




DUKE
UNIVERSITY
LIBRARY

Treasure Room

ORATIONES

AESCHINIS ET DEMOSTHENIS INTER SE CONTRA-
riæ à Dionysio Lambino Monstroliensis litterarum
Græcarum in schola Parisiensi interprete, & doctore
Regio in Latinum sermonem conuersæ.

*Ad Michælem Hospitalem Gallie cancellarium, virum clarissi-
mum.*



Βασιλεὺς τ' ἀγαθὸς, κρατερὸς τ' αἰχμητὴς.

LVTETIAE CIO. I.O. LXV.


Apud viduā Guil. Morelij in Græcis typographj Regij.

ERRATA SIC CORRIGITO

- pag. 8. *habes in murorum refectionem,*
 9. *coarguunt &*
 14. *quæ in contionem*
 26. *Sed cum primum in Eubœam*
 31. *ei oppignerauerunt*
 51. *paucorum dominationi studen-*
 59. *scriptum est, scribe vobis*
 88. *quàmque iustam*
 96. *plana fient.*
 101. *habuit tum in Græcos*
 131. *& speciosas nacti, principatum ad*
 140. *difficilibus reip. temporibus*
 144. *& tres expediendæ*
 149. *& cogitare vni cum*
 159. *incedo: quo*
 ibid. *præbuisset, eo ipso*

A2530

D. Lambinus MICHAELI HOSPI-
TALI GALLIAE CANCEL-
LARIO SAPIENTISSIMO,
DOCTISSIMO, ET ELOQVEN-
TISSIMO VIRO S. D.



Emoriæ proditum est à bonis auctori-
bus, Michaël Hospitalis, priscos illos
Gallos, maiores nostros vltimos, Her-
culem optimè de hominum genere
meritum, quem Ogmium sua lingua ap-
pellabant, non dissimili, atque Græ-
cos, religione coluisse: sed longè dissimili tamen habitu
& figura conformatum pingere consueuisse. Eum enim
admodum senem, partim caluum, reliquo capillo can-
scentem, rugosum, & torrida cute aridum pingebant,
adeò vt Iapeti cuiusdam, aut Saturni, non Herculis spe-
ciem præberet. Neque verò est quòd quisquam suspice-
tur, quemuis potius, quàm Herculem, hac pictura expres-
sum fuisse. Cultus enim atque ornatus planè erat Her-
culis: quando quidem & pelle leonis amictus erat, & dex-
tra clauam tenebat, & læua arcum gerebat, & ex hume-
ro pharetra pendebat. Quid multa? si imago solida esset,
sine ea sanguis & spiritus, & ratio inessent, Hercules ger-
manus erat. Habebat hæc pictura aliud admirabile, & pæ-
ne dicam, incredibile. Ingètem hominum multitudinem
auriculis religatam trahebat. Vincula porrò erant cate-
nulæ tenues ex auro & electro affabrè factæ, monilibus
pulcherrimis similes. Homines autem illi tametsi catel-
lis ita infirmis & fragilibus traherentur: neque fugam
meditabantur tamen, cùm facile effugere possent, si vel-
lent: neque aut toto corpore resistebant, aut pedibus
contrà nitebantur, in aliam partem, quàm quò ducebant-
ur, sese resupinantes: sed contrà, libentes, læti, & alacres
ducem sequebantur, quasi ei, qui ducebat, si modò id ex
pictura intelligi posset, gratulantes, quasiq; eum lau-
dantes, atque hortantes, vt ducere, quò veller, perseue-

raret: studio sequendi ita vincula laxantes, vt & ducem
anteuertere velle, & si soluerentur, molestè laturi esse
viderentur. Sed ne id quidem prætereundum est, quod
in ea pictura absurdissimum erat. Nam cum pictor nihil,
cui summam catenam annexeretur, haberet, quoniã dex-
tram claua, læuam arcus iam occupasset, extrema Her-
culis lingua perforata, fecit illos ex ea trahi, Herculis fac-
cie in eos obuersa, hilara, & subridente. Ac talis qui-
dem pictura fuit. Significabat autem primùm vim ora-
tionis esse maximam, ac tanto viribus corporis maiorẽ,
quanto Hercules Mercurio robore corporis antecellit:
deinde facundiam senilem solam eloquentiæ nomine
dignam esse, solamque eloquentiæ vim obtinere: neque
id immeritò. Ea enim demùm vera est eloquentia, quæ
cum prudentia & sapientia coniuncta est. At prudentia
& grauitas, propria senectutis est, quemadmodũ temeri-
tas & leuitas florētis ætatis: quod testatur his verbis etiã
poëtarum princeps Homerus, ὁπλοτέρων φρένες ἡερέονται,
iuuenum mens vana, leuísque. Itaque quantumuis licet nõ-
nulli iuuenes interdũ flumine inaniũ verborũ admiratio-
nẽ multitudinis excitent, assensũq; atque approbatio-
nem vulgi moueant, à prudentibus tamen existimatori-
bus neque oratores iudicari debent, neque eloquentes,
sed potius molesti rabulæ de foro, & inepti clamatores.
Hoc vidit idem ille poëta, qui seni Nestori orationem
melle dulciorem affingit, non illam iuuenibus vsitatam,
hoc est prudentia vacuam, atque è labris nascentem, sed
planè senilem, id est, prudentiæ, consiliĩque plenam, &
grauissimas ex alto mētis recessu sententias elicientem,
atque explicantem. Quo nomine princeps ille Græciæ
Agamemnon optat vt decem habeat non Aiacis, sed
Nestoris simileis quod sic cõtigerit, confidit se breui Tro-
ia potiturũ. Idẽ Troianos oratores facit vocẽ λειμώσδμ
mittere: quasi quis dicat lilij instar candidam, & foridam:
quid aliud significans, quàm orationem senilem non vnã
cum

cū corpore deflorescere, atq; exarescere, sed vnā cū prudentia, quā affert senectus, virescere ac florescere? Quid quod idem eosdem cicadis simileis esse dicit? nōne quamuis obscurius, & φιλοσφικώτερον, sine controuersia tamen innuit senum maximè propriam esse eloquētiam natura? Cicada enim eò quod sit animal frigidum, tenue, macilentum, atque exsangue natura, senectutem designat. itaque Tithonum poētæ fingunt diu viuendo in cicadam esse conuersum, significantes eum ætate longissimè processisse. longa enim ætas hominum corpora minuit atque extenuat. quod autem idem sit sonorum, vocale, musicum, & canorum, senes esse suapte natura facundos ac disertos declarat. Itaque fidicini cuidam interea dum fidibus caneret, chorda vna, quam fortè pulsauerat, rupta, aiunt cicadam, quasi citharædo illi subsidio venisset, sonum, quem chorda rupta non reddiderat, strepitu suo suppleuisse. Sed redeo ad Hérculem. Eum igitur Galli nostri, illos dico indigenas, &, vt Græco verbo dicam, αὐτοχθόνους, existimabant sapientissimum & eloquentissimum quendam virum fuisse: & vel omnia, quæ ab eo armis gesta & confecta esse fabulantur poētæ, sapientia, & oratione administrasse ac transegisse, vimque hominibus non claua, non iaculis, non viribus corporis, sed dicendi facultate, verbis, persuadendo intulisse: (erāt enim verba, celerrima illa, & acutissima tela scilicet, quæ in animos hominum ferorum penetrabāt, quæ animos agrestium configebant, ac fauciabant:) vel, si quando arma capere, atque expedire coactus sit, ea sic ratione, & consilio, & eloquentia temperasse ac rexisse, vt neque vnquam ab humanitate recesserit, & semper bellis suscepti secundum, atque optatum exitum habuerit. Et rectè. Quid enim minus credibile est, quàm, non dicam Iouis filium, sed eum virum, quem posteritas propter singularia, & plurima in genus hominum merita immortalitati consecrauit, atque ad cælum extulit, solis corporis

viribus vsum, monstis, & talibus pestibus orbem terrarum liberaſſe? tyrannos, & iniuſtos, & maleficos homines armis & ferro ſubegiſſe? Nam ſi nihil præter id, quod lacertis, & corporis robore geſtum ſit, diuinos honores, & immortalem gloriam mereatur, multo præſtabât Herculi gigantes illi *ἥρωες*, & res longè maiores, atque admirabilioreſ conficere poterant. Sed non ita eſt. Illorum enim vim prudentiæ, atque eloquentiæ expertem, ira deorum, id eſt ſapientium virorum prouidentia perculit atque afflixit: Herculis autem viſeis ratione & conſilio temperatas, & cum eloquentia coniunctas, dii immortales adiuerunt, eoque prouexerunt, vt & à feritate, atq; iniuſtitia orbem terrarum vindicaret, & immortalitatem ſibi compararit. Ne multa, flexanima illa, omniumque rerum humanarum regina, eloquentia, præſertim ſenilis, primorum illorum hominum vitam ſoluiagam, iniuſtam, violentam, latrocinijſ infectam, turbulentam, ac ferinam ad cultum ciuilem, iuſtum, legitimum, tutum, pacatum, tranquillum, atque humanum reuocauit, vrbeis condidit, iura deſcripſit, leges rogauit. Huius igitur tanti boni, ac propè diuini, Michaël Hospitalis, quòd te videbam in Gallia noſtra principatum obtinere, Regique noſtro Chriſtianiſſimo Karolo nono, adoleſcenti optimo contigiſſe in conſilio dando non modò Neſtorem, ſed Gallicum quendam Herculem, cuius ſapientia diuina, eloquentiâque ſenili, & præterita reip. vulnera ſanare, & præſentia incommoda leuare, & futura prouidere, ac propulſare poſſit, quòdque mecum ſæpe recordabar quantum tibi bonarum litterarum, omniumque liberalium artium, & linguarum eruditarum doctores ac magiſtri, quos hæc ſchola Pariſienſis innumerabileis habet, & maximè Regij, debeant: cùm vellem tibi meum erga te gratum animum declarare, neq; quicquam haberem te dignum, quod ad te mitterem: duas tamen inter ſe contrarias duorum totius Græciæ eloquentiſſimorum AEſchinis & Demoſthenis orationes ſupe-

superioribus diebus à me, dum eas meis auditoribus explico, in latinum sermonem conuersas, tibi donare, ac dicare constitui, non vt tu homo occupatissimus eas legeres, qui, siquid tibi vacui temporis daretur, Græcas potius, quàm Latinas, præsertim meas, legeres: sed primum vt ex hoc qualicunque munere singularẽ meam referenda tibi gratiæ voluntatem perspiceres: deinde vt tuum vetustum erga scholam Parisiensem studium, atq; amorem omnibus notum, & testatum, non illum quidem è memoria tua depositum, aut obliuione obrutum, sed occupationum tuarum magnitudine, ac multitudine nonnunquam retardatum, atque interruptũ renouarem, ac refricarem: in qua aduenę quidam & peregrini homines, qui omneis vias pecuniæ conciliandę norunt, cùm oporteat peregrinum in aliena rep. nõ esse curiosum, nedum alienum appetere, & parteis aliẽnas sibi præripere, duobus speciosis, & plausibilibus nominibus vsurpatis, religionis, & doctrinæ, Rectore huius nobilissimæ scholæ, ijsq; qui gymnasijs præsunt, inuitis, ludum discendi nuper aperuerunt: iuuentutem incautam, discendi cupidam, litterarũque studio flagrantem blanditijs, & inanibus promissis à gymnasijs antiquis auocatam, atque auersam, ad se pelliciunt: quasi verò aut doctores & magistri Lutetiæ desint, aut ij, qui sunt, non infinitis partibus sint arrogantissimis istis & vanissimis hominibus doctiores: aut Galli, qui omnium honestarum disciplinarũ, bonarũque artium gloria excellunt, nisi à peregrinis, & barbaris istis doceantur, indocti sint futuri: aut tutius sit Gallos, suos liberos tradere & committere docendos ignotis & alienigenis, quàm notis & in eodem solo natis: aut maiores nostri hæc tam multa, & sumtuosa litterarum gymnasia eo consilio ædificarint, vt vel essent murium domicilia, vel à peregrinis, ciuibus eiectis, occuparẽtur: aut superiores Galliæ reges non eo animo tot singularia iura, quę priuilegia vulgò appellam⁹, in scholã Parisiensem contulerint, vt ea à quàm maxima docentium ac di-

ſcientium multitudine celebrarentur, maximèque flore-
 rent: aut clariffimi viri doctores Regij Adr. Turnebus,
 Io. Auratus, P. Ramus, Io. Mercerus: ceteri, quos enu-
 merare longum ſit, fruſtrà à Rege docendi muneri præ-
 poſiti ſint: multa præterea contra morem atque inſtituta
 maiorum magno non ſolùm huius ſcholæ Pariſienſis, ſed
 etiam totius vrbs detrimento moliuntur, & committūt,
 dum neſcio quo diplomate (quod theologi noſtri impro-
 barunt) freti, vltro ingredi geſtiunt in ædeis alienas, vt
 inquirant & explorēt quid quiſque de cæremonijs anti-
 quis & religione ſentiat, dum ſe neque legibus vllis te-
 neri, neque magiſtratibus vllis obtemperare debere,
 neq; à quoquam in ius vocari poſſe, & vt Græci dicunt,
ἀντιπρόσωπος & *ἀντιπροϋνός* eſſe prædicant: quaſi verò aut
 alium habeamus in Gallia dominum, ſecundum deum,
 quàm Regem noſtrum, Karolum: aut princeps vll^o exter-
 nus nouas leges nobis imponere, & nouæ ſectæ inuen-
 tores in vrbibus Galliæ, atque adeò in ceruicibus noſtris
 collocare ſuo iure poſſit: aut deſint nobis probata, & iam
 uſu recepta religioſorum virorum collegia, & ſodalitia,
 quæ quamuis magno oneri ſint populo, ſuſtinentur ta-
 mē à nobis, ſouētur, atq; aluntur cū propter vetuſtatē,
 tūm propter pietatē, tum ob cognationē, & generis cō-
 munionem: aut quos habet Lutetia theologos, doctiſſi-
 mos, & clariffimos, ij neſciāt quæ ſit vera & recta de pie-
 tate ſentētia, quæque approbata Chriſtiani hominis in-
 ſtitutio. Sed hac de re nimis fortasſe multa, præſertim
 hoc loco. Te pro tuo in ſcholâ Pariſienſem, & in totam
 Galliam ſtudio, oro atq; obſecro, vt huic quoque cogi-
 tationi in tuis maximis curis aliquid impertias temporis,
 vt prouideas, ne hæc quondam celeberrima & florentiſ-
 ſima ſchola, in qua amplificanda atque ornanda reges
 Galliæ ſuperiores tantopere elaborarunt, noſtra negli-
 gentia vaſtetur, & deſiſceſcat. Vale.

ARGVMENTVM ORATIONIS

ÆSCHINIS RHETORIS IN CTE-

siphontem, incerto auctore, D.

Lambino interprete.



Ctesiphon scitum fecit, ut Demosthenes Demosthenis F. Paanicus corona aurea donaretur, cuiusque corona predicatio in theatro fieret ludis Liberi patris, tragædis iam iam in scenam prodituris, & recitaturis: quia assidue res populo Atheniensi optimas atque utilissimas & diceret & ageret. Huius populi sciti nomine Ctesiphontem in iudicium adduxit Æschines, tanquam contra leges scripti. Affert autem summa capita, & causa firmamenta tria: vnum, quod Ctesiphon Demosthenem rationum referendarum iudicio obligatum corona donandum censuerit, cum lex vetet, magistratum rationibus referendis obligatum corona donari: atque hoc caput pertinet ad questionem, an sit. Secundum, quod coronam in theatro à præcone pronuntiandam censuerit, cum lex vetet, quenquam in theatro coronari: & hoc pertinet ad questionem qualitatis. Tertium & postremum, quod falsa decreto completus sit. Non enim Demosthenem esse fortem, aut bonum virum, neque corona dignum. Referendum autem etiam hoc est ad crimen de decretis contra leges factis, quoniam lex quædam est, quæ vetat falsa in decretis perscribere. Pertinet porro hoc ad questionem quale sit. Obiectiones autem occupat treis. Ad primum quidem illud, duus: nempe dicturum Demosthenem, se non esse funclum magistratu: & murorum reficiendorum munus, non esse magistratum, sed ministerium quoddam & curationem. quod si demus, esse magistratum: at quia de suo sumtum fecerit, & id, quod impenderit, expensum non tulerit, neque à ciuitate recuperarit, non esse se rationibus referendis obligatum. quod vtrunque ad questionem an sit, pertinet. His autem opponit caput coniecturale, quod tamen non probat: Demosthenem nihil de suo largitum esse, sed à senatu decem talenta attributa habuisse. hoc etiam pertinet ad questionem an sit. Contra secundum autem firmamentum Æschinis, cum Demosthenes legem aliam proferat iubentem, aut certè permittentem, coronam pro-

nuntiari in theatro, si populus auctor fuerit: *Æschines* negat, hanc legem esse de coronis urbanis aut ciuilibus, sed de externis. hoc & ad questionem an sit, pertinet. Ad tertium caput multa singillatim affert *Demosthenes*. Suspiciatur autem *Æschines*, aitque sibi nuntiatum esse, *Demosthenem*, defensionē in quattuor tempora tribuisse, singulasque actiones atque administrationes resp. in hæc tempora partitum esse. Ac primum quidem tempus dicit esse belli primi tempus, quod bellum Athenienses cum Philippo de Amphipoli gerebāt, à *Demosthene*, & *Philocrate* compositum ac sedatum: Secundū, tempus pacis vsque ad illum diem, quo die *Demosthenes* pace diremta belli auctor fuit: Tertium, belli secundū, & cladis ad Charonēā acceptæ: Quartum, præsens tempus, quod versatur in ijs rebus, quæ populo Atheniensi cum Alexandro intercedunt. In primo igitur illo tempore, ait eum pacis causam fuisse, quæ turpis esset & ignominiosa. causam præterea fuisse, quam obrem eam ciuitas in Græcorum communi consessu, consilioque non fecerit. In secundo, bellum aduersus Philippum conflauisse. In tertio, belli sacri, & eorum, quæ Phocensibus acciderunt, & cladis ad Charonēā acceptæ causam fuisse, adductis & impulsis Atheniensibus, ut bello aduersus Philippum suscepto, & societate belli cum Thebanis facta, coniunctis copijs prælio cum illo decertarent. In postremo tempore, queniisse, tacuisse, ciuitati denique neque re, neque consilio profuisse, cum ei, si Alexandrum odio persequeretur, populūque amaret, de patria bene merendi summa facultas daretur, absente Alexandro, & in Asia lōgē gentium bellum gerente. Deinceps totam *Demosthenis* vitam insecatur & reprehendit: ipsius etiam *Ctesiphontis*, sed breuiter & paucis: in quibus postulat à iudicibus, ut ipse pro se dicat, neque *Demosthenem* patronum adhibeat. Summa igitur huius orationis hæc est, præcipuæque, quibus est vsus *Æschines*, capita, hæc sunt. Causam autem obtinuit *Demosthenes*. Reprehenditur porro à quibusdam *Æschines*, quod in criminibus de decretis contra leges scriptis non hæserit, sed actiones, & res gestas *Demosthenis* vituperarit, & accusarit, cum ille remp. bene gesserit: hic tamen contra hac in re robur, & firmitas sua causæ collocat, his verbis: Restat autem mihi pars accusationis, in qua multum studij, operæque pono. hæc autem pars, causa est, propter quam causam *Demosthe-*


nes se corona dignū esse dicit. Sed verendū est, ne hoc *AE-*
schines rectissimè atque vtilissimè fecerit. Quoniam enim hæc erat
 omnium de *Demosthene* existimatio atque opinio, eum lautissimè,
 amplissimè, & magnificentissimè remp. administrasse, non imme-
 ritò putauit frigidam, leuem, nulliusque ponderis omnem suam de
 decreto contra leges scripto orationem futuram, nisi hanc hominum
 opinionem in eorum animis insitam euelleret, & nouam inderet,
 nempe *Demosthenem* ciuem esse maleuolū in populum *Athen.* ani-
 mo, turpiterque & perditè remp. administrasse. Iccirco in hoc ma-
 ximè elaborauit, & in hac accusationis parte plurimum immoratus
 est. Omnino reprehendere possit aliquis proœmium, vt tragicum &
 nimis elaboratum, & accuratum, & epilogi speciem præbens potius,
 quàm exordij.

Orationis status est negotialis in scripto positus, quemadmodum
 & orationis pro *Ctesiphonte*. Capita autem & firmamenta cause
 habet eadem, quæ & illa, nempe legitimū: quod in treis leges diui-
 ditur: & iustum, quod in tria tempora tribuitur. Vide autē vt ad epi-
 logum accommodatè potius, quàm ad proœmium orsus sit, ab aduer-
 sariorum insectatione, & vituperatione, quemadmodū & *Demo-*
sthenes. Quidam dixerunt proœmium expers esse rationis, seu
 probationis: ideoque ne conclusionem quidem in eo esse quæren-
 dam. Sed errant. ibi enim est ratio: Nequid moderati, nequid
 vsitati in ciuitate fiat. Nam si propositionis causa, ratio est: iccir-
 co autem obsecrationes adhibentur, ne moderata, & vsitata in ciui-
 tate fiant, dicendum est hanc esse rationem. Habet autem & con-
 clusionem. Ego autē tum dijs immortalibus, tum legibus,
 ac vobis fretus, &c. vsque ad illa, plus apud vos, quàm le-
 ges, &c.

A L I V D A R G V M E N T V M
 EX M. TVLLO CICERONE.

Cū esset lex *Athenis*, nequis populi scitum faceret, vt quisquam
 corona donaretur in magistratu prius quàm rationes retulisset: &
 altera lex, eos, qui à populo donarentur, in cōtione donari debere: quia
 in senatu *Demosthenes* curator muris reficiendis fuit, eosque refecit
 pecunia sua, de hoc igitur *Ctesiphon* scitum fecit, nullis ab illo ratio-

nibus relatus, ut corona aurea donaretur, eaque donatio fieret in theatro, populo conuocato: qui locus non est contionis legitimæ: atque ita prædicaretur, eum donari virtutis ergò, benevolentiaque, quam is erga populum Atheniensem haberet. Hunc igitur Ctesiphontem in iudiciū adduxit Æschines, quòd cōtra leges scripsisset, ut & rationibus non relatus corona donaretur, & ut in theatro: & quòd de virtute eius & benevolentia falsa scripsisset, cū Demosthenes nec vir bonus esset, nec bene meritus de ciuitate. Causa ipsa alio horret illa quidem à formula consuetudinis nostræ, sed est magna. Habet enim & legum interpretationem satis acutam in utramque partem, & meritorum in rempub. contentionem sanè grauem. Itaque causa fuit Æschini, cū ipse à Demosthene esset capitis accusatus, quòd legationem clementis esset: ut ulciscendi inimici causa nomine Ctesiphontis iudiciū fieret de factis, famæque Demosthenis. Non enim tam multa dixit de rationibus non relatus, quàm de eo, quòd ciuis improbus, ut optimus, laudatus esset. Hanc multam Æschines à Ctesiphonte petijt quadriennio ante Philippi Macedonis mortem: sed iudiciū factum est aliquot annis post, Alexandro iam Asiam tenente: ad quod iudiciū concursus dicitur è tota Græcia factus esse. Quid enim tam aut visendum, aut audiendum fuit, quàm summorum oratorum in grauisima causa, accurata & inimicitijs incensa contentio? Quorum ego orationes si, ut spero, ita expressero, virtutibus utens illorum omnibus, id est, sententijs, & earum figuris, & rerum ordine, verba persequens eatenus, ut ea non abhorreant à more nostro: (quæ si è Græcis omnia cōuersa non erunt, tamè ut generis eiusdem sint, elaborabimur) erit regula, ad quam eorum dirigantur orationes, qui Atticè valent dicere. Sed de nobis satis. Aliquando enim Æschinem ipsum Latine dicentem audiamus.



ORATIO AESCHINIS RHETO-
RIS IN CTESIPHONTEM, A DIO-
nysio Lambino Latina facta.



Vantæ copiarum comparatæ sint, quantâ-
que acies instructa, quanta denique
contentione certi homines vos orēt,
atque obsecrent, Athenienses, nequid
vſitati, nequid moderati in ciuitate
fiat, videris. Ego autem tum dijs im-
mortalibus, tum legibus ac vobis fre-
tus, huic prodij, nullum studium, nullumque apparatus
plus apud vos, quàm leges & iura valere existimās. Vel-
lem porrò, Athenienses, & curia quingentum virum, &
contiones ab ijs, qui his præſunt, rectè administrarentur:
vellem præterea, leges, quas Solon de oratorum mode-
ſtia, pudorèque tulit, valerent: primùm vt ei, qui ætate
longiſſimè proceſſiſſet, in contionem pudenter ac mo-
deſtè prodeunti, ſine ſtrepitu, ac tumultu, pro eo rerum
vſu, quem ſibi comparaffet, optima ciuitati conſilia da-
re liceret: deinde vt cuius ex reliquis ciuibz ſeparatim
pro ſua cuiuſque ætate, ſuoque loco ſingulis de rebus,
quæ propoſitæ ſint, ſententiæ dicendæ potestas daretur.
ſic enim mihi videtur & ciuitas optimè regi poſſe, & ac-
cuſationes rariſſimæ futuræ. Sed quandoquidem res an-
tea ſine cōtrouerſia optimæ, nunc conuulſæ ſunt, & cer-
ti homines nulla religione, nulloque pœnæ metu deter-
riti, decreta contra leges perſcribunt, atque hæc alij ne-
ſcio qui confirmant, & rata faciunt, non qui iuſtiſſimis
vijs ac rationibus principem in ſenatu locum ſortitò ade-

pti sunt, sed qui coitione facta, dedita opera, & ex comparato in consilio sedent: ac si quis aliorum senatorum legitime sortitione facta in principem senatus locum peruenierit, vestraque suffragia verè renuntiaret, ei isti, qui reip. moderationem non iam omnium communem, sed propriè suam ducunt esse, delationem nominis minitantur, ac denuntiant, plebem in suam ditionem ac potestatem redigentes, & dominationem, principatumque sibi vendicantes: atque ea quidem iudicia, quæ ex legibus oriuntur, labefactant: in ijs verò, quæ ex decretis proficiuntur, iracundiæ suæ seruiunt atque obtemperant: si let autem vox illa præconis, omnium, quæ in vrbe sunt, & pulcherrima & modestissima, QVIS EX IIS, QUI ANNOS AMPLIUS QUINQUAGINTA NATI SUNT: QVIS RVERSVS EX ALIIS ATHENIENSIBVS SVO QVISQVE LOCO SENTENTIAM VULT DICERE? Oratorum denique petulantiam iam neque leges, neque ciuitatis moderatores, neque principes senatus, neque tribus, quæ principem locum obtinet, pars decima ciuitatis, continere potest: Quâdo igitur hæc ita se habent, eiusmodique sunt tempora ciuitatis, cuiusmodi vos esse ipsi intelligitis: vna gerendæ reip. via ac ratio reliqua est, siquid ego intelligo, vt decretorū contra leges factorum iudicia retineamus. quod si hæc quoque vos vel tolletis, vel eorum, qui tollere conantur, potestati permittetis: prædico vobis ac multo antè denūtio, vos certis hominib⁹ vniuersæ reip. statum imprudenteis tradituros. Scitis enim, Athenienses, tria esse apud om̃eis homines reip. administrandæ genera: regnum, paucorum principatum, populi dominationem ac libertatem: Ac regnū quidem, paucorumque principatus, eorum, qui præsumt arbitrato & modo gubernantur: ciuitates autem ex, quæ populi ditione ac potestate reguntur, legibus latis obtemperant. Nemo igitur vestrum ignoret, immo verò sibi quisque persuasum habeat, quo die accusatio de decretis contra leges factis

factis in iudicium deducta sit, illo die eum, qui causam sit cogniturus, & iudicaturus, de sua ipsius libertate, dicendique potestate sententiam esse laturum. Idcirco lator legis in iudicium iureiurando primo loco hoc posuit:

SECUNDVM LEGES SENTENTIAM FERAM, illud exploratum habens, ciuitatis legibus conseruatis, saluam quoque esse populi dominationem: quæ quidem vos memoria tenentis oportet eos, qui decreta contra leges scribunt, acerbè & vehementer odisse, nullum denique horum criminum leue, immo verò & grauissimum & improbissimum esse existimare: postremò hoc ius neminem vobis hominem pati eripere, non imperatores patrocínio talium hominum suscipiendo, (qui dū se quibusdam oratoribus ministros & adiutores præbent, remp. labefactant) non hospites orando atque obsecrādo, (quos quidam producentes, rep. contra leges administrata, è iudicijs elabuntur.) Et vt vnumquemque vestrū, quo in præsidio ab imperatore constitutus esset, ab eo præsidio discedere puderet, ita & vos pudeat ab eo loco discedere, quo in loco à legibus hodie collocati estis, popularis dominationis vindices atq; custodes. Simul illud facite vt perpetuò recordemini, ciuitate apud vos deposita, & rep. vobis credita, alios ciueis adesse, atque huic iudicio interesse, alios abesse, familiaribus & priuatis negotijs impeditos: quos vos, per deos immortales, reuerentes, & iuris iurandi, quo obstricti estis, legūque memores, si Ctesiphontem populi scitum fecisse & contrarium legibus, & falsum, & inutile ciuitati ostendemus: rescinditote Athenienses decreta legibus contraria, populi dominationem ciuitati cōstabilite: de ijs, qui reip. gerendæ rationem neque ad leges, neque ad ciuitatis, neque ad communem omnium vestrū vtilitatem referunt, pœnas sumite. Qua quidem mente si ea, quæ dicturus sum, audieritis, certo scio, vos æquam, religiosam, vobis ipsis, totique ciuitati vehementer vtilem sententiam esse luros. Ac de vniuersa quidem ac-

cusatione satis multa à me dicta esse puto: de legibus autem, quæ ad eos, qui rationum referendarum iudicio tenentur, pertinent, contra quas hoc scitum fecit Ctesiphon, paucis iam mihi esse dicendum videtur.

c v m maximis olim magistratibus nonnulli fungerentur, Athenienses, atque in vectigalibus administrandis quæstus turpissimos ac sordidissimos facerent, sibi porro ad eam rem tum è plebe, tum è senatu oratores socios adiungerent, rationum referendarum iudicia laudibus & præconijs anteuertebant, ita ut, quo tempore eos reddere rationes oporteret, accusatores, & multo quidem maximè iudices, quò se verterent, nescirent. Plerique enim eorum, qui referendarum rationum iudicio tenebantur, pecuniæ publicæ fures manifestò deprehensi, iudicia tamen effugiebant. Neque id sanè mirum. iudices enim pudebat, opinor, eundem illum, de quo nuper ludis publicis prædicaretur, eū virtutis & iustitiæ causa aurea à populo corona donari, in eadē vrbe, eodē anno fortasse, non longo certe post interuallo, è iudicio furti causa repetundarum cōdemnatū discedere videri. ita in sentētia ferēda iudices nō crimen notare, sed suo, populi que pudori consulere cogebantur. hoc cum animaduertisset legislator quidam, legem tulit, præclaram illam mehercule, & vehementer vtilem, quæ aperte vetat, ne, qui rationes nondum retulerunt, corona donentur. Et cum hæc tam prudenter à legislatore prouisa, & præoccupata sint, quorundam aucupia verborum tamen, legibus superiora ac potentiora reperta sunt: de quibus nisi quis vos admoneret, imprudentes falleremini. horū enim, qui referendarum rationum iudicio alligatos, coronandos censent, reperiuntur nonnulli modesti ac pudentes natura, (si quis eorum, qui decreta contra leges scribūt, modestus esse potest.) sed tamen existūt nonnulli, qui rei turpitudinem honesta oratione tegunt. Decretis enim quippiam huiusmodi ascribunt, eum se corona donandum censere, qui rationes referre debet, posteaquam
ratio-

rationes eorum, quæ in magistratu gesserit, retulerit. Atqui pari utrobique iniuria ciuitas afficitur. laudibus enim & coronis rationum referendarum obligationes, iudiciâque præuertuntur. Veruntamen qui decretum scribit, ijs, qui audiunt, ostendit, nō negare se contra leges à se scriptum esse: nonnullo quidem certe se peccati pudore affici. Ctesiphon verò, Athenienses, & lege, quæ ad eos, qui rationes referre debent, pertinet, neglecta ac violata, & ea excusatione, quam ego vobis paullo antè exposui, prætermissa, decreuit vt Demosthenes priusquam rationum referendarum iudicio absolutus esset, etiam tum magistratum gerens, corona donaretur.

A L I A m porrò orationem, quæ aliquantum cum superiore pugnat, afferet: Siquis electus quippiam ex plebiscito gerat, id non magistratum, sed curationem atque administrationem quandam esse: magistratus autem esse dicet & eos, quos thesmothetæ in Thesei fano sortitione facta mandant, & eos, quos populus Atheniensis suffragio in comitijs creare solet, nempe cum imperatores, & magistratos equitum, & magistratus cum his coniunctos creat: reliqua autem omnia, negotia esse duntaxat, ex populi scito iniuncta. Ego verò istorum orationi legem vestram opponam, quam eo cōsilio tulistis, vt huiusmodi causas ac defensiones discuteretis ac præcideretis: in qua disertè lator legis, M A G I S T R A T V S (inquit) S V F F R A G I O C R E A T O S: vno nomine omneis cōplexus: & omneis, opinor, magistratus appellans, quos populus Atheniensis suffragijs & manu porrigenda creat. E T P V B L I C I S (inquit) O P E R I B V S P R A E F E C T O S: atqui curator est muris reficiendis Demosthenes, operi omnium maximo præfectus. E T Q V I S Q V I S A L I Q V I D, Q V O D C I V I T A T I S S I E T, A M P L I V S T R I G I N T A D I E S A D M I N I S T R A T: E T Q V I C V N Q V E I V R I S D I C E N D I, R E R V M Q V E I V D I C A N D A R V M P O T E S T A T E M H A B E T

APOPVLO DATAM. (præfecti autem operibus, omnes iuris dicendi potestatem adepti sunt.) Quid hos iubet facere? non ministrare, sed spectatos, atque in iudicio probatos magistratum gerere. (nam ne ij quidem, quibus forte magistratus obuenit, nisi bene cogniti, & re probati magistratum gerunt.) iubet rationem dare, iubet apud scribam, eosque, qui rationum referendarum iudicio præsumt, quemadmodum & alios magistratus, rationes in tabulas inferre. Atque ut me vera dicere cognoscere possitis, ipsæ vobis leges recitabuntur. L E G E S. Quando igitur quos legislator magistratus appellat, isti negotia & procurationes nominabunt, vestrum erit, legem commemorare, legem eorum impudentiæ opponere, subijcere eis denique, non probari vobis, neque audiri callidum verborum artificem, ac sophistam, sperantem se verbis leges euersurum. sed quanto quisque maiorem dicendi facultatem habeat, tanto vos in eum, si quod scitum contra leges fecerit, grauius iratos fore. Oportet enim, Athenienses, idem loqui legem, & oratorem. Vbi verò aliam vocem lex, aliam mittit orator, vobis cōuenit æquitatem legis impudentia dicentis in sententia ferenda esse potiore. Sed pauca mihi antè dicēda sunt ad illud valde difficile, pænēque inexplicabile, quod dicturus est Demosthenes. Ego (inquirit) muris reficiendis curator præfectus sum. fateor: sed ego idem minas centum largitus sum ciuitati, & opus mea opera curaque auctum atque amplificatum est. Cuius igitur rei rationem referre debeo? nisi forte aliqua beneuolentiæ ratio referenda est. Ad hanc igitur causam & defensionem, quā iustam, quāque vobis vtilem dissolutionem afferam, attēdite. In hac ciuitate tanta, & tam antiqua, nemo est eorum, qui ad remp. quomodocūque accesserit, referendarum rationum iudicio sit solutus. id quod vobis primum in ijs, quæ ab omnium opinione abhorrent, demonstrabo. Sacrificos & sacrificas iubet lex hoc iudicio teneri, & generatim omneis, & vnumquemque

que singillatim, qui duntaxat honorarium aliquod consequuntur, qui preces & vota pro vobis dijs immortalibus nuncupant. neque solùm priuatim, sed etiam cōmuniter genera, Eumolpidas, præcones, & reliquos omneis. Rursus trierarchos rationes referre iubet, non qui publica tractarunt, neque qui è vectigalibus vestris multa subtrahunt, pauca in ærario reponūt, largiri se de suo dicunt, cūm vestra haud dubie vobis reddant: sed qui sine controuersia paterna bona in studio laudis & gloriæ, quam ex sua erga vos liberalitate expectant, consumūt, ac profundunt. Neque verò trierarchi soli, sed & maxima omnium, quæ in ciuitate sunt, consilia, iudiciorum auctoritatem ac sententiam subeunt. Primū enim senatū Ariopagiticum, apud ratiocinatores rationes referre iubet, cūmque, qui illic tristis ac seuerus, rerūque maximarum dominus est, sententijs vestris subijcit. Quid? ergo non donabitur corona senatus Ariopagiticus? nō. neque enim hoc illis patrium aut vsitatum est. An non laudis studio ducuntur? ducūtur sanè. Verūm non est eis satis si quis apud eos non peccet: sed si quis peccet, cum supplicio afficiunt. At vestri oratores impunitate, licentiæque exsultant, luxūque diffuunt. Præterea curiam quingentū virū iudicio rationū referendarū subiecit labor legis, atque ita huic hominum generi, qui nondum rationes retulerunt, diffidit, vt statim in principio legum disertè vetet, ne magistratus, qui hoc iudicio tenetur, peregrè profiscatur. Deus bone, dicet aliquis, propterea quòd magistratum gessi, mihi peregrè profiscisci non licebit? Non. ne scilicet cāpta antè pecunia ciuitatis, vel rebus & actionibus occupatis atque interceptis, in fugam te conijcias. Rursus eum, qui hoc iudicio non sit absolutus, vetat bona sua consecrare, vetat quicquam de suis bonis dijs dicatum in templis appendere, vetat adoptari, vetat facere testamentum, & alia pleraque: denique, vt vno verbo complectar, eorum, qui hoc iudicio tenentur, bona donec rationem retulerint, ciui-

tati pigneratur. Esto: sed reperitur aliquis, qui neq; quicquam pecuniæ publicæ capit, neque quicquam impendit: tantum ad aliquam reip. partem accessit. Etiam hûc rationes confectas ad ratiocinatores afferre iubet. Quo pacto qui nihil accepit, nullum que sumtum fecit, rationem ciuitati referet? Lex ipsa subijcit ac declarat, quæ scribenda sint. iubet enim hoc ipsum in tabulas referre, nihil ab eo publici acceptum esse, nihil expensum. Eorû enim, quæ in ciuitate sunt, nihil est, quod sub iudiciû rationum referendarum non cadat, nihil quod anquisitione vacet, nihil denique, quod non seuerissime probandum, atque examinandum sit. Atque vt hæc ita esse intelligatis, leges ipsas audite. **LEGES.**

QUARE cùm se Demosthenes insolentius iactabit, & magnopere confidere videbitur, dicetque se propter liberalitatem ac munificentiam suam, referendarum rationum iudicio non teneri, illud statim ei opponite: Ergo te, Demosthenes, sinere oportebat præconem rationibus præfectorum patrium illud & legitimum præconiû usurpare, **QUIS ACCVSARE VULT?** pâtre, quemlibet è ciuibus tecum disceptare, & contedere, te nihil de tuo largitum esse: sed de multis, quæ accepta habes, in murorum refectiorem pauca impendisse, cùm decem talenta hoc nomine tibi à ciuitate attributa acceperis: ne liberalitatis laudem præripe: ne tabellas iudicibus è manibus eripe: ne in administranda rep. leges antecede, sed sequere. hæc enim populi dominationem, statimque reip. tuentur & conseruant. Hæc igitur ad inaneis ac futilibus istorum causas & defensiones hæctenus à nobis dicta sint. Istum autem hoc decretum interposuisse tum cùm Demosthenes re vera iudicio de rationibus referendis tenebatur, pecuniæ scilicet theatri præpositus: & cùm muris reficiendis curator erat, neutriûsque horum munerum rationem neque dederat neque retulerat, ego iam vos ex tabulis publicis docere conabor. Ac mihi recita quo prætore, quo mense, quo die,

die, qua in contione, pecuniæ theatri populi suffragijs præpositus fuerit Demosthenes, vt intelligere possitis, Demostheni in medio eius magistratu à Ctesiphonte coronam esse decretam. Recita. RATIO DIERVM. Etiam si non progressus fuero longius, nihilque vobis aliud, quàm quod audiistis, demonstraro, iure optimo damnare Ctesiphontem potestis. non enim cum accusatio mea, sed publicæ tabulæ coargunt & condemnant. Erat igitur olim, Athenienses, ciuitati custos populi suffragijs constitutus, qui singulis tribuum imperijs vectigalia in tabulas publicas ad ærarium perscribebat: verum propter summam illam fidem, quam Eubulo habuistis, ij, qui pecuniæ theatri præerant, ante Hegemonis legem, custodis munere fungebantur: coactores & quaestores erant: naualibus erant præfecti: armamentarijs ædificandis præerant: postremo viarum quoque muniendarum curam gerebant: tota denique propemodum ciuitas ab ijs administrabatur. Neque hæc ego eorum accusandorum aut reprehendendorum causa dico, sed quo vobis illud ostendam, latorem legis, si quis vnus vel infimi magistratus rationes referre debeat, nolle eum priusquàm rationes reddiderit, atque in tabulas publicas intulerit, corona donari. At Ctesiphon Demostheni, qui omnibus vno tempore magistratus gerebat, coronam decernere non dubitauit. Muris igitur reficiendis fuisse tum curatorem Demosthenem, cum iste hoc populi scitum fecit, pecuniæ publicæ præfuisse, multarum constituendarum, vt & ceteros magistratus, ius habuisse, iurisque dicendi, & rerum iudicandarum potestate præditum fuisse, harum ego rerum testis vobis ipsum Demosthenem & Ctesiphontem citabo. Charonda prætor 111. Kalend. Maias contione aduocata, populi scitum fecit Demosthenes, vt sexto & quinto Nonas Maias, tribuum concilium haberetur, atque eo scito præscripsit, vt ex vna quaque tribu certi homines deligerentur, qui operum publicorum, & murorum reficiendorum, & pecuniæ publi-

cæ tractandæ & cõdendæ curam haberent. Præclarè sanè, nimirum vt personas haberet ciuitas rationum referendarum iudicio obstrietas, à quibus esset sumtuum factorum rationem repetitura. Recita mihi decreta. **DECRETA.** Esto. verùm hac statim defensione vtitur, murorum reficiendorum curationem sibi neque sorte obuennisse, neque populi suffragijs mandatam esse. Atque hac sanè de re Demosthenes & Ctesiphon orationem bene longam habituri sunt: lex autem breuis atque aperta est, celeritèrque istorum fallacias dissoluit, ac refellit. Sed pauca quædam vos priusquàm huc veniã, vt reliqua facilius intelligere possitis, docere volo. Tria sunt, Athenienses, magistratuum genera: vnum, idque notissimum, quod sorte obuennit: alterum est eorum, qui populi suffragijs mandantur: quo genere continètur & ij, qui amplius triginta dies quippiam eorum, quæ ad ciuitatè pertinent, administrant, & ij, qui operibus publicis præpositi sunt: tertium verbis legis expressum est. **ET SI QVI ALII REBUS IUDICANDIS PRÆSVNT, HI QVOQUE SPECTATI ET PROBATI MAGISTRATVM GERVNT.** Arquì demantur magistratus populi suffragijs creati, & ij, quibus sortitò munus aliquod obuennit, reliquum est, vt ij, quos tribus, tribuùmque tries, & oppida Attica deligunt publicæ pecuniæ tractandæ gratiã, lecti sint magistratus. Quod fit tum, cùm tribus quippiã fuerit imperatum, quemadmodum hoc tempore, vt vel fossas ducendas, vel triremeis ædificandas curent. Vera autem ea esse, quæ à me dicuntur, ex ipsis legibus cognoscetis. **LEGES.** Recordamini igitur legis verba paullo antè recitata, quibus præcipit lator legis, vt qui à tribus editi & lecti sunt, spectati & probati in iudicio magistratum gerant. Arquì tribus Pandionis Demosthenem magistratum & curatorem muris reficiendis declarauit: qui administrationis nomine à ciuitate accepit in hunc sumtum decem circiter talenta. Iam verò lex altera vetat, ne is magistratus, qui rationum referendarum iudicio

cio tenetur, corona donetur: & iurastis vos secundū leges sententiam laturos: & orator præcisè decreuit, vt is, qui iudicio de rationibus referēdis tenetur, corona donaretur, his verbis non ascriptis. POSTEA QUAM RATIONES RETVLERIT, IVDICIOQVE DE RATIONIBVS REFERENDIS ABSOLVTVS FVERIT: ego denique crimen populi sciti contra leges facti legum, ac decretorum auctoritate, ipsorūque aduersariorum testimonio coarguo & conuincō. Potest quisquam aliquē contra leges decretum fecisse apertius demonstrare? At vobis illud quoque ostendam, eum prædicationem coronæ in decreto contra leges fieri iubere. Lex enim differtē iubet, si quem corona donet senatus, vt de eo in curia præco prædicet: sin populus, vt in contione, nusquam autem alibi, ac mihi legem recita. **LEX.** Lex hæc, Athenienses, præclara & vehemēter utilis est. Legislatores enim non putauit (opinor) oratorem apud exteros gloriari, & insolenter se iactare oportere: sed satis cum habere debere, si in vrbe à populo ornetur, nō etiam ex præconijs mercatum instituire, quastūque facere. Atque ita quidem latoꝝ legis: Ctesiphō verò quomodo? Recita decretum. **DECRETVM.** Auditis, Athenienses, iubere legislatoꝝ, vt, qui corona donetur à populo, de eo apud populum in Pnyce loco contionis legitimæ, contione aduocata, prædicetur: nusquam autem alibi. At Ctesiphon in theatro non modò legibus spretis ac violatis, sed etiā loco immutato: non Atheniensibus ad contionem conuocatis, sed nouis tragœdis agentibus: non spectāte populo, sed in conspectu Græcorum, vt illi nobis sint conscij, qualem virum honore afficiamus. Iste igitur populi scito tam aperte contra leges facto cū Demosthene veluti in acie instructa collocatus, aduersus leges artis & fallacias, intendet: quas ego vobis aperiam, ac prædicā, ne imprudentes in fraudem inducamini. Non enim poterunt isti negare, quin leges vetent, de eo, qui à populo corona donatur, extra contionem prædicari. Sed legem

Dionysiacam, qua se defendere possint, afferēt, & parte quadam legis vtentur, ad aureis vestras insidiosè sibi adiutum munientes: legem denique proferent nihil ad hoc iudicium pertinētem: dicēntque duas esse leges de præconijs ciuitati latas, vnā, quam ego profero disertè vtantē, ne de eo, qui à populo corona donatur, extra con- tionem prædicetur: alteram huic contrariam, quæ coronæ donationem ac prædicationem in theatro, populo ad tragædos spectandos coactō, fieri permittit, si modò populus sciuerit. Hanc se igitur legem secutū Ctesiphon suum illud decretum scripsisse dicet. Ego verò aduersus istorum arteis & captiones, leges vestras patronas proferam: quod quidem tota mea accusatione summo studio facio, assiduèque obseruo. Nam si hoc verum est, si hæc consuetudo in remp. vestram inducta est, vt leges irritæ inter ratas scriptæ locū habeant, duæque de vna, eadēque re inter se pugnātes perscriptæ sint, quo nomine hanc remp. appellabimus, in qua leges eadē facere & non facere iubeant? Sed non ita est, & dii prohibeant ne vos vnquam in tantam legum cōfusionem ac perturbationem incidatis. Neque verò hæc sunt à latore legis, qui populi dominationem ac potestatem constituit, neglecta: quin thesmothesis hoc negotij disertè datum est, vt quotannis leges in publico recognoscant, & corrigant, accuratèque videant, & considerent, sitne lex aliqua alteri legi aduersa, sitne aliqua abrogata inter approbatas, ac ratas: postremò sitne plures vna singulis de rebus perscriptæ. quòd si quid huiusmodi reperiant, iubet eas in tabulis descriptas pro decem herouū statuis proponi, ciuitatisque moderatores quinquaginta con- tionem habere, nominibus eorum adscriptis, qui eas leges tulerint: prætorem verò, præsidum magistrum suffragij potestatem populo dare, & leges alias tollere atque abrogare, alias intactas atque integras relinquere, vt lex vna sit ad vnāquamque rem actionemque pertinens, non plures. Ac mihi leges recita. **LEGES.** Si vera igitur essent,

essent, Athenienses, quæ ab his dicuntur, duarumque de præconijs leges essent latæ: cum eas & thesmothetæ deprehendissent, & ciuitatis moderatores ipsis latoribus legis reddidissent, arbitror illos alteram ex legibus necessario sublaturus fuisse, vel eam, quæ prædicari extra conitionem permetteret, vel eam, quæ vetaret. Nunc verò cum horum nihil factum sit, non modo in manifesto & impudenti mendacio deprehensi tenentur, sed ea confingere reperiuntur, quæ ne fieri quidem possunt. Sed unde hoc mendacium, quo vestram fidem ac religionem labefactare conantur, depromserint, ego vos docebo, si prius quam ob rem leges de præconijs theatralibus latæ sunt, vobis exposuero. Cum ludi tragici urbani fierent, alij re à populo non impetrata prædicandum curabant, se à tribulibus suis corona donari, alij à popularibus, alij post reliquos omneis voce præconis conductæ, seruos suos manumittebant, Græcos huius manumissionis testis adhibentes: immò verò, quod erat omnium inuidiosissimum, hospitij publici necessitudinem apud exteras ciuitates nacti perficiebant, ut de se præconis vox prædicaret, à populo, si forte ita caderet, Rhodio, vel Chio, vel alius cuiuspiam ciuitatis, ipsos virtutis ac fortitudinis ergò corona donari. Atque hæc non ita agebant quomodo ij, quibus à senatu vestro, aut à populo talis donatio fieri consuevit, re à vobis impetrata, cum decreto, ob multa denique in vos & magna merita, sed hoc iure vobis prærepto, decretoque vestro non adhibito, aut requisito. Hinc vsu veniebat, ut spectatores, & ludorum magistri, & actores interturbarentur: ij verò de quibus prædicabatur in theatro, maiore honore afficerentur, quam quos populus corona donabat. His enim locus erat certus constitutus, nempe contio, in qua hæc donationem fieri oportebat, nusquam alibi licebat: illi verò in omnium Græcorum conspectu, præconis voce laudabantur: & hi quidem cum decreto, re à vobis impetrata, illi sine decreto. Hæc cum legislator quidam animaduertisset, legem rogat ni-

hil cum lege de ijs, qui à populo corona donantur commune habètem: neque illa abrogata: (non enim contio, sed theatrum turbabatur) neque prioribus legibus aduersam, (non enim fas est.) sed legem de ijs, qui sine vestro decreto à tribulibus, & popularibus corona donantur: de ijs, qui seruos suos manumittunt: denique de coronis externis ac peregrinis. Itaque dilucidè vetat, ne quis in theatro seruum libertate donet, ne quis præconis voce prædicante à tribulibus aut popularibus, aut alio quoquam corona donetur: alioqui præconem infamia notari iubet. Cùm igitur lator legis definierit, vt de ijs, qui à senatu corona donantur, in curia: qui à populo, in contione prædicetur: qui autem à popularibus & tribulib⁹, vetuerit ne ludis tragicis de ijs prædicetur, vt ne quis vndique coronas & præconia colligens & corrogās, falsam, minimèque debitam in remp. meritorū gloriā consequatur: vetuerit præterea in lege nèue à tribulibus, nèue à popularibus, nèue ab alio quoquam, absente senatu & populo, prædicetur: his igitur detractis atque exceptis, quid reliquum est præter coronas externas? Ac me vera dicere, argumēto firmissimo ex ipsis legibus deprompto peruincā. Ipsam enim aureā coronā, quæ in theatro, quæ in vrbe præconis voce pronuntiata fuerit, Minervæ sacram lex esse iubet, ei, cui donatio fit, adensam. Atqui quis vestrū audeat populum Atheniensē tantæ illiberalitatis condemnare? Nam non modò ciuitas, sed ne priuatus quidem quisquam tam angusti ac pusilli animi fuerit, vt, quam ipse coronam donarit, eam vno tēpore à præcone pronuntiari iubeat, adimat, consecret. At ego arbitror, quòd externa corona est, idcirco consecrationē fieri, ne quis, dū alienā erga se beneuolentiā pluris, quàm patriam facit, animo deteriore euadat. Sed coronam illam, que in contione prædicata est, nemo consecrat, sed ei, cui donata est, possidere licet, vt non ipse solum, verum etiam eius posterī, hoc monumentum virtutis domi habentes, nunquam iniquo, neque maleuolo in

in populū sint animo. Et verò propterea adscripsit lator legis, ne in theatro à præcone pronuntietur externa corona, nisi populus sciuerit, ut ea ciuitas, quæ aliquem ciuium nostrorum corona donare velit, legatione missa, id à populo petat. quid ita? ut is, de quo prædicatur, vobis, qui prædicandi potestatem permittatis, coronæ nomine maiorem gratiam habeat, quàm ijs, qui coronā donēt. Atque ut hæc esse vera facilius intelligere possitis, leges ipsas audite. **LEGES.** Cū igitur vobis dicere incipient, oratione ad fallendum composita, scriptum esse in lege, corona donare licere, si populus auctor fuerit, facite vobis in mentem veniat subijcere, Maximè, si quidē te alia ciuitas corona donet. sin autem populus Atheniensis, locus tibi certus constitutus est, quo loco eam donationem fieri oporteat: extra contionem prædicari vetitū est. Ea enim verba, **NVSQVAM AVTEM ALIBI**, quid sibi velint, totum diem dicas licet: certè nunquam ostendes te legitimū decretum scripsisse. Restat nunc mihi accusationis altera pars, in qua mihi plurimum studij atque opæ necessariò ponendum est. Est autem ea pars, Ctesiphōtis causa ac defensio, quam affert, quamobrem Demosthenem corona dignum esse existimarit. Hæc enim sunt decreti verba, **ET PRÆCONEM ARVD GRÆCOS PRONVNTIARE IN THEATRO, DEMOSTHENEM A POPVLO ATHENIENSI CORONA DONARI VIRTVTIS AC FORTITVDINIS ERGO, ET**, (quod est omnium maximum) **QVOD ASSIDVE TVM DICIT, TVM AGIT RES POPVLO ATHENIENSI VEHEMENTER VTILEIS AC SALVTAREIS.** Cū igitur nobis simplex, tūm vobis ad cognoscendum, iudicandū que perfacilis reliqua oratio est. Me enim, qui accuso; scilicet, ostēdere oportet, laudes illas esse falsas nec Demostheni cōuenire: nunquā illum neque antea res valdē vtileis dicere cōepisse, neque nunc in rebus agendis reip.

utilibus perseverare. Hoc si ostendero, iure, opinor, hoc iudicio Ctesiphon damnabitur. Omnes enim leges ventant, nequis in decretis publicis falsum scribat. Eum autem, qui causam dicit, huius contrarium ostendere oportet. Vos nobis eritis eorum, quæ utrinque dicentur, iudices. Atque ita quidem se res habet. ego ad vitam Demosthenis explicandam longiore oratione opus esse puto. Quid enim nunc ego commemorem illa, quæ ei in iudicio de vulnere acciderunt, quo die Demomeli patrueli Paranieo apud Ariopagum diem dixit, & de capite incisor aut quid ea refricem, quæ in Cephisodoti imperio, & classe in Hellespontum profecta designavit? quo tempore Demosthenes, cum vnus esset è trierarchis, & imperatorem in naui circumageret, vnâ cum eo vesceretur, sacrificaret, libaret, quibus omnibus propterea quod ei paternus amicus erat, dignus habebatur: non dubitavit nomine eius delato, eoque in iudicium capitis adducto, lege maiestatis accusatorem sese eius profiteri. quid ea verò, quæ ei cū Midia intercesserunt? quid colaphos, quos in orchestra chori magister cum esset, accepit? & ut contumeliam acceptam, simulque populi sententiam contra Midiam in aede Liberi patris suffragijs populi latam triginta minis vendidit? Hæc igitur & alia his similia rectè mihi videor esse silentio præteriturus, nō quod vobis proderet, aut reo gratificari & præuaricari cogitè, sed quod verear, ne mihi statim ita occurratis, me vera quidem illa, sed peruetera, & obsoleta, & ab omnibus audita & confessa dicere videri. Atquæ Ctesiphon, cuius maxima flagitia, ac dedecora ita certa & nota sunt ijs, qui audiunt, ut accusator non falsa, sed antiqua, & omnium sermone celebrata & confessa dicere videatur, vtrum eum corona donari, an vituperari cōuenit? te verò, qui falsa & legibus contraria scribere ausus sis, vtrum iudicia cōtemnere, an ciuitati dare pœnas oportet? De publicis autem criminibus planius dicere conabor. Audio enim Demosthenem, facta eis dicendi potestate, quattuor apud vos

tempora ciuitatis præterita, per quæ ipse temp. administravit, enumeraturum: quorum illud, ut mihi quidem nuntiatur, primo loco ponit, quo tempore de Amphipoli cum Philippo bellum gerebamus. atque hoc tempus pace facta, & ea societate, quam Philocrates Agnufius, & iste ipse cum illo copulatus decreuit, ut ego ostendam, terminat ac definit. Secundum tempus ait fuisse, quo tempore pacem habebamus, usque ad eum diem videlicet, quo die pace diremta, qua utebatur ciuitas, idem orator bellum persuasit ac decreuit. Tertium cum bellum gerebamus usque ad cladem in Charonea acceptam. Quartum, hoc tempus, in quo nunc versamur. His igitur temporibus enumeratis, me, ut audio, appellaturus & rogaturus est, quòdnam ex his quattuor ipsius temporibus reprehendam: quando negem eum res populo Atheniensi utilissimas gessisse. ad quæ si nolim respondere, & si faciem pudore affectus obtegā ac tergiuerfer, ait sese ad me propius accessurum, & detractis mihi de capite integumentis ad contionem & suggestum pertracturum, respondere denique coacturum. Quare primum ne fortè iste suis viribus tantopere cōfidat: deinde ut vos præmuniti ac præmoniti sitis: postremò ut tibi, Demosthenes, coram iudicibus, reliquisque ciuibus, qui foris circumstant, & Græcis, quibus curæ fuit huic iudicio interesse, respōdeam (video autē non paucos ad audiendum conuenisse, sed tantam multitudinem, quanta in actione publica post hominum memoriā non interfuit) respōdeo, me omnia ista quattuor, quæ tu partitione tua complecteris, tempora, reprehendere: magnāque menses tenet, tūm dijs immortalibus volentibus atque approbātibus, tūm, si iudices pari nos æquitate ac beneuolentia audierint: postremò si ego ea, quæ te admisisse scio, memoria consequi potuero, fore, ut iudicibus planum facere possim, salutem ciuitati primum deos, deinde homines eos, qui sese erga nostram temp. æquos atque humanos præbuerunt, attulisse: incommodorum verò &

calamitatum omnium acceptarum vnum Demosthenem causam atque auctorem extitisse. Statui autem eum ordinem seruare, quo ordine istum vsurum esse audio, dicamque primùm de primo tempore: deinde de secundo: tum verò de eo, quod superiori est proximū: postremò, de hoc rerū statu, in quo nunc versamur. Ad eam me igitur pacem refero, quā tu & Philocrates decreuistis. vobis enim licuisset, Athenienses, priorem illam pacem vnā cum vniuerso Græcorum consensu facere, si certi homines passi essent, vos legatos illo tempore in Græciā missos, quibus Græcos hortabamini, vt. aduersus Philippū communi illi Græcorum consilio interessent, expectare: licuisset & vltro vobis delatum à Græcis imperium si non statim, at aliquanto post recipere. quibus rebus Demosthenis & Philocratis culpa, & propter istorum turpeis quæstus & nundinationes, quas fecerūt, coitione facta aduersus remp. vestrā, planè spoliati estis. Quod si aliquibus vestrum statim vt audierunt, hæc oratio incredibilis accidit, cetera sic attendite vt cum de pecunia expensa longo interuallo sedentes rationem repetere solemus: nonnunquam videlicet falsas domo opiniones de rationibus afferimus: verum posteaquā rationes subductæ & putatæ fuerint, nemo nostrum est tam acribus natura, quin cum hac opinione discedat, vt, quicquid ipsa ratiocinatio, & calculi ratio coarguerit ac probarit, verum esse fateatur: ita vos quoque ad audiendum parati estote. si quis vestrum talem opinionem iandudum comprehensam domo detulit, nihil vnquam Demosthenem cum Philocrate coitione facta pro Philippo dixisse: qui eo animo est (inquam) is mihi neque absoluat, neque condemnet, priusquā audierit. non enim iustum est: sed si vobis paucis & tempora commemoraro, & decretū, quod Philocrate socio scripsit Demosthenes protulero: si vox ipsa & ratiocinatio veritatis implicatū atque irretitum Demosthenem tenuerit & conuicerit, cōplura cum Philocrate de prima illa pace decreta scrip-

se: per summum dedecus atque insignem turpitudinem Philippo assentatum esse, legatos, qui è Græcia reuertebantur, non expectasse: quo minus populus Atheniensis in communi Græcorum consilio pacem cum Philippo faceret, per eum steterisse: postremò Cersobleptem regem Thraciæ, socium nostræ ciuitatis atque amicū, Philippo dedidisse, atque in seruitutē tradidisse: Si hæc vobis plana fecero, rem petam à vobis æquissimam, quam, per deos immortaleis, sinite me impetrare: date hoc mihi, vt fateamini Demosthenē totum illud tempus, quod è quattuor primum est, temp. non bene gessisse. Dicendi autem initium inde ducam, vnde me dicentem facillimè subsequi possitis. Decreuit Philocrates vt caduceatores & legatos de pace ac societate Philippo huc mittere liceret. Hoc decretum tanquā contra leges scriptum, die Philocrati dicta, in iudicium vocatum est. venit iudicij dies. Accusabat Licinius is, qui diem dixerat. causam dicebat Philocrates. patronus erat Demosthenes. absolutus est Philocrates. His rebus gestis, deinceps secutus est annus, quo anno Themistocles, prætor factus est. tum in curiā senator venit Demosthenes, neq; sortitione, neque sub sortitione facta locum illum cōsecutus, sed ambitione, & miris allegationibus, & magno præcio mercatus, vt omnibus in rebus & dicendis & agendis Philocrati subseruiret, & secundas ab eo parteis ageret, quomodo res ipsa declarauit. Obtinet enim alterum decretū Philocrates, quo iubet decem legatos deligi, qui ad Philippum profecti postulent ab eo, vt legatos summam potestatem ab eo acceptam habentis huc mitteret. In his erat Demosthenes: qui illinc reuersus pacis laudator fuit, eadēque atque alij legati, renuntiavit: solus autem ex omnibus senatoribus decreuit, vt cum caduceatore, & legatis à Philippo missis fœdera feriremus: similia in eo decernens ac planè gemina ijs, quæ à Philocrate decernebantur. Ille enim auctor fuit, vt Philippo caduceatorem & legatos huc mittere

liceret: hic cum legatis fœdera percussit. Iam verò mihi ad ea, quæ sequuntur, quæso, diligenter attendite. Multa enim Philippus non iam cum ceteris legatis à Demosthene postea mutatione facta per improbissimam calumniam vexatis, sed cum Philocrate ac Demosthene transigebat: neque id mirum: ut pote qui vnà legationem obierant: qui vnà decreta illa tria fecerāt: quorum primum fuit, ut ne legatos, quos ad Græcos miseratis, eos, in Philippum cōcitantēs, expectaretis, neque communiter cum alijs Græcis, sed priuatim pacem cum eo faceretur: Alterum, ut nō pacem solū, sed etiam societatem cum Philippo scisceretur, ut, si qui fortè attentis ac propensis erga plebem vestram essent animis, fracti ac debilitati conciderent, ac desperarent, cū viderent, vos sibi quidem bellicum canere, bellique suscipiendi hortatores atque impulsores esse: domi verò non modò pacem cum Philippo, sed etiam societatem decretis vestris confirmasse: Tertium, ne Cersobleptes rex Thraciæ fœdere contineretur, neue societatis ac pacis esset particeps, cū ei iam bellum indictum esset, instructusque in eum exercitus duceretur. Et mediussidius is, qui hæc redimebat, culpa vacabat, neque cuiquam iniuriam faciebat. Non enim erat ei crimini dandum, si nondum dato vtrinque iureiurando, nec fœdere facto, suis rationibus consuleret. At qui firmamenta ac præsidia ciuitatis ei vendebant, & impertiebant, ij magno erant odio ac supplicio digni. Nam qui se nunc Alexandri, tūm Philippi inimicum fuisse dicitat, Demosthenes: is, qui mihi Alexandri hospitium maledicti loco obijcit, ciuitatis tempora suffurans, decernit ut ciuitatis moderatores contionem habeant sexto idus Februarias, quo tempore AEsculapio sacra fiebāt. Atque hac de re antequam cum populo ageretur, ad senatum relatum est die festo: quod nunquam post hominum memoriam factum erat. Sed quam causam afferebat? ut (inquit) simulatque aduenierint legati Philippi, quam primum consultet populus

ijs de rebus, quæ nobis cum Philippo intercedunt, legatis, qui nondum venissent, contionem præoccupans, & tempora vestra circumcidens atque amputans, cum interim rem vrgeret, ne cum ceteris Græcis, vestris legatis iam reuersis, sed soli pacem faceretur. Aliquanto pòst, Athenienses, venerunt legati Philippi, vestri verò aberant, Græcos (vt suprà dixi) ad bellum contra Philipppum cohortantes. Hîc obtinet atque adeo expugnat alterum decretum Demosthenes: in quo cêset, vt vos non de pace solùm, verùm etiam de societate consilium capiatis, vestris legatis non exspectatis, sed statim post Dionysia urbana, duodecimo, & vndecimo Kal. Martias. Atque vt hæc, quæ dico, vera esse intelligatis, diligenter dum recitantur decreta attendite. **DECRETA.** Exactis igitur Dionysijs contiones aduocatæ sunt duæ: quarum in priore recitatum est decretum duodecimo Kal. sociorum commune, cuius præcipua vobis capita breuiter exponam. Primùm enim decreuerunt, vt de pace consultaretis, societatis nomen præterierunt, non quòd obliti fuerint, sed quòd pacem illam, necessariam magis, quàm honestam esse existimarent: Deinde præclare Demostheni occurrerunt, quæstus eius sordidos, & flagitiosas nundinationes sanaturi, cum adscripserūt decreto, vt cuius Græcorum liceret, tribus pòst mensibus nomen suum vnà cum Atheniensibus in eadem columna incidere, eademque foederum & pactorum communione contineri: duas res maximas ea ratione anticipantes ac prouidentes: primùm enim trium mensium spatium, quod Græcorum legationibus satis esset, sumserunt: deinde Græcorum beneuolentiā huic ciuitati cum communi Græciæ consensu conciliarunt, vt si forte Philippus foedera negligeret ac violaret, nos neque soli, neque imparati bellum gerere cogeremur. quæ nunc opera & culpa Demosthenis acciderūt. Atque hæc esse vera, quæ à me dicuntur, ex ipso decreto cognoscetis. **DECRETVM SOCIORVM.** Huic me decreto assensum esse fateor: assensi

sunt & omnes oratores, qui in priore illa contione verba fecerunt: populus autem cum hac opinione discessit, pacem quidem futuram, sed de societate deliberare, propterea quòd Græcos in Philippum concitabamus, reip. non expedire: pacem autem futuram communiter cum Græcis vniuersis. Vna nox intercessit. Postridie in contionem venimus. Tum verò Demosthenes suggesto occupato atque obseffo, neminique dicēdi loco relicto, negauit, quæ verba pridie facta essent, ea verba quicquā profutura, nisi ea Philippi legati comprobarent. Nā quæ pax (inquit) sine societate constare queat, non intelligo. Non oportet enim (nam verbū, quod tū vsurpauit, memoria teneo propter acerbicatem atque asperitatē tūm eius, qui dicebat, tūm nominis) non oportet (inquit) à societate pacem abrumpere, neque Græcorum tarditatem exspectare, sed vel ipsos bellum gerere, vel nos pacē priuatim facere. Deinde ad extremum Antipatro in suggestum vocato, quædam requirebat ex eo, multo antè certiore facto quid cum rogaturus esset, simulque præmonito atq; instituto, quānam ille aduersus ciuitatem respondere deberet. Postremò hæc valuerūt, cum hinc Demosthenes dicendo vim attulisset: illinc Philocrates populi scitū scripsisset. Iam verò quod eis restabat, vt Cersobleptem, & agrum Thracium Philippo traderent, atq; in potestatem eius redigerēt, id quoque septimo Kal. Martias effecerūt, priusquàm posteriorem legationem accipiendi à Philippo iurisiurandi causa institutam ac decretam Demosthenes obiret. Etenim acerrimus iste Alexandri ac Philippi inimicus, bis in Macedoniā legatus nobis profectus est, cum liceret ne semel quidem proficisci, is, qui nunc Macedones cōsputare & cōculcare iubet. Veruntamē in cōtione ea, quæ septimo Kal. Martias aduocata est, senator cum esset, senatorium ordinem ex cōparato, & dedita opera cōsecutus, Cersobleptē administro atque adiutore Philocrate tradidit ac dedit Philippo. Occultē enim atque insidiosē Philocrates adscripsit decreto

creto præter alia in eo scripta, quod item Demosthenes comprobauit & confirmauit, vt eo ipso die sociorū consiliarij & confessores, Philippi legatis iurandū darent. à Cerfoblepte porro in consilio qui sederet, aderat nemo. Itaque cū scripsit, vt ij, qui in consilio sedebāt, iurarent: Cerfobleptem, à quo consiliarius aderat nullus, à foedere exclusit. Sed nequishæc à me fingi putet, recita mihi quis hæc scripserit, quis publici consilij præses confirmarit. **DECRETVM. PVBLICI CONSILII PRAESES.** Præclara, Athenienses, præclara, inquam, res est, tabularum publicarū custodia. Immotæ enim permanet, neque vnâ cum reip. trāsfigis immutatur, sed facultatē dat populo, vbi commodum fuerit, hominū olim improborum ac sceleratorum, repente mutata volūtatē, opiniōē sibi probitatis quærentiū, cognoscendi. Restat autem vt eius assentationem vobis cōmemorem. Nam cū Demosthenes annū senatorio munere functus sit, nullos vnquā legatos ad principem locum inuitasse reperietur. sed illoduntaxat tempore, & tunc primū legatos Philippi primo loco collocauit: puluinos quoque adposuit, & conchyliatis peristromatis sedes instrauit, totūque illum quoquo versus locū aulaeis exornauit. cū iam dilucesceret, ducē se legatis in theatrū præbebat, ita vt omnīū sibi exciperetur, propter gestum hominis indecorum, blanditiāsque deformeis atque ineptas: deinde cū illi sese Thebas contulerunt, tria cōduxit eis mulorū iuga, legatosque Thebas deducēdos curauit, ciuitatem nostrā nationibus exteris deridendā propinans. Sed ne lōgius ab instituto degrediar, sume mihi decretū de principe loco legatis Philippi dato. **DECRETVM.** Iste igitur tantus assentator cū per Charidemi speculatores prim⁹ omnīū de interitu Philippi certior factus esset, somnio sibi conficto in deos immortaleis emētus est, proinde quasi nō à Charidemo, sed à Ioue & Minerua nuntium accepisset, quos interdū omni scelere ac periurio violans, noctu secum colloquia habere, futurāque sibi multo antè

prædicere gloriatur. At septimo die post filiae mortem, prius quàm eius funeri iusta soluisset, coronatus, & albatu bouem immolabat, morem maiorum negligebat, leges & instituta perfringebat, vnica filia miser, quæ prima cum patrem appellauerat, amissa. Neque verò calamitatem ei suam maledicti aut criminis loco obijciendam puto, sed hominis mores perpendo & considero. Nunquam enim qui liberos odio habet, patérque improbus est, bonus erit populi moderator ac patronus: nunquam qui capita carissima, summæque necessitudine sibi coniuncta non complectitur amore illo paterno, vos pluris faciet alienos: nunquam qui priuatim nequam est, publicè frugi erit: nunquam qui domi ingenio leui ac vêtoso, animoque molli & imbecillo fuit, in Macedonia fuit legationis tempore constans & fortis. Non enim ingenium, sed locum tantum mutauit. Vnde igitur tanta extiterit in eo mutatio (hoc enim secūdum tempus est) & cur tandem Philocrates quidem rebus ijsdem cum Demosthene publicè gestis, perduellionis accusatus, exsulioque multatus sit, Demosthenes autem aliorum accusator nobis sit exortus: denique quonam pacto homo impurissimus tot incommodis & calamitatibus nos affecerit, hæc nunc audire operæpretium est. Vt primum Philippos Pylas introijt, vrbeisque Phocesium improviso aduentu cepit atque deleuit, Thebanos (quomodo tum quidem putabatis) potentiores, quàm tempora, commodæque vestra ferebant, effecit: cum vos perterriti, agris relictis vasa colligeretis, & supellectilem in urbem deportaretis, cumque maxima tum inuidia flagrarèt, grauissimæque accusarentur legati, qui huius pacis auctores extiterant, atque in primis Philocrates & Demosthenes, propterea quòd non solum legationem illam obierant, sed etiam decreta scripserant: accidit eodem tempore, vt Demosthenes & Philocrates inter se dissiderent ijs prope de rebus, de quibus etiam vos eos inter se dissentire suspicabamini. His igitur turbis excitatis, tantoque

tumul-

tumultu coorto, accedentibus & ceteris malis ac vitij
homini innatis, reliqua iam Demosthenes, quòd Philo-
cratem nundinationum suarum, pecuniarumque capta-
rum socium atque æmulum ferre non poterat, de se dif-
fidenter, timidè, ac suspiciosè consulebat. Itaque existi-
mauit si eorum, quibuscum vnà legatus fuerat, ac Phi-
lippi accusator existeret, Philocratem hand dubiè peri-
tutum: reliquos legatos magnum in discrimen venturos:
de se vno ciueis suos bene existimatuos, & cum amicos
insigni improbitate, & singulari perfidia prodidisset, be-
nevolentia erga populum Atheniensem, famam atque
opinionem consecuturum. Cuius consilia cum perspe-
xissent communis otij, & publicæ tranquillitatis oppu-
gnatores, eum cupidè, vtróque in contionem inuita-
bant, solum integrum, solum castum atque incorruptum
in ciuitate nominantes. Ille verò cum primùm in con-
tionem ascenderat, tumultus ac belli semina, principiâ-
que ministrabat. Hic ille est, Athenienses, qui primus Ser-
rium murum, Doriscum, Ergiscam, Murgiscam, Ganos,
Ganidem reperit: loca, quorum ne nomina quidem an-
tea noueramus. Celeriter autem rem eò loci deduxit, vt, si
quidem Philippus legatos non mitteret, contemni ab eo
ciuitatem ac pro nihilo putari: sin mitteret, explorato-
res, non legatos mitti diceret. Si vellet ille alicui ciuitati
pari de controuersijs nostris arbitrandi iudicandique
potestatem permittere: negabat vllum nobis, & Philip-
po æquum iudicem reperiri posse. Dabat illè Halone-
sum: vetabat hic accipere si daret ac nõ redderet, de syl-
labis scilicet dissidens ac litigans. Postremò corona do-
natis ijs, qui cum Aristodemo contra pacis condiciones
ac fœdera exercitum in Thessaliam & Magnesium du-
xerant, pacem quidem diremit, calamitatem autem no-
bis importauit, bellumque suscitauit. Esto. At enim mu-
ris aheneis, atque adamantinis (vt ipse prædicat) sineis
Atticos muniuit, Eubæorum, ac Thebanorum societa-
te. Immò verò, Athenienses, tribus hac in re iniurijs gra-

uissimis affecti estis, summâque in rerum omnium igno-
 ratione versamini. Sed quoniam festinat animus de ma-
 xima Thebanorum societate disputare, ut suo quæque
 loco atque ordine persequar, de Eubæorum societate
 primùm dicam. Multis vos ac magnis, Athenienses, in-
 iurijs affecti, tum à Mnesarcho Chalcidense Calliæ &
 Taurosthenis patre, quos iste nunc mercede accepta ci-
 uicis Athenienseis sententia sua decernere non dubitat:
 tum à Themisone Eretrienfi, qui vobis pacis tempore
 Oropum ademit: vos has iniurias obliuiscetes, cum pri-
 mùm vobis renuntiātū est, Thebanos in Eubœam exer-
 citum traduxisse eo animo, ut vrbeis Eubœæ in seruitu-
 tem redigerent: quinque diebus Eubœæ classe & pede-
 stribus copijs opem tulistis: necdum triginta dies præte-
 rierant, cum Thebanos fœdere à vobis suppliciter peti-
 to cum pace dimisistis, Eubœâque potiti, vrbeis, & reip.
 statum ijs, qui fidei vestræ commiserant, atque apud vos
 deposuerant, optima fide, summâque cum iustitiæ laude
 reddidistis, neque iustum, neque fas esse ducentes, in eo,
 quod vobis creditum & commendatum esset, præteritas
 inimicitias meminisse. Atque his tot, tantisque benefi-
 cijs affecti Chalcidenses, nequaquam vobis parem gra-
 tiam retulerunt. Sed cum in Eubœam copias traiecistis,
 auxilium Plutarcho laturi, primis quidem certè tem-
 poribus amicitiam simulabant: verùm statim ut Tamynas
 transijmus, montemque Cotylæum, qui appellatur,
 transgressi sumus, tum Callias Chalcidensis, quem De-
 mosthenes pretio accepto summis laudibus in cælum
 efferebat, cum populi Atheniensis exercitum in quas-
 dam locorum angustias compulsus ac redactum videret,
 unde neque se nisi parta victoria recipere poterat,
 neque auxilij spes vlla ostendebatur, non terra, non ma-
 ri: is igitur coacto ex omni Eubœa exercitu, simulque à
 Philippo copijs corrogatis, & vnâ cum eo frater ipsius
 Taurosthenes, is, qui nunc unicuique nostrum comiter
 & officiosè dextram porrigit, atque arridet, militibus
 externis

externis Phocensibus trauectis, eo animo, eaque spe in nos inuaserunt, impetumque fecerunt, tamquam nos funditus deleruri atque euerfuri. Quod nisi primum deus aliquis exercitum nostrum seruaslet, deinde nostri milites, pedites atque equites, se viros forteis præbuisent, & apud Hippodromum, qui est in Tamynis, acie instructa, signisque collatis vicissent, hostibus supplicibus cum pace dimissis: propius nihil esset factum, quam ut ciuitas nostra summam turpitudinem subiret, summoque dedecore afficeretur. Non enim plagam in bello, detrimentumque accipere, malum est maximum: sed ubi quis cum aduersariis indignis congressus inferior discesserit, calamitatem altero tanto maiorem videri necesse est. Vos tamen talibus iniuriis acceptis, eos iterum in gratiam recepistis. Callias verò Chalcidensis cum ei scelerum suorum veniam, impunitatemque dedissetis, breui tempore interiecto rursus ad ingenium redijt. Nam cum Euboicum consilium verbo Chalcide cogeret, reuera Eubœam aduersus vos muniret atque ornaret, & præcipuum sibi dominatum compararet, huiusque fautorem atque adiutorem sibi futurum Philippum speraret, in Macedoniam se contulit. Ibi cum Philippo deambulabat, & in amicis ac familiaribus eius numerabatur: verum iniuste læso, atque offenso postea Philippo cum inde profugisset, Thebanis ultro sese in potestatem tradidit. mox illis quoque relictis cum identidem huc & illuc isset ac redisset, plurisque quam Euripus, propter quem habitabat, circuitiones, & conuersiones reciprocas fecisset, in medias Philippi ac Thebanorum inimicitias præceps actus est. Ad extremum inops consilij cum quid se faceret, nesciret, sibi que bellum denuntiaturum videret, vnam spem salutis reliquam esse animaduertit, si populum Atheniensem sibi iureiurando deuinctum habere posset, cum socij nomine appellatum, auxilium sibi laturum, si quis forte ipsum bello lacefferet: quod sine dubio erat futurum, nisi vos prohiberetis. Cum igitur in hac cogitatione

versatus esset, mittit huc legatos Glaucetam, Empedonem, Diodorum, eum, qui cursum illum Doricum viginti stadia longū cucurrit, populo Atheniensi spes inaneis, Demostheni, & eius alleclis pecuniam afferenteis. Tria autem vno tempore redimebat: primum ne societatis vestrae spe decideret. nam si populus Atheniensis superiorum eius iniuriarum memor societatem non probaret, nihil erat medium, sed ei relinquebatur è duobus alterum, vel ut ex Chalcide profugeret, vel ut vndique circumuentus, atque implicatus mortem oppeteret, tot & tantæ Philippi ac Thebanorum copiae in eum armatae irruebant. dabatur ei, qui societatem decreuisset, merces altera, ne Chalcidenses in conuentu confessūque communi, qui Athenis haberi solet, interesse cogerentur: tertia ne tributa conferrent. Et Calliam quidem nullius eorū, quæ sibi proposuerat, quæque expetebat, nec spes, nec opinio fefellit. Iste autem tyrannorum inimicus, (vt quidem simulat) Demosthenes, quem prædicat Ctesiphon perpetuò res optimas dicere ac suadere, cum tempora ciuitatis vendidit, tum in societate decernenda, censuit, vt Chalcidensibus opem ferremus, loquendi genere duntaxat commutato. nam vt rei iniquitatē honesta oratione tegeret, asperitatemque leniret, pro his adscripsit, vt Chalcidenses nobis opitularentur, & suis Atheniēsis bellū inferre conaretur. Postremò cōuentus Græcorum communis Athenis agendi ius, & tributorum descriptorum, in quibus nervi belli erant positi, vtilitatem funditus sustulit, ac vēdidit: honestissima nomina turpissimis actionibus impoens, vobisque oratione persuadens, ac pene dicam, vim afferēs ad credendum, semper oportere ciuitatem nostram Græcis auxilio egentibus prius auxilium ferre: societates verò posteriore loco facere, beneficio demum accepto. Atque, vt me vera dicere intelligere possitis, sume mihi Calliæ accusationem, & societatem, simulque decretū recita. DECRETUM. Nondum igitur hoc graue aut indignum est,

tantas

tantas temporum, rerumque gerendarum opportunitates, ius conuentuum Graeciae Athenis agendorum, tributorum denique imperatorum utilitates esse venditas, sed multo id, quod dicturus sum, indignius videbitur. Nam Callias quidem eo contumeliae, iniuriaeque prorupit, Demosthenes verò is, quem tantopere laudat Ctesiphon, in eam nundinationis, & pecuniarum turpiter capiendarum cupiditatem processit, ut uectigalia tum ea, quae ex Oreo, tum ea, quae ab Eretria vobis pensitabatur, decem talenta, vobis videntibus, prudentibus, inspectantibus, furtim ademerint: hos, qui à ciuitatibus mitti solebant, consiliarios, à vobis abduxerint, atque iterum in Chalcidem, & in Euboicum (quod appellatur) concilium trastulerint. Sed quibus hoc vijs ac rationibus, quam flagitiosis atque improbis effecerint, nunc operae pretium est audire. Venit tandem ad nos Callias non iam per nuntios aut legatos, sed ipse per se, & cum in cōtionem prodixisset, orationem habuit sibi à Demosthene compositam, summoque studio elaboratā. Dixit se ex Peloponneso venire, noua tributi descriptione facta centum circiter talentorum ad bellum Philippo inferendum. rationemque inibat quantū quosque populos conferre oporteret: Achaos & Magarenseis omneis talenta sexaginta. Euboeae ciuitates vniuersas quadraginta. Ex hac pecunia classem, & peditatum comparari atque ali facillime posse esse & alios è Graecis complureis, qui huius tributi sic descripti partem ferre ac subire vellent: qua ex re spes esset neque pecuniam, neque milites defuturos. Atque haec quidem esse nota & aperta. Alias autem res esse reconditas, quas occultè moliri atque agere coepisset: quarum nonnullos ciuium nostrorum esse testeis: deinde ad extremum nominatim Demosthenem citabat, hortabaturque ut eadem de re vnā secum diceret. Hic verò grauiter & magnifice se ferens procedebat: Calliam laudibus in caelum tollebat: occultum illud denique ac reconditum se scire simulabat. Legationem autem à se

orbitam tum in Peloponneso, tum in Acarnania velle se vobis eo ipso tēpore renuntiare dicebat. cuius orationis hæc capita fuerūt: Peloponnesios, & Acarnanas omneis à se esse ad pecuniam conferendam aduersus Philippum distributos ac descriptos: descriptionem pecuniæ eam esse factam, quæ satis esset centum nauibus actuarijs instruendis atque armandis, & stipendio decem millibus peditum, & mille equitibus persoluendo: (his accessuras vrbanas & ciuileis copias) ex Peloponneso amplius militum grauioris armaturæ quinque millia: ex Acarnania totidem altera. atque huius belli gerēdi ab his omnibus vltro vobis esse delatum principatum. Neque verò longum forè cūm hæc perficerētur, sed a. d. decimum sextum Kal. decembreis. singulis enim ciuitatibus se prædixisse ac denuntiauisse, vt omnes Athenas plenilunio conuenirent, & in communi sociorum concilio interessent, Etenim, Athenienses, hæc est istius hominis cōsuetudo, non iam omnium communis, sed ipsius propria, & peculiaris. Ceteri enim gloriosi & arrogantes ostētatores cūm mentiuntur, dant operam nequid notatum ac definitum temporibus, nequid certum ac perspicuum eloquantur, verentes ne refelli & coargui possint. At Demosthenes cūm venit ei in mentem aliquid sibi impudēter arrogare, de seque gloriose prædicare, primū periurio mendacium cumulat, pestem sibi exoptat, exitiūque precatur: deinde quæ certò scit nunquam futura, non dubitat asseuerare futura: temporibusq; notatis, ac rationibus eorum subtiliter subductis, definit quando quicque futurum sit. denique quos ne de facie quidem nouit, eorum quasi notissimorum nomina commemorat, vestris auribus hac arte fallaciter alle&is, atq; occupatis, eorūque, qui vera loquuntur, orationē imitans. Quocirca acerbissimo odio dignus est, qui cūm sit improbus ac sceleratus, virorum bonorum notas, signaque adulterat atque corrumpit. His dictis decretum dat scribæ recitandū, primū longius Iliade: deinde verbis, quæ

quæ loqui consuevit, & vita, quam vixit, inanius: postremo spei fallacis, & exercituum, qui nunquam conficendi essent, plenum. Cum autem longissime vos à cognitione furtorum suorum abduxisset, spemque inani suspendisset, atque inflauisset, tum sese subito conuertens, scitum facit, in quo censeret, ut legatos eligeremus, qui Eretrienfis orarent, (erat enim valde necesse scilicet eos orare) ut tributum visitatum quinque talentorum, ne iam vobis, sed Calliæ pensitarent. Rursus alteros ad Oritas, qui ab ijs peterent, ut eundem sibi atque Athenienses amicum, eundemque inimicum haberent. Deinde integumenta illa, quibus furtum suum obtexerat, remouentur. nam repetere indicat, ac declarat, se ea omnia, de quibus in illo populi scito scripserat, ad furtum retulisse, censeret ut legati ab Oritis postulent, ne vobis, sed Calliæ quinque talenta penderet. quæ quidem esse vera ex decreti lectione cognoscetis. Recita igitur decretum, detractis ampullis, inanique iactatione verborum, detractis triremibus, detractis denique arrogantibus & gloriosis promissis. recita, & sume in manus furtum, quod homo impurus ac nefarius commisit: quem prædicat Ctesiphon etiam in hoc decreto assidue & dicere & agere res populo Atheniensi valde vtileis & perquam salutareis. **DECRETUM.** Auditis igitur, Athenienses, verbo triremeis, & pedestreis copias, & plenilunium, & confessores, sed retributa unicuique ciuitati descripta, quæ vobis à socijs pendebantur, & decem talenta amisistis. Restat nunc ut ostendam, Demosthenem trium talentorum mercedem acceptam, hoc decretum interposuisse: vno talento ex Chalcide à Callia, altero ex Eretria à Clitarcho tyrano, tertio ex Oreo. Nam, quoniam Oritarum libera ciuitas est, quoniamque nihil agunt, quod non sciscat populus, eo facilius Demosthenis furta patefacta, atque illustrata sunt. illi enim eo bello, quod cum Philippo gesserant, exhausti, atque rei nummarie penuria laborantes, mittunt ad eum Gnosidamum Charigenis filium, eius, qui

quondam in Oreo principatum obtinuit, qui ab isto supplex petat, ut talentum ciuitati remitteret, promittat autem Oritas ei statuam anciam posituros. At iste Gnosidemo respondet, se pauxillulum aris non desiderare: talentum quidem per Calliam exacturum. Cum igitur soluere cogerentur Oritæ, neque haberent unde sumerent, vestigalia publica talenti nomine ei opignerauerunt, huiusque pecuniæ turpiter conciliatæ vsuram Demostheni soluerunt, singulis mensibus in minam, drachmam vnā donec sortem reddiderunt. atque hæc acta sunt cum populi decreto. Sume hoc Oritarum decretum, ut ex eo omnes intelligant, ea, quæ dico, esse vera. DECRETUM. Hoc decretum, Athenienses, probum ac dedecus est ciuitatis, argumentum rerum a Demosthene publice gestarum certissimum, perspicua Ctesiphontis accusatio. Nam qui tam turpiter habuerit pretio addictam fidem, seseque muneribus labefactandum & corrumpendum præbuerit, fieri non potest ut vir bonus sit: quæ tamen iste ausus est in populi scito perscribere. Hic tandem locus est tertij temporis, atque adeo omnium miserrimi atque acerbissimi temporis: in quo & Græcorum, & ciuitatis nostræ remp. funditus euertit ac perdidit Demosthenes: primum quod impius in templum Delphicum extitit, deinde quod iniustam, & prorsus imparem & iniquam cum Thebanis societatem decreuit. sed à sceleribus, quæ in deos immortales suscepit, initium ducam.

Campus est, Athenienses, quem Cirrhæum nominant, portusque, qui hodiè sacer ac dirus appellatur. hunc locum olim Cirrhæi & Acragallidæ, barbaræ, & à legibus alienissimæ nationes incoluerunt, quæ templum Apollinis, donaque ei deo consecrata sceleratè atque impiè diripuerunt, atque expilarunt. simulque Amphictyonum concilium & conuentum grauissimum ac sanctissimum nefariè violarunt. Cum igitur eorum facta, maxime (ut accepimus) maiores vestri: secundo loco ceteri Amphictyones iniquissimè, grauissimèque tulissent, oraculum
consulue-

cōsuluerunt, quibus supplicijs in illos homines animadu-
uertere conueniret. quibus respondit Pythia, vt cū Cir-
rhæis, & Acragallidis dies & nocteis bellū gererēt, agros
eorum depopularentur, ipsos in seruitutem redigerent,
Apollini Pythio, Dianæ, Latonæ, Mineruæ Providæ a-
gros illos, vt in perpetuum inculti essent, consecrarent,
cōsq; neq; ipsi colerēt, neq; ab alio coli paterētur. Hoc
oráculo accepto Amphictyones decreuerunt, cū in ea
re Solō Athen. vir & legum scribendarū peritissimus, &
in omni poetica ac sapientiæ studio multū diūque exer-
citus ac versatus, sentētiā dixisset: vt populus Athe-
nienſis dei oraculum secutus, consccleratis illis homini-
bus bellum inferret. Magno itaque ex Amphictyonibus
exercitu comparato, bellōque illato, eos in seruitutem
redegerunt, portus eorum aggeribus excitatis obrue-
runt, urbem funditus euerterunt, agros oraculo obtem-
perantes consecrarunt: postremò præter illa omnia reli-
gioso se iureiurando obstrinxerunt, neque se terram sa-
cram culturos, neque ab alio coli passuros, opem deo
pedibus ac manibus, & omnibus neruis ac viribus latur-
ros: neque hoc iureiurādo contenti fuerunt, sed sibi, ce-
terisq; omnibus, si aliter facerent, omni execratione
deuinctis pestem, exitiūque precati sunt. Sic enim in
eā execratione scriptum est. SI QVIS HAEC MIGRA-
VERIT, SIVE CIVITAS, SIVE QVIS PRIVATVS,
SIVE NATIO, APOLLINI, DIANAÆ, LATONÆ, MI-
NERVAE PROVIDAE SACER ESTO. hoc præterea ijs
imprecatur, vt neque ipsis terra fructū ferat, neque vxor-
es eorum liberos parentibus simileis, sed monstra &
portenta pariant: neque pecorum partus sint naturales:
& vt è bello, è iudicijs, è foro victi discedant: denique
vt funditus intereant ac deleantur & ipsi, & eorum do-
mus, ac genus. NEQUE VNQVAM (inquit) APOLLINI,
NEQUE DIANAÆ, NEQUE LATONÆ, NEQUE MI-
NERVAE PROVIDAE PVRE LITANTO, NEQUE AC-
CEPTAE SVNT O DIIS IMMORTALIBVS EORVM

VICTIMAE. atque ut hæc esse vera luce ipsa clarius cernere possitis, recita mihi dei oraculum, audite execrationem, iurandi quæ, quod cū Amphictyonibus vestri maiores iurauerunt, memoriam repetite.

ORACULVM. IVSIVRANDVM. EXSECratio.

Non prius hanc vrbis captam delebitis arcem,

Quam Phœbi templum fluctus grauis Amphirritæ

Aluat, horrendum ad sacra tollens littora murmur. Hæc execratione facta, hoc iureiurando concepto, hoc oraculo edito, quæ omnia in tabulas publicas relata adhuc exstant, Locri, Amphissenses, immò verò eorum principes ac magistratus, iuris & legum contemptores, campum illum coluerunt: portum sacrum, dirum ac sceleratum rursus munierunt, ac celebrarunt, cū portoria ab ijs, qui præternauigabant, exigèrent. nonnullos præterea pylagoros (sic enim appellatur concilij Pylæi oratores) qui Delphos venissent, pecunia corruerunt: quorum in numero fuit Demosthenēs. Nā suffragio creatus à vobis Pylagorus mille drachmas ab Amphissensibus accepit, ne quā eorum apud Amphictyones mentionem faceret. Illi autē stipulatione interposita promiserūt se quotānis viginti minas ex pecunia illa nefaria ac scelerata refectas, Athenas missuros, ut in hac vrbe, summa cura, summoque studio Amphissensib⁹ opitularetur: quæ quæsiem ex re hoc ei contigit, ut quemcunque vel priuatum, vel potestate præditum, vel liberam ciuitatem attingeret, vnumquemque horū sua contagione incommodis & calamitatibus insanabilibus & pestiferis afficeret. Videte igitur quemadmodum deus & fortuna Amphissensium impietate fuerint superiores ac potentiores. Theophrasto prætore, Diogneto Anaphlystio hieromneme (sic enim appellat scribam Amphictyoniciū) vos pylagoros legistis Midiam illum Anagrasium, qui vtinam multas ob causas viueret: & Thrasyclem Lesbium, & me vnā cū his tertium. Accidit autem ut cū salui Delphos peruenissemus, continuò Diognetus hieromnemon in febrim

brim incideret, itémque Midias. Alij Amphictyones in consilio aderant. Interea affertur ad nos ab ijs, qui suum in ciuitatem nostram studium ac beneuolentiam declarare cuperent, Amphissenseis tum valde demissos atque humileis, Thebanisque mirum in modum subseruientibus, decretum aduersus nostram ciuitatem attulisse, quo decreto populus Atheniensis quinquaginta talétis multaretur, propterea quòd nouo templo priusquam precibus sollennibus expiatum esset, nouos clypeos dicauissemus cum legitima illa & conuenienti inscriptione, ATHENIENSES DE MEDIS AC THEBANIS, QVO TEMPORE HI CONTRA GRAECOS COMMISSO PROELIO DECERTAVNT. Ego arcessitus ab hieromnemone, & in consilium introire iussus, vt apud Amphictyones pro ciuitate nostra dicerem: venio non inuitus, quippe qui mea sponte hoc ipsum facere constitutum in animo haberem. cùm paullo cupidius ac studiosius ingressus essem, verbáque facere coepissem, alijs Pythagoris seductis, quidam ex Amphissensibus homo petulantissimus, & (vt mihi quidem videtur) nullis artibus ingenuis eruditus, omnisque doctrinæ liberalis expers: fortasse etiam à deo aliquo irato in hanc amentiam impulsus: At si saperetis (inquit) vos Græci, ne nomen quidem populi Atheniensis his diebus commemorari sineretis, sed eos vt contaminatos atque exsecrabiles à templo arceretis. Et simul Phocensium societatem, quam Crobylus ille suaserat, commemorabat: multaque alia cõtumeliosa, acerba, atque odiosa in ciuitatem nostram expromebat, cùm ea diceret, quæ neque tunc aures meæ ferre poterant, neque nunc libenter oratione refrico. Itaque his auditis ita cõmotus ac perturbat⁹ sum, vt nūquam mihi antea quicquam in vita mea grauius ac molestius acciderit. Atque alia quidem, quæ tum locutus sum, prætermittam: hæc pauca de multis vobis exponam. Venit tum mihi in mentem, Amphissensium in terram sacram impietatis facere mentionem: quam terram eo-

dem è vestigio, in quo insistebā (nam campus Cirrhæus templo Delphico subiacet, vnóque fere aspectu totus prospici potest) Amphictyonibus indicabā. Videris (inquam) Amphictyones, campum hunc ab Amphissensibus vomere subactum & excultum, domos, figlinas, & villas inædificatas. cernitis oculis sceleratum & exsecrabilem portum munitum. Scitis ipsi (neque enim alijs testibus egeris) istos ex sacro portu vectigalia exigere, pecuniámque cogere. Et simul dei oraculum, maiorum iusiurandum, exsecrationem factam recitari iubebam, liquidò confirmans ac testificans, me pro populo Atheniensi, pro me, liberis, & domo mea, pedibus, manibus, voce, omnibus denique viribus, iuri iurando obtemperantē, deo & terræ sacræ opitulari, ciuitatémque nostrā religione liberare. At vos, Athenienses, vobis ipsi consulite. Canistrorū dies festus agi iam cœptus est: admotæ sunt altaribus hostiæ, ea petaturi estis à dijs immortalibus, quæ vobis priuatim, ac reip. sint profutura. Vobiscum igitur ipsi considerate, & cogitate, qua voce, qua mente, quibus oculis, qua spe freti & consilii vota, & supplicationes facietis, si vos consceleratos, atque omnibus exsecrationibus deuotos, inultos dimitteris. non enim obscurè, sed apertissime in exsecratione scriptum est, cum in eos, qui impij in deum extiterint, tum in eos, qui non prohibuerint, quibus supplicijs utrosque affici oporteat: **NE PVRE** (inquit) **LIBANTO, NEVE SACRIFICANTO, QVI APOLLINI, DIANAE, LATONAE, MINERVAE PROVIDENTIAE AVXILIVM NON TVLERINT, ET EORVM VICTIMAS DII IMMORTALES AVERSANTOR.** Cùm hæc & alia huiusmodi multa præterea dixissem, tandem dicendi finem feci, atque è consilio discessi. Tum clamor ab Amphictyonibus factus est, tum strepitus editus, & Amphictyonum vociferatio consecuta: neque iam de clypeis, quos dicaueramus, sed de Amphissensibus pœna afficiendis agebatur. Et cùm iam serum diei esset, prodit præco, ac prædicat,

dicat, ut quotquot è Delphis biennio pubertatem superassent, tum serui, tum liberi, hora diei prima cum falcibus & ligonibus ad eum locum, quem indigenæ Thutèum nominant, conuenirèt. Iterum idem præco prædicat, ut hieromnemonēs, & pylagorī eodē venirent, deo, & terræ sacræ auxilium laturi: quæcunque ciuitas non adfuisset, templo Delphico arceretur, scelere atque execratione obstringeretur. Postridie manè in eum locum, quem suprà diximus, venimus, in campum Cirrhæum descendimus. deinde portu illo diruto ac deleto, ædificijs incensis rediimus. Interea dum hæc agimus, Locri, Amphissenses, quorum domicilia, septem circiter milia passuum Delphis aberant, vniuersi armati manu facta in nos impetum fecerunt. quòd nisi properè nos in fugam coniecissemus, ac vix tandem Delphos peruenissemus, nihil propius actum esset, quàm ut funditus periremus. Postride Corthyphus, qui sentētias ratas faciebat, Amphictyonum contionem habuit. (contionem autem nominant, quādo non solum pylagorī, & hieromnemonēs, sed ij etiam, qui vnā sacra faciunt, & qui ad cōsulendum oraculum venerunt, conuocantur.) Hic iam grauitè atque acerbè accusati sunt Amphissenses: nostra ciuitas cōtrā magnis laudibus ornata est. Totius autem orationis hæc fuit clausula: decernitur ut hieromnemonēs ante proximum Pylæum cōuentum pro dicta die ad Pylas venirent, decretumque vnā illud afferrèt, quo decreto Amphissenses essent suorum in deum, terram sacrā, Amphictyones scelerum poenās daturi. Atque ut nihil à me confictum esse perspicere possitis, decretum ipsum vobis scriba recitabit. DECRETVM. Hoc igitur decreto à nobis cū in senatu recitato, tum in cōtione ad populū prolato, & actionibus nostris à populo comprobatis, & vniuersa ciuitate ad studiū pietatis vehemèter excitata atq; inflāmata, cū Demosthenes pro pecunia illa Amphissensi, pronūtiata iā, atq; apud sequestrē deposita cōtrā diceret, egoq; cū vobis inspectātibus atq; audien-

tibus in furto manifesto deprehensum tenerem, neque iam posset homo alió qui audacissimus apertè ciuitatem in fraudem inducere, ingressus in curiam, & summotis imperitis, auctoritatem senatus perscribendam curat, eamque mox in contionem defert, eius, qui scripserat, inscientia fretus. Et vt hæc ipsa senatus auctoritas in cōtione confirmaretur, ratáque fieret, & vt à populo scisceretur, perfecit, cum surrexisset iam cōtio, egóque discessissem, (neque enim vnquam passus essem) multitudine denique dimissa. Cuius quidem sciti caput hoc fuit, vt hieromnemo Atheniensium, & pylagori, qui posthac hoc munere functuri essent, ad Thermopylas & Delphos proficiscerentur ijs temporibus, quæ à maioribus nostris constituta sunt, verbo præclarè, & honestè: re turpiter, & flagitiose. Prohibet enim quo minus ad confessum illum Pylæum ad tempus occurrant, qui necessario ante tempus à maioribus nostris constitutum & visitatum erat futurus. sed aliud ei scito adscriptum est multo & apertius & acerbius, vt Atheniensium hieromnemoni, & pylagoris, qui post illa futuri essent, neque verborum, neque factorum, neque decretorum, neque vllius rei cū ijs, qui illuc cōuenirent, esset vlla cōmunitas. At quid sibi verba illa volunt, NE SIT VLLA COMMUNITAS? utrū verum loquar, an id potius, quod vobis auditu iucundum futurum est? verum loquar. Nam quod ita semper ad voluptatem dicitur, hæc ciuitati nostræ mala, quæ videmus, inuexit. Non sinunt iurisiurandi memores esse, quod maiores nostri iurauerunt, non execrationis, non oraculi. Nos igitur, Athenienses, propter hoc populi scitum in vrbe mansimus: alij Amphityones ad Thermopylas conuenerunt, præter vnam ciuitatem: cuius nomen reticere satius esse duco, & dii immortales prohibeant, ne cuiquam Græcorum similis accidat calamitas: & simul vt conuenerunt, bellum in Amphissenseis, exercitumque decreuerūt, Cottyphumque Pharsalium, eum, qui tunc decreta confirmabat, impera-

peratorem legerunt: quo tempore non erat in Macedonia Philippus, quin ne in Græcia quidem: sed lōginquis in locis in media Scythia versabatur: quem tamen mox audebit dicere Demosthenes, à me esse in Græcos incitatum atque immissum. Ac primo quidem illo exercitu victoriam consecuti, valde se clementeis ac moderatos in Amphissenseis præbuerunt. Nam pro maximis eorum in deos immortales sceleribus, pecunia eos multarunt, eamque pecuniam vt die dicta deo soluerent, multo antè edixerunt: & sceleratos, commissorumque facinorum auctores è ciuium numero segregarunt, atque exterminarunt: eos verò, quos sua pietas solum vertere coëgerat, ab exsilio reuocarunt. Sed cum illi neque pecuniam deo persoluerent, & sceleratos restituerent, & pios de sententia Amphictyonum ab exsilio reuocatos, eijcerent, iam tum alterum contra Amphissenseis exercitum duxerunt, cum longo post interuallo, ex bello, quod cum Scythis gērebat, reuersus esset Philippus: cumque dii immortales nobis huius pietatis imperium principatumque detulissent, Demosthenis avaritia, prædæque obstitisset. At nonne vobis dii prædicebant, nonne præsignificabant, nonne præmonebant vt caueretis, propè humanam vocem mittentes? Nullam me Dius Fidius vnquā ciuitatem videri apertius à dijs immortalibus conservari, à quibusdam oratoribus perdi ac funditus eueri. Non satis valebat ad ostentum illud, quod mysteriorum diebus significatum fuerat, præcauendum, mystarum interitus? Non Amyniades prædixerat, vt & caueremus, & certos homines, qui ab Appolline requirerent quid facto opus esset, Delphos mitteremus? non Demosthenes aduersabatur? cum Pythiam cum Philippo facere diceret, homo omnis doctrinæ atque humanitatis expers, & hac, quam ei datus, licentia immoderatè perfruens, eaque se ad satietatem explens atque ingurgitans. Postremò nonne milites sacris non litatis, non mactatis victimis ad perspicuum vitæ periculum misit? At nuper dicere ausus est,

Philippum iccirco in Atticam cum exercitu non inuasisse, quòd exta fuissent ei minus lata. Quo igitur supplicio dignus es? ò Græciæ labes & funus. Si enim ipse victor in eorum, qui victi erant, sineis non inuasit, propterea quòd exta victimarum ei non erāt lata, tu autem incertus quid esset omnino futurum, priusquàm exta inspexisses, milites ex vrbe misisti: vtrum te corona donari propter cladeis & calamitates ciuitatis, an è ciuiū numero segregari, atq; in vltimas terras amādari oportet? Nā quid insperati, quid inexpectati nostra ætate non vidimus? non enim humanam vitam viximus, sed vt posteris sermonem de rebus inopinatis, & pæne dicam incredibilibus proderemus, in lucem editi sumus. Non rex Persarum, qui montem Athonem perfoderat, qui Hellepontum iunxerat, qui Græcos terram, aquāmque poscebat, qui audebat in litteris scribere, se ab oriente sole ad occidentem, vnum esse omnium mortalium dominū, nōne ille ipse nunc non de principatu & imperio, sed de corporis salute dimicat? nōne eosdem cernimus tum hac gloria, tum belli aduersus Persas suscepti principatu dignos esse habitos, qui templum Delphicum liberarunt? non Thebæ: Thebæ vrbs vicina & propinqua vno die ex media Græcia excissa & sublata est? cui tametsi iure hæc calamitas acciderit, quippe quæ non recte de summa re consuluerat, non tamen humanitus, sed diuinitus in eam amentiam ac temeritatem fuerat impulsæ. Iam Lacedæmonij miserrimi, qui initijs duntaxat interfuerant, remque illam cum templum primū occuparetur, leuiter attigerant, illi illi, qui sibi Græciæ principatum quondam arrogabāt, non propè adest cum, vt Macedonibus dent obsides, suāmque calamitatē, insignem ad posteritatis memoriam sempiternam faciant, iterum ad eum legationem sint missuri, pœnas ipsi cum sua patria Alexādri arbitrato daturi? denique, quod est miserrimum, & victoris & iniuria lacessiti iudicium æquitatemque subituri? Vrbs verò nostra, cōmune olim Græcorum

corum perfugium, ad quam antea legationes ex singulis Græciæ ciuitatibus ventitabant, singuli salutem à vobis accepturi, nōne nunc non de Græcorum principatu, sed de patriæ solo decertat? Atquē hæc nobis acciderūt posteaquā Demosthenes ad reip. accessit. qua de re præclare Hesiodus. vetat enim quodam loco, populos erudiens atque instituens, & ciuitatibus cōsulens, ne improbos oratores approbent, neue in eis acquiescant. dabitis autem mihi hanc veniam, Athenienses, vt ego versus vobis recitem. Arbitror enim nos ob eam causam dum pueri sumus, poëtarum sententias ediscere, vt ætate iam corroborata ijs vtamur. Sic igitur canit Hesiodus.

At toti haud raro populi plectuntur ob vnum,

Qui scelera admittit, qui res molitur iniquas.

His autem exitium cælo demittit ab alto

Iupiter, & letale malum, pestēmque, famēmque.

Sic pereunt miseri cives: saepe ille cohorteis

Interimit totas, saepe altas diruit vrbes,

Et rapidis naueis iactatas obruit vndis. Si poëtæ sententias demto numero perpendatis, puto vobis non Hesiodi carmen, sed oraculum in administrationem reip. & actiones Demosthenis visum iri. nam istius in rep. gerenda rationibus & institutis classes, exercitus, vrbes deletæ, æe funditus euersæ sunt. Quinetiam existimo neque Phrynondam, neque Eurybatum, neque alium quendam eorum, qui olim improbitate excelluerunt, talem magum, aut planum, aut præstigiatores extitisse, qualis est Demosthenes: qui ausus est dicere, ò terra, & vos, ò dii immortales, dæmones, atque homines, ausus est, inquam, dicere, vos rectis oculis aspiciens, Thebanos societatem nobiscum fecisse, non quòd temporibus cohererentur, non metu perterritos, non vestra gloria famaque cōmotos, sed Demosthenis contionibus adductos. Atqui multas ante istum legationes Thebas obierunt homines illorum amantissimi: quorum primus fuit hic Thrasybulus Collyteus, imperator, vir apud Thebanos,

si quis alius, multum auctoritate valens, valdeque apud illos gratus. Deinde Thraso Archicus, cum quo Thebani hospitium publice fecerunt: Leodamas Acharneus, cui non minor est, quam Demostheni, dicendi facultas: meo quidem iudicio, maior orationis suauitas: hic Archidamus Pelex, ipse quoque eloquens, & qui multa in rep. gerenda propter Thebanos pericula adiit: Aristophon Azenicus, contionator & populi magister, qui diutissime Bœoticis partibus studuisse insinulatus est: Pyrander Anaphlytius, orator, qui etiam nunc viuit. Nullus horum tamen Thebanos vobis conciliare, & vt vobis amici essent, flectere potuit. cuius rei causam cum sciam, non necesse habeo propter eorum calamitates exponere: sed posteaquam (opinor) Philippus Nicæam ijs ademptam Theffalis tradidit, & quod bellum ex Bœotorum finibus depulerat, hoc idem bellum rursus per Phocidem in Thebas ipsas traduxit, atque ad extremum Elatéam occupatâ vallo muniuit, in eamque præsidium imposuit: hinc tum illi malorum propinquorum ac iam instantium metu excitati Atheniensium auxilium implorarunt. vos itaque exercitum eduxistis, Thebas introistis armati, pedites & equites, priusquam Demosthenes vnam de societate syllabam scripisset. Quæ res Thebas vos intromittebant? tempus, metus, societatis utilitas ac necessitas, non Demosthenes. Namque his in rebus tria in vos vel grauissima peccauit Demosthenes: vnum quod cum Philippus verbo vobiscum bellum gereret, re vera longe acerbior odio Thebanos persequeretur, quo modo res ipsæ declararunt: (quid enim pluribus opus est?) de his omnibus rebus tantis, tantique ponderis vos celauit: & societatem nobis cum Thebanis futuram simulans non quod ita rationes & tempora Thebanorum postularent, sed quasi ea res consilij & legationibus suis conficeretur: primum persuasit populo ne spectaret, neue magnopere attenderet quibus conditionibus societatem facere conueniret, sed satis haberet, si fieret

si fieret modo. Hoc autem occupatō , & pane dicam expugnato , vniuersam Bœotiam Thebanis dedit , cū decreuit , vt si qua ciuitas à Thebanis descisceret , Athenienses Bœotis , qui Thebis essent , opitularentur , verbis (vt solet) insidiosis res ipsas suffurans , & occultans , aliòque transferens , quasi verò Bœoti re detrimento , malòque accepto , verbis à Demosthene callidè & artificiosè compositis contenti essent futuri , & non incommoda , iniuriàsque acceptas grauissimè laturi . Deinde sumtuū belli parteis duas vobis adscripsit , qui longius à periculo aberatis : tertiam Thebanis , quorum præcipuè res agebatur : in his singulis turpissimè nundinatus ac prædatus : imperium maritimum cum illis communicauit , impensam propriè nostram esse voluit : terrestre (si nugis omis sis seriò loqui volumus) totū prorsus ad Thebanos transtulit , adeò , vt in eo bello , quod natum est , Stratocli , nostro imperatori de militum salute facta non sit statuendi potestas . Atque hæc non & ego in iudicium voco , & alij prætermittunt : sed & ego crebris sermonibus vsurpo , & omnes reprehendunt , & vos scitis , neque irascimini . Sic enim in Demosthenem animati estis : vestræ iam aures audiendis eius facinoribus & flagitijs occalluerunt . Itaque nihil noui quod miremini , vestris auribus accidit , cū de eius factis auditis . At longè aliter facere vos oportet . oportet vos iniquo animo ferre , oportet in eū animaduertere , si quidem reliquas reip . parteis incolumis retinere , & conseruare vultis . Alterum Demosthenis peccatum est longè superiore grauius , quòd senatum & consilium publicum ciuitatis , & populi dominationem ac libertatem nobis insidiosè ademtam , Thebas transtulit , atque in Thebanam curiam traduxit , rebus & actionibus nostris cum principibus Bœotorum pactio ne facta communicatis . Tantam autem sibi iam potentiam comparauit , vt contione occupata , atque adeò obfessa , gloriatur se quoquò velit , etiam si non mittatis , legatum profecturum . Si quis verò imperatorum ei in di-

cendo aduersetur, prætoribus oppressis atque in seruitutem reductis, & assuefactis nihil contra ipsius voluntatem dicere, minetur se suggesti nomine prætorium in ius, iudiciûmque vocaturum. Plura enim commoda, plurisq; vtilitates sua opera è suggesto, quàm per imperatores è prætorio ad vos peruenisse. Iam in externo exercitu cum integer non esset militum numerus, quæstûmque ex ea re faceret vberimum, pecuniam militarem furaretur, decem millia externorum militum Amphissensibus mercede accepta locasset, abductis atque subreptis militibus, nõne me restante deos & homines, & dolenter in contionibus infelicem statum ciuitatis, & imminentem reip. casum deplorante, prope modum urbem imparatam in extremum discrimen adduxit? Quid enim putatis Philippum temporibus illis fuisse optaturum? non vt separatim cum vrbanijs copijs, separatim cum externis militib⁹ ad Amphissam prælium committeret? Græcos tanta plaga accepta omni spe salutis orbatos opprimeret? Et tamen Demosthenes postea quàm tot malorum ciuitati causa extitit, impunitate non est contentus, sed nisi corona aurea donabitur, ferendû non putat, neque ei satis est præconis vocem de eo in cõspectu vestro prædicare, sed nisi Græcis præsentibus atque inspectantibus prædicatio fiet, indignabitur, ferendû nõ putabit. Ita improba natura, vt apparet, magnâ potestaté adepta, populis ac ciuitatibus liberis insignis calamitates importare solet. Venio iam ad tertium tempus, omnium, quæ suprà dicta sunt, multo maximum. Cum Philippus Græcos minime contemneret, sciretque (non enim stolidus nec hebes erat) se de bonis, fortunisque omnibus breui temporis momẽto decertaturum, atque iccirco pacem facere vellet, legatósque missurus esset: cum altera ex parte magistratus ac principes Thebanorum periculum propinquum ac ceruicibus ciuitatis impendens pertimescerent, (neque iniuria: non enim eos orator, qui militiam subterfugisset, locûmque ab imperatore

ratore datum reliquisset, monuerat, sed bellum Phocense, decennium in Phocide versatum, documētum ijs dederat, cuius etiam tunc hæreret in eorum animis memoria sempiterna) cū igitur hæc ita se haberent, cūque animaduerneret ac suspicaretur Demosthenes Bœotiæ principes priuatim pacem facturos, auro sine se à Philippo accepto: non esse cur viuere vellet arbitratus, si qua quæstus & nundinationis societate excluderetur, repente in contionem prosiliit, neque dicente quoquam mortalium, pacem cum Philippo facere oportere, neque negāte, sed quia existimabat se hoc veluti præconio, Bœotorum principibus multo ante prædicare ac denuntiare, vt sibi pecuniæ captæ, prædeque partem referrent, per Mineruā iurabat, quam scilicet eò fabricat⁹ est Phidias, vt in ea quæstus faciēdi rationem quæreret, periurijque fraudem susciperet Demosthenes: si quis pacem esse cum Philippo faciendam diceret, se eum capillo arreptum, in carcerem abducturum, Cleophontis imitans in administrāda rep. rationem & institutum: qui bello Lacedæmonio (vt à maioribus nostris accepimus) ciuitatem fundit⁹ perdidit. Sed cū principes Thebanorū, quid ille vellet non magnopere neque laborarent, neque attenderent, militesque vestros ex vrbe iam ad bellum egressos remisissent, vt vos de pace deliberaretis: tum iste de gradu ac potestate mentis deiectus, & impotētia animi præceps, contionem occupat: ibi Bœotiæ principes, Græcorum proditores nominabat, populi scitum se facturum dicebat is, qui hosteis nūquam rectis oculis ausus est intueri, quo vos Thebas legatos mitteretis, qui à Thebanis iter per eorum fineis aduersus Philipppum postularent. Thebani principes autem summo pudore affecti, ac veriti, ne reuera Græcorum proditores esse viderentur, à pacis consilio refugerunt, atque ad exercitum comparandum, instruendūque excitati sunt. Hoc loco, Athenienses, operæ pretium est fortium virorum meminisse, quos cū iste non immolatis hostijs, & inauspicatō ad

certum, perspicuumque vitæ discrimen compulisset, ausus est fugacibus, & loci desertoribus pedibus in mortuorum sepulcra ascendere, eorumque virtutem laudare. O ad res magnas ac serias omnium hominum ineptissime; ad orationis cōfidentiam, verborumque audaciam accommodatissime ac paratissime: incipiēsne, audebīsne dicere in ora horū intuens, tibi propter ciuitatis calamitates coronā deberi? aut vos Atheniēses, si dixerit, patimini? feretis? vt vnā cum ijs, qui mortem obierunt, vestra quoque memoria (vt appāret) moriatur? Adeste mihi, quæso, Athenienses, animis, ad exiguum spatium temporis, non iam in iudicio, sed in theatro, & fingite vos præconem antecedentem, prædicationemque coronæ ex populi scito futuram recitantem intueri: & vobiscum ipsi considerate, vtrum putetis mortuorum propinquos ob tragœdiarū spectacula, heroū quē grauissimos casus, & acerbissima incommoda, quæ postea exprimentur & referentur in scena, maiorem vim lacrymarum profusuros, an ob ciuitatis iniquitatem & demētiam? Quis enim non Græcus modò, sed homo liberaliter institutus non ingemiscat, si nihil aliud, illud saltem in theatro recordatus, hoc quondam die tragœdis, vt nunc, in scenam proditurus, quo tempore melius erat morata ciuitas, & à magistratibus melioribus gubernabatur resp. præconem, simulac prodijisset, productis orbis filiis, quorū patres in bello occiderant, adolescentulis totius corporis armatura decoratis, pulcherrimum, & ad virtutem expectandam acerrimum præconium pronuntiare solitum?

POPVLVM HOS ADOLESCENTVLOS, QVORVM PATRES IN BELLO FORTITER PVGNANTES CECIDERVNT, VSQVE AD PVBERTATEM ALVISSE, NVNC AVTEM HAC ARMATVRA TECTOS AVSPICATO, ET BONIS OMINIBVS, VT AD RES SVAS REVERTANTVR, DIMITTERE, ET AD SVVM QVEMQVE ORDINEM,

NEM, IVSQUE OBTINENDÆ IN REP. DIGNITATIS VOCARE. Hæc igitur tum prædicabat: nunc verò non item. producto enim eo, qui liberis orbitatis ac solitudinis causa fuit, quid prædicabit, aut quid loquetur? Nam & si ea ipsa, ut præscripta & composita sunt, decreti verba recitabit, non tamen erit muta ea, quæ ex veritate nascitur, turpitudine: quin verba maximè repugnantia & contraria voci præconis loqui videbitur, *POPULUM ATHENIENSEM, HUNC VIRUM*, si quidem iste vir est, *CORONA DONARE VIRTUTIS ERGO*, nequissimum: *FORTITVDINIS*, timidissimum, locique desertorem. Obsecro vos, Athenienses, per Iouem, reliquosque deos immortales, ne tropæum de vobis ipsis in orchestra Liberi patris figite, ne populum Atheniensem in conspectu Græcorum furoris & amenitiæ condemnate, ne calamitosi atque infelicibus Thebanis insanabilium & desperatorum malorum memoriâ refricatis: quos propter hunc fugere coactos in urbem vestram recepistis, quorum fana, sepulcra, liberos Demosthenis turpissimæ nundinæ, mercatusque domesticus, & aurum regum perdiderunt. Sed quoniam corporibus tum adesse non potuistis, nunc adeste animis, & putate vos eorum calamitates intueri: fingite cogitatione imaginem urbis captæ, cuius mœmia diruuntur, ædes incendio deflagrant, mulieres & pueri in seruitutem rapiuntur, viri ac mulieres grandes natu, exacta iam ætate, serò libertatis dulcedinem dediscunt, plorantes, vobis supplicantes, irascentes denique non ijs, qui à se tam crudeleis poenas expetiuerunt, sed ijs, qui tot ac tantorum sibi malorum auctores & causæ extiterunt, orantes atque obtestantes, ne vos vlllo modo in animum inducatis Græciæ procellam, pestemque corona donare, sed potius ut fatum ac fortunam, quæ hominem comitantur, summo studio vitetis. Nam neque vlla ciuitas, neque quisquam singularis & priuatus homo ex negotio

suscepto pulchrè vnquam discessit vsus Demosthenis consilio. Non pudet vos, Athenienses, in portitores, qui Salaminem transuehunt, hanc legem tulisse, vt si quis eorum in transuectione etiam inuitus & inconsultò nauigium euerterit, ne ei postea liceat esse portitori, nequis in hominum Græcorum capitibus ac personis, subitis & ex tempore captis consilijs vsus inconsideratè negligenterque versetur: ei vero, qui Græciam, nostramque ciuitatem funditus euerterit ac perdiderit, reip. iterum gubernandæ facere potestatem? Sed vt ad quartum tempus veniamus, & de hoc rerum statu, in quo nunc versamur, dicere incipiamus, illud vos admonitos velim, Demosthenem non solùm in castris atque in acie locum non tenuisse, verùm etiam ciuitatis vestræ triremi vectũ à Græcis pecunias exegisse: quem cùm insperata salus ex proelio in urbem reduxisset, primis temporibus paullum cõtremiscebat, atq; exsanguis & semimortuus in cõtione prodibat, suadens vobis, vt se pacis custodẽ ac pacificatorem crearetis. Vos autem initiò Demosthenis nomen ne adscribi quidem populi scitis sinebatis, sed hoc negotium Nausicli dabatis. & tamen nunc iam etiam coronam sibi deberi contendit. Mortuo postea Philippo, atque ad regni successionem vocato Alexandro, idem rursus monstra & portenta nobis edens, in Pausaniam sollennia sacra instituit, senatũque scelere obstrinxit, quòd supplicationem & sacrificia dijs immortalibus ob nuntium de Philippi interitu acceptum decreuisset: Alexandro Margitæ cognomen contumeliæ causa imponebat, nec confirmare dubitabat, eum nunquam se ex Macedonia commoturum: satis ei esse si Pellæ deambulet, & viscera paterna custodiret. Atque hæc se dicere prædicabat non coniectura ductum, sed quòd certò sciret virtutem non nisi sanguine comparari, homo alioqui exsanguis: qui Alexandrum non ex Alexandri ingenio ac natura, sed ex sua timiditate ignauiaque fingeret. Cùm igitur censuissent iam Thessali ciuitati nostræ bel-

lum inferendum, iuuenis tum primum offensus atque ir-
 riratus esset, neque iniuria, Thebæ iam ab Alexandro cir-
 cumsessæ essent, castraque ad mœnia posuisset: legatus
 à vobis suffragio creatus Demosthenes, è medio Cithæ-
 rone sese in fugam coniecit, ac reuersus est, neque in pa-
 ce, neque in bello ciuem se reip. vtilem præbēs. Et quod
 est omnium grauissimum, cum eum vos neque prodide-
 ritis, neque in Græcorum concilio condemnari passi si-
 tis, iste vos planè prodidit, siquidem vera sunt, quæ di-
 cuntur. Narrant enim Paralij, & qui legati ad Philippum
 profecti sunt, (neque verò quisquam est, cui res credibi-
 lis non videatur) Aristionem quendam esse Plataicum
 Aristobuli pharmacopolæ filium: (sicui fortè vestrum
 notus est) hic iuuenis olim cum suis æqualibus forma
 præstaret, diu apud Demosthenem cōmoratus est: quid
 ageret autem, quidue pateretur, cum dubium atque in-
 certum sit, tum res mihi nequaquam dictu honesta est:
 veruntamen cum (vt ego audio) & quis sit, & quomodo
 antea vixerit, notum sit nemini, Alexandri beneuolen-
 tiam blandimentis & assentatione collegit, in eius con-
 suetudinem penitus sese immerfit, in eius denique fami-
 liaribus & intimis numeratur. datis huic ad Alexandrum
 litteris Demosthenes metuendi finem fecit, securitatem-
 quæ & cum eo in gratiam redeundi potestatem nactus
 est, multisque & varijs assentandi rationibus de integro
 aditum sibi ad eius amicitiam comparauit. Ex hoc iam
 mihi cognoscite quàm valde res sit criminationi affinis
 & consentanea. Nam siquid horum sentiebat Demosthe-
 nes, si erat hostili in Alexandrum (vt nunc prædicat) ani-
 mo, tria ei huius voluntatis declarandæ opportunissima
 tempora oblata sunt, quorū nullo reperitur vsus: vnum
 cum Alexander non ita pridem regni possessionem a-
 deptus, rebus suis imparatis atque acerbis relictis, in A-
 siam penetrauit, quo tempore rex Persarum classe, pe-
 cunia, peditatu vigeat, ac florebat, idemque libenter
 vobiscum societatem belli fecisset, propter ea pericula,

quæ sibi impendêre præuidebat. Num tu verbum tunc vnum fecisti, Demosthenes, vllûmue decretum interposuisti? Visne te timuisse, tuoque ingenio obsecutum esse ponam & cōcedam? Atqui timiditatem oratoriam reip. tempora non exspectant. Verùm simulac Darius cū vniuerso exercitu descendit, cū Alexander omniū rerum difficultate atque inopia laborabat, in Cilicia interclusus hærebat (vt tu ipse dicebas) cum illum continuò (cuius tu quoque orationis auctor eras) Persicus equitatus conculcaturus erat, iam tunc ciuitas non odium, non insolentiā, nō epistolas tuas capere poterat, quas tu extremis digitis suspensas tenens in foro volitabas: nonnullis etiam os meum indicabas tāquam hominis metu perterriti, animoque debilitati & abiecti, me aurata fronte iuuenem appellabas, & siquid offenderet ac titubaret Alexander, iam iam infulatum & coronatum esse, ac quàm primū immolādum esse dicebas. Ne hic quidem quicquam egisti, sed rem in aliud tempus nescio quod magis idoneum distulisti. His igitur omnibus prætermisis, de præsentī rerum statu dicam. Lacedæmonij, & exercitus externus, secundum fecerant proelium, Corrhagique imperatoris milites conciderant, fuderant, occiderant: Elæi vnā cum eis à Macedonibus defecerant, Achæi præterea omnes præter Pelleneos: Arcadia tota præter Megalopolim. ea autem à Lacedæmonijs obsidebatur, eratque hominū opinio primo quoque tempore eam in Lacedæmoniorum potestatem venturam: Alexander extra septentrionalem plagam, & pænè dicam habitabilem terram discesserat: Antipater multum iam temporis in cōparando exercitu consumserat, sed qualis, & quantus esset futurus, erat obscurum. Hic nunc ostende, Demosthenes, quæ gesseris, quæ dixeris. ego tibi, si tibi commodum est, contione cedam, quoad dicendi finem feceris. Taces. Et quidem tibi ignosco, si nihil tibi, quod dicas in mentem venit. verùm ego ipse nunc quæ tu tum dicebas, commemorabo, atque exponam.

Excide-

Exciderunt ne vobis è memoria, Athenienses, verba illa dura, odiosa, obscæna, intolerabilia, quæ miror vos, ò ferrei, patienter audire potuisse: cum ita diceret è loco superiore, Sarmenta ciuitatis certi homines amputant: Quidam populi palmites exciderunt: Rerum nervi succisi sunt: Storcearum instar in angustum cogimur: Quidam podicem quasi acubus aut mugilibus transfodiunt. Virum sunt hæc verba, ò bellua, an portenta? Quid cum te in omnem partem versans in contione dicebas tanquam Alexandri rebus aduersans: Fateor, me Lacedæmonios ad consentiendum & conspirandum contra Alexandrum concitasse: fateor me Thessalos ac Perrhæbos ad defectionem impulisse. Tunc vicum vllum ad defectionem impellas? Tunc non dico ad urbem, sed domum vllam, vbi sit aliquis periculi metus, accedere atque aspirare audeas? minime, minime verò. Sed sicubi pecunia expendatur, adsidebis, atque harebis, nihil viro dignum geres: siquid optatum ac lætum casu euenerit, id tibi vendicabis, te ipsum ad res iam confectas ac transactas auctorem adscribes: si quis metus alicunde oblatus sit, aufugies: si bene speremus, bonoque animo simus, præmium posces, & aureas coronas postulabis. Esto. At popularis est. Si vos compositum, cultum, & venustum dicendi genus, quo homo vititur, spectabitis, decipiemi- ni, vt & iam antea sæpe decepti estis: sin eius naturam, rei que veritatem intuebimini, nunquam id quidem vobis accidet. Hoc igitur modo potius rationem ab eo re- poscite. Considerabo vobiscum quænam esse oporteat in ciuis popularis ac temperantis natura: & rursus altera ex parte constituam vobis ob oculos, qualem verisimile sit esse hominem paucorem dominationi studen- tem, ac fauentem, hominem nequam atque improbum: vos autem his duobus inter se comparatis, spectate iam mihi non vtro dicendi genere vtatur Demosthenes, sed vtrum viuendi institutum sit secutus. Vos igitur omneis arbitror mihi assensuros, hæc in homine populari in-

esse oportere: primum ut à paterno, maternoque genere liber sit, ne quis propter fortunam infiman atque infelicem infensus sit legibus, quæ populi potestatem continent, incolumemque conseruant: deinde ut ab eius maioribus profecta sint aliqua in populum beneficia: vel, quod est necessarium maximè, nullæ sint eis cum populo inimiciæ susceptæ, ne, dum maiorum suorum casibus aduersis & calamitatibus opitulari, eorumque iniurias vlcisci & persequi studet, eadem opera ciuitatem oppugnare conetur: tertio loco, ut domi in quotidiani victus cultusque ratione frugi sit ac temperans, ne propter luxuriam, sumtusque immane in libidine & flagitio positos largitionibus se corrumpi sinat, turpemque sibi questum contra remp. instituat: deinde ut integritatem ac probitatem habeat cum eloquentia coniunctam: præclarum est enim oratorem consilio & ratione res optimas suscipientem ac sequentem, easdem doctrina politum dicendique facultate instructum auditoribus explicare ac probare posse: sed si alterutro carentum sit, bona mens anteponenda eloquentiæ est: postremò cum forti animo esse oportet, ne in rebus aduersis, & difficultibus reip. temporibus, & in bellis populum deserat. At hominem paucorum dominationi studentem ac fauentem, alijs omnibus, planèque contrarijs studijs deditum esse còuenit. Quid enim ea vobis iterare opus est? Videte igitur quid illorum, quæ suprà enumeravi, insit in Demosthene. Atque hæc consideratio adhibeatur ad illa omnia, quæ in homine populari diximus inesse debere. Fuit isti pater Demosthenes Præanicus, vir fortuna liber (non enim mentiendum est) genus autem eius maternum, auique materni quale sit dum vobis expono, quæso, diligenter, ut adhuc fecistis, attendite. Gylo quidam fuit Cerameicus. hic Nympharum templo, quod in Ponto est, hostibus prodito, quo tempore locum illum ciuitas in potestate, ditioneque sua tenebat, solum exsullij causa vertit, cum supplicium extremum, quo damna-

tus erat, subire noluiſſet. Hinc in Boſporum proficiſci-
tur. ibi cum hortos, qui vulgò appellantur, à tyrannis
dono accepiffet, vxorem ducit ſanè diuitem, ac bene
nummatam, magnàmque vim auri ſecum afferentem:
ſed genere Scythidem: ex qua duas filias ſuſcepit. Eas
huc cum grandi pecunia miſſas in matrimonium collo-
cauit, alteram vxorem duxit neſcio quis, (neque enim
attinet me nominare, quenquam, ne mihi multorum ini-
micitias conſtem) alteram ſpretis ac neglectis legibus ci-
uitatis Demoſthenes Pæaniæus, ex qua vobis homo re-
bus ſuperuacaneis atque inanibus deditus, & calumnia-
tor Demoſthenes natus eſt. Negari igitur non poteſt,
quin & ab auo materno populi Athenienſis hoſtis ſit:
(eius enim maiores capitis damnauiſtis) & à materno ge-
nere, Scythæ & barbarus, & voce duntaxat Græcus: quo
ſit, vt improbitate non ſit ciuis Atticus, neque Atheni-
ſis, ſed aduena & peregrinus. Iam verò ſi eum ex quoti-
dianæ vitæ ratione ſpectare velitis, qui homo eſt? ex tri-
rarcho orationum ſcriptor & cauſidicus euasit, bonis
paternis ridiculè diſſipatis, atque abſumptis. Deinde cum
in hoc negotio perfidioſus compertus & cognitus eſſet,
orationeſque, quarum nomine pretium iam acceperat,
aduerſarijs impertiret: repente in ſuggeſtum proſiliit.
cum ingentem à ciuitate pecuniam accepiffet, perpufil-
lam ſibi reliquam fecit. Nunc verò aurum regium ſum-
tus eius effuſos irrigauit atque alluit. ſed ne hoc quidem
ſatis eſt. Nullæ enim vnquam diuitiæ prauis ingenij vora-
ginem explere potuerunt. Denique, vt in ſumma dicam,
victum ſibi non ex ſuis veſtigialibus, ſed ex incommodis
& periculis veſtris quærit & comparat. De mentis verò
bonitate, dicendique facultate, videamus qualem eum
natura finxerit. verbo expediam. Oratione diſertum, vi-
ta turpem. Sic enim corpore ſuo uſus eſt, ſic liberis pro-
creandis operam dedit, vt flagitia, quæ in ſe admiſit, cõ-
memorare nolim. Vidi enim iam nonnumquam, qui al-
terius dedecus ac turpitudinem nimis apertè declaraf-

sent, ac palàm protulissent, eos nihil inde præter odium atque inuidiam esse consecutos. Quid tum postea? quid ex hac præclara eloquẽtia quæritur ciuitati? verba com-
ta atque ornata, facta humilia atque abiecta. Iam de for-
titudine per mihi breuis restat oratio. Nam si vel se ipse
ignauum esse negaret, vel vos eum ignoraretis, diutius
esset mihi in hoc loco commorandum. Nunc autẽ quan-
do & ipse fatetur in contionibus, & vos ad vnum scitis:
reliquum est, vt leges, quæ his de rebus latæ sunt, vobis
in memoriam redigam. Solo scriptor legis antiquus ijs-
dem pœnis oportere obstringi atque affici putabat, &
eum, qui militiam subterfugisset, & eum, qui locum in
acie non tenuisset, & eum, qui timidus miles fuisset. Sunt
enim etiam contra timidos atque ignauos iudicia con-
stituta. At qui mirabitur fortasse quispiam vestrum, etiam
propter ignauiam & naturam, quæstiones esse constitu-
tas. Sunt. quid ita? vt vnusquisque nostrum pœnas legi-
bus irrogatas magis quàm hostem extimescens, tãto for-
tius pro patria decertet. Lator legis igitur eum, qui mili-
tiam subterfugit, & eum, qui locum non tenuit, & eum,
qui hostem extimuit, & iustralibus vasis prohibet, & fo-
ro arcet, & verat corona donari, nec ad sacrificia vni-
uersi populi nomine instituta admittit. Tu verò, quem
per leges corona donare non licet, ei nos tuo decreto
imponere coronam iubes: tuo decreto tragœdis in or-
chestram hominem indignissimum vocas: ad Liberi pa-
tris sacrum, eum, qui sacra & fana omnia ignauia & timi-
ditate coactus prodidit, inuitas. Sed ne vos ab instituto
sermone longius abducam: facite vobis in mentem ve-
niat, cum se dicit esse popularem, non orationem eius,
sed vitã spectare: neque quem se esse prædicet, sed quis
sit attẽdite. Verùm quoniam iam de coronis & præmijs,
quæ dari solent à populo, mentionem feci, antequàm
mihi è memoria excidat, prædico vobis, ac multo antè
denuntio, nisi hæc multa & infinita dona ac præmia re-
primetis, nisi has, quæ temerè & pessimè, nouoq; exem-

plo à vobis tribuuntur, coronas tolletis, neque eos, quos ornatis, præmiòque atque honore afficitis, gratiam vobis habituros, neque res ciuitatis fore meliores. improbos enim nunquam hac ratione sanabitis: bonorum animos frangetis ac debilitabitis. Quæ quidem verè à medici, hoc vobis erit magno argumento. Siquis vos roget, Athenienses, utrùm his temporibus rerum gestarum gloria nostrâ ciuitas magis florere videatur, an maiorum nostrorum: neminem vestrùm negaturum arbitror, quin hanc ciuitatem maiores nostri longè florentiorem, & gloriosiore viderint. Utrùm tunc, an nunc viri meliores? tunc quidem virtute præstantes, nunc verò multo deteriores. At præmia, & coronæ, & præconia, & quotidianus victus in Prytanéo utrùm tunc erant, an nunc, crebriora? tunc quidem ea, quæ sunt apud nos præclara atque honesta, rarò tribuebantur, & virtutis nomen erat in magno honore ac pretio: nunc res ipsa sordibus obsolescit, atque adeò ludibrio est: denique coronas donatis non consilio & iudicio adducti, sed mala consuetudine deprauati. Hoc igitur rem ipsam attentius cõsiderantibus meritò absurdum, minimèque consentaneum esse videatur, præmia nunc increbuisse, ciuitatis potentiâ tum maiorem quàm nunc fuisse: nunc homines esse deteriores, tunc viros fuisse meliores. At ego vobis quâobrem hoc ita accidat, ostendere conabor. Putatisne, Athenienses, futurum vnquam fuisse, vt quisquam vel ad quinquatrus, vel ad aliud quodpiam certamen coronarium, pancratium, aut aliud aliquod grauioris luctæ genus se exercere vellet, si non fortissimus quisque, sed is, qui victoriam vel pacto aliquo interposito, vel gratia consecutus esset, corona donaretur? Nunquam quisquâ se exerceret. Nunc autem, opinor, propter certaminis raritatem, & propter rei, de qua cõtenditur, dignitatem, & pulchritudinem, propter nominis denique æternitatem atque immortalitatem, quæ ex victoria oritur, reperiuntur nonnulli, qui corporibus suis in discrimen obla-

tis, grauissimisque laboribus susceptis quoduis periculum adire non recusent. Fingite igitur, virtutis ciuiliſ præmia, à vobis ipsis esse constituta, vósque huius certaminis sedere iudices, & simul illud considerate, si paucis ac dignis, & secundum leges præmia tribuatis, compluris vobis virtutis certatores exstituros: sin cuius, & ei qui pactus fuerit, gratificemini, etiam bona ingenia corrupturos. Quæ quidem à me rectè ac verè dicta esse intelligetis, si vos propositis exemplis paullo apertius docuero. Vter vobis vir melior fuisse videtur, Themistocles, qui tum classi exercitusque præfuit, cum prælio naturali ad Salaminem commisso Persas deuicistis, an Demosthenes, qui locum in acie reliquit? Miltiades, qui Marathoniam pugnam barbaros fudit, ac superauit, an iste, qui hostem nunquam ausus est rectis oculis intueri? ij, qui populum exsulantem à Phyla reduxerunt, an Demosthenis similis? postremo Aristides, cui iusto cognomen fuit, multum ei cognomini, quod Demosthenes habet, dissimile; an Demosthenes? Atqui nefas mediis fidius esse puto iisdem diebus de hac bellua, & de viris illis meminisse. Ostendat igitur Demosthenes in ea oratione, quam habiturus est, vbi decretum sit, vt quisquam illorum virorum corona donaretur. Ergo ingratus erat populus? minimè. imò & populus magni & excelsi animi, & illi, qui hoc honore affecti non sunt, hac ciuitate dignissimi. Non enim se litteris, sed eorum, qui beneficium acciperant, memoria, quæ quidem ex illo tempore vsque ad hodiernum diem immortalis manet, ornari se putabant oportere. Sed operæ pretium est commemorare, quænam præmia, quæque munera conſequebantur tum qui de rep. bene merebantur. Fuerunt temporibus illis, qui diuturno labore perfuncti, magnisque periculis aditis apud Strymonem fluuium Medos fortiter pugnando deuicerunt. hi cum victores & incolumes huc reuertissent, præmium à populo petiuerunt. dedit eis populus magna (vt tum quidem videbantur) præmia, nempe vt in porti-

cu Mercuriali treis Mercurios lapideos statuerent, ea lege tamen, ne sua nomina inscriberent, vt non imperatorum, sed populi inscriptio videretur. Esse autem vera ea, quæ à me dicuntur, ex ipsis versibus cognoscetis. inscriptum est autem hoc modo in primo Mercurio.

Ergo & erant illis fortissima pectora, quorum

Strymonis ad ripam gloria parta manet.

Primi etenim Medus ferroque, famæque peremptis

Inuenere suis hostibus exitium.

Secundi hæc inscriptio est.

At populus gratus meritis pro talibus, atque

Fori i animo ducibus præmia digna dedit.

Pro re vt communi hæc cernens perferre labores

Audeat olim hominum post genitorum aliquis.

Tertius autem sic inscriptus est.

Ex hac vrbe olim Mnestheus comitatus Atreides,

Examen duxit Pergama ad alta virum.

Quem tum Meonides Danaorum bellipotentum

Præstantem cecinit Marte fuisse ducem.

Sic sibi Cecropidæ non ducunt esse inhonestum

Virtutis dici, militis, que duces. Est ne hîc vsquam

ducum nomen litteris expressum? nusquam. sed est populi Atheniensis. Adite igitur animis & cogitatione ad porticum Pœcilam. omnium enim rerum præclararum extant vobis in foro monumenta. Quid igitur illud est, Athenienses, quod ego dico? hîc Marathonîa pugna depicta est. Quis erat imperator? Neminem sanè vestrûm esse puto, qui non hoc ita rogatus, Miltiadem respondeat. At illic nusquam eius nomen inscriptû est. quid ita? non petiuit hoc præmijs? petiuit quidem, sed populus nō dedit. verûm ei pro nominis inscriptione concessit, vt primus milites cohortans pingeretur. In æde igitur Matris deorum ad curiam quod præmium ijs, qui exsulem à Phyla populum reduxerunt, tribueritis, cernere potestis. populiscitû scripserat, & obtinuerat Archinus Cœleus, vnus ex ijs, qui populum reduxerunt. Decreuit au-

tem primum vt eis in sacrificium, & donum, quod in tem-
 plis deorum immortalium suspenderetur, drachmæ mil-
 le attribuerentur. At ex ea summa si viritim distribu-
 tur, decem drachmæ ad vnumquenque non peruenient.
 Deinde iubet vnumquenque oleagina, non aurea co-
 rona donari. Erat enim tum oleagina corona, pretiosa:
 nunc autem etiam aurea pro nihilo putatur. Neque verò
 vt id senatus inconsideratè, temerèque faceret, decer-
 nit, sed vt diligenter, accuratèque videret, quàm multi
 ex ijs tum in Phyla fuissent obsessi, cum Lacedæmo-
 nij, & triginta tyranni in eos inuaserunt, qui Phylam
 occuparant, non quàm multi locum ad Chæroneam re-
 liquissent, quo tempore hostes exercitum aduersus nos
 eduxerunt. Quæ quidem verissimè à me dicta esse, reci-
 tato vobis decreto cognoscetis. Recita. **DECRETVM**
DE PRÆMIO IIS, QUI A PHYLA POPVLVM REDV-
XERVNT PERSOLVTO. Recita verò ex aduerso etiā
 id populiscitum, quod Ctesiphon scripsit Demostheni,
 grauissimorum malorum architecto atque auctori. **PO-**
PVLI SCITVM IN DEMOSTHENEM A CTESIPHON-
TE SCRIPTVM. Hoc populiscito, eorum, qui populum
 reduxerunt, præmium deletur: si hoc honestum est, illud
 turpe: si illi meritò honore affecti sunt, hic immeritò co-
 rona donatur. Verum ego audio, eum esse dicturum, me
 facere iniustè, qui res à maioribus gestas cum suis actio-
 nibus conferam. Non enim (inquit) Philemon pugil O-
 lympico certamine coronam eò adeptus est, quod pugi-
 lem illum antiquissimum Glaucum, sed quod suæ ætatis
 certatores & pugiles superarit. Quasi verò nesciamus
 pugilibus inter se propositum esse certamen: ijs autem,
 qui coronam poscunt, cum ipsa virtute, cuius causa co-
 rona donantur, certandum esse. Præconem enim, verum
 esse, atque à mendacio longissime abesse oportet, cum
 apud omnes Græcos in theatro de quopiam prædicat.
 Quare noli nobis pluribus verbis demonstrare, te remp.
 melius, quàm Patæcionem administrasse, sed hoc osten-

de te ex administratione reip. probitatis atque integritatis laudem esse consecutum: ita demum beneficij tui gratiam à populo repete. Sed ne vos ab instituto sermone longius abducam, epigramma, quod in eos, qui populum à Phyla reduxerunt, scriptum est scrib, avobis recitabit.

EPIGRAMMA.

Virtutis causa hos populus vetus auxit honore,

Qui oppressis patriæ legibus imperium

Aggressos primi ex vrbe eiecere, periclis

Offerre haud veriti corpora pro patria.

Propterea quòd eos, qui contra leges dominati fuerant, è ciuitate eiecerunt, omnique iure ciuitatis priuarunt, honore affectos esse dicit. Hærebat enim etiã tũ in auribus atque in animis omniũ, neque dum è memoria effluxerat, populum illo maximè tempore funditus euersum fuisse, postquam nonnulli iudicia de decretis contra leges factis sustulerunt. Nam, vt ego de patre meo audiebam, (qui anno ætatis suæ nonagesimo quinto excessit è vita, cum quidem omnium in ciuitate laborum ac periculorũ socius ac particeps fuisset) is igitur cum vacuus esset, mecum sæpe loquebatur: dicebat autem primis illis temporibus, quibus populus fuerat reuocatus, siqua accusatio de decretis cõtra leges factis in iudicium deducta esset, nomẽ & factum apud eos planè fuisse similia. Nam quid eo, qui cõtra leges aliquid vel agit, vel dicit, sceleratius excogitari queat? Itaque, quemadmodum ille mihi narrabat, longè alia, quàm nunc solent, ratione indices audiebãt. Erant enim in eos, qui decreta contra leges scripssent, acerbiores, atque infestiores, quàm accusatores ipsi. sæpe numero scribam recitantem reuocabant, iubebantque legum, & decreti recitationem iterare: damabantur denique ij, qui contra leges aliquid scripssent, non si leges omneis transilijssent ac neglexissent, sed si vnam duntaxat syllabam immutassent, aut inuertissent. At perridiculum est, quod nunc fieri solet: scriba decre-

tum recitat contra leges factum: iudices proinde quasi carmen aliquod, & cantilenam, aut rem à iudicio alienam, nihilque ad id quod agitur, pertinentem, audiant, aliud agunt, eorumque aures peregrinantur. Iam verò Demosthenis artibus turpissimam cōsuetudinem in iudicia sensim irrepere passi estis: versa sunt & commutata in peiorem partem iura ciuitatis. Accusator enim defendit: reus accusat: iudices quarum rerum iudices ac disceptatores sedeant, interdum obliuiscuntur: quarum rerum iudices non sunt, de ijs ipsis rebus sententiam ferre coguntur. reus si quando de re ipsa, causaque dicere cōperit, dicit non se legitima scripsisse, sed alium iam antea cū talia scripsisset, absolutum esse, quo quidem exemplo magnōpere confidere, magnōsque spiritus sumere Ctesiphontem audio. Atqui ausus est aliquando Aristophon ille Azenieus apud vos gloriari, se iudicia de decretis contra leges factis septuaginta quinque effugisse. Sed non ita priscus ille Cephalus, qui maximè popularis est habitus, non ita, inquam, sed planè contrarijs factis gloriabatur, cū diceret, se, cū plurimā omnium decreta scripsisset, nunquam tamen de decretis contra leges factis reum factum esse: & præclare, mea quidem sententia, meritōque gloriabatur. Nam de decretis contra leges factis nomina deferebant inter se non ij modo, qui in rep. versabantur, verū etiam sodales & amici, siquid aduersus remp. commisissent. Cui quidem rei illud vobis erit testimonio. Archinus Cōeleus Thrasylbulum Stirieum de decretis contra leges factis accusauit, cū hic quiddam contra leges decreuisset, videlicet vt vnus ex ijs, qui secum è Phyla in urbem reuertissent, corona donaretur: & reum peregit, recentibus etiam tunc eius erga populum beneficijs: quorum tamen rationem nequaquam iudices habuerunt. Existimabāt enim quo modo tum ipsos exsulanteis à Phyla Thrasylbulus reuocasset, ita & nunc se in vrbe constitutos ab eo eijci, atque exturbari, cū aliquid cōtra leges decerneret. Sed nunc

non

non ita fit: quin planè aliter. Vestri enim prælati imperatores, & nonnulli ex ijs, qui victum quotidianū in Prytanéo meruerunt, iudicia de decretis contra leges factis pro alijs deprecātur: quos quidē vos meritò ingratos iudicare debeatis. Siquis enim in ea rep. in qua penes populum est dominatio & potestas, honores & præmia cōsecutus, in tali præsertim ciuitate, quam & dij, & leges incolumē seruant, audet ijs, qui decreta contra leges faciunt, opitulari, eum ipsum reip. statum, à quo ornatus est, funditus euertit. Quænam igitur defensionis ratio patrono iusto ac modesto præscripta est? Dicam. In parteis treis diuiditur is dies, quo die accusatio de decretis contra leges factis in iudicium deducitur. Infunditur enim aqua prima accusatori, legibus, populi dominationi, ac maiestati: secunda reo, & eius defensoribus ac patronis, vbi crimen, quod in iudicium allatum est, prima sentētia dissolutum non fuerit: tertia iam aqua litis æstimationi, vestræque iræ, ac seueritati infunditur. Quisquis igitur in æstimatione litis tabellam iudicalem petit, iram vestram deprecatur. At qui in priore actione à iudicibus tabellam petit, iurandum petit, legem petit, populi dominationē petit: quorū neque quicquā quemquā petere, neq; eum, à quo petitur, alteri condonare fas est. Iubete igitur, vt sinant vos secundum leges primam sententiam ferre, atque ita demum litis æstimationi occurrant: denique, vt vno verbo absoluam, Athenienses, pænè dicam, in accusatione duntaxat de decretis contra leges factis, lex hæc feratur oportet, ne liceat neque accusatores dicēdi adiutores ac subscriptores, neque reo patronos adhibere. Non est enim ius incertum aut infinitū, sed vestris legibus terminatum ac definitum. Nam vt in arte fabricandi cum quid rectum, quid non, scire volumus, regulā adhibemus, qua rectum à prauo discernitur: sic in accusationibus de decretis contra leges scriptis, regula iuris, nempe hæc tabula, quæ leges receptas & ratas cōtinet, ad decretum contra leges compositum,

& ad leges item contra legum veterum & probatarum auctoritatem scriptas adhibetur, atque adponitur. Hæc ubi inter se concinere & congruere ostenderis, tum descende. Quid te Demosthenem aduocare attinet? Nónne cùm iusta ac legitima defensione prætermissa, callidum & versutum hominem, & artificem verborum aduocas, auribus insidias comparas? ciuitatem detrimento afficis? populi dominationem labefactas? Sed quæ tandem ratio huiusmodi verborum vitandorum ac propulsandorum reperiri potest? Dicam. Simulatque huc prodierit Ctesiphon, & cùm hoc sibi compositum à Demosthene procœmium pronuntiabit, tempúsque dicendo consumet, nihil denique ad iustam defensionem afferet: vos eum admonete, vt sine clamore ac strepitu, tabulam, quæ leges continet, in manus sumat, legesque cum decreto recitatas conferat, & contendat. Quòd si dissimulabit se audire quid dicatis, ne vos quidem eum audite. Non enim ad hoc iudicium delecti venistis, vt eos, qui iustam ac legitimam defensionis rationem fugiunt, audiatis, sed eos, qui se rectè atque ordine defendere parati sunt. Sin iusta defensione prætermissa, Demosthenem vt pro se dicat, hortabitur, atque implorabit: primùm nolite ferre veteratorem & versutum hominem, sperantem se leges verbis euersurum. Neque sibi quisquam ex hac re virtutis laudem quærat, si rogante Ctesiphonte, liceát ne per vos Demosthenem aduocare, primus clara voce respondebit, *VOC A VOC A*. In teipsum vocas, contra leges vocas, cōtra populi dominationem ac maiestatem vocas. Sed si vobis Demosthenes audiendus esse videatur, postulate vt eo modo Ctesiphontem defendat, quo modo ego accusaui. Quónam pacto accusaui? hoc ferè pacto, vt vobis in memoriam redigam: Ego non prius priuatam Demosthenis vitam explicaui, non vllius publici criminis mentionem feci, cùm huius generis magna mihi copia suppeteret, alioqui omnium hominum infantissimus, summáque dicendi inopia affectus essem:

essem: sed primo loco ostendi, leges disertè vetare, ne corona donentur ijs, qui rationum referendarum iudicio teneantur: continuoque certissimis argumentis demonstraui, & peruici, oratorem Ctesiphontem decreuisse, vt Demosthenes, is, qui iudicio referendarum rationum teneatur, corona donaretur, nulla præfatione vsus, non aliqua honesta oratione præposita, nulla speciosa causa prætexta, non adscriptis denique verbis illis, POSTERAM QVAM RATIONES RETVLERIT: sed vobis, ac legibus planè despectis & contemptis. præterea causas, & recusationes, quibus ad hæc vsurus est, exposui: quas vt memoriæ manderis, etiam atque etiam à vobis peto & contendo. Deinde leges de præconijs vobis, recitandas curavi, quibus apertè cautum, & sancitum est, ne de eo, qui à populo corona donatur, extra contionem prædicetur. At orator, qui his legibus reus est, non solum leges neglexit, ac violauit, verum etiam tempus & locum prædicationi faciendæ constitutum perturbauit, vtpote qui decreuerit, vt non in contione, sed in theatro: non in contionem vocatis Atheniensibus, sed tragœdis iam iam in scenam prodituris prædicatio fieret. His expositis pauca de priuatis Demosthenis flagitijs & sceleribus attingi: magnam partem in publicis criminibus oratio mea versata est. Sic igitur & Demosthenem existimatote pro se & Ctesiphonte dicere debere: primum ad legem de ijs, qui rationum referendarum iudicio tenentur: deinde ad eam, quæ de præconijs lata est, respondere: tertio loco ad illud longe omnium maximum & grauitissimum, ipsam præmio ne dignum quidem esse. Quod si vos oret, vt de ordine dicendi suo sibi arbitrato statuere liceat, promittens se in postrema defensionis parte, crimen de decreto contra leges facto dissolutorum, caute hoc ei concedatis: neque vos fugiat, hanc esse veluti luctam ad eludendum ac supplantandum iudicium callidè comparatam. Non vult enim postea ad crimen decretorum contra leges factorum respondere: sed cum habeat causam ab om-

ni iure & æquitate derelictam, alijs rebus interiectis in
 obliuionem totius accusationis vos adducere cogitat.
 Quemadmodum igitur in certaminibus gymnics vide-
 tis, pugiles inter se de corporis statu decertare: sic & vos
 cum eo totum diem pro ciuitate, & de dicēdi ordine de-
 pugnatē: neque eum sinite extra crimen decretorum cō-
 tra leges factorum longè à re proposita euagando ora-
 tionem producer e: sed toti in audiendo occupati, & huic
 veluti loco infidentes & inhærentes, eum ad orationem
 eum causa coniunctam, earumque rerum, de quibus agi-
 tur, propriam reuocate: verborum denique ambages &
 declinationes à re proposita, quibus vti solet, diligenter
 obseruate. Meo autem officio non alienum esse puto vo-
 bis exponere ac prædicere quæ sint vobis euentura nisi
 Demosthenem hoc modo audietis. Producet enim ho-
 minem præstigiatores, crumenarum sectorem, reip. ve-
 xatorem & carnificem. Hic enim facilius ad lacrymas &
 ploratum, quàm alij ad risum impellitur: omnium verò
 facillimè ad periurium perducitur. neque mihi mirū ac-
 ciderit, si repente sese immutans, & à ploratu ad conui-
 cia transferens, in eos, qui foris circumstant, maledicta
 congeret, dicetque, homines paucorum dominationi
 studēteis, & hoc numero ab ipsa veritate habitos, ad ac-
 cusatoris suggestum: populares autem, & libertatis stu-
 diosos, ad rei subsellia venisse. Hæc igitur cūm dicet, il-
 lud ei ad orationem seditiosam ac turbulentam contrā
 opponite: Si, qui è Phyla populum reducerunt, tui simi-
 les fuissent, Demosthenes, nunquàm populi dominatus
 esset constitutus. nunc autem illi difficillimis reip. tem-
 poribus, extremoque pæne discrimine ciuitatem cōser-
 uarunt, pulcherrimo illo & ab humanitate, doctrinæque
 profecto verbo vsurpato, NE QVIS PRISTINARVM
 INIURIARVM REMINISCERETVR. At tu præterita
 vulnera refricas, atque exulceras, maiorque tibi oratio-
 num in diem elaboratarū cura est, quàm ciuitatis. Cūm
 autem homo assiduè in periurio versatus, ad fidem iure-
 iurando

iurando faciendam confugiet, illud eum admonete, ei, qui peierare consuevit, semperque apud eosdem sibi fidem esse iurato postulat, duorum alterum suppetere oportere, quorum neutrum consecutus est Demosthenes, aut deos novos, aut non eosdem auditores. Iam quod ad magnitudinem vocis & lacrymas attinet, cum ita è vobis quæret, Quò confugiam, Athenienses? si me ex rep. circumscribetis, non est quò me recipiam. Hæc ei contrà referte: At populus Atheniensis, Demosthenes, quò confugiet? ad quas sociorum opes & copias? ad quem apparatus? ad quam pecuniam? quod præsidium, quod propugnaculum per tuas actiones, & res gestas populo comparasti? Nam quibus rebus tibi consulueris ac prospexeris, omnes videmus. Vrbe enim relicta, non (vt hominum opinio est) in Piræo habitas, sed cò loci ex vrbe demigrasti, vt siquid aduersi accidat, è portu fugam capeffas. Ad sumtum autem itineris, nequitia atque ignavia tuæ aurum regium, pecuniámque in perniciem reip. nefarie captam, & cõciliatam prouidisti ac præparasti. Denique quid sibi volunt tuæ lacrymæ? quid clamor? quid vocis magnitudo & cõtentio? Nónne reus est Ctesiphon? nónne causa certam litis æstimationem, certámque pœnam non continet? tu autem neque de fortunis, neque de capite, neque de fama & existimatione tua decernis. Quatandem igitur de re laborat? de coronis aureis, & de præconijs contra leges in theatro pronuntiandis. Quem, si populus aut furore præceps, aut qualia sint tempora ciuitatis, qualisque reip. status, oblitus tam alieno tempore corona donare vellet, ipsum in contionem prodire, atque hanc orationem habere oportebat: Coronam, Athenienses, quam mihi decreuistis, non aspernor, neque reijcio: tempus, quo prædicatio coronæ facienda est, improbo. Non enim cõuenit propter quas res in luctu & squallore fuit, comámque totondit ciuitas, propter eas res me corona donari. Sed hac quidem oratione vteretur, verè vir bonus, & qui vitã cum vera atque expressa vir-

tute cōiunctam vixisset. quæ tu dices verò, scelerati sunt hominis, virtuti obtrectâti, eiûsque inanem imaginem, umbrâmque cōsecrantis. Non enim me Dius Fidius metuendum est, ne Demosthenes magni scilicet et vir animi, & rei militaris gloria excellens, præmiorum repulsa accepta, domum reuersus, mortem sibi ipse conciscat: qui vsque adeò laudis & gloriæ apud vos studia deridet, ac pro nihilo putat, vt hoc pusillum caput rationum referendarum iudicio obstrictum atque obligatum, quod iste contra leges omneis coronandum decreuit, decies milies dissecuerit: cuius quidem rei vberriam mercedem tulit, accusationibus de vulnere consultò illato institutis: colaphis denique à Midia contusus, pugnisque concisus est: quorum etiam nunc, opinor, extant in eius capite manifesta vestigia. habet enim homo non caput, sed vestigal. Iam porrò de Ctesiphonte, qui scitum scripsit, pauca mihi nunc arbitror esse dicenda. Multa autem præteribo, vt periculū faciam de vobis vtrum homines improbitatis notis insigneis, etiam si vos nemo admoneat, ipsi per vos internoscere possitis. id tantum, quod istorū vtriusque cōmune est, quòdque de vtroque apud vos verè & meritò dici potest, vobis exponam. Isti igitur in foro inambulant, veram alter de altero opinionem habentes, vocésque minimè falsas iactantes. Negat se Ctesiphon de se quicquam timere: sperat enim, se idiotam, & imperitum visum iri: sed Demosthenis in administranda rep. quæstus flagitiosos, & pecunias turpissimè contra remp conciliatas, vesanum ac stupidum pauorem, timiditatem, atque ignauiam, ea verò se nō mediocriter perterritescere confirmat. Demosthenes contrà cū in se ipse intuetur, se bene sperare, bonoque animo esse prædicat: sed Ctesiphontis improbitate, & vita in lenocinio versata vehementer commoueri ac perturbari. Quamobrem quando alter alterius opinione ac sententia, iniuriarum & flagitiorum contra leges admissorum condemnatus est, eos vos cōmunes vtriusque iudices nullo modo absolvere,

soluere, aut crimine liberare potestis. Nunc autem pauca mihi de maledictis, quæ in me congesturi sunt, videntur esse prædicenda. Audio enim, Demosthenem dicturum ex suis consilijs atque actionibus, maximas ad ciuitatem nostram vtilitates peruenisse: à me verò eandem permultis damnis affectam, grauissimisque incommodis afflictam esse: & simul Philippi & Alexandri potentiam, eorūque malorum, quæ illi nobis inuexerūt, causas, & crimina mihi attributurum. Est enim (vt videtis) vsque adeò callidus verborum opifex, vt nō satis habeat vel ea, quæ ego in rep. gessi, vel orationes, quas apud vos habui, vituperare, sed etiam otium meum, & illud omne tempus, per quod negotia publica nō administraui, malitiosè criminetur, meūque silentium vituperet ac iudicio persequatur, nequis ei locus scilicet à calumnia vacuus relinquatur. cœtus quoque ac sermones, quos in gymnasijs habui, reprehendit. Postremò ne hoc quidem iudicium ei culpa vacat, qui statim initio dicendi ait me hanc accusationem non studio ciuitatis adductum suscepisse, atque in iudicium deduxisse, sed vt me Alexandro ostentarem propter inimicitias, quæ illi cum isto intercedunt. Et verò, vt ad me defertur, ex me quæsiturus est, cur ego caput rerum à se gestarum reprehendam, atque in iudiciū vocem, singulis actionibus non obstiterim, neque eas accusarim: sed longo interuallo, & cum in rep. administranda non assiduè versatus essem, hanc causam in iudicium deduxerim. Ego verò neque Demosthenis victus, vitæque consuetudinem, & cœtus ab eo haberi solitos, imitari vnquam studui, neque me meorum institutorum pudet, neque eorum, quæ apud vos locutus sum, pœnitet, neque ea, quæ à me dicta sunt, non dicta velim, neque si easdem atque iste habuit, contiones habuissem, manendum mihi in vita putarem. silentium autem meum, Demosthenes, ex vitæ meæ cōtinentia, frugalitate, & moderatione natum est. Paruo enim contentus maiora turpiter non concupisco. Itaque & si-

lento vtor, & ad dicendum venio consilio, iudicioque adductus, non sumtibus effusus, & luxuria in animo, ingenioque insita coactus. At tu pecunia accepta, opinor, elinguis ac mutus fuisti: consumpta autem ac profusa vociferatus es, clamoremque sustulisti. Dicis autem non cum tibi videatur, neque ea, quæ velis, sed cum tui largitores, tuarumque operarum conductores tibi imperarint. Neque ea te pudet & tibi arrogare, & alijs attribuere, quibus in medium prolatis continuo mendacij conuinceris. Nanque hæc accusatio, qua decretum tuum persequor, quam me non ut ciuitati consulerem, sed ut me Alexandro ostentarem, suscepisse & instituisse dicis, deducta est in iudicium Philippo etiam tum viuente, prius quam Alexander regnum obtineret, quo tempore nondum tuum illud de Pausania somnium videras: nondum cum Minerua & Iunone nocturnos sermones habueras. Cur me igitur Alexandro ante tempus ostentarem? nisi fortè ego ac tu idem somniauimus. At reprehendis me quod non assidue, sed spatio interposito, verfer in rep. agamque cum populo: & nos ignorare existimas, te hanc vitæ rationem, quam in me desideras, non ex populari dominatione, & ciuitate libera, sed ex alia reip. administrandæ forma longè diuersa, ac dissimili huc transferre. Namque in ciuitatibus, quæ paucorum arbitratu, nutuque reguntur, non is, qui vult, sed qui dominatur, alterum accusat: in ciuitatibus verò liberis, & in quibus penes populum summa potestas est, is, cui commodum est, & quandocunque ei videtur. Et verò cum aliqua intermissione temporis dicere, virum ex reip. temporibus, & ex vtilitate communi, muneribus publicis fungentem indicat atque arguit: nullum verò tempus intermittere dicendi, operarij est, omnia quæstus ac mercedis causa facientis. Cum autem ad hanc orationem cōfugis, nondum te à me accusatum esse, nōdum tuorum facinorum poenas dedisse, vel auditores obliuiosos esse existimas, vel te ipsum falsis rationibus in fraudem inducis ac decipis.

pis. Nam & corū, quæ impiè sceleratèque in rebus Amphissensum commisisti, & pecuniarum in rebus Eubois turpiter captarum, nūdinationūque tuarum fortasse propter diuturnitatem & longinquitatem temporis, quod intercessit posteaquàm tu à me manifestò deprehensus & conuictus es, populum oblītum esse speras. Rapinas verò tuas in triremibus & trierarchorum præfecturis improbissimè atque impudentissimè versatas, quænam temporis diuturnitas obliuione obruere aut obliterare queat? cū tu lege de trecentis nauibus lata, perpulsoque tua oratione populo, vt te rei nauali præficeret, deprehensus es à me sexaginta quinque naueis actuaris trierarchis ademisse? quo factò maiorem ciuitati nostræ classē subripuisti, quàm quæ tum suppetebat cū Athenienses nauali prælio, quod in Naxo commissum est, Lacedæmonios, Pollimque eorum ducem superarūt. Sic autem criminibus in alijs inferendis pœnas tibi debitas obsepisti, atque obuallasti, vt non tibi, qui omnia iura diuina atque humana violaſti, sed ijs, qui tuas iniurias, tuæque facinora iudicio persequuntur, periculum capitis & fortunarum impendeat, dum tu Philippum & Alexandrum inter calumniandum crebris sermonibus vsurpas, assidueque in ore habes: dum certos homines tempora ciuitatis ad rem bene gerendam idonea impedire insimulas: ipse præsentem occasionem, atque in manibus positam perdis & profligas, futura, & in incerto euentu collocata promittis, & venditas. Ita que ad extremum paucis antè diebus, quàm ego tibi nomē deferrem, tuo consilio, tuæque opera Anaxinus Orita comprehensus est, is, qui Olympiadi rebus emundis operam dabat, eundemque virum tua manu discruciaſti ac distorſisti, composito prius decreto, per quod eum extremo supplicio afficiendum censerēs, apud quem in Oreο deuersabare: quocum ex eadem mensa cibum ceperas, biberas, libaueras: cuius dexteræ dexteram iunxeras: cum quo amicitiam confirmaras, hospitiumque feceras: quem ami-

cum atque hospitem appellaras, cum, inquam, interfecisti: & cum tu huius sceleris ac perfidiæ audiente atque inspectante vniuerso populo Atheniensi à me conuictus tenereris, atque hospitis interfecto nominatus esses, non factum impium negasti, sed ea respondisti, ad quæ & populus, & quicumque aduenæ contionem circumfistebant, clamorem sustulerunt: dixisti quippe, te ciuitatis salem, hospitali mensæ prætulisse. Falsas epistolas taceo, speculatorum comprehensiones, tormenta adhibita ob crimina neque in quenquam conuenientia, neque vnquam in iudicium deducta, quasi ego in vrbe cum certis hominibus rebus nouis studerem. Audio præterea, cum ex me quæsiturum, qualis ille medicus habendus sit, qui ægro interea dum ægrotet, nullum consilium det, nihilque præscribat, aut præcipiat, illo demum mortuo, nonoque post mortem die, cum ad sacrificia nouendialia venerit, commemoret quædam mortui propinquis, quæ si diligenter æger obseruasset, conualuisset. Ex te ipso autem non quæris, Demosthenes, qualis sit ille contionator, populique magister, qui populum blanditijs & assentatiunculis delinire & corrumpere sciat: tempora, quibus ciuitas conseruari poterat, vèdiderit: ciueis optimè sentienteis, improbissimè calumniando à reip. administratione arceat, atque à consilio dando remoueat, ac deterreat: è maximis periculis elapsus atque seruatus, & detrimentis insanabilibus ciuitati importatis se virtutis ergò corona donandum esse contendat: nihil vnquam boni effecerit, omnium malorum atque incommodorum nostrorū architectus & auctor fuerit: quorū res gestas ijs temporibus, quibus ciuitatem seruari licebat, calumniatus sit, eos nunc interroget, cur se multa temerè in rep. molientem, & peccantem non compresserint, cur talia comittere non prohibuerint. Illi verò nunc denique tibi ira responderint: Proelio iam commisso, Demosthenes, otium nobis non erat de tuo supplicio cogitandi, sed de salute ciuitatis legatis huc & illuc missis agebamus,

bamus, atque in hac re vna toti eramus occupati. Verū enim verò quando tibi non satis est pœnas non dedisse, quin etiam præmia poscis, quo factò assequeris, vt ludibrio sit Græcis omnibus nostra ciuitas, hîc tibi obuiam ire, hîc te in iudicium adducere institui. Et mehercule eorum omnium, quæ dicturum esse Demosthenem audio, hoc quod iam vobis dicam, indignissimè fero. Ingenium meum cum Sirenibus comparat, si dijs placet: ab illis enim auditores non permulcentur, aut delectantur, (inquit) sed perduntur ac necantur. ex quo fit vt de earum cantu male existiment homines: sic meam dicendi facultatem vsu & exercitatione comparatam, meamque naturam, ijs, qui audiūt, damnosam, ac perniciosam esse. Atqui cū hanc de me orationem, neminem omnino decere putem: (turpe est enim accusatorem ea crimina, quæ cūpiam verbo obiecerit, re demonstrare non posse) tum, si quis hac oratione necessariò vti debeat, eam non Demostheni, sed imperatori alicui, & forti viro accommodatam esse existimo: qui res magnas, & ciuitati vehementer vtileis gesserit, à dicendi autem facultate deferatur: atque iccirco eloquentiam suis aduersarijs à natura tributam admiratione dignam & vehementer expetendam iudicet: cū intelligat, se nihil eorum, quæ fortiter & præclarè gesserit, oratione explicare posse: accusatorē contrà videat, etiā ea, quæ ille non egerit, sic in eorū cōspectu ponere, oculis que subijcere, vt ab eo administrata & perfectā esse videātur. Nunc verò cū homo totus ex verbis cōflatus atque cōcretus, hîsque acerbis & molestis, odiosè accuratis ac putidis, ad orationis simplicitatem, & factā confugit, quis æquo animo ferat? cui si quis linguam, vt tibijs, demserit, nihil reliquum fecerit. Atque equidem vos demiror, Athenienses, cupiòque de vobis audire, quid nam sitis in hac accusatione vestris sententijs improbanda, & Ctesiphonte absolueno secuturi, quid spectaturi. An quòd scitū legitimū est? at nullum fuit vnquam magis cōtra leges scriptū. an quòd

is, qui scitum fecit, est innocens, neque ullam poenam meretur? Ergo nullæ sunt apud vos rationum vitæ referendarum leges, nulla iudicia, si hunc absoluetis. Atquid nonne illud grauer atque acerbe ferri debet, si olim quidam coronis aureis, quibus populus à Græcis donabatur, orchestra circumfluebat, quia hic dies coronis externis constitutus erat: nunc autem vos ex ijs consilijs atque institutis, quæ in administranda reipublica secutus est Demosthenes, neque coronis donati, neque præconijs ornati estis: hunc vox præconis corona dignum prædicabit? Atquid si quis ex poetis tragicis, qui paullo post histriones in scenam producturi sunt, faceret in tragœdia Therisitam à Græcis corona donari, nemo vestrum ferret, quoniam dicit eum Homerus ignaum & sycphantam fuisse. Vos autem cum tali homini coronam imponetis, non putatis vos tacita Græcorum opinione exhibilatum iri? Patres enim vestri res gloriosas, amplas, & præclaras populo adscribebant, humileis autem & abiectis, & vobis inferiores atque indignas, in malos oratores conferebant. At Ctesiphon arbitratur, quam ignominiam maculam Demostheni detraxeritis, eam vos populo inurere oportere. Et tamen dicitis vos fortunatos esse, ut & estis, & esse debetis. Atquid decernetis, vobis fortunam quidem defuisse, Demosthenem autem benignè fecisse. Iam, quod est omnium absurdissimum, in iisdem iudicijs eos, qui de donis ac muneribus turpiter & flagitiose capti damnati sunt, infamia notatis: ei, quem ipsi scitis mercede reipublice administrasse, coronam imponetis? Et iudices Dionysiacos, qui iniustam atque iniquam de choris in orbem circumactis, & tralatitijs, & communibus sententiam tulerint, multare soletis: vos ipsi, qui non tralatitijs & communium chororum, sed legum & virtutis ciuilibus iudices sedetis, præmia non ut leges præscribunt, neque paucis ac dignis, sed ei, qui pactis & condicionibus interpositis, & per factionem obtinuerit, tribuetis? Et ex iudicio discedet talis iudex, qui seipsum infirmum,

atque

atque imbecillum, rhotorem robustum ac potentem effecerit? Nam priuatus homo in ciuitate libera, & in ea rep. in qua populus dominatur, lege & tabella iudiciali dominatur, & regnat: vbi verò hæc alteri condonarit, ac tradiderit, primùm suam ipse dominationem euertit: deinde iurisiurandi quidem religio, qua obstrictus iudicat, assiduè eum comitans, & asscctans angit & sollicitum habet: (nam propterea, opinor, quòd iusiurandum violauit, culpa est commissa) beneficij verò gratia ei, à quo gratiam inire voluit, obscura est. Non enim sententia palàm fertur, sed in tabellæ latebra delitescit. Mihi porro videmini, Athenienses, & consiliorum incautorum prosperos euentus habere, & in rep. administranda omnia fortunæ temeritati permittere: nihil consideratè faciētes. Nam quòd vos multo maxima pars ciuitatis, præsertim his dubijs temporibus, neruos & firmamenta dominationis ac potestatis popularis paucis traditis ac proiecitis, laudare non possum: quòd nostra ætate factus oratorum non extitit, qui improbitatem habeant cum audacia coniunctam, felicitati nostræ assigno. Talia enim ingenia tulit quondam resp. quæ hoc modo populū facile perdiderunt. blanditijs enim & assentatiunculis delectabatur. Ita illum non ij, quos metuebat, sed ij, quibus seipsum commiserat & crediderat, funditus euerterunt. Nonnulli verò ex ijs etiam ipsi in numero triginta tyrannorum fuerunt, atque amplius mille quingentos ciueis indemnatos, ne criminibus quidem auditis, propter quæ erāt vitam amissuri, necauerunt: non ad sepulturas mortuorum, non ad exsequias cohonestandas propinquos conuenire sinebant. Ergo eos, qui remp. administrant, in potestate vestra non habebitis? non hos, qui nunc rebus secundis elati & feroces insolescunt, percussos ac deiectos in alias terras amandabitis? Non venit vobis in mentem, nunquàm quemquam ad delendū populi principatum accessisse, prius quàm opes iudiciorum auctoritate maiores sibi cōparasset? Libenter equidem, Athe-

nienſes, vobis præſentibus, atque audientibus, cum iſto, qui decretum ſcripſit, perpendere & conſiderare velim, propter quæ Demotheſenis in remp. merita, ei coronam deberi contendat. Nam ſi dicis (vnde tui decreti principium duxiſti) propterea quòd fossas mœnibus obductas pulchrè deſcripſit, ac perfecit: demiror te. Maiore enim reprehensione dignum eſt, eum cauſam cur fossis egere-mus, fuiſſe, quàm ſi opus minus rectè effectum eſſet. Nō enim oportet eum, qui remp. bene geſſiſſe dicatur, eò præmium petere, quòd vrbs muros aggere & vallo munierit, quòd fossas obduxerit, quòd publica ſepulcra excitarit, ſed quòd magni alicuius boni auctor ciuitati fuerit. Quòd ſi venies ad ſecundam decreti partem, in qua ſcribere auſus es, Demotheſenem eſſe virum bonum, & ſine vlla intermiſſione eas res & dicere & agere, quæ populo Athenienſi ſint vehementer vtilis, detracta arrogantia, ac iactatione verborum, facta ipſa in manus ſume: declara nobis atque oſtende quid dicas. Pecunias, quas cōtra remp. cepiſti, quæſtūsque ſordidiſſimos, quos in rebus Amphiffenſibus, Euboicis que feciſti, prætermitto. Cū autem ſocietatis cum Thebanis factæ cauſas Demotheſeni attribuis, ignaros quidem totius rei homines fallis ac decipis: eos verò, qui ſciunt & intelligunt, contumelia afficis. omiſſo enim tempore, ſublatâque horum gloria & maiestate, propter quæ hæc ſocietas facta eſt, obſcurū nobis eſſe exiſtimas, te ciuitatis dignitatem atque amplitudinem in Demotheſenem transferre. Quanta autem & quàm impudens ſit hæc arrogantia, ſigno luce clariore vobis planum facere conabor. Rex Perſarum paullo antè, quàm Alexander in Aſiam penetraret, miſit ad populum Athenienſem valde contumelioſam, & planè barbaram epiſtolam: in qua cū alia valde inhumane, & insolenter loquebatur, tum illud in extrema ſcripſit: EGO VOBIS AVRVM NON DABO: NOLITE AME PETERE. NON ENIM ACCIPIETIS. Hic idem periculis, in quibus etiam nunc verſatur, circumuentus atque

atque oppressus, populo Atheniensi non petenti trecenta ipse vltro talenta misit: quæ tamen non accepit, summa in eo moderatione, & abstinentia usus. Tempus igitur, metus, sociorum egestas, aurum ad nos pertulerunt. Eadem planè res Thebanorum societatem effecerunt. Atquæ tu Thebanorum nomen in ore semper habes, & infelicissima illa societate commemoranda nos obtundis: sed septuaginta talenta ex auro regio, quæ tu præcepisti, atque auertisti, taces. Nónne ob difficultatem rei nummaria cum quinque talenta duntaxat externi milites in stipendium poscerent, Thebanis arcem tradere noluerunt? Nónne cum Arcades ab bellum excitati suas omneis copias eduxissent, ducésque eorū opem ferre parati essent, propter nouem talèta res confecta non est? At tu diues es, habésque vnde tuis voluptatibus sumtum suggeras & suppedites, & vt in summa dicam, aurum regium penes istum est, pericula vobis relicta sunt. Sed operæ pretium est eorum inscientiam, atque inhumanitatem considerare. Nam si Demosthenem aduocare audebit Ctesiphon, vt apud vos verba pro se faciat, & iste consensu suggesto se ipsum laudabit, factis ipsis, quæ vobis acciderunt, quæque pertulistis, grauior vobis erit oratio. Nam cum eos, qui re vera sunt fortes & boni viri, quibúsque multarum ac præclararum rerum gestarum testes & conscij sumus, laudes ipsi suas prædicent, ferre non possimus: vbi is homo, quem totius ciuitatis dedecus ac propudium esse constat, seipsum laudibus efferre cœperit, quis eum patièter audire poterit? Quapropter, Ctesiphon, si sapias, ab improbo atque impudenti negotio desistes, & causam tuam per te tueberis, ac defendes. Non enim hanc excusationem poteris afferre, te non esse instructum ad dicendum. Namque hoc tibi per absurdum acciderit, si nuper quidem te legatum ad Cleopatram Philippi filiam populi suffragijs creati passus es, vt eam de Alexandri Molossorum regis morte consolaretis, parique cum ea molestia afficereris, nunc autem te

vllam dicendi facultatē habere negabis. Et alienā mulierē lugētē oratione consolari potes, scripto autē abs te mercenario plebiscito te ipse non defendes? An veidō talis est is, quem corona aurea donandum censuisti, vt ab ijs, qui ab illo beneficium acceperūt, ignoretur, nisi quis se in dicendo tibi adiutorem præbeat? Quære ex iudici-
bus, nouerānt ne Chabriam, Iphicratem, Timotheum, & simul ab ijsdem cognosce, quamobrē illis præmia dederint, statuāsque posuerint. Respondebunt omnes se Chabriam præmio affecisse propter pugnam naualem ad Naxum commissam: Iphicratem, quia Lacedæmoniorum legionem occidione occidit: Timotheum, propter navigationem Corcyrę obsidione liberandæ causa susceptam: ceteros denique propter multas cuiusque res ac præclaras in bello gestas. At si quis vos ita roget, Demostheni præmium cur negabitis? respōdeatis, quia pretio habuit addictam fidem, quia sese muneribus corrup-
pēdum præbuit, quia timidus atque ignauus est, quia locum in acie non tenuit. Vtrū igitur hunc honore, an potius & vos ipsos, & eos, qui pro vobis in proelio occubuerūt, ignominia afficietis? quos, per deos immortales, putate vos videre, deorum atque hominum fidem imploranteis, suāque condicionem lamentabili voce deploranteis, si futurum est, vt à vobis homo iste corona donetur. Namque acerbè atque indignè, Athenienses, ferendum est, si cū ligna, lapides, ferrum, res mutas denique, atque inanimas, sensūque carenteis, si fortē in aliquem inciderint, eūque exanimarint, exterminare soleamus, eiūque, qui sibi necem cōciuerit, manum, quæ hoc cōmiserit, separatim à corpore sepeliamus: Demosthenem, eū, qui bellum hoc postremum sua sententia confluxit, qui exercitum ex vrbe educendum censuit, qui milites prodidit, honore afficietis. Ergo contumelia afficiuntur cineres, & ossa mortuorum: debilitantur, & frangūtur animi viuorum, cū vidēt virtuti quidem pro præmio mortem esse propositam, memoriam autem sui nominis in-
terire.

terire . Iam quod est omnium maximum , si rogent vos
adolescentes , quódnam ipsi sibi vitæ exemplum ad imi-
tandum proponere debeant , quid respondeatis ? Scire
enim vos arbitror non in palæstris , non in ludis littera-
rum , nō musica tantum , sed multo maximè publicis præ-
conijs iuvenes institui atque erudiri . De aliquo prædica-
tur in theatro his verbis : *RV M VIRTVTIS AC FORTI-
TVDINIS ERGO , BENEVOLENTIAE QVE , QVAM ER-
GA POPVLVM ATHENIENSEM HABET , CORONA
DONARI* , hominem vitæ turpitudine , & omni flagitio-
rum genere contaminatum . Simulatque hæc vidit ado-
lescens aliquis , corruptus , ac deprauatus est . Poenas de-
dit aliquis improbus , in lenocinio , & dedecore versatus ,
vt Ctesiphon ? ceteri doctiores , melioriesque discedunt .
Aliquis factō contra bonos mores , contrāque leges ,
atque honestates omneis decreto , domum reuersus filiū
docere conatur . at huic furdo fabula narratur . Monere
enim & præcipere , meritò hīc obtundere nominatur .
Quapropter non solum quasi iudicātes , sed quasi in thea-
tro quodam constituti , atque omnium oculis observa-
ti , speciménque ingenij vestri præbentes , ita sententiam
ferre , vt habeatis quod ijs respondere possitis , qui huic
iudicio non interfunt , si fortè vos quid iudicaueritis , in-
terrogabunt . Nolite enim dubitare , Athenienses , quin
talis de ciuitate nostra opinio , atque existimatio futura
sit , qualem esse constat eum , de quo prædicatur . Atqui
turpissimum sit , vos non cum maioribus vestris , sed cum
Demosthenis ignauia , nequitiāque comparari . Quónam
igitur modo huiusmodi dedecus ac turpitudinem effu-
gere possitis ? dicam . si eos , qui liberalibus , & humanita-
tis plenis nominibus præoccupatis atque vsurpatis , inge-
nio , & moribus infidi sunt , caueatis . Beneuolentia enim ,
& dominatio popularis in medio positæ sunt . verum ad
eas plerunque properè confugiunt verbo , qui plurimum
ab ijs remoti sunt factō . Itaque cū oratorem coronar-
um , & præconiorum externorum cupiditate affectum

nacti fueritis, iubete eum orationem, quemadmodum &
 præconiorum confirmationes lex fieri iubet, ad vitam
 probatam, omni quæ laude dignissimam, ad mores castos
 ac temperatos reuocare, atque exigere. Cui verò hæc tes-
 timonia defunt, ei suas laudes constabilire nolite: publi-
 cæque libertatis, ac popularis dominationis curam ha-
 bete: quæ vobis iam paullatim de manib⁹ elabitur. Quid
 enim? non indignum vobis esse videtur, Athenienses, se-
 natum quidem, populûmque Atheniensem despici ac
 pro nihilo putari: litteras autem, & legationes non à
 contemtis, & fortè oblati hominibus, sed ab ijs, qui in
 Asia atque Europa principatû obtinent, missas ad ædeis
 priuatas peruenire? & quibus facinoribus extremum le-
 gibus supplicium constitutum est, ea facinora quosdam
 homines à se esse commissâ non negare, sed palàm apud
 populum cõfiteri, epistolâsque à longinquis regibus ac-
 ceptas inter se recitare? alios vos cohortari, vt à se tan-
 quam publicæ libertatis custodibus oculos nusquam de-
 moueatis? alios præmia poscere tanquam ciuitatis con-
 seruatores, ac salutis communis auctores? populum au-
 tem tristem, ac demissum, eorûmque incommodorum,
 quæ acciderunt, mærore tanquam senectute delirum,
 mente captum, ac dementiae damnatum, nomen solum
 dominationis popularis vsurpare, ac retinere: rem qui-
 dem ipsam alijs concessisse? deinde ex contionibus di-
 scedere non consilio capto, sed veluti conuiuij, in quod
 singuli collectâ contulerint, reliquijs inter se distributis?
 Ac ne vobis desipere videar, id, quod dico ex his confi-
 derate. Fuit hîc quidem (magno equidem cum dolore
 miseras ciuitatis sæpius commemoro) veruntamen fuit
 quidam homo priuatus, qui solum Samum nauigare co-
 natus, tâquam proditor patriæ eo ipso die à senatu Ario
 pagitico capitis damnatus, & supplicio vltimo affectus
 est. alteri item priuato Rhodum naui profecto, eo quod
 metum publicû molliter & imbecillè tulisset, nuper tan-
 dem nomen delatum est: ei autem pares numero tabellæ,

quæ

quæ damnarent, & quæ absoluerent, contigerunt. Quod si vna duntaxat salutaris defuisset, vel de ciuitate exterminatus, vel morte multatus esset. Cum illis igitur id, quod nunc fit, cōferamus. Orator omnium ciuitatis maiorum causa, qui locum in acie non tenuit, qui ex vrbe profūgit, is se aurea corona donari, ac virum bonum, fortēque voce præconis pronuntiari debere contendit: vos non vel hominem, vt communem Græcorū pestem & calamitatem amandabitis: vel de eo iam comprehenso, tanquam rerum quidem prædone ac pirata, in nominibus autem & vocabulis administrandæ reip. nauigante, poenas sumetis? Præterea facite vobis huius temporis veniat in mentem, quo tempore sentētiās ferre debetis. Paucis pōst diebus Pythia futura sunt, Græcorūque conuentus: ciuitas nostra magna hoc ipso tempore inuidia, infamiāque laborat, ex ijs rebus, quæ à Demosthene publicè administratæ sunt, conflata. Itaque si istum corona aurea donabitis, cum ijs, qui communem pacem perfringunt, ac violāt, consentire videbimini: sin aliter, populum Atheniensem his criminibus leuabitis, omnique inuidia liberabitis. Quapropter nō vt de aliena, sed vt de vestra ciuitate deliberate: neque liberalitatē & magnificentiam in alios conferte, sed de aliorum liberalitate iudicate: & præmia beneficiāque vestra in personis melioribus, virisque magis probatis collocate: neque solū auribus exquirentes, sed etiam oculis obseruantes, atque alter alterum aspicientes, quānam vestrū Demostheni auxilio futuri sint, considerate: utrūne qui cum eo vnā venabantur, an qui se cū eo, cū adolescens esset, gymnico certamine exercebant. At mediusfidius non in aprorum venatione, non in ceteris corroborādi corporis studijs versatus est, sed eas arteis assiduè coluit, atq; exercuit, quib⁹ aduersus locupletium fortunas vteretur. Sed vos iactantiam hominis, arrogantiamque spectantes, cū dicet se Byzantium sua legatione Philippo ademisse, Acarnanas ad defectionem perpulisse, Theba-

nos contionibus suis perterrefecisse (vos enim vsque adeò stultos & credulos esse existimat, vt hæc credituri sitis, proinde quasi suadelâ in vrbe vestra, non syeophantam alatis) cùm denique in extrema iam orationis parte prædarum suarum ac pecuniarum captarum socios sibi aduocabit, fingite vos intueri in hoc eodem pulpito, quo in loco ego nũc stãs dico, ex altera parte instructos, atque istorum luxuriæ, libidinĩque oppositos viros optimè de rep. meritos, Solonem, eum, qui pulcherrimis legibus publicæ libertatis, popularisque dominationis statum exornauit, virum & sapientiæ studio in primis deditum, & legum scriptorem præstantem, pudenter & modestè (vt eum decebat) vos orantem, atque obsecratem, ne vlllo modo Demosthenis verba pluris, quàm iurifuradi vestri religionẽ, legesque faciatis: Aristidẽ, qui vestrìgilia vobis pensitanda æquabili proportionẽ Græcis descripsit, cuius mortui filias populus in matrimonium collocauit, de iustitia contumeliosissimè vexata, indignissimè que protrita & conculcata, lamentabili voce deplorantem, & conquerentem: à vobis denique querentem, ecquid vos pudeat, cùm maiores vestri Arthmiũ Zelitã, quòd aurum à Medis acceptum in Græciam deportasset, in vrbe habitantem, cum quo populus Atheniensis hospitium publicè fecerat, pæne morte affecerint: eum quidem voce præconis prædicante ex vrbe, atque ex omni terrarum solo, quod populi Atheniensis imperio, dittonẽque tenetur, eiecerint: Demosthenem, eum, qui non aurum Medorum huc deportauit, sed qui sese auro corrumpi passus est: atque id etiam nunc domi cõditum habet, ac possidet, aurea corona donare? Iam verò Themistoclem, eosque, qui in Marathonia pugna mortẽ optinuerunt, & Plataenses, ipsa denique maiorum sepulcra, non putatis grauius suspiria, tristisq; gemitus editura, si is, qui sese Græcis vnà cum barbaris consociatum aduersatum esse cõfiteatur, aurea corona donabitur? Ego igitur ò Terra, Sol, Virtus, Intelligẽtia, Doctrina, qua res

honestas

honestas ab inhonestis discernimus, vobis opem, auxiliūque tuli, sinēmque dicendi feci. Atque equidem si bene, & pro magnitudine & grauitate criminis accusaui, dixi quo modo volui: sin deterius, quàm res postulabat, vt potui. Vos autem, Athenienses, cū ex ijs, quæ à me dicta sunt, tum ex ijs, quæ silentio prætermitto, videte vt pro ciuitate iustam, ac reip. vtilem sententiam feratis.

ARGVMENTVM ORATIONIS

DE CORONA, SEV PRO CTESIPHONTE,

Libanio auctore, eodem Dionys. Lambino

Monstrolienſi interprete.



MOENIA quidem orator opposuit Atheniensium hostibus, visitatis istis, & manufactis firmiora, & meliora, Græcorum in ciuitatem Atheniensium beneuolentiam, & singularem dicendi facultatem pari prudentia coniunctam, vt ait ipse his verbis: Non lapidibus, & lateribus Athenas sepsi ac mu-
niui, sed magnis copijs, & multorū Græciæ populorum societate, partim à terra, partim à mari. Veruntamen etiam ad vrbis murum manufactum non parum studij atque operæ contulit orator. Collapso enim multis partibus vrbis muro Atheniensibus, posteaquàm visum est populo eum de integro excitare ac reficere, electi sunt ad huius operis procurationem decemviri ex vnaquaque tribu, qui huic operi faciundo præessent. Nam sumtus de publico fiebat. Cū igitur Demosthenes ex his decemviris vnus esset à sua tribu factus, non, vt alij, solam curam ac diligentiam adhibuit, sed & opus omnibus suis numeris absoluendum curauit, ita vt nullus reprehensioni locus esset relictus, pecuniam autem domo depromptam in eo negotio administrando ad eam rem contulit. Laudauit hanc eius beneuolentiam senatus, eiūque in reimp. studium & animum aurea corona remuneratus est. Erant enim promti ac parati Athenienses ad gratiam bene de rep. meritis referendam. Fuit

autem Ctesiphon huius sententiæ auctor & princeps, Demosthenem esse corona donandum, quod ad tempus attinet, ludis Liberi patris: quod ad locum, in theatro: quod ad spectatores, Græcis omnibus inspectantibus, quos frequentissima Græciæ celebritas cœgerat: & his præsentibus ita à præcone prædicandum, Demosthenem Demosthenis filium Præanieum ciuitas corona donat omnis virtutis ergò, singularisquæ in eum beneuolentiæ. Erat igitur hic honos omni ex parte admirabilis. Quapropter inuidiæ impetum effugere non potuit, & Ctesiphontis scitum tanquam contra leges scriptum in iudicium vocatum est. AEschines enim Demosthenis inimicus, Ctesiphonti de decretis contra leges scriptis diem dixit, periculûmque creauit, cùm diceret, Demosthenem, qui magistratum gessisset, neque rationem retulisset, iudicio rationum referendarum etiamnum teneri: legem autem vetare, eos, qui rationum referendarum iudicio teneantur, corona donari. Præterea legem profert, quæ iubet, si quem populus Atheniensis corona donet, eius coronæ prædicationem in contione fieri: sin senatus, in curia: alibi autem non licere. Postremò ait Demosthenis laudes esse falsas. Non enim oratorem remp. bene administrasse, sed & nummarium esse populi moderatorem, & multorum malorum atque incommo-
dorum ciuitati causam fuisse. Hoc autem ordine in accusatione sua AEschines vsus est. Primum de lege, quæ ad eos pertinet, qui referendarum rationum iudicio tenentur, disputauit: secundo loco, de præconijs: postremo, de rebus gestis Demosthenis. Postulauit autem à iudicibus, vt cogant Demosthenem eundem ordinem seruare. At Demosthenes & à suis rebus gestis initium duxit, & in eas desit, summa in eo arte vsus. Nam faciendum initium est à firmioribus, & potentioribus, in eademque desinendum. Inculcauit autem ea, quæ posita sunt in legibus. Atque ei quidem legi, quæ de ijs, qui referendarum rationum iudicio tenentur, lata est, sententiam & voluntatem opponit: ei, quæ ad præconia pertinet, aliam legem, seu potius legis partem, vt ait ipse, per quam licet etiam in theatro prædicationem coronæ facere, si populus iusserit, & senatus decreuerit.

ALIVD ARGVMENTVM IN
certo auctore, eod. Lambino interprete.

ATHENIENSES & Thebani bellum cum Philippo gerentes ad Charonéam urbem Bœotia victi sunt. Victoria igitur positus Macedo, praesidium quidem Thebis imposuit: & ita eam urbem in sua potestate habebat iugo servitutis oppressam. Cum igitur timerent Athenienses ne idem sibi accideret, Philippumque cum infesto exercitu primo quocunque tempore aduenturum putaret, constituerunt muri parietibus vetustate corruptas & labefactas excitare & reficere. Atque ita ab unaquaque tribu curatores muris reficiendis nominatim declarati sunt. Pandionis autem tribus suum ad eum usum curatorem è suo corpore Demosthenem sumisit. Cum igitur in manibus esset huius operis procuratio, & præter eam pecuniam, quam Demosthenes à civitate acceperat, alia præterea desideraretur, neque illa satis esset, ipse de suo sumtum fecit, neque civitati expensum tulit, sed gratificatus, ac largitus est. Hac occasione Ctesiphon unus ex ijs, qui remp. administrabant, arrepta, scitum de eo fecit in senatu tale: Quoniam Demosthenes Demosthenis F. cum antea à vita singularem & perpetuam in civitatem benevolentiam declarasset, tum hoc tempore curator muris reficiendis à sua tribulectus, cum pecunia ei de publico data exhausta esset, aliâque præterea egeret, domo quantum opus erat, depromisit, & civitati largitus est: senatui, populoque Atheniensi placere, eum aurea corona donari in theatro, dum tragœdiæ novæ recitarentur: fortasse quo tempore multitudo undique convenire solet, novarum fabularum spectandarum cupiditate affecta. Cum igitur hoc S. C. ad populum perferretur, ut eius auctoritate confirmaretur, exoritur Ctesiphontis accusator Aeschines, inimicitias cum Demosthene gerens ex dissimilitudine studiorum & institutorum in rep. administranda susceptas, cum diceret, hoc scitum esse contra tres leges factum: unam eam, quæ vetat, iudicio rationum referendarum obligatum corona donari, priusquam rationes retulerit. Nondum autem Demosthenem rationes retulisse, cum pecuniam publicam & theatralem tractaret, & cu-

rator muris reficiendis præfectus esset. Expectandum igitur esse, præmiũque ad id tempus sustentandum, donec legibus solutus, atque integer re cognita reperiat. Secundam legem recitat, quæ iubet coronæ donationem ac prædicationem in Pnyce, hoc est, in conatione fieri, non in theatro, reprehendens eos, qui prædicationem coronæ Demostheni decreta, in theatro fieri æquo animo ferunt, & approbant. Tertia lex ad totam vitæ Demosthenis, & rerum publicè gestarum acquisitionem spectat. Vetat enim falsas litteras in ædem Bonæ deæ deferri, quæ in æde omnes litteræ publicæ, conditæ servabantur. Falsum autem complexus est plebiscito, inquit, quia Demostheni benevolentia ac studij in remp. testimonium dedit. Nam malevolus potius, & hostili in patriam animo reperitur. Hanc legem tertiam sibi vtilem arripens & retinens tanquam ancoram orator, aduersarium perculit, ratione sollertißima, artificijque plenissima in accusatorem usus. Hinc enim ansam & facultatem nactus est aduersarij capiendi ac superandi. Alias enim duas leges, & eam, quæ pertinet ad obligatos iudicio rationum referendarum, & eam, quæ est de præconijs, in medium coniecit, imperatorium in morem signa uos medios collocans: firmissima autem & validissima in extremis posuit, aliorum infirmitatem ac debilitatem utroque extremo stabiliens & confirmans. Videtur autem etiam orationem ex utilitate potissimum tractare, neque admodum apertè artem ostentare. Nam cum videatur principio legitimum præterire, alia quædam ratione etiam legitimo usus est. Cum enim AEschines legem recitasset de falsis tabulis, ad eam respondens orator, occasionem nactus est proferendarum in medium, atque explicandarum suarum publicarum actionum, rerumque gestarum, tanquam legitimo pugnas. Tractatio igitur orationis talis est. Firmamentum autem causæ, AEschini est legitimum, Demostheni iustum: utriusque æquè commune, vtile: quod tamen non admodum apertè enucleatur. Status est negotialis in scripto positus. De scripto enim questio est. Cum autem accusatio viuo etiam tum Philippo in iudicium deducta esset, Alexandro iam ad regni successionem vocato & oratio habita est, & iudicium commissum est. Nam simulatque interijt Philippus, & Thebani ex eius interitu suis viribus confisi, & fiducia pleni, præsidium, quod in Urbem Thebas imposuerat Philippus, eiecerunt:

erunt: primum Alexander iratus, tanquam ab ijs contemptus, Thebas funditus evertit: deinde cum eum facti pœnituiſſet, è Gracia de migravit pudore affectus, & Barbarus bellum intulit. Athenienſes autem occaſionem ſibi idoneam oblatam eſſe putauerunt, cauſa proditorum, qui Graciam iniuſtè leſerant, grauiffimisque iniurijs & incommodis affecerant, iudicio permittendæ. Atque ita iudicium commiſſum eſt. Primum igitur procœmium precatione & voto conſtat per diſtributionem inductum, & beneuolentiam parat, quæ hîc maxime Cteſiphonti & Demotheſi opus eſt. Ex Homero autem ſumptum atque imitatione quadam expreſſum eſt,

Diſque, deæque omnes mea, quæſo, attendite dicta. Elucet etiam in eo ſignificatio & declaratio fiduciæ in auditorum beneuolentia collocata. Non enim omne genus deorum appellaret atque imploraret, niſi hoc animo eſſet. Illud, quantam ſemper beneuolentiam erga ciuitatem habui, &c. è Cteſiphontis decreto ſumptum eſt. Declarat autem, ſe in omni vita anteacta beneuolentiam in populum Athenienſem præſtitiffe, eiûſque curam ſemper habuiſſe, prius denique animam, quàm talem in Athenienſis mentem ac voluntatem, profuſurum, ac proiecturum.

DEMOSTHENIS ORATIO

DE CORONA, SEV PRO CTESIPHONTE, Dionyſ. Lambino interprete.



PRIMUM à dijs, deabûſque omnibus immortalibus precor, Athenienſes, vt, quãtam ego ſemper erga ciuitatem noſtram, vòſque vniuerſos beneuolentiam habui, tantam vos in me in hoc iudicio conferatis: deinde vt, quæ res vobis, veſtræque religioni, & bonæ exiſtimationi vehementer vtilis eſt, eius rei dijs iſtis ducibus mentem, voluntatẽque ſuſcipiatis, vt ne aduerſarium conſulatis, quõnam modo me audire debeatis: (eſſet enim hoc ſanè miſerabile atque

ingemiscendum) sed leges, & iusiurandum in consilium adhibeatis: quo in iureiurando præter alia multa, quæ æquissimè descripta sunt, hoc etiam inest iustissimum, ut æqualiter vtrunque audiat: quod non hanc solùm vim habet, ne iudicia iam facta domo deferatis, atque ut parem vtrique benevolentiam præsteris, sed ut suo vtrunque litigatorum arbitratu dicere, eoque, quo instituit ordine, eaque, qua vult defensione uti sinatis.

Cùm multis igitur rebus AEschines in hoc iudicio meliore quàm ego condicione est, Athenienses, tū duabus vel maximis: primum quod non pari de re cum isto decerto. multum enim interest vtrum ego vestræ benevolentiae fructu spolier, an iste causam non obtineat: quin mihi quidem (sed nolo initio dicendi quicquam tristius dicere) isti verò superuacaneum est me accusare. Deinde quod omnibus hominibus natura attributum est, ut maledictis & vituperationibus libenter aureis patefaciant: eorum autem, qui se ipsi laudent, oratione grauius offendantur. Horum igitur duorum id, quod afferre voluptatem solet, isti datum est: quod omnibus (pæne dicam) graue & molestum accidit, id mihi relictum est. Ac si dum hæc vito & fugio, res à me gestas non commemoro: neque ea, quæ mihi ab isto illata crimina fuerunt, refellere ac dissolvere, neque res eas, pro quibus præmia mihi deberi dico, posse ostendere videbor: sin me ad ea, quæ feci, quæque gessi in rep. conferam, sæpenu-mero cogar ipse de me dicere. Quapropter ut id quàm modestissimè & moderatissimè faciã, dabitur à me opera diligenter. quicquid verò res ipsa, necessitasque flagitauerit, huius iste, qui mihi tale periculum creauit, meritò culpam sustinebit. Arbitror autem, iudices, vos omnibus confessuros, mihi cum Ctesiphonte hanc litem esse communem, atque eiusmodi, ut me in ea non minus studij atque operæ consumere, quàm Ctesiphontem, oporteat. Nam cùm rebus omnibus priuari graue, & acerbum sit, præsertim ab inimico, tum verò benevolentia
atque

atq; humanitate vestra spoliari tâto est miserius, quanto est eam colligere & cōsequi maius atque optabilius. Cùm sit igitur hisce de rebus hoc iudicium constitutum, peto à vobis omnibus, vehementérque contendo, vt me pro me dicentem, criminibúsq; aduersarij respondentem, iustè & æqualiter, quo modo leges iubent, audiat: quas is, qui ab initio tulit Solo, vir vestri amantissimus, & maxime popularis, non perscriptione solum & litteris ratas ac sanctas esse putauit oportere: sed vestro etiam omnium, qui res iudicaretis, iureiurando cōfirmavit, nequaquam vobis ille (mea quidem sententia) diffidens, sed cernens iam animo, quibus criminibus & maledictis accusator quòd priore loco dicat, superior est, ea crimina reum præuertere aut declinare non posse, nisi vnusquisque vestrúm, qui rebus iudicandis præestis, pietatem erga deos immortaleis colens ac retinés, tum eius, qui posteriore loco dicat, defensionem beneuolè accipiet, tum posteaquam se parem, communémque vtrique præbuerit auditoré, quid sibi de rebus omnibus statuendum sit, accuratè cogitabit. Verùm quando mihi hodierno die (vt video) & vitę priuatim actæ, & rerum publicè gestarum reddenda ratio est, placet rursus (vt initio dicendi feci) deos immortaleis appellare atque implorare. Precor igitur palàm, vobisq; inspectantibus atque audientibus, iudices, primùm vt quantam ego erga remp. & erga vos omneis beneuolentiam semper habui, tâtam mihi in hoc iudicio tribuatis: deinde vt dent vobis eam mentem dij immortaleis, vt, quod & ad communem omnium existimationem, & ad singulorum religionem conseruandam magnopere pertinet, id in hac causa iudicetis. Atque accusationem suam si iisdem finibus AEschines, quibus lis cõtinebatur, terminasset, ego quoque de ipso senatus consulto statim respondiissem: sed quâdo in alijs rebus, quæ nihil ad causam pertinerent, exponendis, non minus multam orationem consumisit: & simul de me plurima impudenter

ementitus est, necessarium esse existimo atque adeò iustum, pauca prius iisdem de rebus dicere, ut nequis vestrum verbis illis, quæ à causa remota sunt, adductus, alieniore, atque infestiore animo quam iura causæ postulant, me pro Ctesiphonte dicentem audiat. Atque ad eas quidem contumelias, quibus me propriè & priuatim petulantissimè vexauit, quàm simplicem, quémque iustam orationem referam, videte. Si me eum cognouistis, quem iste esse me criminatus est: (nusquam enim alibi quàm vobiscum vixi) ne vocem quidem mittere me conantem patimini, quamuis res omnino præclaras, maximèque laudabileis publicè gesserim: quin surgite, meque iam iam condemnate: sin isto multo & meliorem, & à melioribus ortum, nullo denique eorum, qui mediocri sunt loco, (ne quid grauius dicam) deteriorem me, meosque & existimatis, & nouistis, nec alijs de rebus isti creditore: (Perspicuum est enim omnia ab eo similiter esse conficta) mihi verò quam beneuolentiam omni superiore tempore multis in iudicijs ostendistis, nunc quoque præstate. Sed cum sis usque eo callidus atque improbus AEschinea, hoc tibi omnino stultè venit in mentem, putare me prætermissa illa de meis actionibus & rebus gestis oratione, maledictis tuis responsurum. Non faciam: non ita insanio: sed ijs de rebus primùm, quas tu vel in me falsò, ut à me gestas, contulisti, vel à me prudenter ac sapienter cogitatas atque administratas reprehendisti & calumniatus es, considerabo. Post ad impudentem istam & furiosam maledicendi, ac debacchandi licentiam, (si modo hi non grauabuntur audire) me conferam. Crimina igitur mihi illata sunt multorum atque atrocium facinorum, quibusque poenæ sunt acerbissimæ legibus cōstitutæ. Sed tota hæc accusatio nihil aliud habet propositi, quàm improbam inimici calumniam, petulantiam, conuicium, probrum, & contumeliam, ceteraque generis eiusdem. De ijs autem, quæ mihi crimini data sunt, etiam si vera essent, nostræ ciuitati poenas me-

meritas sumere, per AEschinem non liceret: quod mediusfidius, Athenienses, neque rectum, neque ciuile, neque iustum est, ne vlla quidem ex parte. Non enim ius adeundi ad populum, causæque dicendæ potestatem cuiquā eripere, nō in ea re dolori suo seruire, neq; maledicendi & petulanter alterum insectandi occasionem ex ea quærere oportet. Sed quæ me facinora committere in remp. videbat, cum præsertim essent tanta, quantamodò voce pæne tragica clamabat, eorum pœnas à legibus constitutas, recentibus etiam tum maleficijs, expetere, iudicióque persequi debebat: si res delatione nominis dignas admittere viderer, nomen meum deferre: & hac via me in iudicium vocare: siquid cōtra leges scribere ac decernere, accusationem mihi de decretis contra leges factis intentare. Non enim Ctesiphontem propter me iudicio persequi potest: mihi, si me coargui posset consideret, periculum non creasset. Atqui siquid eorum, quæ falsò in me conferebat, & quæ commemorabat, aut aliquid aliud sceleratè me aduersus vos committere animaduertebat, sunt leges de omnibus constitutæ, sunt multæ, sunt supplicia, sunt accusationes, sunt iudicia, quæ magnas atque acerbis pœnas continent: his omnibus ei vti licebat. Atque hæc cum fecisse, seseque hoc modo aduersus me gessisse videretur, cum eius facto consentiret accusatio. Nunc autem posteaquàm de iusta, rectaque accusandi via deflexit, meque re recenti coarguere vitauit, criminibus & cauillationibus, & maledictis tanto pòst interuallo in vnum collectis & congestis, histrionem se quendā nobis præbet. Deinde cum me verbo accuset, hunc re in iudicium vocat, atque huic tori accusationi & causæ inimicitias mecum susceptas prætexit: cumque mihi nusquam iudicium denuntiauerit, nusquam mecum conflixerit, nunquam mecū in certamen descenderit, alteri suam existimationem & incolumitatem eripere conari reperitur. Atquæ præter alia omnia, quæ quiuisset dicere pro Ctesiphonte possit, hoc

etiam mihi quidem commodissimè atque aptissime dicere posse videatur, æquum esse, ut inimicitias nostras ipsi inter nos geramus, non prætermisissis nostris inter nos contentionibus, alterum quæramus, cui calamitatē afferamus. hoc enim iniuriæ genus extra modum prodit. Omnium igitur criminum, quæ mihi oblata sunt, vnâ, eandemque planè esse rationem, nihilque in ijs peræquè inesse neque veri, neque iusti, ex ijs, quæ diximus, quiuvis intelligere possit. Verumtamen cum vnumquodque singillatim suis ponderibus examinare volo, tum ea maximè, quæ mihi de pace, & legatione falsò attribuit: res ab ipso vnà cum Philocrate administratas ac transactas, impudenter in me conferens. Est autem fortasse necessariū, & ad ea, quæ dicturus sum, vehementer pertinet, quo tunc temporis res essent loco, vobis in memoriam redigere, ut cum illo tempore, in quo ciuitas versabatur, singula comparantes, facilius ea perspicere possitis. Bello igitur Phocensi nato nulla mea culpa (non dum enim ad remp. accesseram) primū sic vos animis affecti eratis, ut Phocenseis saluos esse velletis, quamuis eos res nefarias atque iniustas fecisse videretis: Thebanorum verò casu quātumuis graui atque acerbo, siquid forte incommodi eis accideret, lætaturi essetis. neque verò immeritò illis succensebatis. Victoria enim Leuctrica eorum animos effecerat insolenteis, eamque felicitatē immoderatè rulerant atque intemperanter. Deinde vero vniuersa Peloponnesus dissidijs intestinis laborabat, nec qui Lacedæmonios oderant, tantum poterāt, ut eos euertere ac delere possent: neque qui antea illorum opera ac beneficio imperabant, ciuitates in sua potestate habebant: sed erat quædam tum apud hos, tum apud illos contentio ac perturbatio, quæ non facile diiudicari sedarique posse videbatur. Hæc cum videret Philippus (neque enim erant obscura) primū grādi pecunia singularum ciuitatū proditoribus effusa, eas omneis offensionum ac simultatum seminibus sparsis inter se

se concitabat, mutuísque discordiis exasperabat atque irritabat. Deinde, quibus in rebus alij grauius peccabát, maléque sentiebát, in iis se ipse ad bellum comparabat, in omnium perniciem, opes ac potentiam acquirebat, in omnium denique fortunas imminebat. Posteaquàm verò perspicuum omnibus esse cœpit, necesse futurum, Thebanos diuturno iam bello defessos ac fractos, tum feroceis quidem illos & odiosè insolentis, nunc graui fortunæ casu perculsos atque afflictos, ad vos confugere: id vt ne fieret, neque ciuitates consentirent & conspirarent, Philippus vobis pacem, illis auxilium pollicitus est. Quæ res igitur ei fuit maximo adiuuamento, vt vos, pæne dicam, vestra voluntate inductos, ac deceptos opprimeret? Reliquorum Græcorum siue improbitas, siue ignorantia, siue vtrunque: qui, cùm assiduum ac diuturnum bellum gereretur, idque pro communi Græcorum omnium vtilitate, quemadmodum res ipsa declarauit, neque pecunia, neque viris, neque re vlla omnino alia vos iuuerunt. Quapropter vos eis meritò, iustis que de causis irascentes, pacem petenti Philippo non inuiti auscultauistis. Ea igitur pax, quæ tum illi cōcessa fuit, propter has, quas dixi causas, non quo modo iste insimulauit, mea opera conciliata & constituta est. Istorum verò peccata atque iniurias, simulque turpissimos quæstus in ea pace institutos, pecuniásque nefariè captas, si quis rectè verèque perpendat, horum malorum, in quibus nunc versamur, causas esse reperiet. Atque ego hæc omnia studio veritatis adductus, accuratius persequor, ac subtilius disputo. Nam si qua in his rebus peccata maximè inesse videantur, omni tamen culpa vaco, nihilque illa ad me omnino pertinet. Quin is, qui primº de pace sententiam dixit, qui pacis mentionem fecit, Aristodamus histrio fuit: qui secundas partes egit, qui populi scitum fecit, denique qui se ipse cum isto ad hæc conficienda Philippo mercede accepta locauit, Philocrates Agnoscus fuit, tuus, AEschinas, sodalis, omniumque tuorum

confiliorum particeps ac socius, non meus, mentiendo
disrumpare licet. Eius autem sententiæ approbatores &
suasores fuerunt (causam in præsentia omitto dicere)
Eubulus, & Cephisophon. Ego verò nusquā quicquam.
Et tamen cū hæc ita se habeant, panēque ipsius veri-
tatis voce ita esse demonstrentur, vsque eò fuit impu-
dens, vt ausus sit hoc in loco dicere, me non modò pacis
auctorem fuisse, sed etiam ne ea ipsa pax in communi
Græcorum concilio à nostra ciuitate fieret, prohibuisse.
Et ô, quo te quis nomine rectè appellet, nescio: tūne vf-
quam, cū me tantam rem, tantāque societatem, quā-
tam nunc commemorabas, vocēque panē tragica con-
tendebas, ciuitati detrahare videres, tūne mihi vnquam
præstō fuisti? tūne grauiter atque indignè tulisti? aut, vt
hæc, quæ nunc arguis, doceres, ac proferres, in hunc lo-
cum processisti? Atqui si decretum illud, quo reliqui
Græci pacis communione excluderentur, Philippo ven-
dideram, reliquum erat tibi non vt taceres, sed vt clama-
res, testificarere, rem his aperires ac demonstrares. At tu
nusquam hoc fecisti, nusquam hæc tua vox audita est.
Neque verò ad quēquam omnino Græcorum tum mis-
sa erat legatio: sed erant omnium voluntates iandudum
patefactæ, certisq̃ue argumentis perspectæ: neque iste
quicquam his de rebus verè, sincerèque locut⁹ est. Præ-
terea huius ciuitatis splendorem & gloriam insignibus
infamiæ notis inquinat. Nam si vos vno tempore & re-
liquos Græcos ad bellum vocabatis, & ad Philippum le-
gatos de pace mittebatis, rem neque ciuitati vestræ, ne-
que viris bonis consentaneam ac decoram, sed planè
Eurybata dignam faciebatis. Verū non ita est, Athe-
nienſes, non ita est, inquam. Quorsum enim eos tali tem-
pore vocaretis? Ad pacem? At habebant omnes. Ad bel-
lum? At ipsi de pace deliberabatis. Perspicuum igitur est,
me pacis eius, quæ ab initio constituta est, neque ducem,
neque auctorem aut suasorem fuisse, neque quicquam
eorum omnium, quæ in me falsò contulit AEschines,
verum

verum esse. Iam igitur postquam nostra ciuitas pacem cum Philippo fecit, quid vterq; nostrum agere instituerit, quodque in rep. gerenda consilium ceperit, rursus ipsi cum animis vestris considerate. Ex his enim cognoscetis quis ille sit, qui omnibus in rebus operam Philippo nauabat, qui Philippi causa laborabat: quis altera ex parte, qui omneis suas actiones ad vestram vtilitatem referebat, qui summo studio reip. commodis inseruebat. Ego igitur cum senator essem, decreui ut quam primum legati eo nauigarent, vbi Philippum esse audiret, ut fidem ac iusiurandum ab eo acciperent. Isti autem ne hoc quidem à me decreto hæc facere voluerunt. Quam vim porro, Athenienses, hæc res haberet, ego vobis ostendam. Intererat Philippi, inter nostrum & ipsius iusiurandum, longissimum tempus intercedere: vestra, breuissimum. Quid ita? quia non ab eo tantum die, quo iurauistis, sed à quo pacem vos habituros sperauistis, omnem belli curam atque apparatus remisistis. ille autem ex omni tempore hoc maxime moliebatur & agebat, in eoque totus erat occupatus, existimans (id quod erat) quascunque res ciuitati nostræ præripuisset antequam iuraret, stabileis & fixas sibi haud dubie mansuras, neminemque earum rerum causa pacem diremturum. Quæ cum ego, Athenienses, animo prouiderem, mecumque reputarem, hoc decretum feci, ut in ea loca, quibus in locis esset Philippus, legati nauigarent, & iusiurandum fidemque ab eo confestim acciperent, ut Thracibus socijs vestris ea oppida, quæ nunc iste insectabatur atque irridebat, Serrium, Myrtion, Ergiscam etiam tunc tenentibus, pacis fœdera ferirentur: neque ille locis opportunis occupatis, Thracia potiretur: neque ex his, cum pecunia abundaret, magnamque militum numerum coactum haberet, magnam ad reliquas res aggrediendi facultatem haberet. Et tamen hoc decretum non commemorat, neque recitat AEschines: sed quod, cum senator essem, Philippi legatos introducendos putauerim, id mi-

hi loco criminis ponit, meumque factum malitiose calumniatur & reprehendit. At quid me facere oportebat? an, ne illis aditus esset in contionem, decernere, qui idcirco venerant, ut vobiscum loquerentur? an ne locus eis ab architecto spectandi gratia daretur, vetare? At duobus obolis, nisi hoc decretum fuisset, spectare potuissent. An me parua ciuitatis commoda seruare ac tueri, summam rem, quod isti fecerunt, Philippo vendere oportebat? minimè verò. Sume igitur hoc decretum & recita; quod iste prudens & sciens præteriuit. **DECRETVM.**

Mnesiphilo prætore pridie Kal. Quintileis, tribu Pandionide summam rerum potestatem obtinente, Demosthenes Demosthenis filius Pæanieus hanc sententiam dixit: Quod Philippus, qui legatos de pace misit, cum Atheniensibus rata fœdera percussit, senatui, populoque Atheniensi placere, quo pax suffragiis populi prima contione comprobata confirmetur ac transigatur: legatos ex omni Atheniensium numero quinque legi: qui ubi populi suffragiis fuerint approbati, sine ulla dilatione temporis, quoquo loco Philippum esse cognouerint, eò proficiantur, & iusiurandum ab eo primo quoque tempore accipiant, vicissimque dent super fœderibus, quæ inter illum & populum Atheniensem conuenerunt: eoque fœdere ac iureiurando utrorumque socios complectantur. Electi sunt legati Eubulus Anaphlystius, Aeschines Cothocides, Ctesiphon Rhamnusius, Democrites Phlyeus, Cleon Cothocides. Hæc ego temporibus illis cum scripssissem, cumque id vnum spectarem, non ut Philippo, sed ut ciuitati nostræ commodarem ac prodessem, boni isti & præclari legati, abiecta omni pane reip. cura, treis menseis continuos in Macedonia confederunt, usque eò dum veniret à Thracia Philippus, omnibus illius regni oppidis in suam potestatem redactis, cum decem diebus, immò tribus, aut quattuor quidem certè, in Hellsponum peruenire, & oppida iureiurando accepto priusquam ea ab illo expugnarentur atque euerterentur, seruare liceret. Vobis enim præsentibus nunquam ea attigisset, aut iusiurandum profectò ab eo non accepissemus: ita pace decidisset, neque vtraque, & pacem, & Thra-

Thraciæ oppida teneret. Primus igitur Philippi dolus, hominúmque istorum iniustorúm, ac dijs ipsis immortalibus iniquorúm quæstus improbissimº, & mercatus turpissimº legatione talis fuit, propter quæ & illo tempore, & nunc, & semper posthac me cum ijs bellum, atque inimicitias implacabileis gesturum profiteor. Iam mihi alterúm deinceps longè illo grauius flagitium attendite. Posteaquàm promisit Philippus se nobiscum pacem obseruaturum, Thracia iam istorum culpa (vt dixi) qui decreto meo nõ paruissent, occupata: hoc rursus ab istis redimit, ne ex Macedonia decederent, quo ad eam exercitum, quem contra Phocenseis comparabat, instructum atque ornatum haberet: veritus ne si vobis renuntiassent, eum breui tempore exercitum in expeditionem educiturum, exieris ipsi, & cum triremibus ad Thermopylas, quemadmodum antea, nauigaretis, locique illius angustias clauderetis: sed vno tempore & renuntiantibus istis hæc audiretis, & ille iam intra Thermopylas ingressus esset, neque huic rei mederi possetis. Tanto autem Philippus in metu versabatur, adeoque anxius & sollicitus erat, ne vos etiamsi loca illa præoccupasset, ea de re antequàm Phocenses perijissent, certiores facti, mittendum ijs auxilium decerneretis, atque ita res sibi de manibus elaberentur, vt impurissimum istum iterum non iam communiter cum ceteris legatis, sed ipsum separatim conduceret, quo ea vobis diceret ac renuntiaret, per quæ omnia funditus perierunt. A vobis autem, Athenienses, etiam atque etiam peto, vehementerque contendo, vt in hoc toto iudicio memineritis, si AEschines Ctesiphontem solum accusasset, nihilque extra causam dixisset, me quoque hoc tempore nihil aliud acturum fuisse, nisi vt eum, qui accusatus esset, defenderem: sed cum iste tota sua oratione intemperanter in me fuerit inuectus, meque falsis criminibus, probris, ac maledictis vexarit, ac lacerarit: mihi de memetipso tam multa dicendi, atque ad ea, quæ mihi obiecit, pauca respondendi necessitatem

ab eo impositam esse. Quæ sunt igitur verba illa, tum ab isto usurpata, quæ summam rem perdiderunt? Quod Philippus, inquit, Thermopylas introiit, tumultuari neminē vestrum oportet. Omnia enim vobis ex animi sententia procedent, si quiescatis. Et biduo, aut summum triduo illum ijs, quibus inimicus venit, amicum: contra ijs, quibus amicus, inimicum esse factum audietis. Non enim verbis, inquit, sed utilitatum similitudine & communitate amicitias conglutinari & confirmari solere, grauitè & magnificè pronuntians. Expedit autem Philippo, Phocensibus, & vobis peræquè, Thebanorum immani stupore, intolerabilique arrogantiâ defungi. Quæ quidem iucunda nonnullorum auribus accidebant propter odium illud in Thebanos illo tempore penitus in omniū animis insitum atque infixum. Sed quid est postea consecutum? vt non longo post tempore infelices ac miseri Phocenses interirent, vrbes eorum funditus delerentur: vos dum quiescitis, isti quæ obtemperatis, paullo post vasa, & omnem supellectilem ex agris in urbem comportaretis, iste aurum acciperet: denique præter illa omnia, illud in Thebanos ac Thessalos acerbissimum odium in ciuitatem vestrā redundaret: rerum gestarum gratia, Philippo quæreretur. Atque hæc ita esse, cognoscite & ex Callisthenis decreto, & ex epistola Philippi. ex vtriusque enim lectione vobis hæc omnia plana fiant. Recita decretū. DECRETUM.

Prætor Mnesiphilo, contione subito atque ex tempore ab imperatoribus aduocata, de moderatorum ciuitatis ac senatus sententia, vndecimo Kalendas Octobris, Callisthenes Eteonici filius Phalereus hanc sententiam dixit, placere. Ne quis Atheniensium, quācunque excusationem asserat, in agro pernoctet: sed in vrbe, & Piræeo, præter eos, qui sunt in præsijs collocati, ac distributi: quem autem quisque horum locum atque ordinem nactus est, eum ad extremum seruato, ita vt neque diem, neque noctē extra præsidium suum traducat. Qui huic decreto non paruerit, eum contra remp. fecisse iudicatum iri, & prodicionis pœnas daturum, nisi se vi aliqua maiore, ac necessitate, cui obsisti non potuit, impeditum esse docuerit. De ijs autem, quæ vim ac necessitatem attulisse dicentur, & imperator,

qui

qui exercitui, rei que militari præst, & is, cui ciuitatis procuratio com missa & commendata est, & scriba senatus cognoscunto. Ex agris autem primo quoque tempore omnia, quæ sunt intra quindecim millia passuum, in urbem, & Piræum deportantor: quæ his finibus non continebuntur, in Eleusinem, Phylam, Aphydnam, Rhamnuntem, Suniam conuehuntor. Dixit Callisthenes Phalereus. Nunquid vos hac spe ducti pacem faciebatis? aut hunc vobis exitum mercenarius iste pollicitus est? Recita nunc epistolam Philippi, subactis Phocensibus missam. **EPISTOLA PHILIPPI.** Rex Macedonum Philippus, senatui, populoque Atheniensi S. D. Scitis, nos Thermopylas ingressos esse, Phocidem sub imperium, ditionemque nostram subiunxisse: & in eas quidem urbes, quæ sese nobis adiunxerunt ac dediderunt, præsidia imposuisse: quæ verò cedere no:uerunt, eas vi & virtute captas, atque in seruitutem redactas, deleuisse. Cum igitur audirem vos exercitum comparare, quem Phocensibus auxilio mitteretis, visum est mihi ad vos scribere, ne diutius laboretis, nèue trepidetis. Nam omnino cum arma capitis, nihil mihi moderate facere videmini, qui cum pacem mecum feceritis, exercitum tamen contra me ducere paretis, idque Phocensibus nobiscum fœderum communionem non coniunctis. Quare si pacis cōditionibus stare nolueritis, nullare alia nobis eritis superiores, nihilque aliud assequemini, nisi quòd priores iniuriam feceritis. Auditis quàm aperte ostendat ac declaret socijs suis in hac, quam ad nos misit, epistola, & pæne ita loquatur Philippus, Ego hæc inuitis, & iniquo animo fereatibus Atheniensibus feci. Quapropter si vos Thebani, & Thessali sapitis, hos quidem in hostium numero ducetis, mihi autem fidem habebitis. quibus verbis litteratè quidem non est usus, verum tamen hæc significare atque ostendere voluit. Itaque illos his captos eo pellexit ac perpulit, ut nihil futuri prouiderent, nihil præsentirent, sed cum res omneis in potestatem suam redigere paterentur: vnde infelices Thebani in has calamitates inciderunt. Atque huius fidei apud illos comparandæ administer Philippo atque adiutor iste est AEschines, is, qui falsa vobis renuntiavit, qui vos in fraudem atque in errorem induxit: is, qui

modò Thebanorum casus & calamitates miserabiliter deplorabat: quàm graues, quàm luctuosi essent, multis verbis'persequebatur atque exponebat: in cuius persona,& horum,& eorum, quæ Phocensibus acciderunt, & illorum omnium malorum, quæ Græci pertulerunt, causa consistit. Scilicet enim, AEschinea, tu ijs, quæ Thebanis acciderunt, grauiter angeris, & Thebanorum misericordia commoueris, qui tot bona in Bœotia possideas, tot illorum agros colas: ego verò lætor, is, qui statim ab eo, qui hæc effecerat, ad supplicium deposcebar. Sed in eam orationem incidi, qua me posterius uti fortasse magis conueniet. Ad illa igitur reuertor, quibus ostendere cœperam, istorum quæstus nefarios, & nundinationes flagitiosas, & iniuste facta, & scelera, horum malorū esse causas. Nam posteaquàm à Philippo & vos decepti estis istorum culpa, qui suas operas in legationibus obeundis ei locauerant, quique nihil verè vobis renuntiauerant, & miseri Phocenses, eorūque vrbes deletæ sunt, quid accidit? Contemptissimi omnium hominū Thessali, insolētissimi atque omnis sensus expertes Thebani, amicum, optimè de se meritum, seruatorem suum denique Philippum ducebāt. Erat his ille omnia. Quòd si quis aliud quippiam dicere conaretur, ne vocem quidē eum mittere sinebant. Vos autē, qui omnia, quæ à Philippo gesta erāt, suspecta habebatis, atque adeò iniquissimo animo ferebatis: pacem tamen vobis studiosè retinēdam putabatis. nihil enim soli efficere poteratis. Græci item reliqui consimili vobiscum ratione in fraudem atque in errorem impulsī, & sua spe deturbati, libentissimè otio, pacēque fruebantur, tametsi essent ipsi quodammodo iandudum bello lacerati. Nam cū quoquo uersus grassans, & circumiēs Philippus, Illyrios, Triballos, nonnullos etiam Græciæ populos in seruitutem redigebat, cū multos ac magnos exercitus suo imperio subijciebat, ac subigebat: cū quidā homines è Græciæ urbibus profecti, pacis auctoritate & licētia freti, eò

se

se conferebant, ibique à Philippo corrumpebantur, in quibus iste numerabatur, cum hæc, inquam, fiebant, tum ij omnes, in quos hæc comparabantur, bello lacescebantur. quod si non sentiebant, alia ista oratio est, nihilque ad me pertinet. Ego enim prædicebā, & testificabar tum apud vos, tum ad quoscunque missus essem. Ciuitates autem graui & periculoso morbo erāt affectæ, dum partim magistratus, ijque, qui rebus gerendis præerant, pecuniarum turpiter capiendarum studio ducerentur, seseque pretio corrumpi paterentur: partim plebs & multitudo neque futura prouideret, & vitæ tranquillitate, & quotidiano otio inescaretur: denique sic omnes animis essent affecti, vt quanuis hæc in Græcia mala versarentur, singuli tamen se incommodorum experteis fore, ac periculis alienis res suas, quandocunque vellent, in tuto futuras, arbitrarentur. Itaque multitudini, opinor, hoc vsu venit, vt pro infinita illa, & intempestiua desidia atque ignauia, libertatem amitteret: magistratibus verò ac principibus, qui se cetera, præter seipsos, vendere putabant, vt ipsi sese primos omnium venditos esse sentirēt. Nam qui amici atque hospites tum cum donis ac muneribus corrumpebantur, nominari solebant, nunc assentatores, & dijs immortalibus iniqui atque iniusti, & alijs id genus nominibus, quibus digni sunt, appellantur. Nemo enim, Athenienses, eo animo pecuniam consumit, vt proditorum commodis consulat: neque quisquam posteaquam ea, quæ redemit, obtinuerit, atque in potestate sua habuerit, proditorem reliquis de rebus in consilium adhibet. (nihil enim proditore beatius esset:) quam ob causam tanti fieret proditor? longe aliter est. Sed simulatque is, qui principatum & dominationem cōcupiscit, fuerit rerum potitus, etiam eorum, qui vendiderūt, dominus efficitur. Itaque illorum improbitate perspecta & cognita, tum eos profecto, tum odio habet, tum ijs diffidit, tum eos vexat & conculcat, nullūque in eos, contumeliæ genus prætermittit. Quod vt ita esse per-

spicere possitis, attēdite, quāso, quā dicturus sum, & vobiscum ipsi cōsiderate. Nam tametsi rerum occasionem amiseritis, cognoscendi tamen opportunitas sapientibus ac prudentibus eadem manet. Tātisperdum prodebat Olynthum Lasthenes, amic⁹ Philippi nominabatur: Timolaus quoad Thebas perdidit, vsque eò Philippo carus habitus est: vsque eo Eudicus, & Simus Larissæi, quoad Thessaliam Philippo emāciparunt ac tradiderūt. Deinde cūm eiicerentur, cōtumelijs omnibus afficerentur, quoduis turpitudinis, atq; indignitatis genus subirent, orbis terrarū proditoribus completus est. Quid? Aristratus Sicyone: quid? Perilaus Megaris non contenti atq; abiecti? Ex quib⁹ intelligere quivis facillimè possit, qui patriā suā tuetur ac defendit maximè, quiq; plurimis in rebus, istis dicendo resistit, eū vobis, AEschinea proditoribus, & nummarijs, mercenarijsque ciuitatū gubernatoribus, vnde pretiū accipiatis, & quæstum faciatis, suppeditare maximè, vósque beneficio populi, & eorum, qui contra voluntates vestras dicunt, saluos esse, mercedemq; accipere. Nā meDiusFidius, quantū invobis fuit, iandudū perijssetis. Ac de ijs quidem, quæ tum gesta sunt, tametsi multo plura habeam dicere, hæc tamē nimis multa dicta esse puto. Cuius rei iste culpam sustinet, qui in me suorum flagitiorū ac scelerū veluti crapulam hesternam euomuit: quam quidem mihi necessarium fuit apud eos, quorum memoria res illæ sunt antiquiores, diluere. Fortasse verò etiā vobis hæc oratio grauis ac molesta fuit, qui etiā antequā verbū facerē, atq; adeo hiscerē, omneis istius actiones mercenarias, operasque venaleis noueratis. Quas tamē speciosis atque honestis amicitie, hospitijque nominibus appellabat. hæc enim verba quodam loco orationis suæ posuit: *Qui mihi Alexandri hospitij maledicti loco obiecit, atq; exprobrauit.* Ego tibi Alexātri hospitij? vnde cōsecuto, aut quānam merito? Nec Philippi hospitem te, nec Alexandri amicum ego vnquā appellārim. non ita insanio: nisi fortè mēssores, & ceteros, qui
suas

suas operas mercede locare cōsueverunt, eorū, à quibus conducti sunt, amicos, atq; hospites appellare debemus. Non ita est. At ego te cū antea Philippi, tū hoc tempore Alexandri mercenarium dico, item hi omnes, quos ad hoc iudiciū conuenisse vides. Quòd si non credis, eos interrogato, sodes. Quin egomet pro te hoc faciā. Vtrū vobis, Atheniēses, videtur AEschines Alexādri mercenarius esse, an hospes? Audis quid dicāt? Nunc igitur tandem isti de accusatione respondere, & pro Ctesiphonte dicere: simūlq; res meas gestas exponere volo, vt, tametsi praeclarè intelligat AEschines, audiat tamē quas ob causas ego non ijs solū, quæ à senatu decreta sunt, verū etiam longè maioribus præmijs dignū me esse contendam. Sume igitur accusationis ipsius libellum & recita. ACCUSATIONIS LIBELLVS. Charonda prætor VIII. idus Februarias, AEschines Atrometi filius Cothocides iudicium de decretis contra leges factis in Ctesiphontem Leosthenis filiū ad prætorē detulit, quia scitum contra leges fecit: quo censuit Demosthenem Demosthenis filiū Pæanieum aurea corona donandum à populo virtutis & benevolentia, quā perpetuò habuit in Græcos vniuersos, tum in populū Atheniensem, & fortitudinis ergò, & quòd res dicit agitque populo vtilissimas, omni que studio, cura, opera, labore reip. prodesse conatur. Quæ omnia falsa sunt, & cōtra leges scripta, cū leges vetent, primū falsa decreta in tabulas publicas referri: deinde eū, qui iudicio referendarum rationum teneatur, priusquā rationes retulerit, corona donari. (Est autem Demosthenes curator muris reficiendis, & theatri pecuniæ præfectus.) postremò eam donationem ac prædicationem Dionysijs, tragædus nouis fieri: sed si quem senatus corona donet, iubeant in curia: sin ciuitas, in Pnyce populo cōvocato, de eo, qui coronatur, prædicari. Multa, talenta quinquaginta. Viatores, Cephisophō Cephisophōtis filius Rhamnusius, Cleon Cleonis filius Cothocida. Hæc sunt, Atheniēses, quæ ex toto decreto in iudicium vocat AEschines. Ego verò primū his ipsis planū me facturū confido, iustissimā eam esse defensionē, qua vsur° sum. Seruato enim eodē ordine, quē iste in scribēdo & cōponēdo accusationis libello secut° est;

singillatim de omnibus dicam, nihilque sciens præteribo. Quòd igitur scripsit Ctesiphon, me perpetuò eas res & dicere, & agere, quæ populo sunt utilissimæ, omnique opera ac studio, quantum in me situm sit, ei consulere atque prodesse: quodque his nominibus me laudauit, eius rei iudicium in meis reb⁹ gestis positum esse puto. Ex his enim, cum erunt diligenter considerata, & perpensa, verane sint ea, quæ de me scripsit Ctesiphon, an falsa, perspicuum erit. Quòd autem censuit me corona donandum, his verbis non adscriptis, *Posteaquàm rationes retulerit*, coronæque donationem & prædicationem in theatro faciendam: cum hoc ad ea quoque, quæ in rep. gesti, pertinere puto, videre vtrum sim corona dignus, necne: & vtrum prædicatio fieri in theatro debeat, necne: tum præterea leges mihi proferendas esse existimo, per quas hæc Ctesiphonti scribere licuerit. Atque equidem hanc in defendendo Ctesiphonte orationis æquitatem ac simplicitatem adhibere constitui. Aggrediar autem primum ad ea, quæ gesti: neque est quòd quisquā putet, me longè ab accusatione rationem defensionis auocare atque abducere, si in hunc de Græcanicis meis actionibus sermonem incidero. Nam qui eam decreti partem reprehendit, atque in iudicium vocat, in qua ego res populo Atheniensi utilissimas & dicere & agere dicor, quique hæc tanquam minime vera iudicio persequitur, hic est, qui hanc de meis in rep. institutis, rebusque gestis orationem cum hac causa ita coniunxit, ut non solum propria, sed etiam prorsus necessaria videatur. Deinde cum multa sint administrandæ reip. consilia, multæque voluntates & sectæ, eam potissimum sectam, quæ ad Græcanicas actiones pertinebat, secutus sum. Quapropter non immeritò ex his totius meæ vitæ superioris ducenda sunt argumenta. Ea igitur, quæ Philippus antequàm remp. attigissem, atque ad populum verba facere, & contionari cœpissem, anteuertat, atque occupat, præteribo. (nam nihil horum ad me arbitror pertinere.)

pertinere.) Quæ verò, posteaquàm ad remp. administrādam me contuli, prohibitus est à me facere Philippus, eorum vobis memoriam refricabo, neque de his rationem reddere recusabo, si hoc vnum prius vobis exposuero. Philippus tunc, Athenienses, vna re nobis longè superior erat, quòd non apud nos, aut illos tantum, sed apud omneis peræquè Græcos tanta proditorum, & nummariorum magistratuum, & impiorum hominum vbertas atque annona versabatur, quanta post hominū memoriam non fuit: quos ille suorum consiliorum administratos & adiutores nactus, Græcos antea grauibis, & acerbis odijs inter se dissidenteis, maioribus etiā discordijs ac seditionibus concitauit, cū alios falleret, alij effusè largiretur, alios quauis ratione corrumpere: postremò multas in parteis eos discerpsit ac distraxit, cū hæc vna res omnibus pariter conduceret, ne ille cresceret, prohibere. Cū esset igitur hic omnium Græcorum status, cūque in summa mali nascētis, & in dies latius manantis ignoratione versarentur, vobiscum ipsi considerate, Athenienses, quid sequi, quid agere, quid efficere decuerit ciuitatem: horūque à me rationem reposecite. Ego enim is sum, qui me in hoc reip. gubernandæ munere ac loco, & in hac quasi custodia & vigilia collocaui. Vtrū igitur eam conueniebat, AEschinas, suos illos spiritus deponentem, suæque amplitudinis ac dignitatis oblītam, in eodem atque Thessalos & Dolopes ordine ac numero, Philippo Græcorum dominatum appetenti studere ac fauere, maiorūque suorum ornamenta & iura euertere? an hoc quidem non facere (grauē enim hoc mehercule fuisset, graue) sed quæ futura, nisi quis prohiberet, videbat, & iampridem (vt verisimile est) præsentiebat, ea negligere, nihilque, ne acciderent, laborare? Atqui libenter ex eo, qui res meas gestas tantopere reprehendit, quæsierim: quarum partium ciuitatem nostram fuisse velit: utrū earum, quæ malorum ac dedecorum, quæ Græci subierunt, adiutrices Philippo

fuerunt: in quibus Theſſalos, eorúmque ſocios poſſis dicere fuiſſe verſatos: an earum, quę ſpe amplificádarum opum ſuarum priuatarum, hæc fieri paſſæ ſunt ac neglexerunt: in quibus Arcadas, & Meſſenios, & Argiuos numerare poſſumus. At multi horum, immò verò omnes maiore detrimento accepto, quàm nos, ex hoc negotio diſceſſerūt. Nam ſi Philippus ſtatim vt vicit, ſeſe in Macedoniam recepiſſet, & poſtea quicuiſſet, nemine neque ex ſocijs ſuis, neque ex ceteris Græcis læſo, aut offenſo, eos tamen, qui conatibus eius non reſtitiffent, aliqua ex parte reprehendere & accuſare poſſemus. Sed ſi peræquè omnibus dignitatem, principatum, libertatem, immò verò reip. ſtatum quibuſcunque potuit, ademit, nónne vos, qui mihi credidiſtis ac paruiſtis, glorioliſſimo & præclariffimo conſilio uſi eſtis? ſed illuc reuertor. Quid ciuitatem noſtrâ, A Eſchina, tū facere cōueniebat, cum Philippum videret imperium ſibi in Græcos, ac regnum comparare? aut quid me ſuaſorem & conſiliarium dicere, quid ſcribere oportebat: præſertim Athenis? (Nam hoc plurimum refert) qui ſciebam, patriam meam à primis temporibus uſque ad illum diem, quo die in contionem aſcēdi, ſemper de principatu, ac principe loco, ſemper de honore, ac de gloria decertaſſe: plureiſque viros, & maiorem pecuniæ vim pro ſtudio laudis & honoris, omniúmque Græcorum commodis conſumſiſſe, quàm ceteri Græciæ populi pro ſeſe impenderunt? Philippum autem, cum quo vobis omne certamen inſtitutum erat, videbā pro imperio ac dominatione oculo ſibi effoſſo, iugulo conſracto, manu debilitata, crure comminuto à ſuis inceptis non deſiſtere: denique quamcunque corporis partem fortuna voluerit ei adimere, eam libenter & cupidè amittere, vt reliquo corpore mutilato, cum honore & gloria vitam traduceret? Atquē ne hoc quidem quiſquam dicere audeat, homini Pellæ educato, in vrbe humili tunc atque obſcura, tantam animi magnitudinem meritò ingeneratam eſſe, vt imperium Græcorum

rum concupisceret, atque hoc in animum induceret: in vobis autem, qui Athenienses estis, quique quotidie in omnibus litteris ac disciplinis maiorum vestrorum monumenta cernitis, tãtam ignauiam atque inertiam inesse debuisse, vt libertatẽ Græcorum vltro, & vestra sponte Philippo cederetis. Nemo (inquam) hæc dixerit. Vnũ igitur erat reliquum simul & necessarium: ijs omnibus, quæ ille moliebatur, cùm iniustè vos læderet, iustè obfistere, atque obuiam ire. Ergo vos quidem ab initio hoc faciebatis, vt æquum erat, vt decebat: ego autem decernebam, & suadebam quibus temporibus in rep. versabar: fateor. At quid me facere oportebat? Iam enim ex re quæro, reliquaque omnia prætermitto, Amphipolim, Pydnam, Potidæam, Halonesum: hæc omnia obliuiscor, nihil horum memini: Serrion, Doriscus, Peparethi expugnatio, & cetera id genus, in quibus & iniuriam, & detrimentum accepit ciuitas, fuerintne vnquam, nescio. Et tamen dixisti me horum locorum commemoratione ciuitatem nostram in odium Philippi adduxisse, cùm ea decreta, quæ ad has res pertinent, sint Eubuli, Aristophontis, Diopithis, non mea. O ad dicendum quicquid tibi libeat, omnium hominum promissime, atque expeditissime. nihil igitur ego de his nunc quicquam dicam. Verùm ille, qui Eubœam sibi vendicabat: qui aggerem Atticæ oppugnandæ excitabat: qui Megaris inferre bellum cogitabat: Oréum occupabat, Porthmum subruebat, Philistidem Oréo, Clitarchum Eretriæ tyrannos imponebat, qui Hellepontum sub imperium ditionemque suam subiungebat, qui Byzantium obsidebat, qui vrbeis Græciæ alias funditus euertebat, in alias exsules ab exsilio reducebat: vtrũ cùm hæc faceret, iniuriam faciebat, & fœdera rumpebat, & pacem violabat, necne? Deinde vtrũ è Græcis aliquem existere oportebat, qui hæc eum facere prohiberet, necne? Nam si nõ oportebat, sed illum, quæ Græcia est, Myforum prædã, vt appellatur, viuëtibus & stantibus Atheniensib*, videri

conueniebat: frustra sunt mei tot suscepti labores cum de talibus rebus dixi: inanem quoque & superuacaneam operam sumsit ciuitas, quæ consilio meo paruit: fuerint denique peccata & scelestæ omnia contra ius admissa, mea. Sin autem opus erat aliquem existere, qui hæc prohiberet: quem alium, quàm populum Athen. fuisse conueniebat? Has igitur res ego tum gerebam, & cum illum omnium mortalium ceruicibus iugum seruitutis imponere videbam, aduersabar ego, & resistebam, tum prædicendo, tum monendo, ne hæc Philippo condonaretis ac proderetis. Atqui pacem ille profectò captis nauibus, non nostra ciuitas, AEschinea, violauit atque infirmauit. Profer igitur ipsa decreta, & epistolam Philippi, & ex ordine recita. Nam cui quisque culpæ sit affinis, ex his planum fiet, si diligenter attendentur, & cum re, de qua quaeritur, comparabuntur. Recita. **DECRETA.** Neocle prætore, mense sextili, contione ab imperatoribus extra ordinem aduocata, Eubulus Mnestibei filius Cyprius verba fecit. Quod imperatores in cōtione nūtiarunt Leodamantem nauarchum cum viginti, quæ vnà missæ fuerant, exportandi ex Hellesponto in Lemnum frumenti causa, nauibus, ab Amynta Philippi imperatore in Macedoniam deductum, atque in custodiam datum retineri: placere ut ciuitatis moderatores, & imperatores dent operam, ut cogatur senatus, legati que ad Philippum deligantur, qui cum primum ad eum peruenerint, agant cum eo de dimittendo nauarcho, & nauibus, & militibus. Et si imprudens fecit Amyntas, dicant nihil de eo queri populum Atheniensem: si Leodamantem in aliquo maleficio deprehendit, cum aliquid præter ea, quæ fuerant ei à populo Atheniensi mandata, moliretur, Atheniensis re cognita, pro eius negligentia & contumacia, in eum animaduersuros. Quod si neutrum horum est, sed priuatim fidem & æquitatē violat aut is, qui nauis misit, aut is, qui cum nauibus missus est, placere, ut petant legati à Philippo, ut hac de re faciat nos per litteras certiores, ut populus Atheniensis cum hac comperta habuerit, quid factu opus sit, deliberet. Hoc igitur populi scitum fecit Eubulus, non ego. Alterum, quod deinceps sequitur, Aristophon: deinde tertium

Hegesippus: deinde aliud Aristophon: deinde aliud Philocrates: postremò Cephisophon, & ceteri omnes. Ego quidem nullū vnquā hisce de rebus verbum feci. Recita decretum. **DECRETVM.** Nicocle pratore, pridie Kal. septembris, de sententia totius senatus, ciuitatis moderatores, & imperatores, cū de ijs, quæ in contione acta essent, ad senatum retulissent, decreuerunt populo placere, ut legati ad Philippum de nauibus recuperandis deligantur, iisque ad illum mandata dentur: etiā populi scita in contionibus facta tradantur. *Leeli sunt hi, Cephisophon Cleonis filius. Anaphlystius: Democritus Demophontis filius, Anagrasius: Polycritus Apemanti filius, Cothocides. tribu Hipporhoontide si mimam rem potestatem obtinente. Aristophon Colytteus præses, & consilij publici princeps sententiam dixit.*

Quo modo igitur ego hæc populi scita profero atque ostendo, ita & tu AEschinea ostende, quali ego decreto scripto, belli suscipiendi auctor fuerim. At non potes, si enim posses, nihil tibi nunc prius proferendum duxisses. Atquē ne Philippus quidem in me belli culpam confert, cū alios insimulet, & criminetur. Recita verò ipsam Philippi epistolam. **EPISTOLA PHILIPPI.** Rex Macedonum Philippus, senatui populoque Atheniensi S. D. Venerunt ad me legati vestri Cephisophon, Democritus, Polycritus: egeruntque mecum de nauibus, quibus præerat Leodamas, dimittendis. Ut igitur vno verbo dicam quod sentio, stultissimi mihi esse videmini, si me ignorare putatus, hæc nauigia per simulationem frumenti ex Hellesponto in Lemnum exportandi, eo consilio esse missa, ut Selymbrianis, qui à me obsidentur, nec communibus amicitia & foederibus continentur, auxilium ferrent: atque hæc nauarcho mandata esse non à populo, sed à quibusdam magistratibus, & ab alijs, qui nūc priuati cū sint, vehementer cupiunt, populum, spreta & violata amicitia, quæ mihi cum eo intercedit, bellum redintegrare: idque ut fiat, maiore studio contendunt, quàm ut Selymbrianis opitulentur, existimantes sibi hoc facinus veltigalis instar futurum. Verumtamen non arbitror nec mihi, nec vobis hoc quicquam profuturum. Quapropter primum hæc nauigia, quæ ad nos delata sunt, vobis remitto, & condono: deinde peto à vobis, ne magistratibus vestris per-

mittatis, rēp. malitiosē, & improbē administrare: sed cōerceatis, & castigaretis. quod quidem si facietis, ego quoque omni studio pacem tēri & cōseruare conabor. Valete. Nusquam hīc Demosthenis nomen posuit, nullius me culpæ affinem esse scripsit. Cur igitur cū alios criminetur, nullam de meis rebus gestis mentionem facit? quia de suis in nos iniurijs mentionem fecisset, siquid de me scripsisset. His enim affixus hārebam: ab his nusquam oculos demouebam: his denique aduersabar. Ac primū legatio in Peloponnesum me auctore decreta est, quo tempore ille in Peloponnesum occultis itineribus irrepebat: deinde in Eubœam, cū Eubœam apperebat: deinde exercitus in Oréum à me decretus est, non iam legatio: alter item exercitus in Eretriam, posteaquā tyrannos in his vrbibus constituerat: postremò classeis eas omneis misit, quibus & Cheronesus, & Byzātium, & socij omnes seruati sunt: ex quibus vobis pulcherrima illa nata sunt, laudes, gloria, coronæ, gratiæ ab ijs, qui beneficium à vobis acceperant. Ita factum est, vt eorum, quibus iniuriam faciebat Philippus, lōgè dissimilis esset fortuna. Nam qui vobis tum fidem habuerunt, ac paruerunt, salutem adepti sunt: qui neglexerunt, hoc sunt affecuti, vt & ea, quæ prædixeratis, sæpe recordarentur: & vos non solum optima erga se voluntate, sed etiam singulari prudentia præditos, & vates fuisse iudicarent. Omnia enim quæcunque eis prædixistis, acciderūt. At quī cū fugiat omnino neminem, tū tu omniū hominū minimè ignoras, AEschinea, magno emturū fuisse Philistidem, vt Oréū haberet: magno Clitarchum, vt Eretriam teneret: magno Philippum ipsum, vt hæ sibi aduersum vos facultates suppeterent, nec de ceteris rebus coargueretur: denique nequis iniurias, quibus Græciam vbique afficiebat, magnopere attenderet, aut acrioribus oculis obseruaret. Legati enim, qui tum à Clitarcho & Philistide huc veniebant, apud te deuersabantur, AEschinea, tūque eis hospitium publicum comparabas: quos ciuitas tanquam hosteis, & res neque

iustas,

iustas, neque reip. vtileis persuadere dicendo conanteis, exire ex vrbe iussit, atque eiecit: Tibi autem erant amici. Nihilne igitur horum actum est? ô, te appello, qui me maledictis insectaris: qui dicis me pretio accepto tacere, cōsumto vociferari. Tu verò non item: quin tum maxime vociferaris cū habes, neque vnquam vociferari defines, nisi hi tibi clamorem istum compresserint, iusta infamiæ nota sempiterna. Cū igitur vos tum propter has causas me corona donassetis, iisdemque, quibus hic Ctesiphon, syllabis Aristonicus decretum conscripisset, corona in theatro voce præconis pronuntiata esset: hoc secundum denique mihi iam præconium obtigerit: neque tum contrà dixit AEschines cū præstò esset, neque eum, qui sententiam dixerat, in iudicium vocauit. Ac mihi hoc quoque decretum recita. **DECRETVM.** *Charonida Hegemonis filio prætore, septimo Kal. Februariis, tribu Leontide summum imperium obtinente, Aristonicus Phrearrus ita censuit. Quoniam Demosthenes Demosthenis filius Pæanius, cū multas & magnas populo Atheniensi vtilitates attulit, tum multis populi Atheniensis socijs & antea, & item hoc tempore suis decretis præsidio atque auxilio fuit: quòdque nonnullas vrbes Eubœæ liberauit: postremò quòd perpetuam erga populum Atheniensem beneuolentiam præstat, & tum agendo, tum dicendo, quantum potest, cū ipsis Atheniensibus, tum alijs Græcis consulit: Placere senatui, populoque Atheniensi, vt Demosthenes Demosthenis filius, meritis ac veris laudibus ornetur, aureæque corona donetur. Atque hæc donatio in theatro Dionysijs, tragædis nouis pronuntietur. Huius autem pronuntiationis procurationem habeat & tribus ea, penes quam summa sit rerum potestas, & certaminum scenicarum curator ac præfectus. Dixit Aristonicus Phrearrus. Est ne igitur quisquam, qui dedecore aliquo affectam, aut ludibrio habitam, aut derisam, propter hoc decretum, nostram ciuitatem esse sciat, quæ omnia nunc iste, si ego corona donatus fuero, futura confirmat? Atquæ cū res sunt recentes, & omnibus notæ, si quidem honestæ & præclaræ sint, earum auctoris habetur gratia: sin ali-*

ter, pœna in eos constituitur . At enim tum mihi gratia relata, non pœna irrogata est. Quare vsque ad illa tempora, in quibus hæc gesta sunt, nemo est, qui non me res & optimas, & ciuitati vtilissimas gessisse fateatur: hocque ita esse id erit maximo documento, quod cum aliqua de re deliberabatis, siue dicerem, siue decernerem, omnes sententiam meam probabatis, omnes auctoritatem meam sequebaminì: quod ea, quæ à me decreta essent, fieri iubebatis, quod ex eis coronæ ciuitati, mihi, vobis omnibus comparabantur: quod sacrificia, & supplicationes dijs immortalibus, propter actiones illas tanquam vtilis & salutareis, constituebatis . Posteaquàm igitur ex Eubœa Philippus depulsus ac deiectus est, armis quidem à vobis, ratione autem & scientia reip. bene gerendæ, & decretis (disrumpantur quidam istorum licet,) à me: alteram ciuitatis nostræ oppugnandæ viam quærebat. Cum videret autem, nos magnam partem frumento importato, aliundèque aduecto vti, totius rei frumentariæ exportandæ potestatem concupiuit: & cum in Thraciam venisset, à Byzantijs socijs suis primùm petere cœpit, vt communibus opibus, copiisque coniunctis, vnà secum bellum nobis inferrent . quod cum recusaret Byzantij, negarentque se his condicionibus cum eo societatem iniuisse (neque in eo sane mentiebantur) aggeribus excitatis, vallo circumiecto, machinis admotis urbem oppugnabat. Hæc cum fierent, quid nos facere conueniret, non iam amplius quenquam rogabo: (omnibus enim perspicuum est) sed quis ille fuit, qui Byzantijs opem tulit? qui saluti fuit? quis prohibuit, ne Hellestontus temporibus illis à nobis alienaretur? Vos, Athenienses. vos autem cum dico, ciuitatem nostram dico. sed quis erat ille, qui ciuitati hoc suadebat? qui decernebat? qui agebat, qui denique seipsum nullius periculi metu deteritus, non pecuniæ, non vitæ suæ parcens, rebus omnibus offerebat? Ego . Neque verò vos oportet oratione doceri quantū hæc omnibus profuerint, cum re sitis experti.

perti. Bellū enim, quod tum susceptum est, præter quàm quòd magnā ex eo gloriā cōsecuti estis, fecit vt omnium rerū, quæ ad vitam degēdā necessariæ sunt, maior vobis cum incredibili annonæ vilitate suppeteret vbertas & copia, quàm in hac pace, quam isti viri boni contra patriam tuentur ac retinent, rerum quarundam futurarū spe ducti: qua vt decīdant, neque earum rerum, quæ vos optimarum partium ac rectissimarum voluntatum ciues à dijs expetitis, sint participes, neque ipsi vobis ea, quæ secuti sunt, quæque sibi proposuerunt, impertiant, faxint dii immortales. Recita verò Byzantiorum & Perinthiorum coronas, quibus harum actionū nomine ciuitas nostra donabatur. DECRETA BYZANTIORVM.

Hieromnemone Bosporicho, Damaget⁹ Entealia filius, facta sibi à senatu dicendi potestate, verba fecit. Quòd populus Atheniensis cum superioribus temporibus perpetuam erga Byzantios, & socios, cognatosque Perinthios beneuolētiā habuit, tum hoc tempore cum Philippus Macedo bellū huic agro, & huic vrbi calamitosum inferret, eo consilio atque animo vt Byzantios, & Perinthios funditus deleret, atque euerteret: cūque omnia partim incendio flammisque vastaret, partim cæsis arboribus ferro popularetur, magno nobis vni, vtilitati que fuit, auxiliōque lato centum & viginti nauibus, re frumentaria, armis, viris, magnis periculis nos liberauit, & antiquum nobis reip. statum, leges, sepulcra maiorum restituit: Populo Byzantio, & Perinthio placere, ius matrimonij nobiscum contrahendi, & ciuitatis, ac reip. nostræ communionem, igrorū & fundorum emendorum ac possidendorum potestatem Atheniensibus concedi: in ludis ac certaminibus principem locum, ac proprium, in Prytanéo, in curia, apud populum, apud eos, qui sacris præpositi sunt, tribui: tum si qui volent in vrbe nostra domicilium suarum fortunarum collocare, omnium rerum immunitatem dari: statuas autem treis sexdecim cubitorum in Bosforo poni, quæ significant, populum Atheniensem à populo Byzantio, & Perinthio corona donari: mitti autem munera ac præmia ad celeberrimos totius Græciæ cōuentus, Isihmia, Némæa, Olympia, Pythia: illique prædicationum coronæ, qua corona populus Atheniensis à nobis donatus sit, fieri, vt

Atheniensium Virtus, & Byzantium, Perinthiorumque gratus animus Græcis omnibus perspectus sit & cognitus. Recita & coronas à Cherrhonestis ciuitati nostræ decretas ac donatas. DECRETVM CHERRHONESITARVM.

Qui ex Cherrhonestis Sesium, Eleuentem, Madytum, Halopeconnesum incolunt, ij senatum, populumque Atheniensem corona aurea donant ducentorum & viginti sex pondo: aram Gratia, & populi Atheniensis excitant & corsecrant, quoniam sibi maximi & singularis boni, incredibilisque felicitatis causa fuit, ut pote qui se exercitu Philippi liberarit, qui sibi sedes suas patrias, suas leges, libertatem, sacra restituerit, neque vlla seculorum æternitate ei gratias agere, & quantum consequi poterunt, de eo bene mereri, & quicquid poterunt in eum beneficij conferre, desinent. Hac de communi consilio in curia decreuerunt. Verum non solum ut Cherrhonestus, & Byzantium seruantur, Philippus Hellepontum in potestatem suam redigere prohiberetur, nostra ciuitas his de causis, maximis honoribus afficeretur, mea instituta, mea que in administranda rep. rationes perfecerunt: sed etiam omnibus mortalibus nostræ ciuitatis bonitatem, fidem atque animi magnitudinem, Philippi improbitatem, malitiam, ac perfidiã, perspicuam, clarãque reddiderunt. Hic enim Byzantium amicus, & socius eos ipsos, quos tueri debebat, circumfedere atque oppugnare ab omnibus conspiciebatur: (quo quid turpius aut sceleratius esse possit?) vos qui multa, & quidem meritò de illis queri poteratis, propterea quòd se in vos antea iniquos atque ingratos præbuerant, non modò præteritas iniurias non recordari, neque homines miseros, quibus à Philippo fiebat iniuria prodere ac deferere, sed etiam tueri ac seruare cernebamini. Quibus ex rebus gloriam, omniumque erga vos beneuolentiam comparabatis. Atquæ nemo est, qui nesciat, multos iam ex ijs, qui in rep. versati sunt, à vobis esse corona donatos. sed cuius aliis opera ciuitas nostra honorem coronæ consecuta sit, consiliarij, inquam, & oratoris, præterquã mea, nemo est, qui proferre queat.

Vt igitur ea maledicta, quæ iste in Eubœos, Byzantios-
que congelsit, cum siquid forte asperius ab illis atque
acerbius contra nos actum sit, commemorabat, meras
calumnias esse ostendam, non eò solùm quòd falsa sunt,
(scire enim vos arbitror ita esse) sed quòd, vt maximè
vera essent, res illas tamẽ ita tractaui, ac moderat⁹ sum,
vt ciuitati nostræ essent vtiles: vnum atque alterum è
præclaris facinoribus, ac ciuitati nostræ gloriosis, quæ
apud vos facta sunt, exponere volo, atque ea paucis.
Nam & vnumquenque priuatim, & ciuitatẽ publicè ad
omniũ, quæ extant, pulcherrima, & præclarissima exem-
pla reliquas actiones oportet dirigere conari. Vos igi-
tur, Athenienses, cum Lacedæmonij terræ, marisque im-
perium obtinerent, & totam Atticam quoquo versus,
præfectis, ac præsidijs deuinctam, obsessamque tenerët,
Eubœam, Tanagram, omnem Bœotiam, Megaram, A E-
ginam, Cleonas, ceteras insulas haberent: cum ciuitati
nostræ non mœnia, non naues essent: ad Haliartum ex-
ercitum eduxistis, iterumque paucis post diebus Corin-
thum, quo tempore multas à Corinthijs ac Thebanis
acceptas iniurias, ob ea, quæ bello Decelico, ab illis acta
fuerât, memoria repetere poterant ij, qui tum vivebant
Athenienses maiores vestri: quod tamẽ non fecerūt: nihil
minus. Atqui hoc vtrumque, AEschinea, Athenienses
neque pro benè meritis faciebant, neque à periculò va-
cuum cernebant: sed non idcirco tamen eos, qui ad se
confugiebant, deferere in animum inducebant, immò
verò pro honore & gloria, terrores omneis subire, om-
neisque dolores & cruciatus corporis excipere ac per-
ferre cupiebant: qua in re nihil fallebantur, quin prudẽ-
tissime rectissimeque sentiebât. Namque omnibus ho-
minibus vitæ terminus mors est, etiam si quis se domi in-
clusum contineat & custodiat. Sed viros forteis semper
oportet res laudabileis atque honestas suscipere & co-
nari, bona spe in posterum fretos, & quasi armis quibus-
dam tectos: quicquid autem deorum immortalium

voluntate euenerit, fortiter ac moderatè ferre. Hæc faciebant nostri maiores, hæc qui è vobis sunt ætate grandiores: qui simulatque Thebani victoriam in Leuctris consecuti, Lacedæmonios neque vobis amicos, neque de vobis bene meritos, immo verò propter multas & graueis in nostram ciuitatem iniurias odio acerbissimo dignos, de medio tollere, ac funditus delere conati sunt, prohibuistis, non eorum potentia, non viribus, non opibus, non gloria bello parta deterriti: postremò non agitantibus animis, neque reputantes cuiusmodi vos illi in rebus iniuste læsissent, neque pro quibus hominibus essetis vitæ periculum adituri. Ita his factis, Græcis omnibus declarastis, vos si quis eorum in vos quantumuis grauiter deliquerit, iras atque inimicitias aduersus eum susceptas, ad alias res, aliâque tempora reseruare. quòd si aliquod in discrimen salutis aut libertatis venerint, iniuriæ acceptæ neque memores futuros, neque rationem habituros. Neque verò in his rebus solum ita animati fuistis: sed cum sibi iterum Thebani Eubœam vendicarent, neq; vos neglexistis, neque iniurias, quibus à Themisone, & Theodoro ad Oropum affecti fueratis, memoria tenuistis, sed his quoque succurristis: quo quidem tempore primùm trierarchi voluntarij ciuitati extiterunt, in quibus ego fui. Sed nondum ad eum locum veni, vbi mihi his de rebus dicendum sit. Atqui cum clara in hoc vestra virtus enituerit, quòd insulam illam seruauistis: tum verò multo præclarissimum vestrum illud factum extitit, quòd cum & virorum, & vrbium Euboicarum compotes essetis, ijs, qui vos læserant, vtraque reddidistis, nulla iniuriarum vobis factarum in ijs, quæ vestræ fidei commendata, & credita fuissent, ratione ducta. Alia sexcetera, quæ commemorare possum, præmitto: naualeis pugnas, exercitus in expeditionem eductos, pedestreis copias tum antea, tum vestra memoria comparatas: quæ quidem omnia pro ceterorum Græcorum salute ac libertate ciuitas nostra suscepit. Cum igitur
animaduer-

animaduertissem, & cognouissem, ciuitatem nostram in tot ac talibus rebus pro commodis alienis nullam dimissionem recusasse, cum res ipsius ageretur, consiliūque & certamen quodammodo de ea iniretur, quid ego ei suadere, quid consilij dare debui? Vtrum vt præteritas iniurias recordaretur in eos, qui præsidium nostrum implorabant, qui seruari cupiebant? an vt excusationum latebras quæreret, quibus vtilitatem Græcorum communem proderemus? Et quis me non merirò necaret, si quod ornamentum, decusque ciuitatis verbis duntaxat contaminare conarer? Nam rem quidem vos non fuisse facturos ego certo scio. si enim voluissetis, quid vobis obstitisset? nō licebat? non vobis præstò aderant isti homines, qui hæc dicturi ac suasuri essent? Iam igitur ad ea, quæ deinceps publicè gessi, reuertor. atque in his mihi rursus spectate, & considerate, quid esset optimum factu ciuitati. Cum enim viderem, Athenienses, classem vestram dilabi atque euanescere, diuites impensa modica facta immunitatem esse consecutos, mediocrium aut tenuium facultatum homines ad egestatem esse redactos, ciuitatem ob has causas nihil suo tempore facere, sed amissa iam occasione ad res agendas aggredi: legem tyli, qua diuites officium facere coëgi, pauperes ab iniuria vindicaui: deniq; perfeci, vt omnis commeatus, omnis belli apparatus (quod erat vtilissimum) suo tempore ciuitati suppeteret: atque ob hanc actionem, de legibus contra leges rogatis in iudicium vocatus, vestræ me potestati, sententiæque permisi, in conspectum vestrum veni, & absolutus sum: accusator autem ne quintam quidem tabellarum partem pro se obtinuit. Atqui quanti classium magistros aut primos, aut secundos, aut tertios à me fuisse putatis emtuos, primùm ne hæc lex à me ferretur: secundo loco vt ego tota re inchoata relicta atque abiecta eis iurandi in litem, & iureiurando interposito, recusandi, aut prorogandi iudicij potestatem facerem, atq; ita eos elabi sinerem? tanti profectò, Athe-

nienſes, quanti apud vos dicere non auſim. Atque hæc non immeritò facerēt. Licebat enim illis per leges priores ſenis denis inter ſe copulatis, muneribꝰ publicis fungi, cū ipſi paruam, ac propè nullam impenſam ſinguli facerent, tenuium atque inopum rem familiarem conterrerent atque exhaurirēt: mea autem lege pro ſuis quemque facultatibus pecuniam conferre oportebat. ita duabus triremibus præfectus mea lege exortus eſt iſ, qui vnius ſumtum decimus ſextus antea ſuſtinebat. Non enim ſe tunc trierarchos, ſed tributi conferendi ſocios nominabant. Quare vt hæc tollerentur, atque vt ne officiū facere cogerentur, nihil eſt, quod mihi daturi non fuerint. Ac mihi primū plebiſcitu illud, propter quod in iudiciū adductus ſum de legibus contra leges ſuperiores rogatiſ: deinde cenſuum deſcriptiones, & eam, quæ priore lege obſeruabatur, & eam, quam ego mea lege induxi, recita. **PLEBISSCITVM A DEMOSTHENE FACTVM.** Prætor Polycle, decimo ſexto Kal. ſeptembris, tribu Hippothoontide ſummam rem obtinente, ciuitatemque moderante, Demotheſes Demotheſis filius Pæanieus legem tulit ad nauium præfecturæ pertinentem, ſuperiore abrogata, qua trierarchis tributorum conferendorum partitiō concedebatur. Atque hanc Demotheſis legem ſenatus ſententia ſua, populꝰſque Athenienſis ſuffragio ſuo comprobauit. Itaque hoc nomine, Demotheſenem Patrocles Phlyeus iudicio de legibus non legitimè rogatiſ reum fecit. Qui, Demotheſene omnibus ſententijs abſoluto, cū quintam tabellarum iudicialium partem nō obtinuiffet, quingētis drachmis multatus eſt.

Profer verò & egregiam illam cenſus deſcriptionem lege ſuperiore inſtitutam. **DESCRIPTIO TRIBVTI CONFERENDI EX LEGE ANTIQVA.** Trierarchi ad vnius triremis ſumtus vocantor ſeni deni, ad rationem earum tributi collationum, quæ in centurijs, aut manipulis militum obſeruari ſolet, ab ætatis anno viceſimo quinto uſque ad quadrageſimum: atque hi parem & æquabilem inter ſe ſumtum in triremis faciunt.

Age iam mihi deſcriptionem quoque ex mea lege inductam profer ac recita. **DESCRIPTIO EX LEGE DE-**

MOSTHENIS. *Singuli trierarchi delecti singulis triremibus attribuantur pro suis quisque facultatibus, quorum census sit decem talentorum. quod si sit pluri: pro proportionē vsque ad tria nauigia, cum nauicula ætuario, conferendi munere funguntur. eadem proportionē, si bona sint minoris, quàm decem talentorum, consociantur, & cōueniunt inter se ad munus persutionem, vsque ad decem talenta. Vtrū vobis videor tenuibus mediocriter subuenisse? Vtrū diuites paruo fuisse videntur emturi, ut ne officium facere cogerentur? Non solū igitur his nominibus gloriōr ac triumpho, quod hæc diuitibus nō remissi, neque condonauī: & quod in iudiciū vocatus, absolutus sum: sed quod legem vtilem reip. tulī, id quē re, atque euentu probaui. Cū enim toto belli tempore, mea lege classes nauigarent, nullus vnquam trierarchus ad vos supplex confūgit, tāquam meæ legis iniuria oppressus atque afflictus: nullus in Munychia ad aram Dianæ sedens, onus sibi lege impositum deprecatus est: nullus à magistratibus classis in vincula coniectus est, quod legi meæ parēre nolisset: nulla triremis neque foris comprehensa periit nostræ ciuitati, neque hīc remansit cū in altum deduci non posset. Atquē prioribus legibus hæc omnia accidebant. Causa autem in pauperibus consistebat, quippe qui munere publico fungi propter egestatē non possent. Ex hoc igitur multarum rerum gerendarum impedimenta, multæque difficultates inexplicabiles nascebantur. Ego verō ab ijs, quibus angusta res familiaris, tenuēsque facultates erant, ad locupleteis & copiosos nauium præfecturas transtuli. Ita quæ ratio postulabat, quæque tempora reip. desiderabant, rectē atque ordine agi cœpta sunt. Atquē etiam hoc nomine laus mihi debetur, quod hanc reip. administrandæ viam, rationēque secutus sum, ex qua vno tempore gloria, honores, opes, & copiæ ciuitati quærebantur. Nulla autem mea reip. gerendæ ratio neque inuida, neque maligna, neque acerba, neque malitiosa, neque humilis aut abiecta, neque ciuitate nostra indigna reperietur. Atque can-*

dem planè mentem, ingenijque indolem in ciuitate nostra gubernanda præstitisse videbor, quam in toti^o Græciæ rebus procurandis atque administrandis adhibui. Nam neque in ciuitate nostra gratiam diuitum pluris, quàm multitudinis iura feci, neque in rebus Græcorum, Philippi hospitium ac munera, communibus totius Græciæ commodis ac rationibus antiquiora mihi fuerunt. Iam igitur mihi reliquum esse arbitror de præconio, ac de iudicio rationum referendarum dicere. Nam me res optimas, & populo vchementèr vtileis egisse, beneuolentiàmque erga vos perpetuò habuisse, omniq[ue] opera ac studio reip. profuisse, satis ex ijs, quæ dicta sunt, constare existimo. Atqu[am] partem maximam rerum à me publicè institutarum & actarum prætermitto, quòd arbitrer primùm mihi de crimine ipso decretorum contra leges factorum esse differendum, rationemque reddendam: deinde etiam si nihil de reliquis actionibus, & rebus meis gestis dicam, nihilo minus tamen vestram mihi cōscientiam testem esse earum locupletem. Iam quæ iste sursum ac deorsum omnia permiscens ac perturbans, & oratione longo anfractu verborum circumacta, de legibus disputauit, contra quas hoc decretum scriptum esse arguit: neque mehercule quenquam vestrū esse puto, qui, quid diceret, intellexerit, neque ego intelligere potui. Mihi autem deliberatum est, rectam ac simplicem defensionis viam sequi. Tantum abest enim, vt dicam, me iudicio referendarum rationū non teneri (quod iste mihi crebrò obijciebat, falsò, & ita esse asseuerabat) vt eorū, quæ per omnem vitā publicè vel tractaui, vel ad ministraui, rationē me apud vos referre debere cōfitear: sed quæ de meis bonis populo vltro largitus sum, eorum rationem neq[ue] à me referri vllo tempore oportere dico: (audis AEschina?) neq[ue] ab vllo alio, ne si ex nouè quidē sit prætoribus. Nam quæ tam iniusta, quæ hominum generi tam inimica atque infesta lex, vt, qui de suo sit largitus, quique humanitate adductus benignum se, & munificum,

ficum, & liberalem re præbuerit, eum gratiæ quidem fructu priuet, calumniatoribus autem & sycophantis constrictum tradat? hos ad reposcendas eorum, quæ illæ dedit, rationes, iudices constituat? Nulla profectò est: aut siquam iste esse contendat, ostendat, atque ego æquo animo ferā, & tacebo. Verum, Athenienses, omnino nulla reperietur. Itaque calumniatur iste me, & quòd, cum ego theatriali pecuniæ præfectus essem, pecuniam de meo largitus sum, senatus (inquit) eum laudauit, quo tempore referendarum rationum iudicio tenebatur. Non ob ullam rem, cuius rationem reddere debebam, perditissime sycophanta, sed propter meam largitionem ac liberalitatem. At muris reficiendis curator eras (inquit). Etiam ob id ipsum meritò laudabar, propterea quòd quæ in eorum refectioem insumsi, donauī, neq; in tabulas retuli, expensum ue tuli. Nam expensi latio sanè, iudicium referendarum rationum, & iudices, qui rationes diligenter expendāt, desiderat: donatiò verò ac liberalitas, laudem, gratiamque promeretur. Hanc igitur ob causam Ctesiphon hoc de me scitum fecit. Atque hæc ita esse, & nō solum legibus esse definita, verum etiam institutis ac moribus nostris esse comparata, multis argumentis & testimonijs vobis demonstrabo. Nam primùm Nausicles cum esset imperator, sæpe ob ea, quæ de suo largitus est, à vobis corona donatus est. Deinde Diotimus, quòd clypeos dederat: & rursus Charidemus, coronis donati sunt. Tum Neoptolemus iste multis operibus præfectus, propter ea, quæ de suo largitus est, honorem coronæ est consecutus. Esset enim hoc miserabile sanè atque ingemiscendum, si magistratum aliquem gerenti, vel sua largiri propter magistratum non liceret, vel eorum, quæ largitus sit, non gratiam ullam consequeretur, sed iudicium referendarum rationum subire cogeretur. Atque hæc ita esse, Athenienses, ex ijs ipsis, quæ his decreta sunt, cognoscite. Recita mihi decreta. *DECRETVM. Pratore Demonico Phlyeo, sexto Kal. septembris, Verba fecit Callias.*

Phrearrus de sententia senatus, populi que Atheniensis, Placere senatui, populoque Atheniensi, Nausiclem armis præfectum corona donari, quod cum duo millia peditum Atheniensium grauioris armatura essent in Imbro, ut Atheniensibus eam insulam incolentibus auxilium ferrent, neque posset Phialo, cui suffragio populi huius muneris administratio delata fuerat, propter hiemem ac tempestatem aduersam nauigare, neque stipendium militibus persolvere, de suo viro erogauit, nec tamen à populo repetijt: placere præterea coronæ donationem Dionysijs, tragædis nouis, præconis voce pronuntiari. ALTERVM DECRETVM. Callias Phrearrus, moderatoribus ciuitatis de sententia senatus cōuocatis, verba fecit: Quod Charidemus militibus grauioris armaturæ præfectus, cum classe Salaminem missus, & Diotimus magister equitum, nonnullos milites in eo prælio, quod ad fluuium Elissum commissum est, spoliatos ab hostibus, suis surtibus, chypeis octigentis armauerunt: placere senatui, populoque Atheniensi, Charidemum & Diotimum aurea corona donari, eamque coronam Quinquatribus magnis, in gymnico certamine, & Dionysijs, tragædis nouis, præconis voce pronuntiari: Atque huius præconij curam habere thesmothetæ, & ciuitatis moderatores, penes quos est summa rerum potestas, & certaminum scemicorum curatores ac magistrōs. Vterque horum, AEschina, eius quidem muneris, quod administrabat, rationes referre debebat: sed eorum, propter quæ corona donabatur, minimè. Ne ego quidem igitur. Eodem enim iure scilicet, quo alij, fretus sum. Largitus sum de meo: propterea laude afficior, cum eorum, quæ de meis bonis dedi, rationes referre non debeam. Magistratus gessi, eorumque rationes retuli, non eorum, quæ liberalitate adductus dedi. Eslo. At magistratus perperam gessi. Si ita est verò, cur cum apud rationum præfectos, quorum de ea re notio erat, rationem referebam, præsertim cum adesses, non me accusabas? Ut igitur sciatis, istum ipsum mihi testem esse, me ob ea, de quibus rationes referre non debebam, coronam esse donatum: sume mihi totum scitum de me factum, & recita. Ex ijs enim, quæ de senatus consulto in iudicium non vocauit, se ipse aperiet &

indicabit, atq; in ijs, quæ iudicio persequitur, improbissimus calumniator reperietur. Recita. DECRETVM.

Pratore Euthyle, Vndecimo Kal. Nouembreis, tribu Oeneïde summam rem obtinente, & ciuitatem moderante, Ctesiphon Leosthenis filius Anaphlystius verba fecit. Quoniam Demosthenes Demosthenis filius Pæanicus muris reficiendis curator, præter id, quod ei de publico fuerat attributum, tria talenta de suo in opus publicum à se inscripta populo condonauit, ac remisit, neque exigere curauit: quoniâmq; pecuniæ theatri præfectus, omnium tribuum pecuniam theatralem centum minis auxit in sacrificia: placere senatui, populoque Atheniensi, Demosthenem Demosthenis filium Pæanicum, virtutis ergò, beneuolentiæque perpetuæ, quam erga populum Atheniensem habet, laudari, coronæque aurea donari, eiusque coronæ donationem, ac prædicationem in theatro, Dionysijs, tragædis nouis fieri. Prædicationis autem curam ad ludorum curatorem deferri.

Hæc sunt igitur quæ largitus sum, quorum nihil est, quod in iudicium vocaris: sed quæ iubet senatus mihi pro his persolui, ac tribui, hæc sunt, quæ tu reprehendis, atque insectaris. Tunc igitur cum ea, quæ dantur, accipere legitimum esse concedas, pro eisdem gratiam referre, de decretis contra leges factis persequeris? Si hominem insigniter improbum, & dijs inuisum, & germanum sycophantam ac maleuolum natura describere velimus, qualis per deos immortaleis fuerit? non huiusmodi? At qui quod attinet ad prædicationem in theatro faciendam, non dico de sexcenties sexcentis hominibus illic esse prædicatum: prætermitto me ipsum ibidem sæpenumero esse corona donatum: sed per deos immortaleis, ita ne stolidus, hebes, ac stupidus es, AEschinea, ut nunquã cogitare & considerare tecum ipse potueris, coronâ, ubicunq; ei prædicatio fiat, semper eandem laudem, eandemque gloriâ ei, qui donetur, afferre: sed eorû, qui coronam donât, utilitatis gratia, prædicationem in theatro fieri? Omnes enim, qui vocem præconis audierunt, cum ad bene merendum de ciuitate excitantur, tunc vero eos, qui gratiam referunt, maioribus laudibus, quàm

eum, qui corona donatur, efferunt. Idcirco hanc legem tulit ciuitas, quam recita. **LEX.** *Quoscumque aliqua municipia, aut oppida Attica donant coronæ, coronarum predicationes apud suos quæque populos faciunt: nisi quos populus aut senatus Atheniensis corona donabit. De his autem liceat in theatro Dionysii predicare.*

Audis AEschinea legem dilucidè loquentem? Nisi quos populus, aut senatus corona donabit. De his autem predicationem in theatro fieri fas est.

Quid igitur, infelix, calumniaris? quid verba fingis? cur te ipsum tandem veratro non purgas? Non te pudet alterum capitis arcessere, non quod ei crimen alicuius iniusti facinoris inferre possis, sed quod eius laudi ac virtuti inuideas, atque obtrectes? non pudet alias leges commutare, alijs parteis detrahare, quas æquum erat totas recitari, præsertim ijs, qui se secundum leges sententiam laturos iurauerunt? Et tamen cum talia facias, quibus virtutibus virum popularem præditum esse oporteat, exponis, non aliter atque si statuum præscriptis verbis, & ex syngrapha faciendam locauisses: deinde cum tibi traderetur, esset aliter facta, quam syngrapha cautum esset: aut proinde quasi homines populares verbis, non factis, ac rebus gestis spectentur, & cognoscantur. Atque interea vociferaris, & dicenda tacenda tanquam è plaustro loqueris, quæ in te, genusque tuum conueniunt, non in me: quibus iniusta vita tua est, non mea. Atqui, Athenienses, hoc ego inter accusationem, & maledictionem interesse putò, quod in accusatione crimina insint oportet, ea, quib⁹ poenæ sint legibus constitutæ: maledictio autem nihil habeat propositi, præter conuicia, & cõtumeliam, quæ ab inimicis inter ipsos confingi, & iaci solent. Verùm hæc iudicia maiores nostros eo consilio ædificasse arbitror, non vt vobis à refamiliari vestra abductis, atque in hunc locum coactis, maledicta inter nos dictu atque auditu fœda, ac nefaria iaceremus: sed vt si quis fortè in ciuitatem peccauerit, iniuriamque reip. fecerit, eum coarguamus, & conuincamus. Hæc cum sciret AEschines æquè atque ego, nihilominus

Iominus me maledictis insectari, quàm accusare maluit. Verumtamen ne hac quidem re æquum est eum posteriores ferre, atq; inferiorem discedere. Sed iam me ad hæc conferam, si hoc tantum ab eo quæsivero. Vtrum te vis. AEschinea, ciuitatis, an meum inimicum appellari? Meum scilicet: hoc enim gestu significas. Et tu vbi tibi licebat, siquid iniuste in Athenienses commiseram, pœnas à me legibus pro his expetere, neglexisti: in iudicijs referendarum rationum, in accusationibus de ijs, quæ contra leges scripta sunt, in alijs iudicijs: vbi verò integer & inuocens eram, omni que culpa vacabam, omni ex parte, rebusque omnibus, legibus, tempore, diei præscriptione, multis iudicijs antea his de rebus factis, eò denique quòd nunquam vllius in vos peccati conuictus sum: cum ciuitas ex ijs reb⁹, quæ publicè benè gestæ sunt, necessariò aliàs plus, aliàs minus gloriæ consequatur: hîc mihi occurristi? hîc tu te mihi aduersarium obtulisti? Vide ne germanus ac verus horum sis inimicus, meus verò fictus ac simulatus. Posteaquàm igitur vobis omnibus, religiosæ ac iustæ sententiæ ferendæ via monstrata est, oportet me (vt video) tamen si me natura finxerit à maledicendi studio remotissimum, tamen propter eius in me maledicta, pro multis, & falsis criminibus, quæ in me congestit, ea quæ verissima, & maximè necessaria sunt, in istum regerere: & simul ostendere, quis, & à quibus ortus AEschines, tam sit ad alterum maledictis lacerandum procliuis ac paratus: & verba quædam mea exagitet, cum ea ipse locutus sit, quæ nemo pudens ac modestus vsurpare non magnopere vereatur, ac reformidet. Nam si AEacus, aut Rhadamanthus, aut Minos esset is, qui accusat, non clamator odiosus, ac molestus, rabula de foro, cantor formularum, perditus scriba, non arbitrator cum talia fuisse dicturum, nō tam grauiā, & insolentia verba conquisitum & congestum: qui tanquam in tragœdia, clamabat, O Terra, Sol, Virtus, & cetera huiusmodi: & rursus Intelligentiam, & Doctrinam, qua

res honestæ ab inhonestis internoſcuntur, tragica voce implorabat. Audistis enim cùm hæc diceret, ſcilicet. Tibi verò, aut tuis, ô cœnum, ecqua virtutis communitas eſt? ecqua rerum honeſtarum, aut contrariarum internoſcendarum nota? vnde naſto, aut quomodo conſecuto? Vbi tibi doctrinæ mentionem facere fas eſt? quam qui verè conſecuti ſunt, nemo tamen eorum eſt, qui quicquam tale audeat de ſe prædicare: quin etiam ſiquis alter de ipſo prædicet, erubeſcat. ij verò, qui cùm ea careant, qualis es tu, præ ſtupore cordis tamen, & duritia animi, habere ſe ſimulant, hunc fructum ex orationis ſue vanitate capiunt, quòd auditores obtundunt atque ene cant, non autem talem de ſe apud eos opinionem conſequuntur. Sed cùm mihi non deſit quod de te, & de tuis dici poſſit ac debeat, vnde potiſſimùm dicendi initium faciam, de eſt. vtrum ab eo, quòd pater tu⁹ Tromes apud Elpiam, cum, qui propter ædem Theſei docebat litteras, ſeruiebat, craſſis pedicis, & ligneis compedibus vinctus an quòd mater tua cùm diurnis nuptiis in caula, que eſt ad heroëm Calamitâ operâ daret, te pulcherrimam ſtatuam, & ſummum ac præſtantem tertiarum partium hiſtrionem educabat? an quòd eam contemptus & clauſicus tibicen Phormio Dionis Phrearrij ſeruus ab hoc honeſtiſſimo quæſtu excitatam abduxit? At mehercule vereor, ne, dum de te ea dico, quæ in te conueniant, quæque te deceat audire, ea mihi dicenda ſuſcepſiſſe videar, quæ à meis moribus abhorreant, quæque me dedeceat dicere. Quamobrem hæc quidem miſſa faciam: ab eius autem factis & vita antea facta incipiam. Non enim vnus de multis, non fortè fortuna oblatuſ homo, ſed ex eorū numero eſt, quos populus exſecrari ſolet. ſerò enim tandem, ſerò, inquam, immò verò heri & nuper Athenienſis ſimul & orator factuſ eſt, & duabus ſyllabis additis, patrem, qui Tromes nominabatur, Atrometum fecit: matrem graui ſanè, & honorifico nomine Glaucotheam appellauit, quam ſciunt omnes Empuſam antea fuiſſe
nomi-

nominatam: tracto videlicet ex contumelia cognomine, ob id, quòd omnia & faceret & pateretur. Vnde enim potius? Ita tamen ingratus es, improbūque natura, vt, cū liber ex seruo, diues ex paupere atque egente horum beneficio factus sis, non modò gratiam eis non habeas, sed tuis operis mercede locatis, contra hos temp. geras. Atque ea quidem, quæ in dubium & contentionem venire possunt, vtrū sint ab isto pro ciuitatis utilitate dicta, necne, præteribo. Quæ autem sine controuerfia pro reip. hostibus agere compertus est, hæc commemorabo atque exponam. Quis vestrū nescit, Antiphontem è tribu motum, atque è numero ciuium segregatum, quòd se vestra naualia incensurum promississet, in urbem venisse? quem cū ego in Piræeo delitescentem comprehendissem, & in aspectum vestrum, contionemque produxissem, improbiſſimus iste sycophanta clamans & vociferans me in ciuitate libera res non ferendas atque indignas facere, qui ciueis calamitosos atque afflictos contumelijs insequerer, atque vexarem, eorūque domos introirẽ, sine populi scito dimittendum curauit. Quòd nisi senatus Ariopagiticus re intellegita, cū videret, vos alienissimo tempore, imprudentia, ignorantiaque labi, hominem perquisiuisſet, comprehensūque ad vos reduxisset, vobis ereptus esset homo nocentissimus, & pœnis iustis ac debitis eluſis, ab isto grandiloquo ostetatore dimissus. Nunc autem quæſtione de eo habita cruciatum necauistis, vt item istum morte affici oportebat. Itaque cū hæc sciret senatus Ariopagiticus, ea dico, quæ tū ab isto nefariè conmissa sunt, cūque cum vos eodem errore, eadẽque ignoratione decepti, qua multa iam in rep. de manibus amiſiſtis, auctorem & patronum templi Apollinis, quod in Delo est, suffragijs vestris creauissetis: simulatq; grauissimum illum senatum adhibuistis, eiꝰque totius rei potestatem permiſiſtis, istum quidem cōtinuò vt proditorem exegit atque expulit: Hyperidem autem huic causæ agenda

præesse voluit. Atque hæc gesta sunt, cum tabellæ ex ara ferrentur: neque vlla omnino tabella isti impuro suffragata est. Quæ ut esse vera perspicere possitis, testis vobis in hanc rem locupleteis producam. Euoca testis.

TESTES. *Dicunt hi omnibus de rebus testimonium Demostheni, Callias Suniens, Zeno Phlyeus, Cleo Phalereus, Demonicus Marathonius. Cum populus olim actore ac patroni causa pro templo Deliaeo apud Amphictyones dicenda Aeschinem suffragio suo creasset, nos in consilium missi iudicauimus, Hyperidem digniorem esse, qui personam ciuitatis sustineret: atque ita missus est Hyperides.*

Cum igitur istum spe iam certa, atque opinione sua illius causæ actorem senatus repudiavit, & alteri negotiū dedit: tunc & proditorem, & maleuolo in vos esse animo pronuntiauit. Vnam rem habetis ab isto fortissimo viro gestam, ijs rebus, quas in me reprehendit, valde similem, nonne? Accipite nunc alteram: & memoriam vestram ad ea, quæ dicturus sum excitate. Quo tempore Philippus Pythonem Byzantium misit, atque ab omnibus socijs suis legatos vnâ cum eo mittendos curauit, tanquam ciuitatem nostram dedecore atque ignominia affecturus, & ius gentium ab ea lædi planum facturum: ego tum Pythoni insolentius se iactanti, & multitudine verborum nos perfundere atque obruere torrentis instar cogitanti, non cessi, neque pedem retuli, aut terga verti, sed surrexi, ac restiti: neque iura ciuitatis tacui, aut prodidi, sed Philippum nobis iniuriam facere usque adeo firmis ac certis argumentis ostendi, & peruici, ut ipsi illius socij subito exurgerent, ac palam faterentur. At iste Philippi patrocinium susceperat, testimoniūque contra patriam dicebat, idque adeo falsum: neque his fuit contentus, sed iterum postea, non longo post tempore vnâ cum Anaxino exploratore in Thraſonis adeis ingrediens, & sermones conferens deprehensus est. Atqui qui cum eo, qui ab hoste missus erat, solus cum solo verfabatur, & consilia, sermonesque conferebat, iste ipse explorator erat, & hostis patriæ natura. Atque hæc ve-

ra esse ex testibus cognoscetis. Citentur testes. TESTES.

Menedemus Cleonis filius, Hyperides Callaehri, Nicomachus Diophanti, demuntiato à Demosthene testimonio, testificantur, idque apud imperatores iurarunt, se scire AEschinam Atrometi filium Cothocidem noctu in ædeis Thraasonis introisse, & cum Anaxino cōmunicasse, eo, qui explorator à Philippo missus indicatus est. Hæc testimonia dicta sunt prætoræ Nicia, tertio nonis Iunius. Cùm sexcenta alia habeam, quæ de isto dicam, prætermitto. Namque ita quodammodo se res habet. Multa huius generis præterea possum vobis ostendere, in quibus iste per illa tempora & hostibus inseruisse, & mihi per improbissimam calumniam, malitiâque obstitisse perspectus est. Sed neque hæc vobis digna videntur, quæ memoriæ mandetis, neque cùm auditis, pro magnitudine & gravitate facinorum satis acrem vobis iram commouët. Quin pessimo quodam iam more cuilibet è populo potestaté, licentiâque permittitis eum supplantandi, & calumniandi, qui dicat aliquid è re vestra, ciuitatis commoda cum ea voluptate, quæ ex maledicentia percipitur, commutantes. Quapropter facilius semper & tutius est hostibus inseruientem, mercedem accipere, quàm eas partes, quæ vobiscum faciant, sequentem, remp. administrare. Atque antequàm apertè cum Philippo bellum gererem, ei studuisse, operamque dedisse: sceleratum ac nefarium est, ô terra, ô cælum, diique immortales. quis neget? contra patriam? sed tamen hoc ei date, si vultis, date. Verùm cùm spoliata iam & captæ naues erant, cùm Cherrhonesus euertebatur, cùm in Atticam inuadebat Philippus, neque iam res erat dubia, sed bellum exarserat: nihil quicquam ostendere potest maledic^o iste syco-phanta, iambeorum scriptor, quod pro vestris commodis gesserit: non vllum ab AEschina scitum factum est, neque magnum, neque paruum, quod ad reip. vtilitatem pertineat. Quòd si vsque eò impudens est, vt aliquod extare dicat, iam nunc ostendat sanè, meisque horis utatur. Sed nullum est. Atqui necesse est alterum è duobus

esse verum, ut aut quod ea, quæ à me agebantur, reprehendere non posset, idcirco alia, quæ à meis discreparent, non decreuerit, ac scripserit: aut quod hostium rationibus consulere cogitaret, ea, quæ meis cogitatis sciret esse meliora, in medium proferre noluerit. At cum aliqua in re vobis noceri posse sperabat, tum nihilne dicebat? nihilne decernebat? Immo verò non relinquebatur alteri quicquam dicendi locus. Ac cetera quidem, quæ iste occultè fecit, poterat sanè ferre ciuitas, ut opinor. Sed vnum superioribus suis facinoribus addidit, Athenienses, cuiusmodi, quo admissio ceteris fastigium imposuit, quodque aliorum tãquam extremus actus esse videri queat: de quo longam sanè orationem consumpsit, cum Amphissensium decreta presequeretur: quasi verò hac ratione rei veritatē inuertere, ac deprauare posset. Sed non ita est. Cur enim inuerteretur à mēdacio veritas? Longe aliter est. Neque vnquam tam multa dices, ut eorum scelerum, quæ in ea re commissisti, maculas eluere possis. Sed vobis præsentibus atque audientibus, Athenienses, deos, deasque omneis appello, qui huic terræ Atticæ præsident, & Apollinem Pythium, huius ciuitatis patrium, atque auitum custodem, precorque ab ijs omnibus, ut si quidem apud vos vera dixerò, & dixi apud populum tum, cum primùm istum impurissimū hanc rem attingere animaduerti: (cognoui enim statim, cognoui) dent mihi salutem cum optato vitæ cursu, perpetuæque felicitate coniunctam. Sin odio priuato adductus, & contentionis studio elatus, falsum isti crimen inferam, omnium me rerum bonarum ac secundarum fructu priuent. Cur igitur hæc mihi precat? sum, aut cur tam vehemēter contendit? Quia quamuis & tabulas habeam in tabulario publico cōditas, quibus confido me hæc vobis plana facturum, & sciam vos eius actiones memoria tenere, illud tamen vereor, ne istius persona humilior ac leuior existimetur, quàm ut tanta scelera ab eo admissa esse videantur: quod antea contigit, cum infeli-

cis.

cissimis Phocensibus causa fuit cur funditus interirent, rebus falsis huc ex legatione renuntiatis. Iste est enim, qui bellum Amphissense excitauit, propter quod Elatreā inuasit, & Amphictyonum dux ac princeps lectus est Philippus, is, qui res vniuersas Græcorum euertit, atque afflixit: iste deniq; vnus est ex omnibus, qui Græciæ calamitatum, acerbissimorumque malorum causa fuit. Et cum illo ipso temporis puncto testarer, & clamarem in contione: *Bellum in Atticam inuehis, Æschina, bellum Amphictyonicum concitas, Æschina:* alij multo antè dedita opera comparati, atque ad eam rem compositi, ac subornati, mihi dicendi potestatem non faciebant: alij mirabantur, & me ei falsum crimen propter inimicitias priuatas imponere arbitrabātur. Quæ autem harum rerum conditio, Athenienses, fuerit, quam ob causam hæ res comparatæ atq; instructæ, quomodo gestæ fuerint, nunc denique, quoniam tunc prohibiti estis, attendite. Nam hinc & rem callidè compositā fuisse intelligetis, & simul magno vobis ea, quæ dicturus sum, ad cognitionem rerum communium erunt vsui atque adiumento: & quantæ Philippi sollertia, quantum ingenij acumen fuerit, cognoscetis. Philippus quomodo se bello, quod nobiscum gerebat, explicaret, quoue pacto eius belli molestia defungeretur, nō reperiēbat, nisi Thebanos, ac Thefalos, iniquos atque infensos nostræ ciuitati redderet: quin etiam, vt cum eo infelicitè, & minus strenuè nostri pugnarent imperatores, ab ipsius belli vi tamen, & à prædonibus, maximis & innumeris detrimentis afficiebatur. Nam neque quicquam eorum, quæ terra gignebat, foras exportabatur, neque ea, quibus egebat, importabantur. Iam verò neque in mari superior vobis erat, neque in Atticani venire poterat, si neque Thessali eum sequerentur, neque Thebani per suos sineis ei aditum patefacerent. In eum autem locum rationes eius erant deductæ, vt quamuis proelium secundum faceret, superiorq; è bello discederet, qualescunque imperatores mittere-

tis(hoc enim nihil ad ea, quæ nunc agimus, pertinet) ipsa
tamen loci, rerumque, quæ vtrisque suppetebant, natura,
maximis incommodis confictaretur: Quod si vel
Theſſalis, vel Thebanis perſuadere conaretur, vt priuatarum
ipſius inimicitiarum cauſa vobis bellum inferret, eorum
neminem auditurum putabat: ſin communibus illorum
cauſis ſuſceptis efficeret, vt ad ſe belli principatus
deferretur, facilius ſe partim fallendo, partim perſuadendo,
id, quod optaret, conſecuturum ſperabat. Quid igitur
molitur? videte quàm callidè atque aſtutè. Bellum aduerſus
Amphiſtyones conflare, tumultumque apud conſeſſum
illum Pylæum concitare. Exiſtimabat enim, eos ſtatim
ad has res auxiliũ ſuum deſideraturos. Siquis autem
vel ex conſilii Amphiſtyonici ſcribis, (hieronymonas
appellam⁹) quos ipſe mitteret, vel ex eius ſocijs,
hoc bellum ſuaſiſſet, Thebanis ac Theſſalis rem ſuſpectam
futuram, omneſque ſibi diligenter cauturos arbitrabatur:
ſin huius belli auctor ac ſuaſor, Athenienſis atque à
vobis aduerſarijs proſectus eſſet, ſeſe nullo negotio
conſilia ſua teſta habiturum: quod ita euēnit. Quoniam
igitur modo hæc aſſecutus eſt? nimirum iſtum conducit.
Deinde cum hac de re nemo, opinor, vel tenuiſſimam
antea auditionem accepiſſet, nemo proſpiceret, nemo
caueret: iſte, quemadmodum talia apud vos fieri cōſueverunt,
pylagoras nominatus, tribus aut quattuor ſuffragium
ferentibus, renuntiatus ac declaratus eſt. Ac cum
primũ ciuitatis dignitate atque auctoritate fret⁹, ad
Amphiſtyonas peruēnit, rebus alijs omnibus ſpretis
ac prætermiſſis, ad ea conſcienda omni cura & ſtudio
incumbebat, propter quæ conſectus erat. Ita verbis
in ſpeciem honeſtis, ſermonib⁹que fabuloſis adornatis,
comparatis atque expoſitis, homines rerum ac verborum
imperitos, incautos, & quid eſſet futurum minimè
prouidenteis, ad decernendum adducit, vt totā illam
regionem obirēt ac perluſtrarent, quam Amphiffenſes,
vt ſuam, à ſe arari atque obſeri fatebantur: iſte ad ter-

ram sacram pertinere arguebat, cum Locri neque ullam nobis multam irrogarent, neque ea, quæ iste suo sceleri prætexit, multum à veritate disiuncta, cogitarent. Quòd ita esse, hinc cognoscere potestis. Non licebat Locris, nisi iudicio nobis denūtiato, vllā nostræ ciuitati multam irrogare. Quis vos igitur reos citauit? cuius imperij aut magistratus auctoritate? cedò hominem qui sciat: ostende. At non potes. sed tota illa causa abs te temere & falso conficta est. Cum igitur Amphictyones istius hortatu, agros illos obijissent, Locri impetu facto, omneis pæne iaculis confixerunt: nonnullos etiam hieromnemonēs comprehēderunt, & discerpserunt. Atque vt semel ex his simultates, atque offensiones ortæ, bellumque aduersus Amphissenseis natum est: primū Cottyphus Amphictyonum exercitui præfectus est: deinde cum alij non venirent, alij venissent quidem, sed nullam operam nauarent, Pylæo consilio, eo, quod proximè cōsecutum est, nonnulli partim ex Thessalis ad eam rem compositi, & iam pridem improbi, partim ex alijs ciuitatibus causas probabileis, & speciosas nacti, totam rem ad Philippum detulerunt. dicebant enim aut ipsos pecuniam conferre oportere, externosque milites alere, & qui hæc recusarent, multare: aut illum belli ducem esse deligendum. Quid multa? factum est, vt huius belli principatus ad Philippum deferretur. Ille autē postea breui tempore exercitu comparato, cum per simulationem belli Cirrheo campo inferendi aduenisset, Cirrhæis & Locris longum valere iussis, Elatéam occupat. Quòd si non statim consilium mutassent Thebani, seseque nobiscū maturè coniunxissent, totius huius belli impetus veluti torrens quidam in ciuitatem nostram irruisset. Nunc autē illi confestim eius conatum represserūt: maximè quidem, Athenienses, dei alicuius benignitate erga vos & beneuolentia: secundo loco, quantum vnius hominis virtus præstare potest, mea opera. Cedò mihi hæc decreta, & tempora, quibus vnumquicque gestum est, vt sciatis quot &

quantis turbis impurissimum caput excitatis, pœnas tamen nondum persoluerit. Recita decreta. **DECRETVM AMPHICTYONVM.** Sacerdote Clinagora, Pylæo concilio verno, pylagoræ, Amphictyonumque cōsiliarij decreuerunt: Quoniam Amphissenses in agrum sacrum ingrediuntur, cū colunt, cōserunt, pecore immisso depascūt, vt pylagoræ, & cōsiliarij eò se conferāt, terminos cippis & columnis distinguant, & Amphissensibus in posterum tempus eius agri aditu interdican. **ALTERVM DECRETVM.** Sacerdote Clinagora, concilio Pylæo verno, pylagoræ, & Amphictyonum cōsiliarij, & commune Amphictyonum, ita censuerūt: Quoniam Amphissenses agrum sacrum à se occupatum, viriūque possessum ac diuisum arant, & pecore immisso depascunt: & cū hoc facere vetarentur manufacta, & armatis hominibus, commune Græcorum cōsiliū vi propulsarūt, nonnullos etiam vulnerarunt: placere vt Cottyphus Arcas Amphictyonum delectus imperator ad Philippum Macedonem legatus proficiscatur, ab eoque petat, vt Apollini, & Amphictyonibus opem, auxiliūque ferat, nec sinat ab impijs Amphissensibus deum nefariè violari, iniuriæque affici: postremò doceat, idcirco eum imperatorem summa potestate præditum à Græcis constitui omnibus, qui cōsiliij Amphictyonici sunt participes. Recita verò & tempora, quibus hæc gesta sunt, ea enim ipsa sunt. quibus iste fuit pylagoras. **TEMPORA.** Mnesithida prætor, decimo sexto Kal. decembris. Cedò mihi etiam epistolam Philippi, quam cū ei iam non obtemperarent Thebani, ad focios, qui sunt in Peloponneso misit, vt ex hac quoque intelligatis & illum veram rerum susceptarum causam, nempe se hæc contra Græciam, contra Thebanos, contra vos ipsos agere ac moliri, occultasse, & res ad communem Græcorū vtilitatem pertinentes, atque ab Amphictyonibus decretas facere se simulasse, & istum has ei rerum gerendarum opportunitates, & facultates, & causas subministrasse. Recita. **EPISTOLA PHILIPPI.**

Rex Macedonum Philippus Peloponnesiorum, eorum, qui communi societatis vinculo & fœdere continentur, magistratibus, & cōsiliarijs, reliquisque socijs omnibus S. D. Quoniam Locri Ozgole,

læ, qui nominantur, Amphiffæ habitantes, in templum Apollinis Delphicum nefaria scelera committunt, sacram terram vi & armis populantur, diripiunt, ac spoliant, habeo in animo vobiscum deo subuenire, atque opitulari: eosque, qui aliquid religione apud homines consecratum violare audent, armis persequi, atque vlcisci. Quapropter facite, ut mihi cum armis ad Phocidem occurratis, ibique præsto mihi sitis cōmeatus, & re frumentaria in dies quadraginta instructi, mense proximo sextili, aut, ut nos utimur, Loo: ut Athenienses, Boëdromione: ut Corinthij, Pánemo. Eorum igitur, qui non manu facta, & multitudine armata, se tamen nobis adiunxerint, consilio utemur: qui verò ab hac societate refugerint, eos malè multabimus. Valete. Videte ut veras huius incepti causas dissimulet atque occultet, & ad Amphictyonicas confugiat, in eisque delitescat. Quis igitur ei fuit harum rerum administer atque adiutor? quis has ei causas & latebras præbuit? quis malorum, quæ acciderunt, maximè architectus? quis auctor? quis caput? non iste est? Nolite igitur, Athenienses, inter deambulandum dicere, Græciam ab vno homine his calamitatibus affectam esse. non ab vno, sed à multis & improbis, quos habent singulæ Græciæ ciuitates: ò terra, ò dii immortales: in quorum iste numero est: quem, si me nulla re deterritum verum dicere oportet, non dubitem communem omnium, quæ postea perierunt, labem, perniciem, ac procellam nominare, hominum, locorum, ciuitatum. Nam ut in seminibus causa inest arborum & stirpium, sic tu, qui horum omnium malorum, quæ orta sunt, semen præbuidisti, eorum causa meritò dici debes: quem statim ut aspexistis, quo tandem pacto, ò ferrei, non auersati, atque aspernati fueritis, equidem demiror. Sed immensæ quædam scilicet, densæque tenebræ vobis veritatis lucem obscurant. Factum igitur est nunc denique, ut, dum eas res tracto, quas iste contra patriam gessit, ad meas tandem in rep. administranda actiones peruenerim, in quibus ego istorum consilijs restiti: quas cum multis de causis meritò ex me audietis, tū ob eam causam maximè, quod turpe est, Athe-

nienſes, quarum ego actiõnum, rerũque geſtarum laborem pro vobis ſubierim ac pertulerim, earum vos ne verba quidem æquis auribus, atque attentis animis audire. Cũ igitur viderem, Thebanos, ac pæne dicã, vos ipſos, Athenienſes, eorum conſilijs, atque inſidijs, qui Philippi rationibus conſulebant, quiq̃ apud vtroſque pretio corrupti erant: quod erat & vobis & illis pertimeſcendum, ac magnopere providendum & cauendum, ne Philippum creſcere ſineretis, id negligere, nullãque in re vobis præcauere: ad mutuas autem inimicitias, ad offenſiones ac diſcordias procliueis promptos ac paratos eſſe: ego aſiduè in ſpeculis eram, & id ne accideret, prouidebam, non quòd meo ſolũ ingenio, & conſilio fretus hæc nobis conducere putarem, ſed quia ſciebam Ariſtophontem, & item Eubulum, ſemper hanc inter vos concordiam, atque amicitiam conciliare & conſtituere ſtudiſſe: & cũ alijs in rebus inter ſe ſæpenumero diſſentirent, & concertarent, in hac vnum & idem ſemper ſenſiſſe: quos tu viuos, ô bellua, officiij cauſa deducebas & aſſectabaris, quos ſumma obſeruãtia colebas, quibus aſſentabaris: mortuos non te pudet accuſare. Nam quæ mihi de Thebanis crimini das, in ijs multo magis illos, qui hanc ſocietatem ante me approbarunt, quàm me, reprehendis & accuſas. Verũ ad illa reuertor, de quibus dicere cœperam. Cũ igitur iſte quidem bellum Amphiffenſe excitafſet, alij autem eius adiutores Thebanos à vobis alienaſſent, accidit, vt Philippus bellum nobis inferret: cuius rei gratia iſti ciuitates inter ſe mutuis offenſionibus exaſperabant. quod niſi paullo priores experrecti eſſemus, ne colligendi quidem noſtri, aut reſpirandi data nobis facultas eſſet: ad eò longè iſtorum ſtudio atque opera res proceſſerat. Quo animo autem tum inter vos affecti eſſetis, ex his decretis, Philippique reſponſis cognoscetis: quæ mihi recita. DECRETA. *Heropytho pratore, ſeptimo Kal. Martias, tribu Erechthẽde ſummam rerum poteſtatem obtinente, de ſenatus, imperatorũque ſententia:*

sententia: Quoniam Philippus finitimas vrbeis alias occupauit, alias delet atque euerit: denique omnino in Atticam inuadere parat, fœdera inter nos percussa pro nihilo putans: insurandumque vtrunque interpositum, & pacem factam infirmare instituit, fidem datam, acceptamque negligens: placuit senatui, populôque Atheniensi, vt ad eum legati mittantur, qui cum eo agant, orent que, maximè, vt concordiam mutuam, pactionesque nobiscum factas tueatur, atque obseruet: secundo loco si hoc nobis minus cœcedendum esse existimet, deliberandi tempus & spatium det ciuitatis, indutiasque nobiscum vsque ad mensem Aprilem faciat. Lecti sunt è senatu Simus Anagyraeus, Euthydemus Phlyasius, Bulagoras Alopecensis. AL-
 TERVM DECRETVM. Prætor Heropytho, pridie Kal. Aprilis, de eius, qui rei militari præest, sententia: Quoniam Philippus Thebanos à nobis alienare conatur, & cum vniuerso exercitu in loca Atticæ maximè vicina irrumperere parat, fœdera inter nos icta negligens, decreuit senatus, populûsque Atheniensis iussit, vt ad eum caduceator & legati mittantur, qui ab eo postulent, eumque hortentur, vt nobiscum indutias faciat, quo populus, quo ad eius fieri poterit, pro re nata, deliberet, & statuatur, quid sibi agendum sit. Nam nunc quidem non censuit, ne mediocre quidem auxilium esse mittendû. Lecti sunt è senatu, Nearchus Sofinomi fil. Polycrates Epiphronis fil. fœtialis Eunomus Anaphlystius priuatus & de plebe. Recitata verò & Philippi responsa. RESPONSVM PHILIPPI ATHENIENSIBVS DATVM. Rex Macedonum Philippus senatui, populôque Atheniensi S. D. Qua ab initio fueritis erga me voluntate, quantôque studio elaboraueritis, vt Thessalos, Thebanos, atque etiam Boeotos alliceretis, non ignoro. Verùm cùm cepissent illi consilia cautiora, & saniora, neque iudicium ac voluntatem suam vestræ potestati iradere, aut summittere voluissent: sed sese ad partis vtiliores applicuissent, vos nunc sententia mutata, missis ad me legatis ac fœtialibus, facitis mihi de fœderibus mentionem, à mœque, vt ego indutias vobiscum pacificas, petitis, nulla prorsus in re à nobis iniuste læsi. Ego igitur, vestris legatis auditis, assentior vestris postulatis, indutiasque vobiscum facere paratus sum, ea lege si eos, qui vobis minus recta consilia dederunt, è ciuium numero eiciendos atque ignominia afficiendos curaueritis. Valete.

EIVSDEM RESPONSVM THEBANIS DATVM. *Rex Macedonũ Philippus, senatui, populoque Thebano S. D. Epistolã vestrã accepi, quã mihi concordiam nostram, pacẽque inter nos constitutã renouatis, Audio porrò Athenienses omnia erga vos studia vobis deferre, ac polliceri, eo consilio, vt ea, quã à vobis postularunt, approbetis. Atque equidem antea existimabam fore, vt spem vobis ab illis ostentatam, eorũque institutum ac voluntatem sequeremini. Nunc verò posteaquã cognoui, vos pacem mecum colere ac tue-ri, quã aliorum consilijs & sententijs morem gerere maluisse, magnopere lætatus sum: immò verò cùm multis nominibus vobis gratulor, tũ ob id maximè vos laudo, quòd & melius vobis consulistis, & vestram erga me benevolentia declarastis. Quam quidem rem spero vobis magno adiumento ad omnia futuram, si modò in hac sententia maneatis. Valete. Cùm ciuitates his artibus ac rationibus inter se sic affecisset Philippus, his decretis & responsis elatus, venit cum exercitu, Elateãque occupauit, proinde quasi siquid rerum nouarum moliretur, ne tum quidem vos & Thebani consensuri essetis. Quamuis autem qui tum in vrbe motus ac tumultus fuerit excitatus, meministis: vos tamen, dum ea, quã huic causã coniuncta ac necessaria sunt, expono, quãso diligenter attendite. Cùm iam vesper esset, venit quidam ad ciuitatis moderatores, qui nuntiaret Elateã esse occupatam. Ibi continuò alij, his inter cenandum auditis, surrexerunt, opifices ex tabernis, quã in foro sunt, exturbant, pelleis & tabernacula viminibus obducta incendunt: alij, imperatores arcessebant, & tubicinem euocabant: vrbs denique plena turbarum, plena clamoris ac strepitus, plena tumultus erat. Postridie hora diei prima, ciuitatis moderatores, senatum in curiam vocabãt. Vos in contionem concurrebatis, & prius quã quicquam in senatu actum, ullũque senatusconsultum factum esset, populus vniuersus in locis superioribus confederat. Deinde statim vt senatus in contionem venit, exposuerũt ciuitatis moderatores ea, quã ad se delata essent, eũque, qui venerat, produxerunt: qui cùm ea, quã audistis,*

distis, locutus esset: interrogabat præco, quis verba facere vellet. nemo prodibat. Cùm iterum ac sæpius illud idem interrogaret præco, nihilo magis quisquam ad dicendum surgebat, cùm adessent omnes imperatores, omnesque oratores: cùm denique communis patriæ vox audiretur, quæ aliquem, qui pro communi salute diceret, euocabat, atque inuitabat. Nam, quam vocem præco ex legum præscripto mittit, hæc communis patriæ vox haberi debet. Atqui si eos, qui ciuitatē saluam esse volebant, in medium prodire, atque in suggestum ascendere oportebat, vos omnes, & ceteri Athenienses surrexissetis, atque in contionem ascendissetis: omnes enim, sat scio, cōseruari volebatis: si locupletissimos, trecenti viri, qui censu reliquis ciuibus antecellunt: si eos, quibus vtrunque suppetit, & optimus in remp. animus, & res familiaris ampla & lauta, eos, qui postea eximiam liberalitatem & munificentiam in populum cōtulerunt. Nam & beneuolentia adducti, & diuitijs freti, munifici fuerunt & liberales. Verùm, vt appāret, tempus illud, atque ille dies non virum in ciuitatem beneuolum & diuitem tantum requirebat, sed eum, qui ab initio ita se comparasset, vt rerum ordinem ac progressum vsu doctus, animo penitus comprehensum haberet, & apud se rationibus omnib⁹ subductis cogitatione explicasset, quid sibi veller, quid spectaret, quam ob rem hæc ageret Philippus. Nam qui hæc nesciret, neque ea diligenter expendisset, quantumuis esset reip. beneuolus atque amicus, quantumuis locuples & pecuniosus, nihilo magis tamen quid faciendum esset, sciret, aut, vt sciret, consilij vobis dandi facultatem haberet. Ego igitur illo die is exortus sum, quem patrie salus requirebat: ego surrexi, & in contionem ascendi, eaque apud vos locutus sum, quæ nunc peto à vobis, duabus de causis vt diligenter, & erectis animis ex me audiatis: primùm vt intelligatis, me vnum ex ijs, qui contionari solent, quiq̃ue in rep. versantur, beneuolentiæ erga patriam præsidium & lo-

cum, in asperis ac formidolosis reip. temporibus non reliquisse, sed in ipso discrimine, atque in ipsis rebus aduersis ea perspectum esse tum dicere, tum decernere, quæ tempora reip. postulabāt. deinde quia breui tempore in his audiendis cōsumto maiorē totius reip. status cognitionem cōsecuturi estis. Dixi igitur tū, eos, qui sic trepidarent ac tumultuarentur, quasi Thebani essent amici Philippo, totius rerum præsentium status ignaros mihi videri. Nam si ita esset, inquam, non iam eum Elatéæ, sed in nostris finibus esse audirem: venisse autem illū certò scio, ut ea, quæ iam pridem molitur in Thebanos, composita, parata, atque expedita habeat. Atque, ut intelligatis quomodo hæc se habeant, diligenter attendite. Quotquot illic ex Thebanis vel pecunia inducere, vel dolis capere potuit, omneis habet sibi pulchrè instructos ac paratos. Eos autem, qui & ab initio sibi resisterunt, & nunc etiam aduersantur, nulla ratione ut sibi obtemperent, flectere potest. Quid igitur sibi vult? aut cur Elatéam occupauit? copijs suis proximè illorum urbem ostentatis, armisquæ in eorum conspectu positis & constitutis, cogitat amicis quidem animos augere, eosquæ erigere, & spe optima cōfirmare: aduersarios autem perterrere, ut vel metu perculsi, vel vi ac necessitate coacti, ea concedant quæ nunc renuunt ac pernegant. Si nos igitur hoc tempore statutum in animis habebimus, siquid forte à Thebanis grauius ac durius in nos antea commissum est, id meminisse, illisquæ diffidere, illos deniq; in hostium numero ac loco ducere: primùm ea ipsa, quæ Philippus audissimè expetit, ac vehementer exoptat, faciemus: deinde vereor, ne cū eum in amicitiam receperint ij, qui nunc ei aduersantur, atq; ita vno animo omnes cum Philippo fecerint, ac steterint, vtrique iunctis copijs in Atticam inuadant. Quare si consilium meum atque auctoritatem secuti fueritis, siquæ ad prudenter ac sapienter cogitandum, non ad contendendum his de rebus, de quibus nunc dissero, omni studio, curaque

que incubueritis, spero me & opinionem fidelis ac prudentis monitoris apud vos consecuturum, & periculum, quod impendet ciuitati, depulsurum. Quid igitur dico? Primùm vos à metu, in quo nunc versamur, liberos ac solutos esse oportere: deinde illum ipsum metum aliò deriuare, & omneis Thebanis timere: (multo enim propius absunt à malis: periculòque, quod Græcis imminet, maximè sunt omnium propinqui.) deinde & vos, qui per atatem arma ferre potestis, & vos equites Eleusinem instructa acie profectos, Græcis omnibus ostendere, vos in armis esse, vt ij, qui Thebis vobiscum & sentiunt, & faciunt, æquè vt vobis, liceat de communi Græcorum iure liberè sentire, & liberè loqui, cùm exploratum habuerint, quemadmodum ij, qui patriam Philippo vendiderunt, habent copias Elatææ instructas ac paratas, auxilio sibi, vbi opus erit, futuras: ita ijs, qui pro libertate decertare volunt, vos præstò esse, alacris, promptos, ac paratos, præsidioque eis futuros, si quis eos bello laceffat. Deinde decem legatos suffragijs creandos esse censeo, atque his pariter cum imperatoribus summam potestatem permittendam & statuendi, quo tempore milites illuc proficisci debeant, & exercitus sub signis educendi. Posteaquàm verò legati Thebas peruenerint, quònam modo hanc rem tractandam & administrandam censeam, quæso diligenter attendite. Nihil quicquam à Thebanis supplices petite, nihil eos rogate. turpe enim tempus est. sed vos auxiliũ eis laturos, si vti velint, promittite, tanquã illi quidem summo in discrimine versentur: nos autem acrioribus oculis, quàm illi, rerum euentum prospiciamus, vt, si quidem hæc approbent, nobisq̃ assentiantur, primùm lætemur nos ea, quæ volumus, esse consecutos, & ex sententia res esse administratas: deinde in his rebus agendis, antiquam nostræ ciuitatis dignitatem & amplitudinem retineamus: sin nihil profecerimus, illi quidem seipsi accusent, & de se querantur, siquid nunc titubarint, atque offenderint: à no-

bis autem nihil turpe, nihilque humile admissum esse gaudeamus. Hæc & quædam alia his similia cum dixissem, descendi. quæ cum essent ab omnibus comprobata, nemoque quicquam contrà dixisset, non & ea dixi, & non decreui: neque verò decreui, & non legatione obij: neq; legatione obita, Thebanis non persuasi: sed à principio progressus rem totam gradatim ac singillatim ad exitum perduxì, meque planè totum in periculis & difficillimus reip. temporib⁹ vobis patefeci, obtuli, ac permisi. Cedò mihi decretum, quod tum factum est. At quì quem te vis AEschina, quem meipsum fuisse illo die faciam? An me quidem, quem tu maledicti & contumeliæ causa appellaueris, Batalum fuisse vis: te autem non fortè fortuna oblatum heroa, sed aliquem ex his de scena Cresphontem, aut Creontem, aut, quem tu olim in Colytto cum eum malus malè ageres, obtriuisti Oenomaum? Tunc igitur, illo, inquam, tempore, ego ille Batalus Pæanieus, te Oenomao Cothocida melior, & laudabilior patriæ ciuis extiti. Nam tu quidem nulla ex parte vsquã utilis eras ciuitati: ego autem omnia optimo atque vtilissimo ciue digna & præstabam, & gerebam. Recita decretum.

DECRETVM DEMOSTHENIS. *Nausicle prætor, tribu A Eantide summam rerum potestatem obtinente, decimo sexto Kal. Iunius, Demosthenes Demosthenis filius Pæanieus verba fecit: Quoniam Philippus Rex Macedorum cum superioribus temporibus pacis fœdera, quæ cum eo populus Atheniensis percussit, apertè neglexisse, iusurandum, iuræque omnia, quæ apud omnes per æquè Græcos sancta sunt, despexisse, ac pro nihilo putasse: Urbis, in quibus nihil omnino iuris habet, interceptisse, ac sibi vendicasse: nonnullas, quæ sunt Atheniensium, vi & armis cepisse reperitur, nulla accepta à populo Atheniensi iniuria: tum hoc tempore vi & crudelitate longius in dies progreditur: nam ex Græciæ Urbibus alias præsidij deuincit, & liberorum populorum statum reip. labefacit, alias in seruitutem redigit, & diruit: in alijs colonos barbaros, Græcis eiectis, collocat, sacrorum ac sepulcrorum vsum eis impertiens, nihil alienum neque patria, neque ingenio suo faciès,*

rebus secundis intemperanter & immoderatè perfruens atque exsultans: denique oblîtus se ex humili & contempto Macedone magnum insperatò factum esse: quândiu enim populus Atheniensis videbat eum vrbeis barbaras, quasi peculiareis ac propriis interciperet, leuius id esse & tolerabilius arbitrabatur, cum ipse in se peccaret: nûc autem cum cernat oculis, vrbeis Græciæ partim ignominia affici, partim deleri, ac funditus eueriti: & graue, & maiorum suorû gloria indignum esse putat, se conuinete ac patiente Græcos opprimi atque in seruitutè abduci: Propter has igitur causas, decreuit senatus, populûsque Atheniensis, vt ciues deos immortaleis, atque heroas, huius vrbis, solique Attici custodes ac præsidēs comprecati, sacrificiûsque sollennib⁹ ritè factis, & maiorum nostrorum virtutem animis agitantes, memoriâque repetentes, quibus multo optabilius erat, Græcorum libertatem, quàm patriam suam, conseruare, ducentas nauéis in mare deducant, nauarchus ad Thermopylas nauiget, imperator & magister equitum pedestreis & equestreis copiis Eleusinem educat: ad ceteros Græcos præterea legati mittantur, sed omnium primùm ad Thebanos, quia Philippus in eorum fincis maximè imminet: qui legati eos hortentur, & orent, vt nullo Philippi metu territi, tueantur, ac retineant suam, aliorûque Græcorum libertatem: polliceantur, & confirment, populum Atheniensem, præteritarum iniuriarum memoria deposita, & siquid fortè antea hæ duæ ciuitates durius inter se fecerunt, oblîtum opem, auxiliûmque eis laturum copijs, pecuniâ, telis, armis, præclarè intelligentem, ipsos inter se Græcos de imperio ac principatu decertare honestum esse: sed exteri hominis & alienigenæ dominatum subire ac perpeti, principatûque ab eo spoliari, hoc verò & Græcorum gloria, & maiorum suorum virtute esse indignum. Præterea populum Atheniensem non arbitrari Thebanos neque cognatione generis, neque gentis coniunctione à se alienos esse. Recordari verò & maiorû suorum magna in Thebanorum maiores & proauos merita ac beneficia. Herculis enim liberos, qui à Peloponnesijs imperio paterno spoliabantur, is, qui cum illis acie instructa prælium committere ausi fuerant, bello superatis, in possessionem imperij restituisse: nos etiam Oedipum, eiusque socios è patria eiectos excepisse, aliâque multa nostræ erga Thebanos humanitatis & benignitatis gloriosa monumenta

extare: Itaque ne nunc quidem populi in Atheniensem à suo pristino more, Thebanis, reliquisque Græcis consulendi & commodandi destitutum. Postremo pacem cum ijs faciant, societatem ineant, ius eis connubij tribuant, dent iusurandum, vicissimque accipiant. Legati Demosthenes Demosthenis filius Paanius, Hyperides Cleandri fil. Sphettius, Mnesithides Anthiphanis fil. Phrearrius, Democrates Sophili fil. Phlyeus, Callaschrus. Diotimi fil. Cothocida.

Hoc rerum Thebanarum principium, hic primus status fuit. Antea enim ciuitates omnes istorum opera nobis erant infensæ atque inimicæ, antea dissidebant. Hoc decretum, illud, quod tum ciuitati periculum impendebat, tanquam nimbum aut procellam depulit, atque auertit. Erat igitur boni ciuis ac iusti, siquid his melius haberet, tunc omnibus ostendere ac declarare, non nunc maledictis insequi ac reprehendere. Suasor enim, siue consiliarius, & sycophanta cum omnibus in rebus valde sint inter se dissimiles, tum in hac plurimum discrepât, quod ille qua de re agitur, ea de re quid sentiat, ante rerum euentum exponit ac pronuntiat, simulque se ipse reum de rationibus referendis offert ijs, qui ciuis consilium secuti sint, fortunæ, temporibus, cuius denique, qui ab eo rationem repetere voluerit. hic verò cum eo tempore tacuerit, quo tempore eum maximè verba facere oportebat, siquid durius ac tristius acciderit, hoc per improbißimam calumniam insectatur, carpit, ac lacerat. Quare, quod dicere cœperam, tempus illud virum de patria magnopere laborantem, sollicitum, atque animo excubantem requirebat: tempus illud iustas ac veras pro rep. voces desiderabat. At ego quò descendâ, quòue progrediar, videte. siquis docere potest, melius aliquod tum consilium; ac rectius potuisse ciuitati dari, atque adeò siquid omnino aliud suaderi potuit, præterquam quod ego suadendum esse iudicaui, me grauiter peccasse fateor. Nam siquid est, quod nunc quisquam profuturum fuisse, si tunc à vobis actum esset, dispexit: id me ignorare non debuissè concedo: sin neque est, neque fuit quicquam, neque quis-

quisquam ne hodie quidem melius afferre potest, quid eum, qui consilium dabat, facere oportebat? nō eorum, quæ in promptu erant, quæque facultatem habere videbantur, optima sumere ac deligere? Hoc igitur feci, interrogāte præcone, AEschinea, *Quis verba facere vult?* non, *Quis de præteritis accusare,* neque, *Quis de rebus futuris sponsor esse vellet?* At cum tu temporibus illis mutus & elinguis in contionibus sederes, ego in medium procedebam, & ea de re, quæ proponebatur, orationem habebam. Verum quando quidem tunc siluisti, at nunc certè loquere: ostende, quæ oratio, quam me excogitare atque explicare conuenerit: quæ temporis opportunità reip. utilis: quæ societas, quæ actio, ad quam potius hos cohortari, atque impellere debuerim, à me fuerit prætermissa. Atqui præterita semper apud omneis homines negliguntur, neque ea quisquam vsquam ad deliberandum proponit. Præsentia autem & futura, suaforis parteis, munusque postulant. Tum igitur rerum incommodarum, atque aduersarum, aliæ imminebant, atque instabant, (ut erat opinio) aliæ iam iam aderant & vrgebant: in quibus meam administrandæ reip. rationem, meaque consilia spectata, non euenta calumniare. Omnium enim rerum exitus talis esse solet, qualem esse fortuna voluerit. Consilium autem ipsum, suaforis & consiliarij mentem indicat ac declarat. Quare ne sit hoc meum crimen, ne mihi hanc culpam attribue, si Philippus in acie victor potius est. nam prælii euentus atque exitus in deo, non in me positus erat. sed me aut nō omnia, quæ humano consilio prouideri potuerunt, prouidisse ac secutum esse, neque recte, neque diligenter, neque vigilāter, & laboriose, ac pæne dicam, supra quàm meæ vires possent, egisse: aut res minus honestas, ac ciuitate indignas, minimèque necessarias instituisse: hæc mihi ostendito, & iam tunc sanè me accusato, ac reprehendito. Nunc verò si fulminis cuiusdam, aut procellæ, aut tempestatis illius, quæ tum coorta est, tanta vis fuit, ut non vos solum, verum etiam

reliquos omneis Græcos perculerit atq; afflixerit, quid facto opus est? egone accusandus sum? ut si quis nauicularium, qui ea omnia, quæ ad vectorum salutem pertinerent, adhibuisset, nauemq; rebus omnibus, quibus eam feruari posse confideret, instruxisset, graui postea tempestate iactatum, armamentis nauis comminutis & collisis, aut etiam prorsus contritis ac perfractis, naufragij crimine in iudicium vocet. At ego nauem non gubernabam, dixerit ille, quemadmodum, neque ego exercitum ducebam, neq; fortunam in mea potestate habebam: sed illa contrà rerum omnium erat domina. Verùm illud mihi vide & considera. Si nobis, etiam Thebanis nobiscum in acie stantibus, iunctisque amborum copijs, ita rem gerere, quomodo gessimus, erat fatale, quid expectare, aut quid sperare deberemus, si hos socios non haberemus, sed ij sese cum Philippo cōiunxissent: quod ut assequeretur, omnia faciebat, omnia loquebatur, omneisq; voces mittebat? Et si nūc proelio tridui itinere ab Attica cōmisso, tātō in periculo fuit ciuitas, tātōq; timore perculsa est, quid si qua in parte soli Attici eadem calamitas accidisset, euenturum nobis esse sperandum esset? putatis nos nunc standi, congregiendi, respirandi denique facultatem habituros fuisse? Multas nobis dies vnus, & alter, & treis expediendæ salutis vias ac rationes dederūt. Neque verò ea me commemorare attinet, quæ tunc nostra ciuitas, dei alicuius erga nos beneuolentia ac benignitate vsa, huiusque societatis, quam tu maledictis infestaris, præsidio munita, & veluti propugnaculo defensa, ne experta quidem est. Sed vos admonitos velim, iudices, tam longam hac de re disputationem ad vos haberi, & ad ceteros, qui audiunt, quique hoc iudicium foris circumstunt. Nam ad istum ipsum contemptissimum & contaminatissimum hominem breuis & aperta oratio satis erat longa. Si enim tibi vni ex alijs omnibus, AEschyna, futura, explorata erāt & cognita, cū de his consultabat ciuitas, tum ea te prædicere oportebat. Sin erāt tibi

tibi quoque incerta & incognita : eiusdem tu, atque alij ignoratiæ iudicium subire, rationemque referre debes. Cur igitur de his tu me potius reprehendis atque accusas, quàm ego te? ego enim ciuis tanto melior, quàm tu, fui, in his ipsis, quæ dico, (de ceteris enim nondum disputo) quòd ego in ijs, quæ omnium sententia ac iudicio è rep. esse videbantur, vltro ciuitati meæ copiam feci, vltro me ad omnia obtuli, nullum periculũ priuatum perhorui, nullius aduersi casus rationem habui. Tu verò, neque alia dixisti his meliora (non enim hi meam auctoritatem secuti, neque meis consilijs vsi essent) nèque reipsum ad hæc vlla ex parte vtilẽ præbuiti: sed, quod nequissimus & malevolentissimus quisque in ciuitatem fecisset, hoc tu post rerum euentum facere reperiris. Et vno tempore Aristratus in Naxo, Aristolaus in Thaso, homines, vt semel dicam, infestissimi atque inimicissimi huic ciuitati, Atheniensium amicos in iudicium vocant, & Athenis AEschines Demosthenem accusat. Atqui is, qui apud se Græcorum calamitates ad laudem & gloriam reconditas seruabat, perire potius & morte affici, quàm alterum accusare debet. & cui eadem, quæ reip. hostibus, tempora profuerunt, fieri non potest, vt ei patria sit cara. Denique quo sis in ciuitatem animo, tu ex ea vita, quam viuis: ex ijs, quæ facis: ex ijs rebus, quas geris, & quas non geris, ostendis ac declaras. Bene rem vestram geritis, & aliquid vobis ex sententia procedit? mutus est AEschines. refluuit vobis atque aduersata est vsquam fortuna, & aliquid, quod opus non erat, vobis accidit? præstò est AEschines, vt rupta & conuulsa vbi corpus morbo aliquo fuerit affectum, commouentur, & acrem dolorem præbent. Et quoniam euenta crebro exagitat & insectatur, libet mihi quiddam dicere, quod à cõmuni omnium opinione fortassis abhorrere videatur. Nequis autem miretur, obsecro vos per deos immortales, me ita rem amplificare verbis, & orationem propemodum supra fidem augere, sed beneuolo animo ea, quæ dico, audiat,

& audita cōsideret. Si futura antè quàm euenissent, explorata omnibus fuissent: si ea omnes præsciuisent: si tu, AEschîna, prædixisses, & sublato clamore testificatus esses, qui ne locutus quidem es: ne sic quidem nostræ ciuitati ab his consilijs desistendum, aut refugiendum fuit: si quidem aut gloriæ, aut maiorum, aut posteritatis aliquid rationem duceret. Nunc enim nihil aliud dici potest, quàm eius consilijs fortunam non respondisse, eamque spe sua decidisse, quod omnibus mortalibus commune est, ubi ita deo visum fuerit. Tunc verò ea, quæ se imperio ac principatu dignam putaret, deinde ab hoc descisceret: culpam totius Græciæ Philippo proditæ meritò sustineret. Nam si hæc sine dimicatione essent à nobis deserta ac prodita, pro quibus nullum periculum nostri maiores recusassent, quis te non conspuitaret? quis te non acerbissimo odio dignum existimaret? (nō enim me dicam, neq; ciuitatem) quibus verò oculis, per deos immortales, eos intueremur, qui in hāc urbem venirēt, si, cum res in eum locū, quo in loco hodie sunt, deuenissent: dux, princepsq; Græcorum sumtus esset Philippus cum summa omnium rerum potestate, alij autem sine nobis ne hæc fierent, omni contentione pugnassent? idq; cum ciuitas nostra numquam antea tranquillitatem securam gloriæ expertem, pluris quàm periculum pro rebus honestis susceptum fecerit? Nam quem Græcorum, quem verò barbarorum fugit, & Thebanos, & eos, qui ante hos potentissimi fuerunt, Lacedæmonios, & regem Persarum, quietam illam & otiosam vitam nostræ ciuitati libenter fuisse concessuros, magnamque ei gratiam habituros cum eo, vt & quicquid aliud vellet, acciperet, & sua obtineret, si imperio parēre vellet, alterumque Græciæ principatu potiri sineret: sed non erant hæc, vt appāret, Atheniensibus patria, neque auita, neque ferenda, neq; in eorum animis insita: neq; vnquam quisquam ab omni æternitate ciuitati persuadere potuit, vt cum potētioribus, iisdemque ad iniuriam faciendam instru-

instructis atque exercitatis conspirans, & consociata, tranquillè, otiosè, tutòque seruiret: quin de principatu, de honore, de gloria sese periculis omnibus non dubitanter offerens, perpetuò, & per omnem ætatem decertauit. Atque hæc tam ampla, tam magnifica, tam nostris moribus consentanea esse ducitis, vt maiores nostros, eos, qui hæc gesserunt, maximis laudibus efferre soleatis: neque iniuria. Quis enim virtutem illorum virorum non admiretur, qui & patriæ solum, & urbem relinquere non dubitarunt, nauisq; conscenderunt, ne imperio parerent, imperatùmque facerent? Themistoclem, huius consilij auctorem, huiusq; sententiæ principem atq; auctore, imperatorem delegerunt? cum verò, qui barbarorum legibus, imperiòque parendum censuerat, Cyrillum lapidibus obruerunt? neque cum solum sic vlti sunt viri, sed etiam illorum vxores de eius vxore easdem poenas sumserunt? Non enim quærebant ij, qui tum vivebant, Athenienses, maiores vestri, neque rhetorem, neque imperatorem, propter quem feliciter seruirent: immo verò, ne causam quidem esse, cur viuere vellent, iudicabant, nisi sibi cum libertate viuere liceret. Existimabat enim quisque eorum se non solum patri & matri, sed etiam patriæ natum esse. Quæret aliquis quid intersit. Quòd is, qui arbitratur se parentibus solum natum esse, mortem, quam vel fatum, vel casus afferat, exspectat: qui verò etiam patriæ se natum putat, ne eam seruire videat, æquo animo excedit è vita: & contumelias, atque ignominias, quas in vrbe subacta, superbissimòque dominatu oppressa, ac seruiente perferre necesse est, morte horribiliores esse ducit. Itaque si hoc conarer, aut inciperem dicere, me vobis auctorem fuisse, vt spiritus vestris maioribus dignos sumeretis, nemo profectò est, qui me iure reprehendat. Nunc verò, & semper antea talia vestra consilia atque instituta fuisse asseuero, & antequàm natus essem, hos fuisse spiritus ac sensus ciuitatis ostendo: me autem pro mea virili parte singularum

rerum gerendarum administrum atque adiutorem fuisse dico. At iste dum summam rem insectatur ac reprehendit, vósque cohortatur, vt mihi inimici infestí que sitis, proinde acsi timoris & periculorum causa fuerim ciuitati, cum in præsens laudis & honoris fructu me priuare cupit, tum in omne reliquum tempus vestrarum virtutum laudationes & præconia vobis eripere conatur. Si enim Ctesiphontem damnabitis, quasi rep. à me non optimè gesta: non fortunæ culpa & iniquitate calamitatem, quæ vobis accidit, accepisse, sed deliquisse videbimini. At nihil deliquistis, Athenienses, nihil peccastis, cum pro omnium Græcorum libertate ac salute periculum adiistis: non, inquam, peccastis, per maiores nostros iuro & eos, qui in Marathone sese in discrimen obtulerunt, & eos, qui ad Platæas acie instructa conflixerunt, & eos, qui ad Salaminam, & ad Artemisiū prælio nauali decertarunt, multosque alios, qui in monumentis publicis conditi sunt, viros forteis: quos omneis peræquæ ciuitas singularibus affectos honoribus, sepeliuit, non eos solos, A Eschina, qui rem bene gesserant: neque eos solos, qui vicerāt: & meritò. Nam quod fuit fortium virorum, id omnes re præstiterunt: fortuna autem vsi sunt ea, quam cuique dii immortales tribuerūt. Et hoc loco, ò cœnum, ò scribarum omnium postreme, dum studes efficere, ne me hi merito honore afficiāt, néue se humanos ac liberales erga me præbeant, tropæa, & pugnas, & antiqua maiorum nostrorum facinora commemorabas. quorum omnium, quæso, quidnam hæc causa desiderabat? me verò, ò histriionum omniū deterrime, qui in publicum prodibam ciuitati suasurus, auctórque futurus, vt de principatu contenderet, cuius hominis mente suscepta, cuius spiritu sumto, cuius induta persona, in contionem ascendere oportebat? an eius, qui his indigna diceret? Tum verò iure optimo interfectus essem. Præterea non eodem animo, eadémue mente, priuata iudicia, atque publicas quæstiones exercere debetis. Sed cum de
ho-

hominum contractibus, qui in vita quotidiana versantur, disceptatis, vos priuatas leges, hominúmque actiones, & facta spectare cónuenit: cùm de communibus ac publicis populi Atheniensis cónsilijs atque institutis iudicatis, maiorum nostrorum gloriam ac dignitatem vos oportet intueri, & cogitare: vnà cum virga & insigni iudiciali vnumquemque vestrùm sumere speciem ac spiritum ciuitatis, vbi de rebus ad reip. statum pertinentibus cónueneritis iudicaturi, siquidem res illis dignas vos agere oportere existimatis. Sed ad eas res, quæ à maioribus vestris gestæ sunt, studio prouectus, nonnulla decreta, actaque præterij. Ad ea igitur, vnde degressus sum, reuertor. Vt Thebas peruenimus, ibi Philippi, & Thessalorum, & aliorum sociorum legatos offendimus: nostros amicos metu perterritos, tristes ac demissos: illius alacris, latos ac feroceis. Atque vt intelligatis, me hæc neque mei temporis, neque commodi causa dicere: eam mihi epistolam recita, quam tum nos legati statim misimus. Atquæ vsque eò iste calumniando progressus est, vt siquid bene, & è rep. gestum sit, non mihi, sed temporibus ascribendum atque assignandum dicat: aliarum autem rerum omnium, quæ secus acciderunt, in me, atque in fortunam meam, culpam conferat. Atque, vt appâret, suator & orator ego, nullius earum rerum, quæ oratione, & consilio actæ sunt, adiutor ei fuisse videor: earum, quæ in acie, & castris, & imperio minus feliciter gestæ sunt, solus auctor, & causa fuisse reperiior. Ecquis immajor, ecquis omni execratione dignior sycophanta fingi potest? Recita epistolam. EPISTOLA. Contione igitur aduocata, Thebani legatos Philippi priores introduxerunt, propterea quòd illi sociorum locum apud eos obtinebant. Producti itaque contionabantur, ac Philip-pum quidem multis laudibus in cælum ferebant: vos autem multis nominibus vituperabant, & accusabant, omnium, quæcunque vos vniquam aduersus Thebanos fecistis, meinoriam refricantes: quorum hæc summa fuit:

A Equum esse illos pro maximis Philippi in eos beneficijs sibi gratiam referre: earum verò iniuriarum, quas à vobis acceperant, poenas utroque modo vellent, expetere aut per eorū sineis aditu sibi patefacto & transitu concessio, aut bello communiter, & coniunctis copijs in Atticam inferendo. Ad extremum ostendebant (ut sibi quidem videbantur) ex ijs, quæ suaderent, pecora, mancipia, aliæque, quibus abundat Attica, in Boeotiam perventura: contra ex ijs, quæ essemus dicturi, Boeotiae fructus omnes & copias à bello direptum iri: multæque alia præterea dicebant: sed huc tamen omnis eorum spectabat oratio. Quæ autem contra dixerimus, æquidem tota re mea familiari, meisque facultatibus omnibus estimarim, singillatim vobis exponere atque explicare licere. Sed vereor, ne vos, præteritis iam temporibus, existimantes eluionem tum quandam rerum in Græcia accidisse, inanem & molestum verborum strepitum esse putetis, omnem eam, quæ his de rebus habeatur, orationem. Quæ igitur persuaserimus nos, & quæ nobis illi responderint, attendite. RECITA. RESPONSIO THEBANORVM. His igitur actis & transactis, illi vos arcessiebant: vos educebatis exercitum, opemque ferebatis. Et, ut media prætermittam, illi vos ita familiariter & comiter acceperunt, ut absentibus suis grauis armaturæ militibus, & equitibus, exercitum vestrum in urbem, & in suas domos reciperent, ubi erant liberi, ubi uxores, ubi ceteræ res carissimæ. Atqui treis illo die vestrum laudationes Thebani pulcherrimas omnibus mortalibus ostenderunt: unam fortitudinis, alteram iustitiæ, tertiam temperatiæ. Nam cum vos pugnandi socios habere, quam vobiscum pugnare maluerunt: duo de vobis præclara iudicia fecerunt. Nam & vos meliores esse Philippo, & vestra postulatæ Philippi postulatæ æquiora iudicarunt: cum autem ea, quæ cum apud ipsos, tum apud omnes homines diligentissimè custodiri solent, liberos, & coniuges potestati vestræ permiserunt, fideique commiserunt, certissimam

mam se de vobis temperantiæ opinionem habere declararunt. In quibus omnibus, Athenienses, quod ad vos attinet, eos rectè sensisse, res ipsæ comprobarunt. Nam neque ingresso in oppidum exercitu quisquam Thebanorum de vobis ne iniuria quidem questus est, ita vos ipsos temperanteis præbuitis: & cùm bis coniunctis viribus, & copijs in prima acie stantes pugnaueritis, semel in eo proelio, quod ad fluuium * commissum est: iterum in hiberno, quod nominatur: non modò reprehensione iusta, criminèque caruistis, verùm etiam hominum summam admirationem excitastis, ornatu, apparatu, alacritate animi, & studio: propter quæ laudes vobis ab alijs tributæ comparabantur: à nobis verò sacrificia, & supplicationes ad omnia deorum puluinaria constituebantur. Atque hoc loco libenter ab AEschyna quaesierim, cùm hæc agerentur, cùm gloriæ, cùm lætitiæ, cùm laudum plena esset ciuitas, utrùm vnà cum populo sacrificaret, & in communi omnium lætitia ipse quoque lætaretur: an tristis, & mæstus, & ingemiscens, & ægritudine confectus ob communem ciuitatis felicitatem domi sederet, aut etiam iaceret. Nam si aderat, si cū alijs comparebat, nōne importunus atque improbus, immò verò nōne impurus atque impius est; qui, quarum rerum tñquam optimarum ipse deos immortaleis testeis adhibuerit, eas à vobis, sanctissimo iureiurando obstrictis, postulet vt sententijs vestris non optimas iudicetis? si non aderat, nō dignus est, qui milles pereat; si ea, ex quibus alij maximam lætitiā capiebāt, sine summo animi dolore aspicere non poterat? Recita igitur hæc quoque populi scita. POPULI SCITA, SACRIFICIORVM.

Ergo nos quidem in sacrificijs cramus occupati: Thebani verò inibi erant, vt sese per nos salutem consecutos esse existimarent. res denique huc reciderant, vt, qui auxilium alienum ex istorum actionibus imploraturi ac desideraturi videbantur, ij ipsi alijs auxilium ferrent, ex ijs reb°, quas me auctore suscepistis. Qualeis porrò tunc

propter hæc ipsa voces mitteret Philippus, quibus in turbis versaretur, quàm trepidaret, ex illius ad Peloponnesum missis epistolis cognoscetis: quas mihi recita, ut intelligatis, quid ego mea assiduitate, meis itineribus, meis cursibus, meis laboribus, multisque decretis, quæ nunc iste maledictis insectabatur, profecerim. At qui multi apud vos, Athenienses, magni & clari ante me oratores extiterunt, Callistratus ille, Aristophon, Cephalus, Thrasylbulus, sexcenti alij: nemo ex his tamen unquam vlla in re, à principio usque ad extremum sese utilem præbuit ciuitati. Sed si quis fortè scitum faceret, legationem non obibat: qui legationem obiret, populi scitum non faciebat. Sibi enim unusquisque eorum quietis aliquid & laxamenti relinquebat, simulque siquid fortè accideret, transferendi in alium criminis locum ac facultatem reseruabat. Quid ergo? dicet aliquis, tunc tanto audacior, aut fortior es, quàm ceteri, ut solus omnia conficias ac transigas? Non equidem tantum mihi arrogo, ut hæc de me prædicem: verum ita mihi persuaferam magno in discrimine versari ciuitatem, ut mihi neque locum, neque spatium de priuatarum rerum mearum stabilitate cogitandi dare videretur: sed præclare nobiscum actum iri existimarem, si quis nulla re necessaria prætermissa, negotia, quæ erant in manibus, ex sententia explicare posset. Mihi autem in animum induxeram, stultè fortasse, sed tamen induxeram, neminem neque qui decerneret, melius quàm me fuisse decreturum, neque qui ageret, commodius acturum, neque qui legationem obiret, studio acriore, aut fide maiore legationem obiturum. Propter has causas mihi ipse omneis reip. administrandæ partem, omniaque munera deposcebam. Recita epistolas Philippi. EPISTOLAE PHILIPPI. Huc redigit Philippum mea reip. gerendæ ratio, Aeschina: hanc illum vocem mittere coëgi, eum, qui antea voces ferocis, voces audaciæ & confidentiæ plenas in ciuitatem iaciebat. Pro quibus ego ab his meritò corona donabar:

neque

neque tu cùm adesses, contrà dicebas. Et qui me accusavit Diondas, quintam tabellarum partem non obtinuit. Ac mihi hæc populi scita recita, quæ tum sententijs iudicum absoluta, ab hoc ne in iudiciũ quidem vocata sunt.

POPULI SCITA. Hæc populi scita, Athenienses, iisdem syllabis, iisdemque verbis perscripta sunt, quibus ea, quæ antè Aristonicus, nunc iste Ctesiphon scripsit. Atque hæc AEschines neque ipse iudicio persecutus est, neque ei, qui in iudicium adduxisset, subscriptor ullus extitit. Atqui Demomelem, & Hyperidem, qui hæc decernebāt, siquidem me nunc iste veris criminibus accesseretur, iustius ac probabilius accusaret, quàm Ctesiphontem. Quid ita? quia huic licet recusare, seseque rebus iudicatis tegere ac tueri, & his exceptionibus vti, istum ipsum illos reos non fecisse, qui eadem, quæ hic nunc scripsit, scripserunt, & leges non amplius sinere de rebus ita transactis in iudicium quenquā vocare: multaq; alia dicere potest. Ac tunc quidem res ipsa per se perpèderetur, & disceptaretur, priusquàm quicquam horum antecessisset, priusquam vllum præiudicium factũ esset. Verum tunc non poterat, opinor, quod nunc facit, ab ultimis temporibus, & ex multis decretis ea ad calumniandum excerpere, quæ neq; quisquam antea nouerat, neq; hodie recitatum iri suspicatus esset: non poterat inuerso ac perturbato temporum ordine, falsis rerum antea actarum causis prolatis, verisque dissimulatis ac celatis aliquid dicere videri: tunc, inquam, hæc non poterat: sed ipsa veritate propter adstante, & præsentem: recenti etiam apud vos omnium rerum memoria, vobis denique pæne manu vnam quamque rem tractantibus ac tenentibus omnis haberetur oratio. Itaque his argumentationibus ac probationibus declinatis ac vitatis, quæ è rebus ipsis duci poterant, nunc denique venit, existimans vos certamen aliquod oratorum proposituros (vt mihi quidem videtur) non rerum publicè gestarum disceptationem facturos: & iudicium de verbis, non de utilitate reip. futu-

rum. Deinde grauis auctor sapiētium orationem imitatur & sententias loquitur : aitque oportere vos eam de nobis opinionem, quam huc domo detulistis, negligere, ac pro nihilo putare. Nam quemadmodum (inquit) cū rationes cum aliquo subducitis, aliqua esse apud eum reliqua existimantes, si accepta expensis quadrarint, si calculi sint puri & puti, nihilque sit reliqui, manus datis & conceditis: sic & vos nunc ijs, quæ vtriusque oratione demonstrata & plana facta fuerunt, cōuenit assentire. Videte, obsecro, quā imbecillum, & fragile sit natura, ut par est, quicquid iniuste sit actum, atque ab iniuria profectum. Namque hac ipsa similitudine, tam acuta, tamque erudita, vos iam nunc statuisse confitetur, me meis orationibus consulere patriæ, se suis Philippo. Non enim vos de hac sentētia demouere conaretur, nisi talis esset, eaque inueterata, vestra de utroque nostrum existimatio. At ego vos iam facile docebo, eius orationem, qua ex animis vestris hanc de nobis opinionem euellere conatur, vehementer esse iniustam, non adhibitis calculis (non enim ita rerum subducuntur rationes) sed primū singularū actionum memoria breuiter à vobis repetita: deinde vobis, qui auditis, rationum iudicibus sumtis, simul & testibus productis. Mea enim reip. administratio, ne, quam iste reprehendit, effectum est, ut pro eo ut Thebani vnā cum Philippo in fineis nostros inuaderēt, quod omnes futurum existimabant, illi coniunctis nobiscum copijs, vnāque in acie stantes illum prohiberent: pro eo ut bellum in Attica versaretur, octoginta circiter millia passuum longē ab vrbe in Bœotorum finibus gereretur: pro eo ut prædones ex Eubœa profecti vestros agros popularētur, diriperent ac vastarent: pace maritima per omne belli tempus frueremini: pro eo ut Philippus Helle spontum teneret Byzantio occupato, societate coniuncti vobiscum Byzantij, bellum ei inferrent. Ecquid tibi videtur, AEschinea, ea, quæ de rebus gestis initur, ratio, calculorum similis esse? aut tu has contrario iudicio de-

lere, ac de medio tollere putas oportere, & non quomodo earum memoria posteris prodatur sempiterna, videre? Mitto quòd crudelitatem, quam ijs in rebus animaduvertere potuistis, in quibus potestatem in aliquos nact⁹ est Philippus, alij experti sunt, ac pertulerunt: humanitatis autem ac mansuetudinis, quam illè cùm cetera concupisceret, atq; amplecteretur, vobis simulatè ostentabat, fructus vos merito vestro percepistis: hæc, inquam, missa facio. verumtamen audebo hoc dicere, cum, qui in oratorem & contionatorem verè ac iustè velit anquire, neque illum calumniari: ea, quæ tu modò commemorabas, non esse crimini daturum, atque obiecturum, exempla fingentem, verba iridentem, habitum, gestumque loquentis imitantem: (in hoc enim positæ sunt fortune Græciæ, scilicet, utrùm hoc, an illud verbū in oratione posuerim: huc an illuc manum porrexerim) sed ab rebus ipsis longius non discedentem, spectaturum quas facultates, quas copias tum haberet ciuitas, cùm ad remp. accessi: quas ego ei postea, cùm rebus gerendis præfessum, compararim: quo loco essent res aduersariorum, & quomodo sese haberent: deinde siquidem copias reip. imminuisssem, deteriorésque fecisssem: meum crimen esse ostenderes: sin auxisssem, non calumniareris. Quoniã igitur tu hoc tibi faciendum esse nō putasti: ego faciam: vos, utrùm vera ac iusta fuerit mea oratio, necne, iudicabitis. Erant igitur hæ vires & copię ciuitatis: insulareis non omneis habebamus (nam neque Chius, neq; Rhodus, neque Corcyra nobiscum faciebant) vestrīgial erat in singulas ciuitates descriptum circiter quater millies centies: atque hæc pecunia iam erat redacta: grauis armaturæ militem, aut equitem, præterquàm nostrum, & vrbanum habebamus neminem. Et quod erat & nobis omnium formidolosissimum, & hostibus vtilissimum, perfecerant isti, vt omnes finitimi, Megarenses, Thebani, Eubœi in odium, quàm in amicitiam nostram proniores ac propēiores essent. Res igitur nostræ ciuitatis hoc

erant loco, neq; quicquam aliud est præterea, quod dicere quisquā possit. Philippi verò, cum quo nobis erat certamen, rationes quales essent, & quomodo sese haberent, videte. Primum in eos, qui eum sequebantur, imperium habebat, & quod omnium est maximum, earum rerum, quæ ad bellum pertinent, penes eum summa potestas erat: deinde hi numquam ponebant arma de manibus: deinde pecunia abundabat: tum quæ ipsi visa essent, agebat: neque verò decretis propositis quid vellet, denuntiabat, aut prædicebat, neq; palàm deliberabat, neque à calumniatoribus in iudicium vocabatur, neq; de decretis contra leges factis accusabatur, neq; cuiquam mortalium iudicio de rationibus referendis tenebatur: sed planè (vt semel dicam) solus erat ipse dominus, solus dux, solus imperator: denique omnia in vnius potestate vertebantur. Ego autem cum hoc ad certandum compositus (nam hoc perpendendum & considerandum est) cuiusnam rei potestatem habebam? nullius. Nam primum hoc ipsum contionari, cuius solius eram compos, seu potius particeps, in medio erat positum, & mihi commune cum ijs, qui ab illo mercedem accipiebant: & quibuscunque in rebus ego ab istis victus essem (nulta autem accidebant huiusmodi, aliud alijs de causis, quas cunque fors tulisset) his ex usu hostium deliberatis & consultis discēdebatis. Verum tamen ego tot rebus inferior, tot incommodis ac difficultatibus affectus, socios vobis Eubæos, Achæos, Corinthios, Thebanos, Megarenseis, Leucadios, Corcyrenseis asciui & comparavi. ex quibus externorum militum quindecim millia, equitum duo millia extra urbanas copias coëgistis. pecuniam autem tãtam à socijs conferendam descripsi, quantam potui maximam. Quod si iura nostra cum Thebanorum iuribus comparas AEschinea, aut cū Byzantiorū, aut cum Eubæorum, aut si de rata & equabili parte nunc disputas: primum videris ignorare, cum & antea trecentæ triremes essent illæ, quæ pro Græcis decertarunt, earum ducentas ciuitatem

tem nostram præbuisse: neque tunc eam quisquam sic affectam vidit, ut aut se idcirco deteriore condicione esse, damnóque affici putaret: aut eos, qui hoc consilij dedissent, in iudicium vocaret, aut hæc grauitèr, molestèque ferret: (turpe enim, mehercule, turpe) sed dijs immortalibus gratiam haberet, si Græcis in commune discrimen adductis, ipsa duplo plus quàm, alij ad omnium salutem contulisset. deinde inanem ac falsam horum gratiam aucuparis, cùm me calumniaris. quid enim nunc ea commemoras, quæ facere oportebat, ac non tum cùm in vrbe esses, & cùm rebus omnibus interesses, hæc decernebas, si licebat per illa tempora: in quibus non quod vellemus, sed quod res ipsæ darent ac ferrent, æquo animo accipere oportebat? Nam paratus erat, qui cōtrà liceretur & emeret: qui eos, quos expulissimus, exciperet: qui pecuniam adderet. Sed si nunc propter illa, quæ sic à me gesta sunt, accusor, quid futurum fuisse censesis, si, cùm ego hæc subtiliter & exiguè ad calculos reuocarem, ciuitates illæ à vobis desciuisent, & sese cum Philippo cōiunxissent, & vno tempore Eubœæ, Thebarum, Byzantij compos factus esset Philippus? quid, inquam, impios istos homines fuisse facturos, aut dicturos putatis? Non, illos esse traditos? non, spretos ac reiectos, cùm societate nobiscū cōiungi cuperet? nō Philippū Hellesponto per Byzantios esse potitum? cōmeatus, & frumenti, quod ad Græcos supportabatur, dominū esse factum? bellū finitimum, & graue per Thebanos in Atticam inuectum? inare latrocinij infestum esse factū, & propter prædonum ex Eubœa eruptiones, mercatoribus esse clausum? nōne hæc, & alia multa præterea dicerent? Improbæ, Athenienses, improba res est omni tempore calumniator, & vndique inuido dēte petens, vndiq; criminandi ansam arripiēs. Talis autem est homunculus iste, seu potius bellua natura: qui nihil vnquam à prima ætate sinceri, nihil recti, nihil libero aut ingenuo dignum fecit: simia planè tragica, rusticus Oenomaus, adulterinus orator. Quid

enim tua dicendi facultas patriam iuuat? quid ex tua eloquentia ad ciuitatem vtilitatis peruênit? nunc denique nobis de præteritis verba facis: vt si quis medicus ægris, interea dum ægrotent, domum ingressus, non exponat, neque afferat rationes, quibus morbum depellere, & conualescere queant: postea quàm aliquis ex eis excesserit è vita, quo tempore ei parentetur, iustaque funeris soluantur, sequatur ipse, & ad sepulcrum veniat: & tum denique pluribus verbis disputet, hominem istum si hoc, & illud fecisset, moriturum non fuisse. Et ô fanaticæ, nunc demum dicis? Iam verò ne cladem quidem illam, quam nostra ciuitas accepit, quando tibi hæc animos attollit, propter quam te dolore affici atque ingemiscere, ô scelus, oportebat, in ijs, quæ in mea potestate sita fuerunt, fuisse reperiatis: quod facite, vt sic mecum consideretis. Quocumque ego legatus à vobis missus sum, nusquam à Philippi legatis victus discessi: non ex Thessalia, non ex Ambracia, non ex Illyrico, non à Thraciæ regibus, non Byzantio, non vlllo alio ex loco, non postremò nuper Thebis: sed quibus in rebus eius legati à me victi fuerant verbo, hasille armis, & impetu facto subigebat. Hæc igitur à me repetis, & flagitas? neque te pudet ab eo, in quem ob molliem dicta dixeris, postulare, vt vnus omneis Philippi copias superaret, idque verbis? quid enim aliud in meâ potestate positum erat? non enim anima, non fortuna cuiusquam eorum, qui in acie steterant, non imperatoris partes, cuius tu rationes à me repetis: ita stolidus es & vecors. At quorum rationem lege referre debet orator, de ijs quo minus in me acerrime anquiras, non recuso. Quænam sunt hæc? principia rerum cernere, futura multo antè videre ac præsentire, eaque alijs prædicere. Hæc mea sunt: hæc ego gessi. Quid tum prætereas? populorum tarditatē, moram, cunctationē, desidiam, ignorantiam, inscientiam, contentiones, quæ ciuitatibus omnibus vitia & peccata sunt vsitata, insita, ac necessaria, hæc cōterere & comprimere: & contrà, discordiam sedare, cōcordiamque

diâmq; constituere, amicitiam confirmare, ad studium agendi, quæ reip. tempora postulant, cohortari & excitare: hæc omnia à me facta sunt: neque mortalium quifquam est, qui, quantum in me fuit, aliquid à me prætermisum reperire possit. Siquis igitur quemuis roget, quibus rebus magnam partem eorum, quæ gessit Philippus, administrauerit, respondebunt omnes castris, exercitu, largitione, corrupendis ijs, qui in singulis Græciæ urbibus rebus gerendis erant præfecti. Atqui neque exercitum in mea potestate habebam, neque dux exercitus eram. Quare neq; eæ res, quæ castris, & ferro gestæ sunt, ad me pertinent, neq; earum rerum rationes referre debeo. At hoc certe Philippo superior fui, quòd me ab eo pecunia corrumpi non sum passus. Nam ut is, qui licetur, si emerit, vicit eum, qui pretium accepit: sic qui nec accepit, nec corruptus est, licitatorem vicit. Ita quod ad me attinet, ciuitas manet inuicta. Hæc igitur sunt, & his similia, ut alia multa præteream, quæ ego præstiti, quamobrem hic talia de me scribere merito ac iure posset. Verùm quæ vobis omnibus nota sunt, hæc iam commemorare mihi non videtur alienum. Statim post pugnam populus, qui sciret, ac vidisset quot ego res, quantasq; gessissem, dum per terrores ipsos, ac per discrimina omnia medius incedo, quo tempore mirum nemini esse deberet, si offensa multitudo, se mihi iniquiorem atque infestiores præbuisset: eo ipso tempore primùm meas de salute ciuitatis sententias suo suffragio comprobabat, & omnia quæcunque communis custodiæ causa agebantur, dilectus militum, præsidij distributio, fossæ, pecuniæ ad murorum refectionem, & munitionem urbis erogatio, hæc me auctore fiebant. deinde cùm rei frumentariæ curatorem, publicumque frumētum emtorem crearet, mihi vni hanc procurationem ac potestatem suffragio suo detulit: postremò cùm coissent, & cōspirassent inter se ij, qui in hanc curam incumbabant, ut mihi negotium, facerent, ac nocerent, cùm me de decretis cōtra leges

factis reum faciebant, cum mihi iudicia rationum referendarum, & perduellionis, & maiestatis denuntiabant: cum hæc omnia mihi intentabāt, non per se illi quidem initio, sed per quos maximè suas in me insidias occultas fore putabant: (scitis enim & meministis scilicet me primis illis temporibus in iudicium quotidie vocari, neque audaciam atque amentiam Soficlis, neque Polycratis calumniam, neque Diondæ, & Melani insaniam, neque aliud quicquam ab istis esse contra me inexpertum relictum) ex his igitur omnibus periculis maximè deorū immortalium benignitate, secundo loco, vestro & aliorum omnium Atheniensium beneficio integer & incolumis seruatus sum: neq; iniuria. hoc enim & verum est, & cum iuratis iudicibus, tum ijs, qui religiosè iudicarunt, honestum & gloriosum. Cum igitur, me perduellionis accusatum omnibus sententijs absoluebatis, ita vt ne quintam quidem tabellarum partem accusatores mei obtinerēt, tum statuebatis, me res optimas, & reip. perutileis agere: cum de decretis contra leges factis reum factum, absoluisistis, declarastis omnia me legitimè & dicere, & decernere solere. cum rationes meas comprobabatis atque obsignabatis, omnia me sine pretio ac mercède, integrè & incorruptè gessisse fatebamini. Cum hæc igitur ita se habeant, quod nomen rebus meis gestis Ctesiphontem imponere æquum & verum erat, aut conueniebat? non id ipsum, quod à populo impositum esse videbat? non quod à iuratis iudicibus tributum, non quod ab ipsa veritate apud omnes homines comprobatum? Certe (inquit) sed illud Cephali præclarum, nullo vnquam cum iudicio causam dixisse. Et mehercule fortunatum. Sed num idcirco is, qui sæpe in iudicium vocatus, nunquam ullius criminis conuictus sit, meritò in culpa ponatur? Atqui quod ad istum quidem attinet, Athenienses, illud Cephali præclarum verè mihi de memetipso prædicare licet. Nunquam enim me A Eschines vlla lege accusauit, nunquam vlllo iudicio reū fecit. Itaque tua quidem confessione

feſſione nihilo Cephalo deterior ciuis ſum ego . Cùm multis igitur ex rebus quis iniquitatem iſtius, & ſingularem inuidiæ coniunctam calumniæ perſpexerit, tum ex ijs maximè, quæ de fortuna diſputauit. Omnino quiſquis homini cùm ipſe homo ſit, fortunã exprobrat, ego eum ſtolidum prorſus & mente captum eſſe puto . Nam cùm is, qui ſibi ipſe videtur eſſe fortunatiſſimus, quiq; ſe fortuna maximè propitia, & perbenigna vti arbitrat, exploratum non habeat, eam, talem uſque ad veſperum eſſe permanſuram, aut de hac dicere, & gloriari, aut eam alteri maledicti loco obijcere, ſummæ dementiæ eſt. Verùm quoniam præter alia multa, quæ ſibi iſte arrogauit, etiam his de rebus orationem habuit inſolentiæ atque intolerantiæ plenam, videte, quæſo, Athenienſes, & vobiſcũ ipſi conſiderate, quanto ego verius iſto, quantoque modeſtius atque humanius de fortuna diſputem. Ego fortunam ciuitatis bonam, ſecundam, ac propitiam eſſe arbitror atque hoc video & Iouem Dodonæum, & Apollinem Pythium vobis vaticinatum eſſe : omnium verò hominum, eam quidem, quæ nunc vrget, aduerſam, iniquam, atque acerbam. Nam quis Græcorum, aut quis barbarorum hoc tempore non multa incommoda, graueſque caſus expertus eſt? Quòd igitur honeſtiſſima & præclariffima voluerimus, cãq; ipſa nobis ad agendum propoſuerimus, & quòd, cùm Græci ſperauiffent, ſe, ſi nos deſeruiffent, ac prodidiſſent, beatè victuros, melius, quàm cum eis, nobiſcum agatur, hoc bonæ fortunæ noſtræ ciuitatis acceptum fero: quòd nos titubauerimus atque offenderimus, neque omnia nobis ex animi noſtri ſententia proceſſerint, in eo aliorum hominum fortunam pro rata parte ſuo iure in ciuitatem noſtram uſam eſſe exiſtimo. Fortunã autem meam, & cuiuſque veſtrũ propriam in priuatis rebus expendendam & conſiderandam eſſe duco. Ego igitur ſic de fortuna quærendum eſſe cenſeo, rectè ſanè & iuſtè, mea quidem ſentètia: quod, idem vobis videri puto . Iſte autem fortunam meam pri-

uatam, maiorem dominatum habere, quàm publicam & communem ciuitatis ait: humilem, aduersam, atque afflictam plus posse, quàm magnam, secundam, ac florentem. quomodo hoc fieri potest? Atquì si meam fortunâ, AEschîna, perpendere, & omnibus spectandam proponere, constitutum in animo habes, confer eam cum tua: & si meam compereris esse tua meliorem, eam definito maledictis infectari. Iam mihi igitur vsque à principio eam cõtemplare. Sed ne me quisquam, per deos immortalis, ineptum esse iudicet. Nam neq; si quis vllius paupertatem contumeliosè vexat atque exagitat, neque si quis in multa copia, rerùmq; omniũ affluentia natus atque educatus hoc nomine gloriatur, eum sanæ mentis esse puto. Verùm ego istius sæui atque importuni hominis maledicetia & calumnijs compulsus, in hanc orationem incidere cogor: cui tamen ita moderabor, vt natura rerum, de quibus agitur, feret, & quoad eius maximè fieri poterit. Contigit igitur mihi cùm puer essem, vt ad ludos discendi illi ætati accommodatos, atque vñtatos frequens irem, eaque mihi suppeterent, quibus instructum eum esse oportet, qui nihil sit inopia coactus turpiter facturus: posteaquàm verò è pueris excessi, vt his cõsentanea agerem, meis sumtibus ludos facerem, trierarchus essem, pecuniam in ciuitatem conferrem, nullam neque priuatam, neque publicam liberalitatem ac munificentiam prætermitterem: sed me & ciuitati publicè, & amicis priuatim vtilem præberem. Põstquàm autem ad remp. accessi, visum est mihi talem reip. administrandæ rationem sequi, vt sæpenumero & à patria mea, & à reliquis Græcis corona donatus sim, vt ne vos quidem inimici mei sitis vnquam dicere conati, consilia, & instituta mea non fuisse honesta atque præclara. Talis igitur mihi perpetua meæ vitæ comes fortuna contigit. Nam cùm alia multa de hac possim dicere, sciens prætermitto: veritus ne cuiusquam animum his rebus offendam, quibus glorior. Tu verò vir amplus & grauis, qui ceteros despicis,

cis, vide quali tandem ad hanc meam fortuna sis vsus: propter quam puer magna in egestate educatus es: cum vnà cum patre ludò litterarum affixus esses, illique assideres, atramentum tereres, scamna spongijs purgares, gymnasium puerile verreres, vernæ, non pueri ingenui parteis ageres. sumta autem virili toga, matri ininitanti libros recitabas, vocèque præibas: & reliqua, quæ ad munus illud pertinent, concinnabas, & comparabas: noctu eos, qui initiabantur, ceruina pelle succingebas, vasa vinaria circumferebas, vinumque ministrabas, ac defundebas: illos expiabas, centonibus & furfure defricabas ac detergebas. Expiatione autem facta surgebas, eosque dicere iubebas. EFFUGI MALA, NACTVS SVM MELIORA: gloriabare denique quòd nunquam quisquam tam clara voce vlulasset. Quod quidem ita esse arbitror. Nolite enim existimare, eum, qui tam clarè loquatur, vlulatus non clarissimos edere. Interdiu verò præclaros illos bacchantim choros per vias agitabas: angueis, quos Parias nominant, fœniculo, & populeis frondibus coronatos comprimebas, & supra caput attollebas: & cum clamares, Euoë Saboë, & carmen illud saltares, Hyas Attas, Attas Hyas, ab aniculis præsaltor & princeps chori, thyrsiger, ederifer, vannifer, & huiusmodi nominibus appellabaris. Atque huius quidem operæ ac ministerij egregiam sanè mercedem ferebas, lagana, frustula, scriblitas, liba, placentas. Quibus rebus quis non eum verè beatum iudicet? quis non eius fortunam omnium regum copijs & voluptatibus anteponat? Posteaquàm autem in popularium, ciuiumque numerum adscriptus es: quoquo id modo affecutus sis: (nam hoc omitto dicere) verum postquàm adscriptus es, statim munus pulcherrimum suscepisti, vt infimis magistratibus subseruires, & secundarum partium scribe esses. Deinde vt hoc tandem munere defunctus es, ea omnia, quæ alijs maledicti loco obijcis, facere instituisti. Iraque nihil eorum, mehercule, quæ tibi tua virtute parta suppetebant, po-

steriore vita dedecorasti. Sed cum teipsum histrionibus illis, qui cognomen ex grauitate vocis, & gemitus consecuti, barystoni nominantur, Simmyca, & Socrati mercede locauisses, tertiariū partium actor eras: ficus, vuas, oliuas, tanquam pomorum redemptor, ex alienis fundis decerpebas & colligebas: cum quidem tu plura in his vulnera, quàm in eis certaminibus, in quibus vos de vita decernebatis, acciperes. Erat enim vobis cum spectatoribus bellum implacabile, & sine vlla denuntiatione susceptum, à quibus cum multa vulnera acceperis, meritò in eos, qui in talibus periculis non sunt exercitati, ac versati, tanquam timidos dicta dicis. Sed prætermisissijs, quorum culpam quiuis in paupertatem cōferre possit, ad ea crimina veniā, quæ propriè in mores tuos quadrant. Talem enim reip. administrandæ rationem secutus es, posteaquàm tibi tandem remp. administrare venit in mentem, vt in rebus secundis ciuitatis, léporis vitam viueres, omnia circumspectares, quicquid increpuisset, pertimesceres, horreres, tremeres, plāgas & verbera ob ea, quorum tibi conscius eras, flagitia & scelera, semper exspectares: in aliorum ciuium casibus aduersis, audax, ferox, & alacer ab omnibus cernereris. Atquē per deos immortaleis, qui mille ciueis interfectos lætè atq; insolèter tulit, quibus pœnis ab ijs, qui viuunt, affici debet? Cum multa igitur alia habeam, quæ de isto dicere possim, præteribo. Non enim quacunque probra ac dedecora in isto inesse possum ostendere, puto me facile proferre debere: sed ea demum, quæ mihi turpia dictu non sunt. Quare, AEschinea, primū vtriusque nostrū vitam, & quæ ab vtroque in ea instituta & acta sunt, inter se contendito leniter & clementer, non asperè neque acerbè: deinde ex his quærito, vtrius sibi quisque fortunam dari malit. Tu litteras docebas: ego in ludum frequens veniebam: tu initiabas, ego initiabar: tu cum choro saltabas, ego chori, & ludorum sumtum suppeditabam: tu scribæ munereungebaris, ego contionabar: tu

tertiarum partium histrio in scenam prodibas, ego ludos spectabam: te vox deficiebat, ego exhibebam: tu in rep. administranda hostibus consuluisti, ego patriæ. mitto cetera. nunc quidem hodie, propterea quòd corona donatus sum, vita mea in iudicio spectatur, & explicatur: omnium autem voce & confessione nulla in re iniuste rép. lēssisse declaror: tu autem cum hoc affectus es, ut calumniator habearis, tum in discriminē venisti, utrum te amplius calumniari homines innocentis oporteat, an desinere, & coërceri, ne quintam quidem tabellarum partem à iudicibus consecutum. Iamne vides, A Eschiana, quàm propitia & secunda per omnem vitam fortuna vsus, meam tanquam iratam atque aduersam crimineris? Age verò liceat mihi publicorum munerū, quæ ego cumulatè & prolixè obij, quibúsque amplissimè & magnificentissimè functus sum, testimonia recitare. tu verò contrà versus nobis recita, quos tu malè agendo inuerebas ac deprauabas.

Orci relicta ianua, & latebra inferum. &

Mala scito non volentem nuntiare me. At te omnium hominum profligatissime ac perditissime, primùm dii immortales, deinde hi omnes male perdant, malum ciuem, patriæque proditorem, malumque tertiarum partium histriorem. Recita testimonia. TESTIMONIA.

In ijs igitur, quæ ad ciuitatem pertinent, talis extiti. In priuatis autem, si nescitis me commodum, liberalem, & humanum, atque in egenteis munificum fuisse, non est quòd quicquam ipse de me dicam, neque vnquam adducar, ut vllum vobis hac de re testimonium afferam: non si quos ab hostibus redemi, non si aliquorum filias in matrimonium collocaui, non quicquam horum tale. Namque hæc mea sententia est: eum qui beneficium acceperit, omni tempore beneficiū memoria tenere oportere existimo: eum uerò, qui dederit, de memoria statim deponere, si modo vult ille viri boni, hic non illiberalis, neque ieiuni hominis officio fungi: sua certè beneficia

commemorare & prædicare, propemodum exprobrare est. Quare nihil sum tale facturum, neque ullius vnquam oratione, aut maledicto ad hoc faciendum adducar. sed qualiscunque hominum in his rebus de me opinio est, ea mihi satis est. Volo autem sine mihi facto de rebus domesticis ac priuatis dicendi, de forēsis ac publicis pauca etiam quædam apud vos explicare. Si quem igitur mortalium, quos hic sol videt, AEschinas, proferre potes, siue Græcorum, siue barbarorum, qui integer, intactus, atque incolumis antea à Philippi, nunc ab Alexandri dominatu discesserit: sit ita sanè, do tibi & concedo, meam siue fortunam, siue infelicitatem nominare voles, omnium malorum publicorum causam fuisse: sin & eorum multi, qui neque me vnquam viderunt, neque vnquam vocem meam audierunt, multis & grauibus incommodis affecti sunt, non solum singulares homines, sed & totæ ciuitates, & nationes: quanto verius & æquius est, communem omnium hominum (vt credibile est) fortunam, & sæuam quandam rerum tempestatem ac procellam reip. infestam ac perniciosam, horum causam fuisse existimare? At tu his omisis me, qui apud hos remp. gero, criminaris, idque cum scias si non totam, at certè ratam partē tui criminis ac maledicti cum ad omnes, tum ad te maximè redundare. Nam si cum penes me summa rerum potestas esset, ego per me de rebus consulerem ac statuerem: possetis vos alij oratores ea, quæ acciderunt, mihi crimini dare: sin vos semper in omnibus concionibus aderatis, si ciuitas communiter omnibus ad de liberandū quid expediret, proponebat: & hæc cum omnibus optima videbantur, tum maximè tibi: (non enim beneuolentia adductus, spem præmiorum, laudem, honorem, quæ omnia inerant in ijs, quæ tunc à me gerebantur, mihi concedebas, sed partim scilicet veritate victus, partim quia nihil melius, quod diceres, haberes) non tu iniuste facis? non tu importunus & improbus es, qui ea nunc reprehendas, quibus tum afferre meliora non poteras?

teras? Equidem apud omneis alios homines hæc quodammodo video iura esse definita, atq; aptè descripta. Facit aliquis iniuriam prudens? iratæ leges, infesti iudices, poenæ in eum constitutæ. Peccauit aliquis imprudēs & inuitus? huic venia datur, non supplicium quæritur. Neque iniuriam fecit alius, neque peccauit: sed cum in ijs, quæ omnium opinione reip. vtilia esse videbantur, egregiam operam nauasset, minus feliciter rem gessit, minúsque optabilem suorum consiliorum exitum habuit. huic tali non euentum crimini dare atque exprobrare, & propter eam causam ei maledicere, sed pari potius cum eo molestia affici cónuenit. Atque hæc omnia non solùm in legibus ita se habere reperientur, verùm etiam ipsa natura legibus non scriptis, & communibus hominum sensibus sanxit ac definiuit. Itaque AEschines vsque adeò omneis mortaleis acerbitate, & calumniandi studio superauit, vt etiam ea, de quibus ipse, tanquam de casibus aduersis, ludibrijsque fortunæ differebat, mihi criminis loco ponat. Et præter alias eius in me iniurias, proinde quasi sincerè, simpliciter, & optimo erga vos animo omnia dixerit, vos hortabatur & monebat, vt, me diligèter obseruetis, & caueatis, ne ego vobis fucum faciam, ne vos verbis insidiosis inducam, & circumueniam, cum me callidum ac versutum, planum, magum, sophistam, & alijs nominibus per contumeliam nominaret: quasi verò si quis ea prior alteri obiecerit, quib⁹ ipse sit affinis, ita re vera sit futurum, quasi que auditores iam, quis sit is, qui dicat, attédere sint desituri. Ego verò cum sciam, istum vobis omnib⁹ esse notum, tum mihi nequaquam dubium est, quin hæc multo magis in istum, quam in me conuenire existimetis. Neque illud me fugit, quæcumque in me est dicendi facultas: (demus enim esse aliquam: quanquam video equidem magna ex parte, eorum, qui dicunt, dicendi facultatis & eloquentiæ, auditores esse dominos, & moderatores: nam vt cuiusque orationem libenter auditis, & quali quenque bencuolen-

ta, complectimini, talis de eius, qui dicit, prudentia, & eloquentia existimatio est.) siqua igitur & mihi huiusmodi dicendi exercitatio, facultasque suppetit, hanc vos profectò reperietis omnes in rebus communibus procurandis semper esse versatam: semper omnium iudicio expositam vobis publicè profuisse, nunquam ne priuatim quidem cuiquam obfuisse: istius autem eloquentiam contrà semper vobis perniciosam fuisse, non eò solum, quòd causam hostiū agere cōsuevit: sed quòd si quis aliqua in revolutatē, aut animū eius aliquo loco offendit, hos omni dicendi ratione oppugnare conatur. ita neq; iustè, neque ex vsu ciuitatis eloquentia vtitur. Non enim virum fortem, & bonum ciuem cōnuenit à iudicibus, qui de rep. disceptaturi conuenerunt, postulare, vt odiū, aut inimicitias cum aliquo susceptas, aut alium quempiam animi affectū sua sibi sentētia expleant, atq; confirmēt: neq; ira, ac dolore animi impulsus, quenquā in iudiciū vocare, sed primū operā dare, vt ingenio sit præditus his affectib⁹ libero ac soluto: deinde, si necessitate talis esse cogatur, eniti, & cōtendere, vt naturę acerbitatē cōsilio & ratione mitigasse, atq; ad mediocritatē quandam reuocasse videatur. Quibus igitur in rebus oratorem, & reip. moderatorem, vehementem atque asperum esse oportet? in ijs, in quibus aliquid, quod ad summam remp. pertinet, in discrimen venit: in ijs, in quibus aliquid rei populo cum aduersarijs intercedit: in ijs, inquā. hec enim sunt viri fortis, & generosi, bonique ciuis. Eum autem, qui nullius vnquam publici criminis, addam ne priuati quidem, neque nomine ciuitatis, neque suo, sibi putauerit à me pœnas esse repetendas, nunc venire paratum atque instructum, vt coronam & laudem criminibus falsis inferendis, mihi adimat, & idcirco tot iam verba consumsisse: priuatarum inimiciarum, & inuidiæ, & angustii paruique animi, nullius quidem certè probitatis signum est. ommissa verò mecum contentione, in hunc incurrere, hoc vno genere profectò, cetera omnia vitia inclu-

clusa continentur. Ac mihi vidêris, AEschîna, istorum verborum multitudine cùm laterum tuorum firmitatem ostentare, vocisq; tuæ specimen edere velles, idcirco hanc accusationem suscepisse, non quòd vllius criminis pœnas expetere in animo haberes. verùm non oratoris oratio, AEschîna, neque vocis magnitudo & contentio magni æstimanda est, sed iudicio ac voluntate cum populo consentire, & conspirare, eosdẽmque odisse atque amare, quos patria: hæc magna sunt, hæc quantivis facienda sunt, hæc quantovis pretio atque honore digna sunt. Nam qui hoc animo est, is omnem dicẽdi rationem ad benevolentiam & caritatem civium conferet. At qui eos, à quibus sibi periculum aliquod ciuitas prospicit impendere, colit, & omni officiorum, obsequiorumque genere deuincire conatur, non eadem naui, atq; populus, vehitur: non eundem portum, quem populus petit: neq; igitur eandem spem salutis, & incolumitatis, quam populus, habet. Vides quàm longè alia mea sit ratio? Ego enim easdem vtilitates, atq; hi, mihi proposui: nihil mihi eximium, nihil præcipuum asciui, aut quæsiui. Tunc idẽ de te prædicare potes? quomodo? qui statim post pugnam legatus ad Philippum proficiscebaris: cuius in persona calamitatum, quæ temporibus illis patriæ nostræ acciderunt, causa consistebat: idq; cùm superiore omni tempore, hoc, vt omnes sciunt, munus recusasses, ac subterfugisses. Atqui, quis fucum facit? nõ qui aliud sentit, aliud loquitur? Cui verò præco malè precatur meritò, iurèque optimo? non tali homini? quod porrò crimen grauius oratori obijcere quisquam potest, quàm quòd non eadem loquatur, atque sentiat? Tu igitur talis repperus es. Et tu cum istis factis audes vocem mittere? Audes horum ora intueri? Vtrùm existimas hos nescire qui sis? an vsque adeò somnolentos atque obliuiosos esse censes, vt non meminerint, quæ tu inter contionandum, apud populum olim loquebare, cùm tibi exitium precabaris, cùm omni execratione caput tuum deuouebas,

cūm dicerabas nihil tibi rei esse cum Philippo : sed me hoc tibi falsum crimen inferre, priuatis inimicijs impulsū, odiōque incitatum? Allato autem de pugna nūtio, jis, quæ antè dixeras, neglectis, subitò amicitiam & hospitium tibi cū Philippo intercedere profitebaris ac præ te ferebas, mercede accepta hæc nomina transferens & commutans. Nam quæ'nam potest afferri æqua, aut iusta causa, propter quam AEschinæ Glaucothææ tympanistriæ filio, vel hospes, vel amicus, vel omnino notus esset Philippus? Equidē non video: sed ei tuas operas ideo locauisti, vt horum cōmoda labefactares. Et tamē cūm ita manifestō ab his proditor deprehensus tenearis, cūm in te ipsum post euenta rerum index extiteris, mihi maledicis, eaque obijcis, quorum culpam in quemuis potius, quā in me conferendam esse reperies. Multas sanē res, & magnas, & præclaras, me duce atque auctore, & gerēdas suscepit, & feliciter gessit nostra ciuitas: quarum eam non esse oblītā, hoc argumento est, quod cūm populus aliquē suffragijs creare vellet, qui orationem de laudibus mortuorū haberet: ijs ipsis diebus, quibus recens erat cladis acceptæ mēoria: non te creauit, quamuis delatus, ac nominatus esses, quamuis vocis magnitudine præstares: non Demadem, qui modō pacem fecerat, non Hegemonem, non quenquā denique alium vestrū, sed me. Et cūm tu in medium prodijsses, & vnā Pythocles, quo ore, dij immortales, quo aspectu, quo spiritu, qua immanitate? & cūm his ipsis criminibus, quibus nunc tu solus, vos tum communi studio me insimularētis, cūm eadem maledicta in me congererētis: tanto etiam cupidius me illi muneri suis suffragijs præfecit. cuius rei causam tametsi tibi minimē obscuram, ego tamen breuiter explicabo. Nouerat ille meam in se beneuolentiam, meūmque, quod in rebus agendis adhibebam, studium: nouerat idem scelus, improbitatem, atque iniustitiam vestram. Nam quæ bonis & optatis reip. temporibus iurati negabatis, hæc eadem vbi quid offenderat ciuitas

uitas, profitebamini. Eos igitur, qui in communibus omnium incommodis, & rebus aduersis arbitrabantur se suarum nefariarum cogitationum ac sententiarum licentiam, impunitatēque esse consecutos, re iandudum hosteis fuisse, tunc quidem denique seipsos aperuisse atque indicasse existimauit: simulque conuenire putauit, eum, qui de mortuorum laudibus dicturus, eorūque virtutem verbis ornaturus esset, neque contubernalem, neque foederatum ijs, qui aduersus illos instructa acie depugnasset, fuisse: neque cū illic vnā cum ijs, quorum manibus Græciæ propugnatores essent interfecti, ob Græcorum calamitatem intemperanter epulatus & commiscatus esset, laudesque deorum cecinisset, huc reuersum honore affici: neque inflexa voce, & fictis lacrymis, simulatōque dolore illorum fortunam deplorare, sed ex animo cum populo vniuerso verè dolere: quod quidem cū in se, tum in me esse videbat, in te verò minime. Neque porrò ita fecit populus: mortuorum autem parentes & fratres ad funus procurandum, exsequiasque cohonestandas à populo electi, secus: sed cū eos epulum dare oporteret, hoc ipsum tanquam apud eū, qui mortuos summa necessitudine attingeret, quemadmodū alia fieri solent, apud me fecerūt. Neq; iniuria. Genere enim singuli singulis erāt me propinquiore: cōmuniter autem vniuersis nemo certè fuit coniunctior. Nam, cuius intererat maximè illos benè rem gerere, & saluos esse: is posteaquā tristem illum casum subierūt, (quem vtinam effugissent,) doloris omnium interitu suscepti partem maximam tulit. Recita verò isti hoc epigramma, quod eis ciuitas inscribi voluit, vt ex hoc etiam intelligas, AEschinea, te calumniatorem importunum, & fascinatorem sceleratum esse. RECITA.

Pro patria hi tellure sua quondam arma tulere,

Protinus hostileis & repulere manus.

Dum inter se certant de Virtute, atque timore,

Proiecere animas, iudice morte, suas:

Ne Græci seruire iugum ceruice ferentes,

Regum se gement sceptra superba pati.

Patria sed gremio cæsorum amplectitur ossa:

Nam legem humanis hanc deus imposuit.

Nil peccare deûm est, neque falli in rebus agendis,

Sed fati legem non licet effugere. Audis, AEschinea,

etiam in hoc ipso epigrammate, nihil peccare, neque falli in rebus agendis, deorum esse potestatem rei bene gerendæ ab ijs, qui dimicant, ac decertant, non suasori, sed dijs immortalibus ascripsit. Quid igitur mihi, ò scelus, his de causis maledicis, eaque loqueris, quæ dij immortales in tuum caput conuertant? Ex multis igitur alijs, quæ mihi crimini dedit, & quæ in me mentitus est AEschines, vnũ summopere demiratus sum, quòd, cùm ea, quæ tum ciuitati nostræ acciderunt, memoria repeteret, non ea mente fuit, quam vir bonus, ac iustus, amansque patriæ ciuis præstitisset: non illa crymauit, non ingemuit, non vlllo tali dolore commotum animum habuit, sed cùm lætitia exsultans vocem contenderet, inflatòque & quàm maximè laxato gutture clamorem tolleret, putabat se videlicet, magnam mihi oratione sua inuidiam conflare: verùm suo ipsius indicio declarabat, se non similem, atque alij, ex rebus aduersis molestiam capere. Atquĩ is, qui sibi leges, & reip. curæ esse dicit, quemadmodum iste nunc, si nihil aliud, hoc certè habere debet, vt ijsdem rebus doleat, ac lætetur, quibus populus: neq; id reip. administrandæ consilium capiat, institutũque sequatur, propter quod se in aduersariorum præsidijs ac partibus collocasse videatur: quod tu nunc apertè fecisse videris, qui me omnium, quæ acciderunt, causam esse: qui ciuitatem, me suasore & impulsore, in has molestias incidisse criminaris, cùm vos Athenienses, neq; mea administrandæ reip. ratione adducti, neq; meum cõsilium, aut institutum secuti, sed vestra sponte Græcis auxilium ferre cœperitis. Nam si mihi hoc à vobis daretur, vos me suasore atque auctore toties ei dominationi restitisse,

quæ

quæ in Græcos comparabatur, maius mihi à vobis præmium, quàm quæ vniuersa ceteris olim dedistis, tribueretur. sed neque ego hæc vnquam de me prædicarim (vobis enim iniuriam facerem) neque vos, sat scio, si dicerem, concederetis: & si iste iustum se erga vos præbere vellet, nunquam inimicitijs, quas mecum gerit, impulsus, laudes omnium laudum vestrarum maximas, & ornamenta vestra omnium prima, eximia, ac præcipua, immi-
 nueret, detereret, maledictis calumnijsque vexaret. Sed quid ego hæc in eo de isto queror, cum alia multo atrociora, & propter quæ iustius meam vicem deplorare debeam, crimina, eaque falsa mihi intulerit? Nam qui mihi studium Philippi, ò terra, ò dij immortales, obijcit, quid hic dicere non audeat? Atqui per Herculem, reliquosque omnes deos immortales iuro, si falsis, confictisque criminationibus, & contumeliosis vocibus, quæ ab inimicitijs proficiuntur, de medio sublatis, spectare verè oporteat, qui sint ij re vera, quibus ea, quæ acciderunt, meritò, atque optimo iure omnes attribuere debeant: homines istius similes, non mei, in vnaquaque ciuitate huic culpæ affines fuisse reperientur: qui quo tempore res Philippi erant adhuc infirmæ, & admodum humiles, ac pusillæ, vobis sæpe prædicentibus, hortantibus, denique docentibus quid esset optimum factu, turpis sui questus gratia, vtilitatem Græcorum communem prodiderunt, cum suos ciueis singuli dolo circumuenirent, deciperent, corrumperet, eò usque quoad eos in seruitutem redegerunt, Thessalos Daochus, Cineas, Thrasylaudas: Arcadas Cercidas, Hieronymus, Eucalpidas: Argiuos Myrtis, Teladamas, Mnaseas: Elæos Euxitheus, Cleotimus, Aristechmus: Messenios Neo, & Thrasylochus, Philiadæ dijs iniqui, & impij hominis filij: Sicyonios Aristratas, Epichares: Corinthios Dinarchus, Demaratus: Megarenseis Præodorus, Elixus, Perilaus: Thebanos Timolaus, Theogiton, Anemæta: Eubæos Hipparchus, Clitarchus, Sosistratus: dies me deficiat, si velim omnia

proditorum nomina persequi. Hi omnes, quos dixi, Athenienses, iisdem sensibus ac voluntatibus præditi, iisdemque consilijs in suis patrijs vsi, quibus apud vos isti, scelerati homines, atque impuri adulescentes, Græciæ pestes ac furia, qui suas singuli patrias mutilarunt, libertatem suam antea Philippo, nunc Alexandro, auro accepto propinarunt, ventre, & abdomine, & obscenis voluptatibus vitam beatam metientes. Libertatem verò, & nulli domino parere, qui prioribus illis Græcis erant fines honorum, & regulæ, quibus suas actiones dirigebat, funditus euerterunt. Huius igitur tam turpis, & flagitiosæ, omniumque sermone celebratæ conspirationis, & improbitatis, immodè verò, Athenienses, (si nugis omisissis serio loqui volumus) proditæ Græcorum libertatis, cum ciuitas nostra apud omnes homines culpa vacat, quod quidem ad meam reip. administrandæ rationem attinet: tum ego apud vos omni iusta reprehensione careo. Et tu à me quaris, cuius virtutis ergò præmium postulem. Ego igitur tibi respondeo, quia cum omnes omnium Græcorum magistratus, & reip. gubernatores, quos quidem à te numerare potes, corrupti fuerint antea à Philippo, nunc ab Alexandro, me neque inclinatio temporum, neque verborum blanditiæ, neque promissorum magnitudo, neque spes, neque metus, neque gratia, neque aliud quippiam excitauit, neque impulit, neque induxit, ut quicquam eorum, quæ statuisssem vel ad ius, vel ad utilitatem patriæ pertinere, proderem: neque quæ vnquam his suasi, quemadmodum vos, ad lucrum, quasi in trutina, vergens ac propendens suasi: sed quæcunque à me gesta sunt, à recto, iusto, integro, incorrupto iudicio, animoque profecta sunt. & cum omnium mortalium, qui mea ætate vixerunt, maximis rebus præfuerim, has omnes salutariter, & iuste administraui: propter has causas præmium mihi deberi dico. Hos autem muros, has fossas, quibus vrbe cinxi ac muniui, quæ tu maledico dente appetebas, ac lacerabas, gratia quidem ac laude digna esse iudico. quid

niſed tamen hæc ipſa in meis rebus geſtis non numero. Non enim lapidibus, neque lateribus urbem muniui, neque ob has res maximos mihi ſpiritus ſumo: ſed ſi munitiones meas iuſtè & attentè conſiderare velis, arma, caſtella, portus, vrbeis, naueis, cōplureis equos, & qui pro his propugnarent, milites, reperies à me eſſe ciuitati comparatos. His ego propugnaculis Atticam ſepſi, atq; armaui, quāta maxima, humana ratio excogitare & conſequi potuit: his totius Atticæ ſineis vltimos, non Piræci, aut vrbis ambitum tantum communiui. Neque verò cōſilijs aut cogitatis Philippi viſtus ſum (longè aliter eſt) neque copijs, neque apparatu, ſed ſociorum noſtrorum duces, & copiæ fortuna fuerunt inferiores. Quibus argumentis hæc demonſtrare poſſum? illuſtribus, & luculentis: quæ, obſecro, ſic vobiſcum ipſi conſiderate. Quid beneuolum & amantem patriæ ciuem facere oportebat? quid eum, qui omni prouidentia, cura, ſtudio, ac iuſtitia in adminiſtranda rep. patriæ conſularet? non à mari Atticam Eubœa tegere ac munire? à mediterraneis regionibus, Bœotia? ab ijs locis, quæ ad Peloponneſum ſpectant, nationibus huic finitimis? non quemadmodum res frumentaria vſque ad Piræeum, mari vndique pacato, ſubueheretur, prouidere? & alia quidem iam antea quaſita & parta tueri & conſeruare, auxilijs mittendis, dicendo, decernēdo, Proconneſum, Cherroneſum, Tenedū? alia vt nobiſcum pacem & amicitiam confirmarent, nobiſcūque ſocietate coniungerentur, efficere, Byzantium, Abydus, Eubœa? & maximas hoſtium opes, ac vireis, maximæque robora ijs demere ac detrudere? quæ deeſſent noſtræ ciuitati, ea acquirere, atque adiungere? Hæc igitur omnia meis decretis, atque inſtitutis, quæ in rep. gubernanda tenui, perfectæ ſunt: quæ ſiquis, Athenienſes, ſincere, ac ſine inuidia ponderare, & conſiderare volet, rectè ac ſapienter à me eſſe cogitata, & ſumma cum fide ac iuſtitia adminiſtrata reperiet: nulli⁹ rei tempus à me neque prætermiſſum, neque ignoratum, neque

proditum, & quæcunque in vnius hominis potestatem, mentemque venire potuerunt, omnia à me esse summa diligentia, curaque præstita. Quòd si aut dei alicuius potentia, aut fortunæ vis, aut imperatorum vitium, aut eorum, qui vestras vrbeis prodiderunt, nequitia & improbitas, aut hæc simul omnia summam rem profligarunt ac labefactarunt, vsque cò donec funditus euerterût, quòdnam Demosthenis crimen est? At si qualis ego erâ apud vos, pro eo gradu ac loco, in quo fueram à vobis collocatus, talis vir vnus in vnaquaque Græcarum vrbiũ extitisset, immò verò si vnum solum Thessalia, vnum Arcadia habuisset, qui idem, quod ego, sentiret: nullus neque eorum Græcorum, qui sunt extra Thermopylas, neque eorum, qui sunt intra, his calamitatibus, in quibus nunc versatur, affectus esset, sed omnes essent liberi, suisque legibus vterentur, ab omni denique metu vacui, securi, otiosi, ac beati tutò suas ipsorum patrias incolerent, tantorumque ac talium bonorum gratiam, propter me, vobis & ceteris Atheniensibus haberent. Atque vt intelligatis facta verbis, quibus vtior, multo esse grandiora atque ampliora, ideò quòd inuidiam pertimescam: tolle hos libellos, & recita numerum auxiliorum, quæ me auctore, ac suasore, meis decretis ciuitati quæ sita sunt. Recita. *NUMERVS AUXILIORVM EX DEMOSTHENIS DECRETIS.* Hæc & talia, AEschinea, virum fortem & bonum ciuem agere oportet: quæ si benè ac feliciter cessissent, ô dii immortales: nobis haud dubie esse maximis ac potentissimis licuisset, idque sine cuiusquam iniuria: sed quando secus accidit, at certè hoc nobis reliquum est, quòd bene de nobis omnes homines existimât, quòd nemo neque ciuitatem nostram, neque eius institutum, consiliũque reprehendere potest, sed fortunam duntaxat vituperare, quæ talem rerum exitum esse voluerit. Hæc igitur bonus ciuis agere debet, non, cum à commodis & rationibus ciuitatis descuerit, seseque aduersarijs mercede locauerit, pretiòque fidem suam addixerit,

hostium potius, quàm patriæ temporibus operam nauare atque inferuire: neque cum, qui res ciuitate dignas tum dicere, tum decernere instituerit, atque ausus sit, & quod caput est, in his cōstanter permanserit, in inuidiam vocare, & calumnijs onerare: si priuam ab aliquo læsus sit, hoc meminisse, animoque penitus infixum tenere, neque otio ac silentio iniusto, infido, atque insidioso delectari: quod tu sæpenumerò facis. est enim, si nescitis, Athenienses, est aliquod otium iustum, & vtile ciuitati, quod vos plerique ciues sincere & simpliciter amplectimini. Sed non hoc iste otium adamauit: nihil minus. verum remouens se, vbi ei commodum fuerit, (sæpe autem commodum est) ab administratione reip. speculatur & obseruat, quo tempore aut vos alicuius oratoris assidue dicentis ceperit satietas, aut aliquid aduersi, fortuna refluente atque aduersante, acciderit, aut aliunde denique quippiam durius ac tristius euenerit: (multa autem huiusmodi fert vita) deinde hoc ipso tempore ex otio repente, tanquam ventus ac turbo cōortus, orator existit, & voce exercitata, magnoque nominum ac verborum aceruo congesto & collecto, hæc ipsa connectit & contextit, & articulatè, ac distinctè, vnoque spiritu pronuntiat: quæ neque vnquam prodesse, neque cuiusquam rei bonæ fructum cuiquam ferre, sed contrà calamitatem cuilibet ciui importare, turpitudinè ac dedecus inurere consueverunt. At qui commentationum ac studiorum tuorum, AEschinea, si quidè ab animo casto, integro, ac pio, & eo, qui vtilitatem patriæ sibi propositam habeat, nascerentur, fructus latos atque vberes, & generosos, & omnibus vtileis extare oportebat: ciuitatum societates, pecuniæ facultates, & vestigalia, mercatum structuras, legum salutarium rogationes, cum certis atque apertis patriæ hostibus susceptas inimicitias, & contentiones. hæc enim superioribus illis temporibus exquiri, spectarique solebant: & præteritum tempus viro forti, & bono, ciui suæ virtutis declarandæ ac probandæ sæpe facult

tatem dedit: quo in numero nusquam tu reperieris esse versatus: non primus, non secundus, non tertius, non quartus. quid tempus frustra contero? non quintum, non sextum, non millesimum locum in eis obtines. non, inquam. Nam si ita esset, tuis rebus gestis, tuaque opera opibus, copijs, honore, dignitate, ciuitas aucta esset: quod de te prædicare non potes. Quæ enim societas te auctore ciuitati comparata est? quod auxilium? quæ beneuolentiæ, gloriæ, uel possessio quæsitæ? quæ tua legatio, quæ procuratio, aut administratio abs te commemorari potest, propter quam ciuitatis gloria sit propagata? quæ res urbana, & domestica: quæ forensis, & externa, cui tu præfueris, tua opera correctæ, aut sanata est? quæ triremes, quæ tela, quæ naualia, quæ urbis munitio, qui muri, quis equitatus abs te quæsitus est? quam ad rem denique vsui es? quando vel locupleteis, vel tenuis, atque egenteis communi in ciueis studio & amore prouectus, pecunia inuisti? nunquam. Verum, dicet aliquis, si nihil eorum ab AEschine re præstitum est, at non deest ei studium, & beneuolentia, & animus in patriam munificus ac liberalis. Vbi? quando? qui, ô omnium mortalium iniustissime, ne tum quidem cum ij omnes, qui aliquando è loco superiore verba fecerunt, ad salutem publicam pecunias erogabant: & postremo Aristonicus pecuniam incolumitatis amissæ recuperandæ gratia coactam effundebat: ne tum quidem prodiisti, neque quicquam rogasti. non quod egeres: quid minus credibile? cui hereditas testamento Philonis soceri amplius quinque talentorum venit: qui duo talenta habebas tibi à decuriarum magistris dono data, eò quod legē de triremium præfecturis abrogaras ac sustuleras. Verum ne, dum mihi noua ex superiore semper nascitur oratio, ab instituto sermone longius degrediar, hæc missa faciam. sed ex his certè perspicuum est, non tibi rei nummariæ difficultatem, aut rei familiaris inopiam, quominus liberalitatem in remp. cōferres, impedimento fuisse: sed quod tuum illud institutum

tū tenere ac seruare fuderes, ne quid abs te fieret, quod ijs obesset, quorum arbitratu temp. administras. Quibus igitur in rebus acer & fortis es? quando magnificus ac splendidus es? ubi in hos aliquid dicere oportet, hīc tu clarissimè vociferaris, hīc magnopere vocem contendis, hīc acerrima memoria præditus es, hīc actor es optimus tragicus, & germanus Theoclines. Et verò etiam hoc loco de præstantibus in rep. viris, qui olim fuerunt, mentionem facis: & rectè facis, neque reprehendo. Verumtamen iniquum est, Athenienses, AEschinem sibi assumpta, atque in se deriuata ea, quam in mortuos habetis, beneuolentia, me, qui vobiscum viuo, cum illis componere & comparare. Quis enim omnium mortaliū nescit, viuos omneis inuidia fere aliqua laborare, alios maiore, alios minore? in mortuos autem, ne eorum quidem, qui inimici fuerunt, vllum odium remanere? Cū hæc igitur ita sint comparata natura, cum ijs, qui ante me vixerunt, spectabor & comparabor? Minime. Nam neque iustum, neque æquum est, AEschine, sed tecum & cum alio, quem voles, eorum, qui eadem, atq; tu, reip. administrandæ consilia ceperunt, idēque vitæ genus secuti sunt. Iam mihi illud quoque vide & considera, vtrū honestius ac melius sit ciuitati, propter antiquorum beneficia, quæ sunt ingentia atq; immensa: (nemo enim consequi dicendo possit, quanta sint) eorum, quæ hac ætate in patriam conferuntur, nullam gratiam referre, eaque cōtumeliosè vexare, ac vituperare, an ijs omnibus, quorum beneuolentia in rebus agendis claruerit, honorem, & humanitatis fructum populum Atheniensem imperitare. Atqui, Athenienses, si mihi hoc quoque dicendum est, mea reip. administrandæ ratio, meum consilium, atq; institutum (si quis diligenter & rectè attenderit) illorum, qui tum laudabantur, rationibus, ac voluntatibus simillimum esse, idēque spectare reperietur: tuū autem, eorum, qui tunc taleis viros calumniabantur, amentia maximè geminum. Perspicuum est enim nonnullos fuisse

etiã temporibus illis, qui cùm suæ ætatis homines male-
dictis insequeretur, & vituperarent, veteres laudabant:
rem malcuolentię, & liuoris, & calumnię plenam, & ean-
dem, quam tu facis, facientes. Et tamen audes dicere, me
nulla ex parte illorum esse similem. At tu similis es, A E-
schina? at frater tuus? at aliquis ex ijs, qui nunc sunt, ora-
toribus? Ego enim prorsus nego esse quenquam. verùm
cum ijs, qui viuunt, & meis æqualib⁹, ô vir bone, vt nihil
aliud grauius dicam, me viuentem compara, quemad-
modum & alia omnia, poëtæ, chori, palæstritæ conferri
inter se consueuerunt. Philammo non quia Glauco Ca-
rystio, & nonnullis alijs athletis, qui antea fuerunt, erat
inferior, atque infirmior, idcirco ex Olympico certami-
ne sine præmio, coronâq; discessit: sed quia eorum, qui
certamen cum ipso inierant, optimè pugnauerat, & coro-
na donabatur, & voce præconis victor pronuntiabatur.
Tu quoque me cum his, qui nunc sunt, oratoribus com-
pone, & specta, tecum, & cum quo alio voles ex omni-
bus. Nulli cedo: quorum omnium cùm quod ciuitati ma-
ximè expediret, deligere ac sumere licebat, cùmque om-
nibus in medio positum certamen erat, quis beneuolen-
tia erga patriam ceteris præstare videretur: ego opinio-
ne ac iudicio totius populi res optimas dicebam, ac de-
cernebam: meis decretis, meis legibus, meis legationi-
bus omnia agebantur, & transigebantur: nemo vestrũ
vsquam comparebat, nisi si fortè his insultare, atque ob-
trectare oporteret. sed posteaquàm ea euenerunt, quæ
vtinam prohibuissent atque auertissent dii immortales,
& cùm iam non suasores, sed homines, qui imperata fa-
cerent, ac seruirent, homines contra patriam mercedem
accipere parati, homines assentâdi studio dediti, quære-
bantur: tum tu, & istorum tui similium vnusquisque suo
loco atque ordine magni, & splendidi, & magnifici diui-
tiarum ostentatores volitabatis. Ego verò tenuis, atque
infirmus eram, fateor. At certè beneuolentia erga popu-
lum vobis superior. Hæc autem duo ciuem moderatum

ac temperatum natura habere oportet: (sic enim maximè mihi de memetipso dicere posse sine inuidia videor) in potestate & imperio, voluntatem & consilium animi magnitudinis, & primi gradus in Græcia ciuitati tueri & conseruare: in omni tempore, omni que actione beneuolentiam erga ciueis retinere. In hac enim, natura: in potentia autem, opibus, & viribus fortuna dominatur. Hæc igitur, quam dico, beneuolentiam apud me perpetuò mansisse reperietis. Cui rei hoc erit testimonio, quòd neque cùm ad supplicium deposcebar, neque cùm in iudicia Amphictyonica vocabar, neque cùm hostes minis me terrebant, neque cùm promissis inuitabant, neque cùm sceleratos istos in me tanquam feras immaneis immittebāt, meam erga vos beneuolentiam vlllo modo deserui. Nam statim ab initio hanc iustam ac rectam reip. gerendæ rationem, ac viam secutus sum, vt honoribus, potentiæ, gloriæ ciuitatis seruirem, hæc augerem, cùm his starem, pro his propugnarem. Neque verò aliorum rebus secūdis elatus, hilarus, atque alacer in foro inambulo, dexteram tendens, & istis læta nuntians, quos illuc perluros sperem: secundis aliquibus rebus ciuitatis auditis cohorresco, ingemisco, tristis capite demisso terram intueor, quemadmodum impij isti, qui ciuitati nostræ obtreçant, quasi verò non sibi ipsi, cùm hoc faciunt, obtreçant: deinde foras spectant, aliòque respectum habent: & vbi Græcis fortuna duriore conflictatis, aliquis alter fortunæ benignitatem expertus, rem suam bene gessit, hæc collaudāt, bene factum exclamant, & vt propria ac perpetua sit hæc felicitas, aiunt operā dare oportere. Nolite vos, obsecro, ò dij omnes immortales, nolite hæc numine, nutūque vestro comprobare: sed potius maximè quidem istis meliorem mentem date: sin autem eorum insanibilis amentia est, istos quidem ipsos separatim terra, marique funditus, & immatura morte deletere ac perditte: nobis verò reliquis ciuibus, & in præsens tempus impendentium ceruicibus nostris terrorum, ac pe-

culorum celerrimam liberationem: & in posterum, secundum vitæ sine vlla offensione cursum, stabilémque salutem date.



DION. LAMBINI IN IMAGVNCVLAM ARISTOTELIS ARGENTEAM,
quæ eadem Michaelis Hospitalis Galliæ
cancellarij effigies videtur.



Hæc *Æcine* Aristotelis magni, clarique figura
Illius est, cui serenum natura creatrix
Nuda it totum; talos à vertice ad imos?
Principia, & causas rerum qui præ omnibus vnus
Perspexiſſe, & perspektas miro ordine princeps
Tradidit, & docta ratione, & tramite prono?
Qui ingenia, & mores hominum, affectusque animorum
Cognovit varios, formam; & naturam animantium
Cunctarum penitus vidit, vniſumque, genusque?
Qui quibus agrestes populi, gentesque feroces
Legibus & iussis, quo iure, & more regantur,
Et quibus ætatem tranquillam degere possint:
Rursum quæ tristem importent mala ciuibus agris.
Interitum potuit Graijs exponere chartis?
Est'ne ergo illius hæc argento impressa figura?
Atquæ cum frontem, atque oculos, narciſque, caputque
Temporaque, & mentum aspicio, colloſtroque totam
Luminibus formam, liquiſſe Acherunta videtur
Magnus Aristoteles, tenebrisque in luminis oras

Emerſiſſe

Emeruisse, iterum exortus, nobisque renatus.
 Namque ego in hac parua effigie te agnosco, Michaël,
 Te venerande senex, cognomen ab hospite ducis
 Qui gentile tuum: cerno, inquam, in imagine prisca
 Te nouum Aristotelem: tu illum omniparentis alumnus
 Natura eximium non solum fronte, genisque,
 Et naso: sed, quod magis est mirabile habendum,
 Mente, animoque refers, & moribus, ingenioque:
 Hoc mihi tu tantum differre videris ab illo:
 Ille quibus populi iussis, & legibus auum
 Degere tranquillum, ac tutum, optataque potiri
 Pace queant: quibus edictis sua regna, quibusque
 Consilijs reges regere, aurigaréque possint,
 Prescripsit: tu docte senex, tu regna ruine
 Proxima consilio fulcis. Cum Gallia nuper
 Sanguinearum irarum aestu concessa labaret:
 Sanguine ciuili cum vrbes, campique natarent:
 Passim cum Germanus atrox, seuusque Britannus:
 Et, qui plus aestu, quam robore, pollet Iberus,
 Prædabundus, ouans, per pinguia Gallica rura,
 Per latas segetes spolijs volitaret onustus:
 Cum ruerent vrbes latè, cum mœnia, & arces
 Tormentis validis magno labefacta fragore
 Conciderent: cum rex genus alto à sanguine regum
 Pestifera (impavidus licet, & formidinis expertus)
 Sed tamen horreret magnus puer arma suorum:
 Cum regis vocem ciuili imbuta cruore
 Spicula iactantes manibus se audire negarent
 Præcipites rabie ciues, trepidique fiore:
 Tu venerande senex sapienti pectore, & alta
 Mente, & consilijs rectis, linguaque disertâ,
 Et suada, & doctis dictis respersa cruore
 Arma extorsisti populo irato, atque furenti:
 Tu tantos hominum motus, tamque horrida bella
 Ciuibus armatis alijs componere inermis
 Scinisti tandem, & tantos sedare tumultus.



